

New Testament

Ngombe Language

Ngombe - Bible - New Testament

Matayo	3
Malako	70
Luka	112
Yoane	183
Bikomeli	236
Baloma	301
1 Bakolinto	329
2 Bakolinto	356
Bagalata	373
Baepeso	383
Bafilipoi	393
Bakolosai	400
1 Batosalonike	407
2 Batosalonike	413
1 Timoteo	417
2 Timoteo	425
Tito	431
Pilemona	434
Baebele	436
Yakobo	456
1 Petelo	463
1 Petelo	470
1 Yoane	475
2 Yoane	482
3 Yoane	483
Yuda	484
Boboloja	486

Ngombe - Bible - New Testament

Matayo

Matayo 1

Batata baYesu Masiya

¹Mokanda mobatata baYesu Masiya, mwana oDawidi, mwana oAbalayama.

²Abalayama abota Isaka. Isaka abota Yakobo. Yakobo abota Yuda na bananango.

³Yuda abota na Tamala; abota Pelesé na Jala. Pelesé abota Eseloma. Eseloma abota Alama.

⁴Alama abota Aminadaba. Aminadaba abota Nasona.

⁵Nasona abota Salamo. Salamo abotana Laba; abota Boasa, Boasa abota na Luta; abota Obede. Obede abota Yisai.

⁶Yisai abota Dawidi, kumu.

⁷Dawidi abota na mwali oUlia; abota Solomo. Solomo abota Leoboama. Leoboama abota Abia. Abia abota Asa.

⁸Asa abota Yosapata. Yosapata abota Yolama. Yolama abota Osia.

⁹Osia abota Yotama. Yotama abota Aka. Aka abota Hesekia,

¹⁰Hesekia abota Manase. Manase abota Amona. Amona abota Josia.

¹¹Josia abota Yekonia na bananango a ehole ekē bo masungu a Babilo.

¹²Ama bo kē masungu a Babilo, Yekonia ami bota oko Salatiele. Salatiele abota Selubabela.

¹³Selubabela abota Abiuda. Abiuda abota Eliakima. Eliakima abota Asola.

¹⁴Asola abota Sadoka. Sadoka abota Akimi. Akimi abota Eliuda.

¹⁵Eliuda abota Matana. Matana abota Yakobo.

¹⁶Yakobo abota Yosepa muma 'Malia, na Yesu yona odi na kombe Masiya abotama na nde.

¹⁷Oko boa, bilulu bisusu a sibano eAbalayama na Dawidi bidi bilulu domi-nabinei. Bilulu bisusu a sibano eDawidi na ehole ekē bo masungu a Babilo, bidi

bilulu domi-na-binei. Na bilulu bisusu a sibano eehole eke bo masungu a Babilo, oko ai Masiya, bidi bilulu domi-na-binei.

Bobotama boYesu Masiya

¹⁸Bobotama boYesu Masiya boda a njea ye. Yesu apanda Malia nange eYesu, lyo ko aboloa na demi dimolwaja Mwembo Mosenke, oko bapetakini da momi na mwali.

¹⁹Yosepa, muma'nde, adaka moto oyongi, na aipala bo amokejae sɔni a miso mabato. Akana bo asiejae mojɔ monde na bowi.

²⁰Yana alekε yo boa, obwεnji oKumu adoa ai yo a njɔti, na abala bo, Wε Yosepa mwana 'Dawidi, pε bobanga boso mwali owe Malia, mojɔ bo demi dilwai yo lidi mojɔ moMwembo Mosenke.

²¹Iyo adi bobota mwana-momi, na odi bomobakea kombe Yesu, mojɔ bo âheleja bato bande a jibe jibu.

²²Mojɔ mu mosusu modaka boa a bongameja ekenge ema bala Kumu na motɔndɔi bo,

²³Ikani; moseka yona ojebeanakini na momi âlwa demi. Âbota mwana-momi, na bâmobakea kombe Imanuele. Cina ekombe emina edi—Njambe adi na su.

²⁴Yana asisoa Yosepa, akɔ o ama bala obwεnji na nde. Asɔ mwali onde bo adae na nde.

²⁵Iyo ko aijeweana na nde oko adaka yo pε bopeta bota mwana'nde, na amobakea kombe Yesu.

Matayo 2

Bato Babowεi

¹Yana abotama Yesu a Bεtεlεmε a likota liYuda, a ehole ekumu Elode, bato babowεi badonga a esεta, na bamea a Yelusalema.

²Bahɔjɔ bo, Yona obotami kumu oBaYuda adi jɔ? Iso bone monjɔtɔ onde a dɔngɔ diesεta, na bodoi bo bomosakoe.

³Kumu Elode, ama yo ka mojɔ momina, ami ko da oko na mokakwano, na bato basusu ba Yelusalema pongono.

⁴A mojɔ momina, yo abolea likita libasuku banganga na basɔni bangando, na abahɔjɔ esika ebobotama boMasiya.

⁵Ibo babala na nde bo, A Bεtεlεmε, ngando eYuda; mojɔ bo motɔndɔi asɔnɔ boa bo,

⁶Wε Bεtεlεmε a likota liYuda; Odit i ngɔngɔ jibakumu basusu baYuda; Mojɔ bo okina kumu adi bomana ai we, Yona ôda mobanei obato bambi baYisalaele.

⁷Elode abea bato babowei na poloso, na abakokeleja a mojɔ moehole emana monjɔtɔ.

⁸Abaloma a Bεtεlεmε, na abala na bu bo, Kεni aduke mwana omina na bingi. Okamobolojani, doani a bojebeja mbi, bo mbi nakεe namosakoe pongono.

⁹Aka bo ekenge yena ekumu, bake oko a njea ebu. Monjɔtɔ mone bo a esεta akεke boso bobu, na ama a diko diesika edaka mwana.

¹⁰Basepa bou mεnε yana anε bo monjɔtɔ.

¹¹Akwea bo a ndako, banε mwana na ngwa'nde Malia; na basumana na banmosakoa. Baloloja leka lobu, na bamopa bipeeli biwɔlɔ, na malasi, na mila.

¹²Njambe ko abajebeja a njɔti bo bata-sɔmbɔ ai Elode; na bayana a ngando ebu a njea etongo.

Bocia a Ejipito

¹³Ama bo yana, okina obwεnji oKumu ami doa oko ai Yosepa a njɔti. Abala na nde bo, Angɔ; tomba mwana na ngwa'nde, cia na bu oho Ejipito. Yeyoa oho oko a ehole êbala mbi na wε, mojɔ bo Elode akεke aduke mwana bo amowoe.

¹⁴Yosepa angɔ, atomba mwana na ngwa'nde na bulu; akε a Ejipito

¹⁵na ayeyoa oho oko a bogwa boElode, a bongameja ekenge ema bala Kumu na motɔndɔi bo, Mbi nabei mwana'mbi bo ahule Ejipito.

¹⁶Elode ko, yana anε yo bo bato babowei bamokosea, aka kεlε enεnε. Adumba mobeko bo bawoe bana-bami basusu bay a badaka na bianga bibae na dea, a ngando eBεtεlεmε na a likota dia lisusu. Iyo ahieja ehole, cina bo ama kokeleja mojɔ na bato babowei.

¹⁷Oko boa ekenge esɔnɔ motɔndɔi Yelemaya engama bo,

¹⁸Ba'ka hulɔ a Lama, Bio na kɔndɔ enεnε. Lakεlε ayeaka bana bande. Molema monde motagɔmbɔ, Mojɔ bo bana bande baditi koko.

¹⁹Yana agwa Elode, obwεnji oKumu adoa ai Yosepa a njɔti oho Ejipito.

²⁰Abala na nde bo, Angɔ; tomba mwana na ngwa'nde, sɔmbɔ na bu a ngondo eYisalaele, mojɔ bo bay a baduka mwana bo bamowoe bagwi.

²¹Oko boa yo angɔ, atomba mwana na ngwa'nde, na asɔmbɔ na bu a ngondo eYisalaele.

²²Yanako aka yo bo Alukelao asangoa bokumu boYuda a esika esangwa 'nde Elode, adaka na bɔ a bokε oho. Na Njambe amojebeja a njɔti bo akεe a likota liGalile.

²³Akε oho, na ada a ekina ngando yena edi na kombe Nasaleta. Oko boa mojɔ mobala batɔndɔi mongama bo, Bâmobea moto oNasaleta.

Matayo 3

Yoane Mobatisi

¹Yoane Mobatisi adoa a masu mamina, na atɔndɔ mwako moNjambe a lisobe liYuda.

²Abala bo, Hekojani milema minu, mojɔ bo Bokumu boDiko boba'i mea,

³Motɔndɔi Yisaya abala a mojɔ moYoane yana abala yo bo, Kɔpi emoto yona obetoaka a lisobe bo, Selingoani mokɛngɛ moKumu; Tangbojani njea jinde.

⁴Yoane adaka na bisenja bingungi jikamela; adaka na ekpoka eyobo etito a bongo bonde; dia linde lidaka oko bapaala na pɔki eesika.

⁵Bato baYelusalema na Yuda, na bato badɔngɔ disusu diYoladene bakε ai yo.

⁶Bajima jibe jibu, na yo ababatisa a dua yena edi na kombe Voladene.

⁷Yana anε yo BaPalusi na BaSadoki banεnε bakadoe ai yo bo ababatise, abala na bu bo, Ino bana banjɔ! Oehi no nda bo ocieni likundu lia likeke adoe?

⁸Isa ohekojaini milema, anejani bimbete bia bibwani,

⁹T'oleeni oko bo, Abalayama adi tata osu, Mbi natɔndɔkɔ no bo Njambe akapala, abwani bongɔjɔ bana ai Abalayama oko na matai ma.

¹⁰Epondø esambi edεye a cina jimele. Mele mimiti bota mbuma jipele, mîkwεlεmε misusu, na mîdumbama a mosa.

¹¹Mbi nabatisaka no a madiba cina ebohekoja bomilema; yo ko yona okεke adoe ngɔngɔ jimbi anɔi mbi na ngulu. Mbi nabɔngiti bo natombe sapata jinde. Iyo âbatisa no a Mwembo Mosenɔke na a mosa.

¹²Adi na ehεhei a ebb ende, âpueja moboku monde, na âbolea ndongo jinde a edejai. Âtumba ko poso a mosa, na mosa momina motadimea nongo.

Bobatisa boYesu

¹³Yesu adonga a Galile, na adoa a Yoladene bo Yoane amobatise.

¹⁴Yoane ko amosia; abala bo, Wε odoi ai mbi? mbi yona obwani bobatisama na wε.

¹⁵Yesu ko amosɔmbeja bo, Ye modae boa edεye; mojɔ bo bobwani bosuma ngando jesusu jibodongo boa. Oko boa Yoane ajima.

¹⁶Yana abatisama Yesu, aduboa bokpa a madiba. A ehole emina, Diko didipoama oko bodipoaraa; anε Mwembo moNjambe mokatite o sungu na mokabakame ai yo.

¹⁷Na kɔpi emana oho Diko bo, Iyo adi Mwana'mbi ongenjɔ. Nadi na sepi a mojɔ monde.

Matayo 4

Bomeka boYesu

¹A ehole emina Mwembo molinda Yesu a lisobe bo Satana amomeke.

²Akia dia masu domi-inεi, na yana asia ehole emina, aka nja.

³Momeki adoa ai yo na abala bo, Isa wε odi Mwana 'Njambe, bala na matai mama bo mabongoe milεmbε.

⁴Yesu amosɔmbeja bo, Mosɔnɔmɔ bo, Moto atahela na milεmbε pε, Oko na bikenge bisusu bia bimanaka a monɔkɔ moNjambe.

⁵Ngɔngɔ jimina, Satana ake na nde a ngando yena esεnɔke. Amobakea a diko ditempelo, na abala na nde bo, Isa wε odi Mwana 'Njambe, sadumba nase. Mojɔ bo, mosɔnɔmɔ bo,

⁶Adi bopa babwεnji bande monɔkɔ a mojɔ mowε, Na bâbanda wε na mɔmɔ mabu, Bo ebota ewε esaka lakimea a litai.

⁷Yesu abala na nde bo, Mosɔnɔmɔ pongono bo, T'odingee oko Kumu Njambe owe.

⁸Satana ake na nde koko a diko dimono monεnε, na amoneja makumu masusu mangondo, na ekumu emakumu mamina.

⁹Abala na nde bo, Mbi nadi bopa we makumu ma masusu, okasumana a bosakoa mbi.

¹⁰Yesu abala na nde bo, Satana, donga ya; mojɔ bo mosɔnɔmɔ bo, Toma sakoa Kumu Njambe owe; Toma kɔme oko yo pε.

¹¹Satana amokina boa, na babwεnji baDiko badoa ai Yesu bo bamokɔmejae.

Yesu ake a Galile

¹²Yana aka Yesu bo bapea Yoane, asɔmbɔ a Galile.

¹³Adonga a Nasaleta, na adoa a Kapalanauma bo adae ena a dɔngɔ dimadiba, a likota liSebulona na Nepatali,

¹⁴bo angamejae ekenge ebala motɔndɔi Yisaya bo,

¹⁵Bato baSebulona na Nepatali, A njea emadiba-mamukwa, na a dɔngɔ ditongo diYoladene, Na BaGalile baMidoa;

¹⁶Bato baya badaka modidi Bani bohu bonεnε. Na busa bohoi Ai bato baya badaka a esika ebogwa na a esie ebogwa.

Yesu abanga Elomu

¹⁷Yesu abanga bokoja a ehole emina, na atɔndɔ bato bo, Hekojani milema minu, mojɔ bo Bokumu boDiko bobengi bomea.

¹⁸Adaka yo akadale a dɔngɔ dimbongu elibale liGalile, anε bami babae, moto na mwananango, oko Simona yona odaka na kombe Pεtεlo, na mwangwa'nde Andalea, Ibo badaka bakadumbe eyoma ebu a madiba, mojɔ bo badaka badukeli baswi.

¹⁹Yesu abala na bu bo, Cingamani na mbi, na mbi nâkɔ no badukeli babato.

²⁰Ibo bakina biyoma bibu bokpa, na bacingama na nde.

²¹Anɔ yo esikaemina, anε bami batongo babae, moto na mwananango, Yakobo mwana 'Sebede na mwangwa'nde Yoane. Badaka na sangwa'bu a bwato, na batataka biyoma bibu.

²²Yesu ababea, na bakina bwato na sangwa'bu bokpa, na bacingama na nde.

Yesu aheleja Bato a Bego

²³Yesu ake akadale a likota lisusu liGalile, Akoja bato a sinagoge; atɔndɔ Mwako Mopele moBokumu, na aheleja bato a bego na bipeko tungu jesusu.

²⁴Gala ende epele etunda a makota masusu maSilia; badoa ai yo na bato basusu baya badaka na bego, na baya badingoaka na bipeko na saya a mikuku, bato bamiembo mibe, bato balilale, na bato bamikutumeli, na abaheleja.

²⁵Bato bacingama na nde kanga mandundu mεnε, bato baGalile, na Dekapoli, na Yelusalema, na Yuda, na dɔngɔ ditongo diYoladene.

Matayo 5

Bokoja boYesu a Mono

¹Yana anε Yesu bimumu bibato, awea a mokina mono. Adaka yo oho, bacingami bande badoa ai yo.

²Iyo adipoa monɔkɔ na abakoja na bikenge bi.

³Bojongoa ai bato baya basatitejaka a milema, mojɔ bo Bokumu boDiko bodi oko ai bo.

- ⁴Bojongoa ai bato baya bayeaka edeye, mojɔ bo bâgɔmbɔ.
- ⁵Bojongoa ai bato baya badi na milema miyεmbu, mojɔ bo bâsangoa ngondo.
- ⁶Bojongoa ai bato baya badi na nja na posa ebodongo, mojɔ bo bâgola.
- ⁷Bojongoa ai bato bamonganji, mojɔ bo bâsɔ monganji.
- ⁸Bojongoa ai bato baya badi na milema misεnɔke, mojɔ bo bâne Njambe.
- ⁹Bojongoa ai bato bamasiili, mojɔ bo bâbeama bana baNjarabe.
- ¹⁰Bojongoa ai bato baya badingoaka a mojɔ mobodongo, mojɔ bo Bokumu boDiko bodi oko ai bo.
- ¹¹Bojongoa ai no, bakalolea no, bakadingoja no, na bakalongɔ no na bibaeli bibe bibokosea a mojɔ mombi.
- ¹²Sepani, dani na enanga, mojɔ bo ndese enu edi enεnε oho Diko. Badingoja batɔndɔi baehèle koko boa.
- ¹³Ino odini mukwa mongondo. Mukwa ko mokabeha, modi bobɔngɔ koko na ye? Mobwaniti nongo na ekina elomu. Mobwani oko na bodumba pε, bo bato bamodalakake na bibota.
- ¹⁴Ino odini bohu bongondo. Ngando yena edi a diko dimono etabombama nongo.
- ¹⁵Bato te bayojake paka bo baebombe cina jiteni. Baebakeaka a mesa bo bato basusu baya badi a ndako badi bone bohu.
- ¹⁶Oko boa, kinani eyoi enu eyoe a boso bobato. Baka'ne bikɔmeli binu bipele, badi bokumeja Sangwa'nu yona odi oho Diko.
- ¹⁷T'oleeni oko bo mbi nadoi bo nadimojae Mibeko na mikanda mibatɔndɔi. Nadoiti bo namidimojae; nadoi oko bo namingamejae.
- ¹⁸Mbi natɔndɔkɔ no bo, Nongo busa bokagwa, na ngondo ekagwa, pεpε nongo litɔnɔ limɔci isa mosɔnɔ momɔci mo. Mibeko modi bokputoa; midi bongama kanga misusu mεnε.
- ¹⁹A mojɔ momina, moto akambεjε mokina mobeko, nongo mobeko mokekεlεkε mεnε, na akakoja bato boa, moto omina adi boda moto osuka mεnε a Bokumu boDiko. Moto na moto ko yona okojaka bato bo bamisume, na amisumaka yo mεnε, yo adi boda na ekumu enεnε a Bokumu boDiko.
- ²⁰Mojɔ bo, mbi natɔndɔkɔ no bo, Bodongo bonu bomiti nɔ bodongo bobasɔni na BaPalusi, otakweani nongo a Bokumu boDiko.

Mojɔ moBowa

²¹Ino o'kani bo batata basɔ mobeko bo, T'owoe oko moto. na bo, Moto akawa adi bosamba.

²²Mbi ko natɔndɔkɔ no bo, Moto akakɛnɔ na mwangwa'nde abwani bosamba. Moto akatangola mwangwa'nde abwani bosamba a likita libasuku. Na moto akalolea mwangwa'nde bo, Wε egegele; abwani oko na mosa moGehena.

²³Oko boa, okadoa a litumbu, na okasalejε bo mwangwao adi na wε mokina mojɔ,

²⁴kina epeeli ewε a boso bohtumbu; peta kε a bosieja mojɔ na mwangwao, osa ko ohule a bopa epeeli ewε.

²⁵Sieja mojɔ na soki ewε, nongo yana adi no a njea eesambi. Omiti kɔ boa, soki ewe adi bopa wε a mɔmɔ majuji, na juji adi bopa we a mɔmɔ mapolisi, na ôkwea a blɔkɔ.

²⁶Mbi natɔndɔkɔ wε na soti bo, Omiti pa likonja kanga lisusu menε, otamana nongo.

Mojɔ moBɔɔli

²⁷Ojebakani mobeko bo, T'ongεe oko bɔɔli.

²⁸Mbi ko natɔndɔkɔ no bo, Moto akanja mwali na posa, asi angi na nde bɔɔli a molema monde.

²⁹Diso diwε diebɔ ebami dikasakeja wε, ihwa na dumba diso dimina. Enɔi na bopele bo enama ewε emɔci egwε, bo mokuku mowε mosusu motadumbama a Gehena.

³⁰Ebo ewε ebami ekasakeja wε, lena na dumba ebo emina. Enɔi na bopele bo enama ewε emɔci egwε, bo mokuku mowε mosusu motadumbama a Gehena.

³¹Babala koko bo, Moto akalona mwali onde, adi bomopa mokanda mobobɔtɔnɔ.

³²Mbi ko natɔndɔkɔ no bo, Moto na moto yona oyanejaka mwali onde, na editi na cina ebɔɔli, akɔkɔ mwali omina moto obɔɔli. Na moto yona osɔkɔ mwali omina angεke na nde bɔɔli.

Mojɔ moBεli

³³Ino o'kani koko bo batata basɔ mobeko bo, T'obεle oko bεli na bokosea. Kɔ mojɔ mobεli we ai Njambe.

³⁴Mbi ko natɔndɔkɔ no bo otabeleni nongo bεli, isa eDiko, mojɔ bo didi mongbelengɔ moNjambe;

³⁵isa bəli engondo, mojɔ bo edi ebakei ebibota biNjambe; isa bəli eYelusalema, mojɔ bo edi ngando ekumu monene.

³⁶T'obəle oko bəli emolo mowε, mojɔ bo oditi na ngulu a bopueja isa a bohindeja moswe momɔci.

³⁷Kinani ebaeli enu edae isa Ee, ee! isa Pεpε, pεpε! Ekina ebaeli etongo edi oko ebe.

Mojɔ moLikundu

³⁸Ino o'kani bo babala bo, Diso dibukana na diso; dino dībukana na dino.

³⁹Mbi ko natɔndɔkɔ no bo otaswianani na moto mobe. Moto aka'la wε epapata a mobanga momɔci, moneja mobanga motongo pongono.

⁴⁰Moto akabea we a esambi a mojɔ mosimisi ewε, kina atombe kasaka ewε pongono.

⁴¹Moto akapea wε bo omopakae kilometra emɔci, mopaka kilometra jibae.

⁴²Moto aka'nga wε eka, mopa; t'obulεe oko moto yona opalaka boboa njabo ai wε.

Mojɔ moEpaeli

⁴³Ino 'kani bo babala bo, Toma pala motuteano mowe, na toma lona soki ewε.

⁴⁴Mbi ko natɔndɔkɔ no bo, Toma palani soki jinu. Toma'ngɔɔnoni Njambe a mojɔ mobato baya banɔngejaka no.

⁴⁵Oko boa ôdani bana baSangwa'nu yona odi oho Diko. Mojɔ bo yo ahojaka busa ai bato babe na bato bapele. Alomaka mbua a mojɔ mobato bapele na bato babe pongono.

⁴⁶Isa opalakani oko bato baya bapalaka no, obwanitini bosɔ ndese a mojɔ momina. Baputeja batako baditi koko na ekɔmeli emina pongono?

⁴⁷Okabεjεni oko bina'nu pε, bato batongo baditi koko na ekɔmeli emina? Nongo bapakano bakɔkɔ boa pongono.

⁴⁸Ino ko, toma dani babɔngɔke mεnε, mojɔ bo Sangwa'nu yona odi a Diko adi kanga mobɔngɔke mεnε.

Matayo 6

Mojɔ moBodongo

¹Toma nganjamani bo otakɔni bilomu binu bibodongo a boso bobato bo banε no. Okakɔni boa, otasɔni nongo ndese ai Sangwa'nu yona odi a Diko.

²Oko boa, wε okakɔ monganji ai bato batongo, pε bohueja mo-ndule a boso bowε. Bato babokosea bakɔkɔ boa a sinagoge, na a licilinga, bo bato babakumejae. Mbi natɔndɔkɔ no na soti mεnε bo bato bamina ba'si ndese yena ebwani na bu.

³Wε ko, okakɔ monganji, t'okane oko bo ebo ewε ebali ejewe mojɔ mokɔkɔ ebo ewε ebami.

⁴Kɔ bato monganji oko a libombi; na Sangwao yona onekε a libombi âda na likabo ai wε.

Bokoja a mojɔ moBo'nga

⁵Oka'ngani Njambe, t'odaeni oko na ekɔmeli ebakosei. Ibo bapalaka bo bangɔe a sinagoge, na bo bamae a licilinga a mojɔ mobo'nga, bo bato babanεe.

⁶Wε ko, oka'ngā Njambe, kwea a tei endako ewε, dipa modipe mowε, na inga Njambe a libombi. Sangwao yona onekε a libombi âda na likabo ai wε.

⁷Yana angaka no, t'odaeni oko na bikenge binεnε bingasangasa o akɔkɔ bapakano. Mojɔ bo, ibo badingaka bo Njambe adi bobahokea a mojɔ mobikenge bibu binεnε.

⁸T'odaeni oko na ekɔmeli ebu, mojɔ bo Sangwa'nu ajebaka taka enu oko omongakinini.

⁹Obwanini bonga Njambe na ekɔmeli ye; Sangwa'su yona odi a Diko; Yε kombe ewε esumame;

¹⁰Yε Bokumu bowε bodoe; Yε bolulea bowε bokɔɔme ya nase o akɔɔmɔkɔ bo a Diko.

¹¹Bopa so busa bu milεmbε mia mibwani.

¹²Boyε so nongo jisu ai wε o ayεkε so baye badi na nongo ai so.

¹³Bambeja so a njea ebomeka. Heleja so ko a bobe Bokumu bodi ai wε, na ndangasa, na ekumu, oko na bosusu. *Amen.*

¹⁴Ino okayεni bato jibe jibu, Sangwa'nu adi boyε no pongono.

¹⁵Ino ko omiti yεni bato jibe jibu, Sangwa'nu atayε no jibe jinu.

¹⁶Yana adi na bikia, t'odaeni oko na wa a miso manu o ekɔmeli ebakosei. Ibo bakinaka maso mabu mabehe, a boneja bato bo bakiaka dia. Mbi natɔndɔkɔ no soti bo ndese ebato bamina ebwani.

¹⁷Wε ko okakia, baka swe jiwε, na sosa boso bowε, bo bato batajeba nongo bo okiaka;

¹⁸aneja oko Sangwao yona odi a libombi, na Sangwao yona oneke a libombi âda na likabo ai wε.

Likonja liNase na Bokumu boDiko

¹⁹T'ohεjeni oko leka loyumu lonεnε a mojɔ monu bεnε ya nase, mojɔ bo lobebaka ya na sε na bikpa, na babi babukaka ndako a bo'ba.

²⁰Kinani leka lonu loyumu lohεe oko oho Diko; lotabeha nongo na sε oho, na babi batalusa nongo a boba.

²¹Mojɔ bo, esika edi leka lowε loyumu, molema mowε mosambi oko ena.

²²Diso didi paka emokuku. Isa diso diwε didi dipele, mokuku mowε mosusu modi a bohu.

²³Diso diwε ko dikabeha, mokuku mowε mosusu modi oko a modidi. Oko boa, isa bohu bua bodi a tei ewε bodi oko modidi, modi modidi tuu.

²⁴Moto t'ajebake bokɔmε baswa babae. Isa adi bolona okina, na âpala yona otongo; isa adi bocingama na okina, na âsεtoja yona otongo. Otahɔnɔkɔni bokɔmε Njambe na makonja pongono.

²⁵A mojɔ momina, mbi nabalaka na nu bo otakakwanani nongo a mojɔ momohelo monu, a mojɔ moboyaka na bomwaka na elwaeli enu. Na mohelo na mia, edi boso nde, te mohelo? Na mokuku na bisenja, edi boso nde, te nɔokuku?

²⁶Anjani mbulu badiko; te banake gbie, te bajuake, te baboleake leka a ndako, Sangwa'nu ko yona odi oho Diko ababɔ kɔkɔ. Na no na mbulu, banci na bobuno nda, te no?

²⁷Okina onu adi bakaeja masu mande mweka na mokakwano? Oko adi bokakwana a mojɔ mobisenja cina eye?

²⁸Anjani bohohu bomanga maesika; te makɔke elomu; te mayoake bisenja.

²⁹Mbi ko natɔndo kɔ no bo elwaeli eSɔlɔ mɔ a ekumu ende esusu, eibwana na elwaeli edikina danga diesika.

³⁰Leka loesika lua lodi busa bu lodi botumbama puma; na isa Njambe alwajaka leka lomina, esingaiti no! Ino bato baejimeli ekεke!

³¹Yεni boda na mokakwano; yεni bobala bo, Êyaka so nde? Êrawaka so nde?

³²Bapakano badukaka oko leka lomina, Sangwa'nu ko yona odi oho Diko ajebaka bo obwanini bɔsɔ leka lu losusu.

³³Ino, peta dukani Bokumu boNjambe na bodongo bonde, nongo osεni leka lu losusu pongono.

³⁴Oko boa, t'okakwaneni oko a mojɔ mopuma. Kinani puma etombe muna mopuma. Monɔngɔ mobusa bu mobwani na busa bu.

Matayo 7

Bileho biYesu

¹Yεni bosambejani, bo otasambani no bεnε.

²Mojɔ bo, ôsambani oko na esambi esambejaka no; badi bongɛ ai no oko na mwɛngi mongɛkε no bεnε.

³Onjaka mobumbu mua modi a diso dimwangwao, pε ko bone epaso yena edi a diso diwε mεnε mojɔ moye?

⁴Wε yona odi na epaso a diso diwε mεnε, obwani bobala na mwangwao bo, Kina nahwε mobumbu a diso diwε?

⁵Wε mokosei, peta hwa epaso a diso diwε mεnε; oko boa odi bone bohu a bohwa mobumbu a diso dimwangwao.

⁶Yεni bopa leka losenɔke ai mbwa. T'odumbeni oko leka lonu loyumu a boso bongulube, basaka lodehɛkɛkε na sɛkε jibu, na bâhekhoa a bona na nu.

⁷Ingakani nongo osenι. Dukani nongo obolojaeni. Bomani nongo modipe modipoame ai no.

⁸Mojɔ bo, yona ongaka asɔkɔ; yona odukaka abolojaka, na modipe môdipoama ai yona obomaka.

⁹Okina onu adi bopa mwana'nde litai akamo'nga molembε?

¹⁰Na mwana'nde akamo'nga swi, adi bomopa njɔ?

¹¹Oko boa, isa ino ojobakani bopa bana banu leka lopele, nongo adi no bato babe, esingaiti Sangwa'nu yona odi oho Diko! Iyo âpa leka lopele ai baya bamongaka.

¹²Kɔni ai bato batongo o apalaka no bo bato batongo bakɔe ai no. Cina esusu eMibeko na mikanda mibatɔndɔi edi oko bosi.

¹³Kweani a modipe mokototake; mojɔ bo njea yena edi na sasa esukeaka na bogwa; modipe momina modi monεnε, na bato banεnε bakweaka ena.

¹⁴Njea yena esukeaka na bomɔ edi ekototake; modipe momina modi mokɛkε, na baya bakweaka ena badi oko baleka pε.

¹⁵Toma nganjamani na batɔndoi babokosea, Badoaka ai no na elwaeli ebata, na badi soti oko swa babilia.

¹⁶Odini bobambetea na mbuma jibu. Mojɔ bo, bato te batwake mbunga a bolongo, isa mamwe a likpanda.

¹⁷Oko boa, mole mopele mobotaka mbuma jipele, na mole mobe mobotaka oko mbuma jibe.

¹⁸Mole mopele te mobotake mbuma jibe, na mole mobe te mobotake mbuma jipele.

¹⁹Mole momiti bota mbuma jipele, môkwələmə na môtumbama.

²⁰Oko boa ôbambeteani na mbuma jibu.

²¹Badi bokwea a Bokumu boDiko, te nongo bayabeaka mbi Kumu, Kumu, oko moto yona okɔkɔ bolulea boSangwa'mbi yona odi oho Diko.

²²Bato banené bâbala na mbi a busa bomina bo, Kumu, Kumu, iso boitɔndɔ mwako a kombe ewε? Boimeja miembo mibe a kombe ewε? Boikɔ mindumba minené a kombe ewε?

²³Mbi ko nâbatɔndɔ bo, Mbi nitajebaka no nongo mweka. Dongani ya ai mbi, ino bato babikɔmeli bibe.

²⁴Moto yona o'kaka bikenge bi bimbi, na asumaka bikenge bimina, adi o moto obowei yona oyoa ndako ende a diko dilitai.

²⁵Mbuakwa, pela elaloa, mopomba modoa monené, na moboma ndako emina, Eikwa ko, mojɔ bo eyoama a diko dilitai.

²⁶Moto na moto ko yona o'kaka bikenge bi bimbi, na yo pε bosuma bikenge bimina, adi o egegele yona oyoa ndako ende a mopunji.

²⁷Mbuakwa, pela elaloa, mopomba modoa monené na moboma ndako emina. Ndako emina ekwa oko bokwa, na bokwa bomina bodaka mojɔ monené.

²⁸Asieja Yesu bikenge bimina bobala, bato baemumu bakamoa a mojɔ mobokoja bonde;

²⁹cina bo abakojaka na kpaci, te na ekɔmeli ebasɔni.

Matayo 8

Yesu a Kapalanauma

¹Yana atita Yesu a mono, bato banené mènè bamosusaka.

²Okina moto omaba adoa ai yo, atita na magbunda a boso bonde, na abala bo, Kumu, wε okapala, obwani boheleja mbi.

³Yesu aninoja ebo ende, aebakea ai yo, na abala na nde bo, Najimi; oheli. Bokpa mènè, maba mande masia oko bosia.

⁴Yesu ajɔ na nde bo, T'otɔndɔe oko moto mojɔ mu. Kε ko ai nganga, saneja ai yo, na pa epeeli ebekeia Mose a mojɔ momina bo bajebɛ.

⁵Asa yo mea a Kapalanauma, okina kapitɛni asi adoi ai yo, amongɔɔnɔ bo,

⁶Kumu, okina mokɔmeli ombi asambi na mokutumeli a ndako, na yogo ende egbasoi.

⁷Yesu abala na nde bo, Nâdoa bo namosengoe.

⁸Kapitɛni amosɔmbeja bo, Kumu, mbi nabɔngiti bo nase wε a ndako embi. Bala oko ekenge emɔci pε, na mokɔmeli ombi adi bohela.

⁹Mbi nadi ngɔngɔ jibasuku bambi; mbi mɛnɛ nadi na basoda ngɔngɔ jimbi. Nakabala na okina bo akεe, adi bokε. Nakabala na otongo bo adoe, adi bodoa. Nakabala na mokɔmeli ombi bo akεe mokina mojɔ, adi bomokɔ.

¹⁰Ama yo ka ekenge emina, Yesu ami kamoa oko bokamoa. Abala na bato baya badaka bacingi na nde bo, Mbi natɔndɔkɔ no soti bo napakiti nε ejimeli enεnε boa, nongo a Yisalaele.

¹¹Mbi natɔndɔkɔ no bo bato banenε badi bodonga a εsɛta na wεsɛta, na bâda a bidie bibu a dɔngɔ diAbalayama na Isaka na Yakobo a Bokumu boDiko.

¹²Bana ko baBokumu bâdumbama a modidi mosokolu, a esika ebio na bokpεkpεnε bomino.

¹³Yesu abala na kapitɛni bo, Yana a ndako ewε. Ye modae na wε o ami wε jima. Na mokɔmeli ahela a yogo oko a ehole emina.

¹⁴Yesu akwea a ndako ePεtεlo, na atana bokio boPεtεlo asambi na mɔlɔ.

¹⁵Abɛnje ebɔ ende, na mɔlɔ mosia oko bosia. Iyo asi ko angɔi na abakɔmε.

¹⁶Badoa na bato banenε ai Yesu a ehole emɔkɔ, baya badaka na miembo mibe. Iyo ameja miembo mibe oko na ekenge emɔci pε, na aheleja basusu baya badaka na bego.

¹⁷Oko boa, ekenge ebala motɔndɔi Yisaya engama bo, Iyo mɛnɛ atombi bwɛmbu bosu, na alwai bego bisu.

Yesu agɔleja Mopomba

¹⁸Iyana anε Yesu bo bato bamohikaka kanga banenε mɛnɛ, apa monɔkɔ bo balekele.

¹⁹Okina mosɔni adoa ai yo, na abala na nde bo, Mokoja, mbi nadi bocingama na wε bisika bisusu bikεke wε.

²⁰Yesu amosɔmbeja bo, Kpia badi na mikpo mibu; mbulu badiko badi na mobo; Mwana 'Moto ko apeliti esika a bosuka molo monde.

²¹Okina otongo, mocingami onde, abala na nde bo, Kumu, ye napete ke a bopusea sangwa'mbi.

²²Yesu amosɔmbeja bo, Cingama na mbi, Kina bagwake bapusee bagwake babu bɛnɛ.

²³Atamba Yesu a bwato, bacingami bande batamba na nde pongono.

²⁴Mopomba modoa monɛnɛ yana adaka bo a boliko, na bwato bopaka dinda. Yesu ko adaka ahwɛli.

²⁵Bacingami badoa ai yo, bamosisoja, na babala bo, Kumu, iso bogwi! heleja so!

²⁶Iyo abasɔmbeja bo, Ebangaka no ndeni? Ejimeli enu edoni? Asi ko angoi, alema na pwea na madiba, na mopomba moyɛyɔ bowi.

²⁷Bacingami bakamo a bou mɛnɛ, na babala bo, Iyo moto ndani? mojɔ bo pwea na madiba bamosumaka pongono.

Yesu aheleja Bato bamiembo mibe

²⁸Aduboa yo a ngunda yena etongo, a dɔngɔ diBaGadala, asongana na bato bamiembo mibe babae, bayo bamana a kunda. Bato badaka na bɔ a bonɔ a njea emina, mojɔ bo badaka na bila enɛnɛ.

²⁹Ibo babekoa bo, We Mwana oNjambe, mojɔ mosu na we modi bo? Odoi ya a bonɔngeja so oko ehole esu ebwanakini?

³⁰Bwela bonɛnɛ bongulube bodaka bokayake bohali mweka,

³¹na miembo mibe mingɔɔnɔ Yesu bo, Okameja so, kina bokwee a tei ebwela bongulube.

³²Iyo abala na bu bo, Keni! Miembo mibe mimana, mikwea a tei engulube a mono, na bwela bosusu babikoa mbango nase oko a libale, na bagwa a madiba.

³³Babanei bangulube bacia oko bocia. Bakɛ a ngando a bojebéja bato mojɔ momina mosusu, na mojɔ mobato bamiembo mibe.

³⁴Bato basusu bangando emina badoa a boduka Yesu, na yana amonɛ bo, bamongɔɔnɔ bo adonge a esika ebu.

Matayo 9

Moto oMokɔbɛlɛ

¹Yesu atamba koko a bwato, alekela, na ahula a ngando ende mene.

²Bato badoa ai yo na moto omokɔbɛlɛ yona odaka asambi a litɔkɔ, Yana anɛ Yesu ejimeli ebu, abala na moto omokɔbɛlɛ bo, Mwana, da na sepi; jibe jiwɛ jikinami.

³Bakina basɔni ko bale bo, Moto yoyo atangolaka Njambe.

⁴Yesu ko ajeba biləli bibu, na abala na bu bo, Ino oləkəni mijɔ mibe a milema minu mojɔ moye?

⁵Nakabala bo, Jibe jiwε jikinami, isa Angɔ, dala; mojɔ monɔi na bopipo nda?

⁶Mbi ko nadi boneja no bo Mwana 'Moto adi na kpaci ya nase a boyε jibe. Oko boa abala na moto omokɔbelε bo, Angɔ, tomba litɔkɔ liwε; yana a ndako ewe.

⁷Moto omokɔbelε angɔ oko bongɔ, na ayana a ndako ende.

⁸Yana anε bimumu bibato mojɔ momina, badaka oko na bɔ, na bakumeja Njambe yona opa kpaci emina ai bato.

Yesu abea Matayo

⁹Yana adonga Yesu a esika emina, anε okina moto a bilo ende etako, kombe ende Matayo. Yesu abala na nde bo, Cingama na mbi. Iyo angɔ na acingama na nde.

¹⁰Adaka Yesu a mesa a ndako tei, bato banεnε badoa a boda na nde na bacingami bande a mesa, baputeja batako, na bato bagala ebe.

¹¹Bakina BaPalusi baya babanε babala na bacingami bande bo, Mokoja onu ayakaka na baputeja batako na bato babe mojɔ moye?

¹²Yesu ko aka ekenge emina, na yo abala na bu bo, Babwani na monganga oko baya bapekaka, te baya badi baniilake.

¹³Kεni adukeni cina eekenge yeye, Mojɔ mopalaka mbi modi wa, te tito bamasiko. Mojɔ bo mbi nadoi a bobea bato babe, te bato bapele.

Bacingami baYoane

¹⁴Bacingami baYoane badoa ai Yesu, na bamohɔjɔ bo, Iso na BaPalusi bodi na bikia binεnε; bacingami bawε ko te bakiake mojɔ moye?

¹⁵Yesu abasɔmbeja bo, Isa momi obolongana adi na bina 'nde a lihang, badi boyea bio? Badi bokia ko a masu mangɔngɔ, oko momi obolongana amaka donga.

¹⁶Moto t'abambake kasaka eyou na ebolo eyene. Mojɔ bo ebolo eyene edi bodonga, na edi bohεje lipose oko bohεje.

¹⁷Bato te balumejake bikutu bibiobo biyou na vino eyene. Bakakɔ boa, badi bobatoja bikutu; vino edi bosopea, na bikutu bidi bobeha. Bahangojaka vino eyene oko a bikutu biyene. Oko boa badi bobanea bikutu na vino pongono.

Mwana 'Yailo

¹⁸Amaka yo bala ngando jiji, okina kumu adoa oko ai yo, asumana a boso bonde na abala bo, Mwana'mbi mwali agwi oko edεye mεnε; wε ko doa omobakee ebɔ ewε nongo ahele koko.

¹⁹Yesu angɔ, akε na nde, na bacingami bande pongono.

²⁰Okina mwali yona oma peka na ekia bianga domi-na-bibae, adoa ngɔngɔ jinde na abεnje gbomba ekasaka ende na ebɔ.

²¹Mwali omina ale bo, Mbi nakabakea ebɔ embi a kasaka ende, nadi bohela a yogo embi.

²²Yesu ahekua, amonε, na abala na nde bo, Mwana, titeja molema mowε. Ejimeli ewε ehelejai wε. Na mwali ahela oko bohela a yogo ende a ehole emina.

²³Amea Yesu a ndako ekumu omina, anε bato bapoolo, na emumu ebato baya badaka na daka enεnε.

²⁴Abala bo, Yanani; mwamwali aditi nongo mogo; ahwεkε oko hiɔ pε. Ibo ko bamosεkε oko bosεkε.

²⁵Ama bo meja emumu ebato sokolu, Yesu ami kwea oko a ndako. Apea ebɔ emwamwali, na yo angɔ oko bongɔ.

²⁶Na bananganeja mwako momojɔ momina a likota dia lisusu.

Bato bamiso mago

²⁷Yana adonga Yesu a esika emina, bami babae bamokimana. Badaka na miso mago, na babekoa bo, Wε Mwana 'Dawidi, ike so wa!

²⁸Yesu akwea a ndako, na bami bamiso mago badoa ai yo. Yesu abala na bu bo, Ojimakani bo mbi nabwani bokɔ mojɔ mu? Bamosɔmbeja bo, Ee Kumu.

²⁹Yesu abεnje miso mabu na ebɔ ende, na abala bo, Yε modae na nu boa cina ejimeli enu.

³⁰Miso mabu masɔ njεnε, na Yesu abaleha na bopipo bo batatɔndɔ bato mojɔ momina.

³¹Ibo ko bayana na batundeja gala epele eYesu a likota dia lisusu.

³²Yana amanaka bo, bato badoa na okina momi, emimi, yona odaka na mwembo mobe.

³³Yana ameja Yesu mwembo mobe, momi abala oko bobala, na bato basusu bakamoa bou mεnε. Bajɔ bo, Iso boipaka ne mokina mojɔ boa a Yisalaele.

³⁴BaPalusi ko babala bo, Iyo amejaka miembo mibe oko na kpaci ekumu omiembo mibe.

Yesu aloma Bacingami bande a Elomu

³⁵Yesu ake akadale a ngando jesusu jinεnεnε na jikεkε. Akoja a sinagoge jibu, Atɔndɔ Mwako Mopele moBokumu, na aheleja bato a bego bisusu na biεmε bisusu.

³⁶Yana anεkε yo bimumu bibato, aba'keaka wa. Mojɔ bo badaka na mokakwano na bwembu, o ekɔmeli ebata baya bapeliti mobanei.

³⁷Oko boa Yesu abala na bacingami bande bo, Ejueli edi enεnε; basali ko badi oko baleka pe.

³⁸A mojɔ momina, ingani Kumu oejueli bo alome basali a bojua.

Matayo 10

¹Yesu abolea bacingami bande domi-na-babae. Abapa kpaci a bomeja miembo mibe, na a bosengoa bego na biεmε bisusu.

²Kombe jibawenji domi-na-babae oko jiji; yona oboso oko Simona yona odi na kombe Petelo, na mwangwa'nde Andalea; Yakobo mwana 'Sebede, na mwangwa'nde Yoane;

³Pilipo na Balatelemi, Toma na Matayo moputeja otako; Yakobo mwana oAlapayo, na Tadayo;

⁴Simona oKanana, na Yuda Iskalio yona omokaba.

⁵Yesu abaloma, domi-na-babae, oko na eleho ye, Pe bokeni a njea ebapakano, isa a ngando jiSamalia.

⁶Kεni oko ai bata babungake badenga diYisalaele.

⁷Kεni atɔndɔeni mwako bo, Bokumu boDiko bobengi bomea.

⁸Helejani baya badi na bego. Angɔjɔni bagwake. Sεnojani bato bamaba, na imejani miembo mibe. Ino osini bossɔ, pe nongo bosomba; pani koko boa.

⁹Pe botombani likonia liwɔlɔ, isa palata, isa flanka a mabenga manu;

¹⁰pepe nongo litɔngi a mojɔ momɔngɔ monu, isa kasaka jibae, isa sapata, isa pango; cina bo mosali abwani bossɔ dia dinde.

¹¹Okameani a ekina ngando, isa cnεnε isa ekεkε, dukani moto oesako epele, na yeyoani a ndako ende oko a ehole enu eboyana.

¹²Okakweani a ekina ndako, abεjεni njεbε.

¹³Ndako emina ekabɔngɔ, kinani bowi bonu boda ena. Emiti bɔngɔ ko, kinani bowi bonu bohule ai no.

¹⁴Bamiti sɔ no bopele, na bamiti hokea mwako monu, kinani ndako emina, isa ngando emina, na hakoani dutu libibota binu.

¹⁵Na esambi eSɔdɔmɔ na Gomola, na esambi engando emina, mbi natɔndɔkɔ no bo esambi engando emina enɔbí na bopipo a busa boEsambi.

¹⁶Hokeani; mbi nalomaka no o bata baya bahikami na swa. A mojɔ momina, toma dani na bopasa bonjɔ na bowi bosungu.

¹⁷Anganjamani ko na bato; mojɔ bo badi bogbula no a bisambi, na bâtua no a sinagogue.

¹⁸Bâlinda no a boso bobakumu na bakonji a mojɔ mombi, bo odaeni batati bambi ai bo na ai bapakano.

¹⁹Bakapea no, t'odaeni oko na mokakwano a mojɔ mokɔpi enu na ebaeli enu; mojɔ bo ôsɔni bikenge bibobala a ehole emina.

²⁰Mwembo moSangwa'nu a tei enu modi bobala, te no bɛnɛ.

²¹Moto adi bokaba mwananango bo agwɛ. Sange'moto âkaba mwana'nde. Bana bâna na baboti, na bâbaweja.

²²Bato basusu bâlona no a mojɔ mokombe embi. Yona ko ôda mombilimake oko a suka, yo âhela.

²³Bakanɔngeja no a ngando emɔci, ciani a ngando etongo. Mojɔ bo mbi natɔndɔkɔ no na soti mɛnɛ bo Mwana 'Moto adi bodoa oko omeakinini a ngando jisusu jiYisalaele.

²⁴Moto yona okoaka t'anɔke mokoja onde. Mokɔmeli t'anɔke moswa 'nde.

²⁵Libondo limokoja libwani koko na yona okoaka, na lia limoswa libwani na mokɔmeli. Bakabakea moswa ondako kombe Balasebuba, esingaiti bakɔmeli bande!

²⁶Yeni ko bobanga bato bamina; mojɔ bo ngando jisusu jia jikundami jîkundoama, na jia jibombami jîboloa.

²⁷Tɔndɔni a bohu ngando jibalaka mbi na nu a modidi; bekoani a diko dibilitondo jia jikaka no na polipoli.

²⁸Yeni bobanga baya bawaka mokuku, mojɔ bo te bahɔnɔke bowa mwembo. Odini bobanga oko yona odi na ngulu a bowa mokuku na mwembo pongono a Gehena.

²⁹Dɛkɛ babae batakwaka likota limɔci? Pɛpɛ nongo omɔci ko odi bokwa nase, na Sangwa'nu pɛ bojeba.

³⁰Iyo ko ajebaka etango eswe jimelo minu.

³¹A mojɔ momina, ino obwanitini bobanga, Ino na dɛkɛ, banɔi na bobuno ada, te no?

³²Moto akajima bo adi moto ombi a boso bobato, mbi nadi bojima moto omina a boso boSangwa'mbi yona odi oho Diko.

³³Moto ko aka'ngana a boso bobato bo adi moto ombi, mbi nadi bongana moto omina a boso boSangwa'mbi yona odi oho Diko.

³⁴T'oleeni oko bo mbi nadoi a bopa ngondo bowi; pɛpɛ nongo mweka. Mibi nadoi, te a bopa bowi; nadoi oko na mopamba.

³⁵Nadoi a boboteja moto na sangwa'nde, mwamwali na ngwa'nde, na mwali na bokio bonde mwali.

³⁶Soki ilmoto jîda oko bato badenga dinde mɛnɛ.

³⁷Epaeli emoto ai sangwa'nde isa ai ngwa'nde ekanc epaeli ende ai mbi, moto omina abɔngiti na mbi.

³⁸Moto amiti tomba mole-mobokea monde a bocingaraa na mbi, abɔngiti na mbi.

³⁹Yona obaneaka mohelo monde âmobungeja, na yona obungejaka mohelo monde a mojɔ mombi, âmobanea.

⁴⁰Moto akasɔ no, asɔkɔ mbi; na yona osɔkɔ mbi, asɔkɔ yona olomani.

⁴¹Moto akasɔ motɔndɔi mojɔ bo adi motɔndɔi, âsɔ ndese emotɔndɔi. Akasɔ moto obodongo mojɔ bo adi moto obodongo, âsɔ ndese emoto obodongo.

⁴²Moto akapa kɔpɔ emadiba ai okina obana ba bakɛkɛ mojɔ bo adi mocingami ombi, mbi natɔndɔkɔ no na soti bo atataka bosɔ ndese ende.

Matayo 11

Lihɔjɔ liYoane

¹Yana asieja Yesu bileho bimina ai bacingami bande domi-na-babae, adonga a esika emina bo akojae na atɔndɔe mwako a ngando jibu.

²Yana aka Yoane a blɔkɔ mojɔ mobilomu biMasiya, amolomea monɔkɔ na bacingami bande mɛne.

³Amohɔjɔ bo, We odi yona odi na sako ebodoa, isa bodi bomba okina otongo?

⁴Yesu abasɔmbeja bo, Sɔmbɔni ai Yoane; mojebejani ngando jikaka no na jinɛkɛ no.

⁵Bay a bagwa miso basok̄o njene ebu. Bato bamitengu badalaka. Bato bamaba bahelaka. Bato babohoka badi na njoki, Bagwake banḡi, na bato babokwali bakaka Mwako Mopele.

⁶Bojongoa ai moto yona otabunga moj̄ mombi.

⁷Ama bo yana, Yesu ami bala oko na emumu ebato a moj̄ moYoane. Abala bo, Eke no oho a lisobe a bonja ndani? mongongo mokakumane na pwea?

⁸Ee, eke no oho a bonja ndani? moto yona olwaka bisenja bibopetepete? Ikani! bay a balwaka bisenja bibopetepete badi oko a ndako jibakumu.

⁹Eke no oho moj̄ moye?—a bonja motond̄oi? Ee, mbi natond̄oko no bo yo anɔi motond̄oi.

¹⁰Moj̄ mu moson̄m̄ a moj̄ monde bo, Anjani, mbi nalomi obwenji ombi a boso bowe; Iyo âselingoa njea a boso bowe.

¹¹Mbi nabalaka na nu na soti men̄e bo p̄ep̄e nongo moto om̄ci yona obotama na mwali onɔi Yoane Mobatisi Endeles ko, yona odi nḡongo men̄e a Bokumu boDiko adi boso bonde.

¹²Bato babanga bokwea a Bokumu boDiko na bopipo a masu maYoane Mobatisi, na edeye pongono, bato babotepeli bakweaka ena na bopipo.

¹³Batond̄oi basusu, na Mibeko pongono, batond̄o ngando jia jidi bokwa nḡongo, oko a ehole eYoane.

¹⁴Isa ejimeli enu ebwani na moj̄ mumu—Yoane adi oko Elia yona odaka na sako ebodoa.

¹⁵Isa moto adi na matoi manjoki, ye ahokee.

¹⁶Mbi nadi bonge elulu ye na ye? Babwani oko na benḡe baya batitani a nd̄ongo, na babekoaka ai bina'bu bo,

¹⁷Iso bobomi ebumba, ino ko pe bobua nḡom̄, Bobomi lingondo, ino ko pe boyea k̄ond̄o.

¹⁸Moj̄ bo Yoane adoiti na eyakeli na emwakeli, na babala ka bo adi na mwembo mobe.

¹⁹Mwana 'Moto ko adoi, akayake na akamwake, na babalaka bo, Anjani moto omogbuko na molangoi; apanganaka na baputeja batako na bato babe. Bowei bodi bolonga oko na bilomu bibowei.

Moj̄ moBato baPend̄o

²⁰Yesu abanga bolemoa na bato a ngando jik̄ok̄o yo mindumba minde minen̄e, cina bo baihekoja milema mibu.

²¹Abala bo, Monɔngɔ ai ho Kolasina! Monɔngɔ ai no Betesaida! Akɔkɔ bo ne mindumba minɛke no oho Tula na Sidona, ka bahekoja milema mibu eyou, na balwa bipupu, na basasuo a mihulu.

²²Mbi natɔndɔkɔ no bo bodingoa bonu bonɔbí bua boTula na Sidona a busa boEsambi.

²³Ino Kapalanauma—obakini diko? Pεpe, otitabíni nase oko a Gehena, Nongo Sɔdɔmɔ, akɔkɔ bo ne mindumba minɛke no, ka badi oko busa bu.

²⁴A mojɔ momina, mbi nabalaka na nu bo esambi enu enɔbí yena eSɔdɔmɔ na bopipo a busa boEsambi.

²⁵A ehole emina, Yesu abala bo, Sesa, Kumu oDiko na nase, mbi nasakoaka wε cina bo obomba ngando jiji ai bato babowei, ai bato baya bacingeaka mijɔ, na ojibolojai ai bana bakɛkε.

²⁶Ee Sesa; bolulea bowε bopele bodaka boa.

²⁷Sangwa'mbi apani kpaci a ngando jesusu. Pεpe nongo moto ojebaka Mwana. Edi oko Sango pε yona omojebaka. Pεpe nongo moto ojebaka Sango. Edi oko Mwana pε yona omojebaka, Na Mwana akajima, amobolojaka ai bato bo bamojebé.

²⁸Doani ai mbi, ino basusu baya bangwai, na baya ba'mbi na mina, bo mbi nahemejae no.

²⁹Tombani mosongo mombi. Ikoani na mbi, mojɔ bo mbi nadi na molema motitake.

³⁰Mosongo mombi moditi na kpɔkɔsɔ, na muna mombi modi mohahanake.

Matayo 12

Busa baSabata

¹Ekina ndɔndɔ, Yesu adala a busa boSabata, na alena njea egbie jibsɔ. Bacingami bande batwa jikina ngbelenga jibsɔ na bajiyaka, mojɔ bo badaka na nja.

²BaPalusi ko babanε, na babala na Yesu bo, Anja bacingami bawε! Akɔkɔ bo boa, basopaka mobeko moSabata. Yesu abasɔmbeja bo,

³Ino olangakinini mojɔ mokɔ Dawidi yana akaka yo nja, yo mεnε na bato bande?

⁴Iyo akwea a ndako eNjambe na ayaka milεmbε mimokako. Midaka oko a mojɔ mobo'nja pε; mihengemε oko ai nganga pε, na eibɔngɔ bo yo ayake isa bato bande.

⁵Olangakinini a Mibeko bo nganga batempelo basopaka mobeko moSabata a tei etempelo a busa boSabata, na baditi na lindo?

⁶Mbi nabalaka na nu bo mokina mojɔ modi jɔno mua monɔi tempelo.

⁷Akɔki no cingea ekenge yeye, ka odumbitini baya baditi nongo na mojɔ; Mbi nasepaka oko na wa, te tito bamasiko.

⁸Mojɔ bo Mwana 'Moto adi Kumu oSabata.

Yesu aheleja Moto na Ebɔ endɔke

⁹Adonga yo a esika emina, Yesu akwea a sinagogue ebu.

¹⁰Okina momi adaka ena yona odaka na ebɔ endɔke, Bakina bahɔjɔ Yesu bo, Elomu esengo ebɔngi a busa boSabata? Babala boa cina bo badukaka na nde mojɔ.

¹¹Yesu abasɔmbeja bo, Isa okina onu adi na bata omɔci, na yo akakwa ta mombɔndɔ a busa boSabata, otamopea bo omohwε a mombɔndɔ?

¹²Na moto, na bata, onɔi na bobuno nda, te moto? Oko boa, ebɔngi bo moto akɔe bopele a busa boSabata.

¹³Asi ko abali na momi bo, Ninoja ebɔ. Iyo aninoja ebɔ, na ebɔ ende esɔ nguli, na ewana na ebɔ etongo.

¹⁴BaPalusi bamana, na babolea likita a bodumba ndungu bo bamowoe.

¹⁵Yesu ko ajeba mojɔ momina, na adonga a esika emina. Bato banenε bamosusa a njea, na abaheleja basusu a bego.

¹⁶Iyo ko abalemba na bopipo bo batameja mojɔ monde a bohu.

¹⁷Akɔ boa a bongameja ekenge ema bala motɔndɔi Yisaya bo,

¹⁸Anjani mokɔmeli ombi. Mbi namohɔi; Nadi na nde ngenjɔ. Molema mombi mosepaka na nde, Mbi nâmolwaja Mwembo mombi. Iyo âjebɛja makota mangondo mojɔ mobodongo.

¹⁹Ataswiana na moto; atabekoa na bopipo. Pεpε nongo moto odi boka monɔkɔ monde a licilinga.

²⁰Atabuka hongo mongongo mua mokwei pola, Na atadima nongo motanda momodidi, Oko adi yo pε bopeta gbokeja na bodongo.

²¹Na makota mangondo mâda na njingo a kombe ende.

Mojɔ moMiembo Mibe

²²Badoa ai yo na moto yona odaka na mwembo mobe; agwa miso, na adaka koko emimi. Yesu amoheleja; emimi abala na asɔ njεnε ende.

²³Bato basusu bakamoa bou; babala bo, Iyoyo, te Mwana oDawidi?

²⁴BaPalusi ko, yana aka bo mojɔ momina, babala bo, Moto yo amejaka miembo mibe oko na kpaci eBalasebuba, kumu omiemblo mibe.

²⁵Yesu acingea bilɛli bibu, na abala na bu bo, Bokumu bokada na bobɔtɔ, bodi bobeha; na ngando ekada na bobɔtɔ, etayeyoa nongo.

²⁶Oko boa, Satana aka'na na Satana, adi na bobɔtɔ, na bokumu bonde bodi boyeyoa na ye?

²⁷Isa mbi namejaka miembo mibe na kpaci eBalasebuba, bana banu bamimejaka na kpaci enda?

²⁸Isa mbi ko namejaka miembo mibe na ngulu eMwembo moNjambe, Bokumu boNjambe bodoi ai no.

²⁹Moto amiti kanda moto mopipo mbɔci, adi bokwea a ndako emoto mopipo a bobeja leka londe? Akakɔ boa abwani bobeja leka londako ende.

³⁰Moto yona oditi a dɔngɔ dimbi aloni mbi. Moto amiti kɔmeja mbi a bondoa, ananganejaka oko bonanganeja.

³¹A mojɔ momina, mbi nabalaka na nu bo boye bodi a mojɔ mojibe jisusu na matangola masusu. Moto ko akatangola Mwembo Mosenɔke, boye boditi nongo.

³²Moto akadɔ Mwana 'Moto abwani bossɔ boye. Moto ko akadɔ Mwembo Mosenɔke, atasɔ nongo boyε, isa a ehole ye, isa a ehole yena ekadoe.

³³Balani bo mole modi mopele, na mbuma jimole jidi koko jipele; isa bo mole modi mobe, na mbuma jimole jidi koko jibe. Ombeteakani mole oko na mbuma.

³⁴Ino bana banjɔ! Adi no bato babe, odini bobala mijɔ mipele na ye? Mojɔ bo monɔkɔ mobalaka oko mijɔ mia minɛngi a molema,

³⁵Moto mopele amejaka mijɔ mipele a ebombei ende epele, na moto mobe amejaka mijɔ mibe a ebombei ende ebe.

³⁶Mbi natɔndɔkɔ no bo bato basambabí a busa boEsambi a mojɔ mobikenge bibu bisusu bibibalabala.

³⁷Odi bolonga a mojɔ mobikenge biwε, na bikenge biwε bidi bodumba wε pongono.

³⁸Bakina basɔni na BaPalusi babala na Yesu bo, Mokoja, iso bopalaka bo onejae so ekina embete.

³⁹Yesu abasɔmbeja bo, Bato baelulu ye badi na posa a bone embete; elulu ebe, elulu ebɔɔli! Batanε ko ekina embete etongo, oko embete ejona pε.

⁴⁰Jona adaka a scopo jiswi monene masu masato. Oko boa pongono, Mwana 'Moto âda masu masato a tei ekpoto.

⁴¹Bato baNinewe badi bo'ma a Esambi na elulu ye, na badumbabí elulu ye. Moj bo, ibo bahekoja milema mibu a moj momwako motondo Jona; okina ko yona onci Jona adi yaya.

⁴²Kumu-mwali odongo disudo adi bo'ma koko na bato baelulu ye a Esambi, na abadumbabí. Moj bo, yo adonga a suka engondo a bohokea bowei boSolembo; okina ko yona onci Sobombo adi yaya.

⁴³Mwembo mobe mokamana ai moto, mokèke adale lebaleba a bisika bikakanake a boduka bowi, pè ko botana bowi.

⁴⁴Oko boa, modi bobala bo, Yε nasombe a ndako ekini mbi. Mokamea ena, moneke bo ndako edi ngasa, na edi embøke na engebenèke.

⁴⁵A moj momina, mwembo mobe mokèke a boduka miembo mitongo sambo mia minci yo na bobe, na mikweaka a boda ena. Oko boa, moda mongongo momoto omina modi bono moda monde moboso na bobe. Moj moelulu ye modi koko boa.

Yesu na Nango na Bananango

⁴⁶Nange eYesu na bananango bamea na ba'ma a sokolu yana abalaka yo na bato, na baduka njea bo babale na nde.

⁴⁷Okina moto abala na Yesu bo, Ngwao na banangwao badi oho sokolu na bapalaka bobala na wε.

⁴⁸Yesu amosombeja bo, Ngwa'mbi nda? Banangwa'mbi banda?

⁴⁹Aninoja ebo ende a dongo dibacingami bande, na abala bo, Anjani ngwa'mbi na banangwa'mbi!

⁵⁰Moj bo, moto na moto yona okoko bolulea boSangwa'mbi yona odi oho Diko, yo adi mwangwa'mbi, na ngenè embi, na ngwa'mbi.

Matayo 13

Monde moNgua

¹Yesu amana a ndako a busa bomina, na akε akadae a mbongu.

²Bato batitana ai yo banene menε, na bamohika. A moj momina, yo atamba a bokina bwato bo adae ena, na bato basusu ba'ma oko a mbongu.

³Iyo abala na bu mijɔ minene oko na mindε. Abala bo, Okina moto akε a bomese ngua ta gbie.

⁴Yana amesekε yo, jikina ngua jikwa a dɔ̃ngɔ dinjea; mbulu badoa na bayaka ngua jimina.

⁵Jikina ngua jitongo jikwa a bisika bidaka matai, pεpε kpɔtɔ jinεnε. Ngua jimina jiiyeyoa na bo'tɔ, cina bo kpɔtɔ jidaka oko mweka pε.

⁶Ama mana mo ko, jimi wɔcsɔsɔ oko bowɔcsɔsɔ, na jigwa, mojɔ bo njeli jiidaka na ndinda.

⁷Jikina ngua jitongo jikwa a bisika bidaka njani; njani jidaka na bohohu, na jidimoja ngua.

⁸Jikina ngua jitongo jikwa a kpɔtɔ jipele. Ngua jimina jibota, jikina mokama, jikina jitongo macinda masato, na jitongo koko licinda-na-domi.

⁹Isa moto adi na matoi manjoki, yε ahokee.

¹⁰Bacingami badoa na babala na nde bo, Obatɔndɔkɔ oko minde pε mojɔ moye?

¹¹Yesu abasɔmbeja bo, Ino osini bocingea a bojeba ngando jibombamake jiBokumu boDiko; ibo ko basiti bocingea.

¹²Yona opeli, asɔ koko libondo bo adae na lituna. Moto ko yona odi oko ngasa,— badi bokatoa yena epeli yo.

¹³A mojɔ momina, mbi nabatɔndɔkɔ oko mindε pε; mojɔ bo, nongo adi bo na miso, batanεkε eka na miso; adi bo na matoi, te bakake nongo.

¹⁴Eseko epa motɔndɔi Yisaya engami soti na bato bamina. Iyo abala bo, Ô'kani na matoi, na otacingeani nongo. Ôajani na miso, na otanεni nongo.

¹⁵Mojɔ bo milema mibato ba midi na bondanga. Matoi mabu madi na bohoka. Badipi miso mabu oko bodipa, Bo bata'nε na miso, na bata'ka na matoi, Na batacingea na milema, Basaka hekoa ai mbi bo nabaheljæ.

¹⁶Ino odini na bojongoa, mojɔ bo miso manu madi na njεnε, na matoi manu madi na njoki.

¹⁷Mbi najebajaka no na soti bo batɔndɔi na bato babodongo banεnε badaka na posa a bone ngando jinεkε no, na a boka ngando jikaka no; baijine ko, na baijika.

¹⁸Hokeani ko cina emonde momomεsei onguia.

¹⁹Moto aka'ka mwako moBokumu, na yo pε bocingea, yona Mobe adoaka a bocinoa mua momεsεmi a molema monde. Mojɔ monde modi o ngua jia jikwa a dɔ̃ngɔ dinjea.

²⁰A mojɔ mongua jia jikwa a bisika bidaka matai; jidi oko mwako mokaka moto yona osɔkɔ mwako momina na sepi.

²¹Iyo ko apeliti njeli a tei ende, na t'ayeyoake nongo ekoka. Mokina monɔngɔ mokadoa, isa jɔɔlɔ, a mojɔ moEbaeli, adi bongwa oko bongwa.

²²Ngua jia jikwa a bisika bidaka njani jidi oko mwako mokaka moto, Mwako ko mogbokaka oko na mikakwano a mojɔ mongando jingondo ye, a mojɔ mobokosea bomakonja, na motabotaka nongo.

²³Ngua jia jikwa a kpɔtɔ jipele jidi oko mwako mokaka moto na bocingea. Iyo abotaka soti; ngua emɔci ebotaka mokama, etongo macinda masato, na etongo koko licinda-na-domi.

Mindɛ Mitongo

²⁴Abatɔndɔ mokina monde motongo. Abala bo, Bokumu boDiko bodi o moto yona ona ngua jipele a gbie Ende.

²⁵Yana ko adaka bato bahweli, soki ende adoa. Iyo ana ngua jinjani a esika edaka lɔɔcɔ, na ayana.

²⁶Yana atɔ ngua na jikwea, ngua jitongo jitɔ pongono.

²⁷Basali bakε ai moswa'bu na bamohɔjɔ bo, Kumu, wε oina ngua jipele a gbie ewε? Oko boa njani jia jitɔi ena jihuli jɔ?

²⁸Iyo abasɔmbeja bo, Okina moto yona odi na mbi soki akɔi mojɔ mu. Basali babala na nde bo, Opalaka bo so bokε bojibikoe?

²⁹Iyo abasɔmbeja bo, Pεpε, osaka bikoani bsɔ pongono yana abikoaka no njani.

³⁰Kinani tungu jisusu jibae jikpelɔe oko a ehole ebojua. Ehole ebojua ekamea, nadi botɔndɔ basali bayo bajuaka bo, Peta ndoani njani na jikandani mobɔmbɔ mobɔmbɔ a mojɔ raobotumba. Boleani ko bsɔ a magasini mambi.

³¹Abatɔndɔ koko mokina monde motongo. Abala bo, Bokumu boDiko bodi o mongua mosinape. Moto amotomba na amona a gbie Ende.

³²Mongua momina monɔi ngua jisusu na bojio. Mokatɔ ko, modi bokaa monenε, na mɔnɔ njua jisusu na buke; modi mole mεnε, na mbulu badiko badi bodoa a boyoa mobo mabu a bitape bimole momina.

³³Monde motongo mobala yo na bu oko mu;—Bokumu boDiko bodi o lipetu litomba mwali; ali'sa a mitεke mindongo, saani jisato; na mitεke misusu mipetoa.

³⁴Yesu abala na bimumu bibato ngando ji jisusu na mindɛ, Aibala na bu mijɔ mitongo, oko mindɛ pε,

³⁵bo angamejae ekenge ebala motɔndɔi bo, Mbi nâdipoa monɔkɔ mombi a bobala mindɛ. Nâbala mijɔ mia midaka mibombamake oko a libangake lingondo.

³⁶Yesu ayaneja bato na akwea a ndako, Bacingami bande badoa ai yo na babala bo, Cingea so monde mongua jinjani a gbie.

³⁷Iyo abasombéja bo, Yona cnaka ngua jipele adi oko Mwana 'Moto.

³⁸Gbie edi ngondo. Ngua jipele jidi bana baBokumu. Njani jidi bana bayona Mobe. Soki yona oji'na adi oko Satana.

³⁹Ehole ebojua edi oko suka eehole ye; na bato babojua badi babwénji-baDiko.

⁴⁰Bandoaka na batumbaka njani, na modabí koko boa a suka eehole ye.

⁴¹Mwana 'Moto alomabi babwénji bande baya badi bodongeja ngando jisusu jibe a Bokumu bonde, na bato basusu baya bakɔkɔ bobo,

⁴²na babadumbamabí a libulumeja limosa. Badabí oho oko na bio na bokpækpène bomino.

⁴³A ehole emina ko, bato babodongo badabi na bohu bomodika-busa a Bokumu boSangwa'mbi. Yona odi na matoi manjoki, yε ahokee.

⁴⁴Bokumu boDiko bodi o leka loyumu lua lobombama a ekina gbie. Moto aboloja leka lomina, alokunda koko, na ake a bongejε leka londe losusu bo asombe gbie emina.

⁴⁵Bokumu boDiko bodi koko o moto obwasa yona odukaka matai mayumu.

⁴⁶Akaboloja litai limɔci libobuno bonεnε, adi bokε a bongejε leka londe losusu bo alisombe.

⁴⁷Bokumu boDiko bodi koko o eyoma edumabama a madiba, na edinga swi tungu na tungu,

⁴⁸Eluma na swi, na badukeli baegbula a mbongu. Basa swi bapele a mitongo, na badumba swi babe.

⁴⁹Ehole ye ekasia, edabí koko boa. Babwénji baDiko bamanabí a bobɔteja babe na bapele.

⁵⁰Badumbabí babe a libulumeja limosa, na badabí oho oko na bio na bokpækpène bomino.

⁵¹Ino ocingeini mijɔ mi misusu? Ibo bajima, Ee.

⁵²Yesu abala na bu bo, Mosɔni yona ocingeaka ngando jiBokumu boDiko adi o moto yona odi na ndako, na amejaka leka loyene na leka loyou a edejai ende.

Yesu a Nasaleta

⁵³Asieja yo mindε mi, Yesu angɔ,

⁵⁴asomb̄ a likota linde mēnē, na akoja a sinagoge ebu. Bato bakamo a bou mēnē na babala bo, Iyo asi bowei bomina j̄o, na ngulu a bok̄ mindumba mimina pongono?

⁵⁵Iyo, te mwana osapante? Ngwa'nde te Malia? Bananango, te baYakobo, Yosepa, Simona na Yuda?

⁵⁶Na ngēnē jinde jesusu jiditi na su ya pongono? Oko boa, yo asi ngando jiji j̄o?

⁵⁷Na bamolona oko bolona. Yesu ko abala na bu bo, Motōnd̄oi adi o motongasa oko a ngando ende mēnē p̄e, na a ndako ende mēnē p̄e.

⁵⁸Aik̄ bimbete binēnē bingulu oho, cina epēnd̄o ebu.

Matayo 14

Bogwa boYoane

¹Kumu Elode aka gala eYesu a masu mamina

²na abala na bakōmeli bande bo, Iyo adi Yoane Mobatisi. Ahuli a bogwa, na akōk̄ mindumba mimina.

³Moj̄ bo, Elode apea Yoane, amokanda mb̄oci, na amosa ta bl̄k̄ a moj̄ moElodia mwali oPilipo yona odaka mwanange 'Elode,

⁴Moj̄ bo, Yoane abala na Elode bo, Mobeko molembaka w̄e bo otas̄ mwali mina.

⁵Elode adaka na posa bo awoe Yoane; yo ko abangaka bato bangando, moj̄ bo, ibo banjaka Yoane o motōnd̄oi.

⁶Iyana ko adaka bo na yenga enēnē a moj̄ mobusa bobobotama boElode, mwamwali oElodia abua ngom̄ a boso bobato babea yo, na asepeja Elode.

⁷A moj̄ momina, Elode ajima na b̄eli bo mwamwali omina aka'nga ekina eka, adi bomopa eka emina.

⁸Ngwa'nde asa a molema monde bo abale bo, Pani molo moYoane a esei.

⁹Elode ajasa dosa. A moj̄ mob̄eli ende ko, na bato babea yo, abekea bo bamop̄e.

¹⁰Aloma mon̄k̄ bo batend̄e molo moYoane a bl̄k̄.

¹¹Badoa na molo monde a esei. Bamopa ai moseka omina; iyo ake na mu ai nango na amopa.

¹²Bacingami baYoane badoa a botomba njemba ende na baepusea. Nḡonḡ jimina, bake a bojebeja Yesu.

¹³Iyana aka Yesu mojɔ momina, atamba a bwato, na adonga ena a bokε a ekina esika ebowi a lisobe. Bato ko, ama bo jeba, ba'mi donga oko a ngando na ngando, na bamokimana a njea engondo.

Yesu apa Molεmbε ai Bato koto jitano

¹⁴Oko boa, yana aduboa yo a bwato, anε bato banεnε, kanga emumu mεnε. Aba'kea wa, na aheleja bato babu baya badaka na bego.

¹⁵Iyana adipa busa, bacingami bande badoa, babala na nde bo, Iso bodi ya a esika, na busa bodipi. Yaneja bato bo bakaduke milεmbε a ngando.

¹⁶Yesu ko abala bo, Ebɔngiti bo bayane. Bapani dia no bεnε.

¹⁷Ibo bajɔ na nde bo, Bodi ya oko na milεmbε mitano pε, na swi babae.

¹⁸Iyo abala bo, Panini ke leka lomina.

¹⁹Apa monɔkɔ bo bato badea na mbondo a njienjie. Atomba milεmbε mitano na swi babae. Akaho miso diko, na ajongoa, Abuka milεmbε na swi, amipa ai bacingami, na bacingami bamipa ai bato.

²⁰Bato bayaka kanga basusu mεnε, na bagola. Bandoa koko bikenge bia bidika, na balumeja sanga domi-na-jibae.

²¹Bami baya bayaka badaka koto jitano na dea, pε bolanga etango ebali na bana.

Yesu adala a diko diMadiba

²²Yesu atambeja bacingami bande a bwato bo balekele a ngunda etongo, na yo adika a bosɔmbeja bimumu bibato.

²³Ama yo sɔmbeja bato, ami kε oko a mokina mono monεnε yo buki a mojɔ mobo'nga, na adaka oho yo buki pε a ehole emɔkɔmɔkɔ.

²⁴Bwato ko bopεkεpεkε a boliko a mojɔ momula, cina bo pwea edongaka a ngunda ekεkε bo.

²⁵Yesu akε oho ai bo a ehole emojukakeli, akadale a diko dimadiba.

²⁶Bacingami, ama bo monε akadale a diko dimadiba, ba'mi ko banga oko bobanga. Bajɔ bo, Edi oko mongɔli! na balebɔ na bo.

²⁷Yesu ko abala na bu bokpa bo, Titejani milema minu; mbi yoyo, t'obangeni oko!

²⁸Pεtelo amosɔmbeja bo, Kumu, isa edi wε soti, beani oho adi wε a diko dimadiba.

²⁹Yesu abala bo, Doa. Pεtelo amana a bwato, na adala a diko dimadiba bo akεe ai Yesu.

³⁰Petelo ko, yana anja yo mopomba, adaka na bɔ, na abanga bodinda. Abekoa bo, Kumu, helejani!

³¹Yesu aninoja ebɔ ende bokpa, amopea, na abala na nde bo, Ejimeli etaki na wε. Odaki na mokakwano mojɔ moye?

³²Batamba a bwato, na pwea eyεyɔ oko boyεyɔ.

³³Bayá badaka a bwato basakoa Yesu na babala bo, Wε odi Mwana oNjambe soti,

³⁴Asemε bo a mbongu, baduboa a likota liGenesaleta.

³⁵Bato baesika emina bambetea Yesu, na baloma ndɔsɔ ebato basusu bayá badaka na bego a likota libu lisusu, na badoa na bu ai Yesu,

³⁶Bamongɔɔnɔ bo babenjɛe oko linyanga likasaka ende, na bayá bakɔ boa bahela a bego bibu.

Matayo 15

BaPalusi na Mijɔ miBatata

¹Bakina BaPalusi na basɔni baYelusalema badoa ai Yesu a ehole emina, na bamohɔjɔ bo,

²Bacingami bawε batasumaka mijɔ mibatata cina eye? Te basosake nongo mɔmɔ mabu a mojɔ mobo yaka.

³Iyo abasɔmbeja bo, Ino bεnε osopakani Mobeko moNjambe a mojɔ mongando jibatata mojɔ moye?

⁴Mojɔ bo Njambe adumba mobeko bo, Toma suma sangwao na ngwao; na moto akasinga sangwa'nde isa ngwa'nde, abwani oko na bogwa.

⁵Moto ko akabala na sangwa'nde isa ngwa'nde bo, Mbi nabwani bopa no eka yeye, naedikejai ko ai Njambe; ino obalakani bo moto omina aditi koko na ekina nongo ai sangwa'nde isa ai ngwa'nde.

⁶Oko boa osetojakani Ebaeli eNjambe cina engando jibatata.

⁷Ino bakosei! Ekenge ebala Yisaya ebwani na nu soti. Iyo abala bo,

⁸Bato ba basumaka mbi na monɔkɔ. Milema mibu ko midi na mbi bohalı.

⁹Basakoaka mbi oko esakoasakoa; Mijɔ mikojaka bo midi oko mibeko mibato pε.

¹⁰Yesu abea bato banεnε ai yo na abala na bu bo, Hokeani na cingeani mojɔ mu.

¹¹Moto t'abehake a moj̄ moeka yena ekweaka ta mon̄k̄ monde. Modi oko moj̄ mua momanaka a mon̄k̄ momoto mua momobejaka.

¹²Bacingami bande badoa ai yo, na babala na nde bo, Ojebaka bo BaPalusi basuboaka a moj̄ mobikenge bimi w̄ bala?

¹³Iyo abas̄ombeja bo, Mele misusu midi Sangwa'mbi p̄e bona, m̄pikoama oko bopikoama.

¹⁴Kinani bade. Bagwa miso, na banejaka bato njea baya bagwa koko miso. Moto yona ogwa miso akaneja moto njea yona ogwa koko miso, bo basusu babae badi bokwa a lib̄enḡe.

¹⁵Petelo amos̄ombeja bo, Cingea so monde momina.

¹⁶Yesu abala bo, Ino omanakinini a libumi?

¹⁷Otacingeakani bo eka ekakwea ta mon̄k̄, en̄k̄ a s̄c̄p̄ na emanaka a njima.

¹⁸Moj̄ mua momanaka a mon̄k̄ ko modongaka a molema; mua mobejaka moto oko mu.

¹⁹Bileli bibe bimanaka a molema, na bowa, na b̄ōli, na lis̄ongi, na liba, na bokosea, na minango.

²⁰Ngando jia jibejaka moto oko ji. Moto ko akayaka, pe bopeta sosa m̄m̄o, moj̄ momina motamobejaka nongo mweka.

Mwali oKanana

²¹Yesu adonga ena na ake a makota maTula na Sidona.

²²Okina mwali oKanana yona odaka a esika emina, amana na abekoa bo, Kumu, Mwana 'Dawidi, ikeani wa! Mwana'mbi mwali adi na mon̄ngo mon̄ene a moj̄ momwembo mobe.

²³Yesu ko ais̄ombeja nongo ekenge. Bacingami bande badoa ai yo na bamonḡcon̄ bo, Moyaneja, moj̄ bo asusaka so na abekoakadea.

²⁴Iyo ko ass̄ombeja bo, Mbi nalomami oko ai bata babungake badenga diYisalaele.

²⁵Mwali ko adoa, asumana ai yo, abala bo, Kumu, k̄omejani!

²⁶Yesu amos̄ombeja bo, Eb̄ongiti bo batombe milembe raibana bak̄ek̄e bo bamidumbe ai bana-mbwa.

²⁷Mwali ko abala bo, Ee, Kumu; bana-mbwa ko bayakaka mbumbu jimol̄emb̄e jia jikwaka a mesa mamoswa'bu.

²⁸Yesu amosombaja bo, Mwali, ejimeli ewe edi enene. Ye modae na we o apalaka wε, Na mwana'nde ahela oko a ehole emina.

Yesu a Galile

²⁹Yesu adonga ena, ahula koko a libale liGalile, na akε akadae a mokina mono.

³⁰Bato badoa ai yo banεnε mεne. Ibo badoa koko na bato bamitεngu, bato bay bagwa miso, na bimimi, na babiεmε, na batongo koko banεnε. Babasambea a boso bonde na abaheleja.

³¹Bato baemumu bakamoa bou yana anε bo bimimi bakabale, bo babiεmε bahela, bamitεngu bakadale, bato bay bama gwa miso baso njεnε, na bakumeja Njambe oYisalaele.

Yesu Ayakeja Bato Koto Jinεi

³²Yesu abea bacingami bande na abala na bu bo, Mbi nadi na wa a mojɔ mobato ba banεnε. Bayeyoi na mbi edεye masu masato, na bapeliti eka eboyaka. Nitapalaka bo nabayanejae boa na nja, basaka kwa limama a njea.

³³Bacingami bamohɔjɔ bo, Adi so ya a esika, iso bodi boboloja milεmbε iɔ, mia mibwani na bato ba banεnε?

³⁴Yesu abahɔjɔ bo, Odini na milεmbε meka? Ibo bε bo, Sambo, na bakina swi babojo.

³⁵Oko boa Yesu apa monɔkɔ bo bato badea na mbondo.

³⁶Atomba milεmbε sambo na swi. Ajongoa, abuka milεmbε na swi, apa bacingami bande, na bacingami bapa milεmbε na swi ai bato baemumu.

³⁷Ibo basusu bayaka na bagola. Bandoa koko bikenge bia bidika, na balumeja sanga sambo.

³⁸Bay a bayaka badaka bato bami koto iinei, pε bolanga bali na bεngε pongono.

³⁹Ngɔngɔ iimina, Yesu ayaneja bato, atamba a bwato, na akε a dɔngɔ diMagadala.

Matayo 16

BaPalusi Baduka Embete

¹BaPalusi na BaSadoki badoa ai Yesu bo bamodingee, Bamo'nga bo abanejae ekina embete eDiko.

²Yesu abasombaja bo, Isa biyembi bidi bikpetu a ehole edipaka busa, obalakani bo, Busa bôbɔngɔ puma.

³Ehumahuma ko, isa biyembi bidi bikpetu, na isa busa bohindi, obalakani bo, Mbua âkwa busa bu. Ojebakani bocingea bimbete bibusa, pε ko bombetea embete eehole yena ebwani.

⁴Bato baelulu ebe na elulu ebɔɔli bapalaka bone eikina embete; batanε nongo embete, oko embete ejona pε. Yesu abakina boa, na adonga a esika emina.

⁵Yana alekela bacingami a dɔ̃ngɔ ditongo, babosa milεmbε botomba.

⁶Yesu abala na bu bo, Nganjamani bopele a mojɔ molipetu liBaPalusi na BaSadoki.

⁷Bacingami babomana kite a mojɔ momina, na bajɔ bo, Edi mojɔ bo botombiti milεmbε.

⁸Yesu, yana anε yo mojɔ momina, abala na bu bo, Obomakani kite mojɔ bo opelitini molembε cina eye? Ejimeli enu edoni?

⁹Ocingeakinini mojɔ? Obosaini mojɔ momilembε mitano na bato koto jitano, na etango esanga jilumejai no?

¹⁰na mojɔ momilembε sambo na bato koto jinei, na etango esanga jilumejai no?

¹¹Otacingeakani mojɔ? Abali mbi na nu bo onganjamani a mojɔ molipetu liBaPalusi na BaSadoki, nabaliti a mojɔ momolembε.

¹²Oko boa bacingea bo abalejekε a mojɔ mobokoja boBaPalusi na BaSadoki, te nongo a mojɔ molipetu limolembε.

Ejimeli ePεtεlo

¹³Iyana amea Yesu a likota liKaisalia-Pilipo, ahɔjɔ bacingami bande bo, Bato babalaka bo Mwana 'Moto adi nda?

¹⁴Ibo bε bo, Bakina babalaka bo odi Yoane Mobatisi. Batongo babalaka bo odi Elia; na batongo koko babalaka bo odi Yelemaya, isa okina motɔndɔi otongo.

¹⁵Yesu abahɔjɔ bo, Ino bεnε ko obalakani bo? Nadi nda?

¹⁶Simona Pεtεlo amosɔmbeja bo, Wε odi Masiya, Mwana 'Njambe obomɔ.

¹⁷Yesu amosɔmbeja bo, Odi na bojongoa, wε Simona mwana 'Yona. Cina bo obolojaiti nongo mojɔ momina na bowεi bomoto. Sangwa'mbi ko yona odi oho Diko amobolojai ai wε.

¹⁸Mbi natɔndɔkɔ wε bo, Wε odi Pεtεlo, na mbi nāyoa Denga dimbi a diko dilitai di; na ngulu eGehena etabwana boedumba.

¹⁹Mbi nadi bopa wε sabe jiBokumu boDiko. Okakanda ekina eka ya nase, êda ekandamake oho Diko. Na okacingoa ekina eka ya nase, êda ecingoamake oho Diko.

20Yesu asi ko alehi bacingami bande bo batatondō nongo moto bo yo adi Masiya.

21Yesu abanga bojebeja bacingami bande a ehole emina bo adi bokε a Yelusalema, bo basuku bangando, na nganga, na basɔni, badi bomodingoja bou mεnε, bo badi bomowa, na bo adi bongɔ koko a busa bomasato,

22Petelo amohengε a dɔngɔ dimɔci, na abanga bolemoa na nde. Abala bo, Kumu, yε bobala boa! Mojɔ momina motakwa nongo na wε.

23Yesu ahekaoa, abala na Petelo bo, Donga ya Satana; ngɔngɔ jimbi! Odi oko libaku a njea embi. Mijo mileke wε midi oko mibato pε, te nongo miNjambe.

Bocingama Na Yesu

24Yesu abala na bacingami bande bo, Isa moto apalaka bocingaraa na mbi, adi bosalona yo mεnε, adi botomba mole-mobokea monde bo asuse mbi.

25Mojɔ bo, yona opalaka bobanea mohelo monde âmobungeja, na yona obungejaka mohelo monde a mojɔ mombi, âmoboloja.

26Nongo moto akakonja ngondo esusu mεnε, na akabungeja mohelo monde, adi bobɔngɔ na ye? Moto adi bosikoa mohelo monde na ye?

27Mojɔ bo, Mwana 'Moto adi bodoa na babwεnji bande a ekumu eSangwa'nde, na adi bokaba ai moto na moto libondo lia libwani na bikɔmeli binde a ehole emina.

28Mbi natɔndɔkɔ no na soti bo bakina ba'mi yaya baya batagwa oko banεkini Mwana 'Moto akadoe a Bokumu bonde.

Matayo 17

Yesu Akindoa Elimo Etongo

1Yana ano masu masamano, Yesu abea Petelo, na Yakobo, na Yoane mwanange eYakobo. Ake na bu a diko dimono monεne, oko bo buki pε.

2Iyo akindoa elimo etongo a boso bobu. Boso bonde bodaka na bolailai bomodika-busa. Bisenja binde bipua kanga bopεε mεnε.

3Mose na Elia basaboloja a boso bobu, na basola na Yesu.

4Petelo abala na Yesu bo, Kumu, modi mojɔ mopele bo so bodaε ya. Okapala, kina napike maako masato; dikina diwε, ditongo diMose, na ditongo koko diElia.

5Yana abalaka yo boa, eyembi ebolailai ebahua oko bohua. Na kɔpi emana a eyembi bo, Iyo adi Mwana 'mbi ongεnɔ; nadi na nde sepi. Mohokeani.

⁶Aka bo kɔpi emina, bacingami bakwa nase, maso mabu a kpɔtɔ, na balulumna bɔ.

⁷Yesu ko adoa, ababanda, na abala na bu bo, Angɔni; t'odaeni oko na bɔ.

⁸Yana adipoa bo miso, banε oko Yesu yo buki pε, pεpε okina otongo.

⁹Yana atitaka bo a mono, Yesu ababekea bo, Yεni botɔndɔ moto mojɔ mo'mi no nε, oko adi Mwana 'Moto pε bopeta ngɔ a bogwa.

¹⁰Bacingami bamohɔjɔ bo, Basɔni babalaka bo Elia adi bopeta doa mojɔ moye?

¹¹Yesu abasɔmbeja bo, Elia abwani bodoa soti a bobɔngeja ngando jesusu.

¹²Mbi ko natɔndɔkɔ no bo Elia adoa ehele, bato ko baimombetea, na bako ai yo o apalaka bo. Bâdingoja Mwana 'Moto koko boa.

¹³Oko boa bacingami bacingea bo abalaka na bu a mojɔ moYoane Mobatisi.

Yesu Aheleja Mwama-Momi

¹⁴Amea bo a esika edaka emumu ebato, okina momi adoa ai Yesu, atita na magbunda a boso bonde na abala bo,

¹⁵Kumu, ike a mwamomi ombi wa. Apekaka na lisiesie, na adi na jɔɔlɔ enεnε, Akwaka ta mosa na madiba mandeli-mandeli.

¹⁶Mbi nadoi na nde ai bacingami bawε, ibo ko pε bobwana bomohɔleja a yogo.

¹⁷Yesu amosɔmbeja bo, Elulu ye epeliti ejimeli, na edi elaboake. Mbi nadi boyeyoa na nu ekoka? Nadi bohɔnɔ mijɔ minu ekoka? Doani na mwana ai mbi.

¹⁸Yesu alema na mwembo mobe, na momana ai yo; na mwamomi ahela oko bohela.

¹⁹Yana adaka Yesu yo buki, bacingami bande badoa ai yo na bamohɔjɔ bo, Iso bobwaniti bomeja mwembo mobe cina eye?

²⁰Yesu abala na bu bo, Cina bo ejimeli enu ehɔliti. Mbi nabalaka na no bo, Akɔki no da na ejimeli o adi mongua mosinape, ka obwanini bobala na mono mu bo modonge ya a bokε a esika etongo, na modi bodonga; na odini bohɔnɔ ngando jesusu.

²¹Elimo ye emwembo ko edi bomana oko a mojɔ mobo'nga na ekia edia.

Mojɔ moBogwa na Bo'ngɔ BoYesu

²²Iyana adalaka bo a Galile, Yesu abala na bu bo, Badi bokaba Mwana 'Moto a mɔmɔ mabato babe.

²³Badi bomowa, iyo ko ângɔ a busa bomasato, Ibo badaka na wa enεnε a mojɔ momina.

Yesu Na Tako eTempelo

²⁴Amea bo a Kapalanauma, baputeja batako etempelo badoa ai P̄etelo na bamoh̄j̄o bo, Mokoja onu aputaka tako etempelo?

²⁵Iyo ajima, Ee. Yana akwea yo a ndako, Yesu ajeba moj̄ mua modaka a molema monde, na abala bo, Simona, wε ol̄ekε bo? Bakumu bangondo ye baputejaka bana babu b̄en̄e tako, isa midoa?

²⁶P̄etelo amos̄mbeja bo, Oko midoa. Yesu abala na nde bo, Isa edi boa, bana bataputa.

²⁷Pe moj̄, botapalaka bo bobakejae kεlε. Kε adumbe bob̄ a madiba, osa ko owoe swi om̄ci. Okamohwa a madiba, dipoa mon̄k̄ monde na ône ekenge elikonja ena. Tomba du na ôbapa a moj̄ mosu na wε.

Matayo 18

Yona Odi Boso a Bokumu boDiko

¹Bacingami baYesu badoa ai yo a ehole emina na bamoh̄j̄o bo, Odi boso a Bokumu boDiko nda?

²Yesu abea okina mwana mok̄ek̄eleke, amodeja a ndanda ebu,

³na abala bo, Mbi nat̄nd̄k̄ no na soti bo omiti kindoani, bo odaeni o bana bak̄ek̄eleke, otakweani nongo a Bokumu boDiko.

⁴Moto akasatiteja bo adae o adi mwana yoyo, yo âda boso a Bokumu boDiko.

⁵Iyona os̄k̄ okina mwana mok̄ek̄eleke o adi yo, a kombe embi, as̄k̄ mbi m̄en̄e.

⁶Moto ko akasakeja okina obu bak̄ek̄eleke bayajimeaka mbi, bopele bo bacingee litai lin̄en̄e a d̄li linde, na bamodumbe a madiba mandinda.

⁷Mon̄nḡ a ngondo a moj̄ momabaku! Mabaku madi boda soti. Mon̄nḡ ko ai moto yona osakejaka batongo.

⁸Eb̄ ewε isa ebota ewε ekasakeja wε, tend̄, na dumba eb̄ emina, isa ebota emina. Na bokwea a bom̄ na eyεmε, isa na mot̄engu, na bodumbama na m̄om̄ mabae, sa bibota bibae, a mosa mua modi na bosusu, en̄i na bopele bo moto akwee a bom̄ na eyεmε na mot̄engu.

⁹Okak̄ bobè a moj̄ modiso diwε, ihwa na dumba diso dimina. Na bokwea a bom̄ na diso lim̄ci, na bodumbama a mosa moGehena na miso mabae, en̄i na bopele bo moto akwee a bom̄ na diso lim̄ci.

¹⁰Nganjamani bo otasetojani okina obana ba bak̄ek̄eleke. Mbi nat̄nd̄k̄ no bo babw̄en̄ji babu oho Diko banjaka boso boSangwa'mbi yona odi oho Diko.

Monde moBata Molaboake

11Mwana'Moto adoi a boheleja yona odaka mobungake.

12Ino olekeni bo? Isa moto adi na bata mokama, na okina obu akalaboa, moto omina atakina bata domi-libwa na libwa a meno, bo ak  e a boduka yona om  ci molaboake?

13Na akamoboloja, mbi nat  nd  k   no na soti bo, sepi ende a mo  j mobata yona om  ci, edi bon   sep   Ende a mo  j mobata domi-libwa na libwa bay a balaboiti.

14Oko boa pongono, Sangwa'mbi yona odi oho Diko atapalaka bo okina obu bakekel  ke abunge.

Boy   boJibe

15Mwangwao akak   w   bobe, ke abale na nde mo  j momina oko no babae p  , Akahokea w  , oko boa osii mwangwao bosili.

16Amiti hokea w   ko, bea bakina bato batongo, om  ci isa babae na dea, a bolena mo  j na ebaeli ebanj  n  ki babae isa basato.

17Akalona bobahokea, jebeja Denga mo  j momina. Akalona koko bohokea Denga, y   adae o mopakano na moputejai otako a miso maw  .

18Mbi nat  nd  k   no na soti bo leka losusu lokandaka no ya nase, l  kandama oho Diko. Na okalolojani leka ya nase, l  lolojama oho Diko.

19Nat  nd  k   no koko bo, bakina banu babae bakada na molema mom  ci ya nase a bonga mokina mo  j, Sangwa'mbi yona odi oho Diko â  k   mo  j momina ai bo.

20Mo  j bo, bato babae isa basato bakatitana a kombe embi, mbi m  ne nadi ena a ndanda ebu.

21P  telo adoa ai yo na amoh  j   bo, Kumu, mwangwa'mbi akak   mbi bobe, nabwani bomoye bihole beka? Oko bihole sambo?

22Yesu abala na nde bo, Mbi nabalaka na we bo, Te nongo bihole sambo, oko bihole domi-sambo-sambo.

Mond   moMok  m  li Mobe

23Bokumu boDiko bodi o kumu om  ci yona opala bokokeleja mikanda mibak  m  li bande.

24Abanga yo bokokeleja, badoa ai yo na okina yona odaka na nongo ai yo, talenta koto domi.

25Iyo ko aidaka na likonia a bosieja nongo ende. Kumu onde ajima bo bang  j   moto omina, na mwali onde, na bana bande, na leka londe losusu m  ne, a mo  j mobo'ta nongo.

²⁶Mokɔmeli omina atita na magbunda, na amongoɔnɔ bo, Kumu, ambɛjɛ molema a mojɔ mombi. Nadi bo'ta kanga esusu menɛ.

²⁷Kumu omokɔmeli omina amokea wa; amocingoa, na amokinea nongo emina.

²⁸Mokɔmeli omina ko, yana amana yo, asongana na okina mokɔmeli otongo, yona odaka na nongo ai yo, flanka mokama. Amopea a ekoolo na abala na nde bo, Seja nongo ewɛ!

²⁹Mokɔmeli omina atita na magbunda na amo'nga bo, Ambɛjɛ molema a mojɔ mombi. Nadi bo'ta kanga esusu menɛ.

³⁰Iyo ko aijima; akɛ na amosa ta blɔkɔ bo asiejae nongo.

³¹Yana anɛ bina'nde bakɔmeli mojɔ momina, badaka na wa enɛnɛ, na bake a botɔndɔ kumu obu mojɔ mosusu.

³²Kumu onde amolomeja, na abala na nde bo, Wε mokɔmeli mobe! Mbi nakinei we nongo ewɛ esusu cina bo ongɔnɔ mbi.

³³Oko boa wε obwani bokea minao mokɔmeli wa pongono, o akei mbi wε wa.

³⁴Kumu onde aka kɛlɛ enɛnɛ, na amopa a mɔmɔ mabato bablɔkɔ oko adi yo pε bopeta sieja nongo ende esusu.

³⁵Sangwa'mbi yona odi oho Diko adi bokɔ na nu koko boa, omiti yɛni moto na moto mwangwa'nde na molema monde mosusu.

Matayo 19

Mojo moBolongana

¹Yana asieja Yesu bobala ngando jmina, adonga a Galile. Aleka Yoladene, na amea a ngunda eYuda a dɔngɔ dia.

²Bato bamosusa oho kanga banɛnɛ menɛ, na abaheleja a bego oho.

³BaPalusi badoa ai yo bo bamomeke na lihɔjɔ bo, Mwali omoto akada na mokina mojɔ, momi abwani bomoyaneja?

⁴Iyo abasɔmbeja bo, Ino olangakinini bo yona obakɔ a bobanga, abakɔ momi na mwali,

⁵na yo abala bo, A mojɔ momina, momi adi bokina baboti bande bo alongane na mwali onde, bo ibo babae badea oko omɔci pε.

⁶Oko boa baditi koko babae; badi oko omɔci pε. A mojɔ momina, Njambe akakataneja bato, t'okine oko moto ababɔtejae.

⁷Ibo babala na Yesu bo, Isa modi boa, Mose abekeea bo bapɛ mwali mokanda mobobɔtɔnɔ bo bamoyanejae mojɔ moye?

⁸Yesu abasɔmbeja bo, Mose ajima bo oyanejaeni bali banu oko a mojɔ momilema minu mipingamake. Moidaka nongo boa a bobanga,

⁹Mbi ko natɔndɔkɔ no bo, Moto akayaneja mwali onde—emiti da cina ebɔɔli—na akasɔ mwali otongo, angɛke na nde oko bɔɔli. Na moto akasɔ mwali oma yo yaneja, angɛke na nde bɔɔli pongono.

¹⁰Bacingami bande babala na nde bo, Isa mojɔ momomi na mwali modi boa, enɔi na bopele bo moto atasɔ nongo mwali.

¹¹Iyo ko abasɔmbeja bo, Babwani boso mojɔ momina, te nongo bato basusu, oko baya basi mojɔ momina o epeeli.

¹²Bakina babotama oko batete. Batongo badi boa mojɔ bo balenama na bato. Batongo koko badi boa baya basalena bo bɛnɛ a mojɔ moBokumu boDiko. Moto akahɔnɔ, ye ase mojɔ momina.

Yesu Apamboa Bana Bakɛkɛ

¹³Badoa na bakina bana bakɛkɛ ai Yesu bo abakee mɔmɔ mande ai bo, na bo ange a mojɔ mobu. Bacingami ko balemoa na bu.

¹⁴Yesu ko abala bo, Kinani bana ba bakɛkɛ; yɛni badoe ai mbi, mojɔ bo Bokumu boDiko bodi oko ai bo.

¹⁵Abakea mɔmɔ mande ai bo na adonga ena.

Konji Ahɔjɔ Yesu Mojɔ

¹⁶Okina moto adoa ai Yesu, na abala na nde bo, Mokoja, mojɔ mopele mɔkɔ mbi nda bo nase bomɔ bua botasia?

¹⁷Yesu amosɔmbeja bo, Ohɔjɔkɔ mbi a mojɔ mobopele cina eye? Omɔci pɛ adi mopele. Wɛ ko, isa opalaka bo okwee a bomɔ, toma suma mibeko.

¹⁸Iyo ahɔjɔ bo, Mibeko nda? Yesu amosɔmbeja bo, T'owoe oko moto. T'ongee oko bɔɔli. T'obe oko.

¹⁹T'otate oko tati ebokosea. Suma sangwao na ngwao, na toma pala motuteano mowɛ o asapalaka wɛ mɛnɛ.

²⁰Mwenga omina abala na nde bo, Mbi namisumaka misusu. Mojɔ motongo motaki na mbi nda?

²¹Yesu amosɔmbeja bo, Isa opalaka bobɔngɔ na soti mɛnɛ, kɛ angɛjɛe leka lowɛ losusu, na kaba na bato babokwali, nongo odae na likonja liyumu oho Diko; osa ko odoe a bocingama na mbi.

²²Yana aka yo ekenge emina, mwenga omina ayana na wa a molema monde, cina bo adaka na makonja manɛnɛ mɛnɛ.

²³Yesu abala na bacingami bande bo, Mbi natɔndɔkɔ no na soti bo moto yona opeli likonja linɛnɛ adi bokwea a Bokumu boDiko oko na kpɔkɔsɔ.

²⁴Ee, natɔndɔkɔ no koko bo, Bonɔ bokamela a diso litonga, na bokwea bomoto olikonja linɛnɛ a Bokumu boDiko, bokwea bomoto olikonja linɛnɛ a Bokumu boDiko bonɔi na kpɔkɔsɔ.

²⁵Yana aka bacingami ekenge emina, bakamo a bou mɛnɛ, na babala bo, Ekada boa, odi bohela nda?

²⁶Yesu abanja linjenje, na ajɔ na bu bo, Bato te babwanake na mojɔ mu. Njambe ko abwani bokɔ ngando iisusu.

²⁷Petelo amosɔmbeja bo, Ika; iso bokini leka losusu a bocingama na wɛ. Êsɔ so ndeni?

²⁸Yesu abala na bu bo, Mbi natɔndɔkɔ no na soti bo Mwana 'Moto akadabí a ngende eekumu ende a ngondo eyene, ino bay a bacingami na mbi odabíni a mingbelengɔ domi-na-mibae a bosambeja makota maYisalaele domi-na-mabae.

²⁹Moto akakina ndako, isa bananango, isa ngɛnɛ, isa sango, isa nango, isa bana, isa gbie, a mojɔ mokombe embi, adi boso libondo lia linoi na bonɛnɛ, na adi bosangoa bomɔ bua bodi na bosusu,

³⁰Banɛnɛ ko bay a badi saboso badi boda sanɔngɔ, na banɛnɛ bay a badi sanɔngɔ badi boda saboso.

Matayo 20

Monde moBasali

¹Mojɔ bo Bokumu boDiko bodi o moswa' elomu yona omana ehuma a boduka basali a mojɔ moelomu egbie ende.

²Ajima na bu bo abapɛ tu busa pata emɔci-emɔci, na abaloma a gbie ende.

³Amana koko a ngonga *eneuf heures*, na atana bakina batongo bay a badaka ba'mi oko ema'ma a jando.

⁴Ajɔ na bu bo, Ino pongono, kɛni a gbie embi, na nâpa no likonia lia libwani. Oko boa bake.

⁵Amana koko a midi na *trois heures*, na akɔ koko boa.

⁶Amana yo a *cinq heures*, atana bakina batongo bay a badaka oko ba'mi ema'ma; abala na bu bo, Ino odini ya busa bosusu edada mojɔ moye?

⁷Ibo bamosɔmbeja bo, Mojɔ bo moto abeiti so a elomu. Iyo abala na bu bo, Ino pongono, kɛni a gbie embi.

⁸Yana adipa busa, moswa 'gbie abala na kapita onde bo, Bea basali na bapa likonja libu. Banga na yona osuka, na sukeja na yona oboso.

⁹Adoa basali baya bakwea a elomu a *cinq heures*, basɔ tu moto pata-pata.

¹⁰Adoa ko basali baboso, ibo badaka na njingo bo likonja libu lidi bohε. Ibo ko basɔ koko pata-pata.

¹¹Asɔ bo likonja limina, bahima moswa ogbie

¹²na babala bo, Iso bokɔi elomu busa bosusu na moi mopipo; ibo ko bangɔngɔ bakɔi elomu oko heure emɔci pe, na obabwanejai na su amεci.

¹³Iyo asɔmbeja okina obu bo, Moninga, mbi nitakɔkɔ wε bobe. Iso na wε bojimiti bo napε we pata emɔci?

¹⁴Tomba libondo liwε na yana. Mbi najimaka bo napε moto osuka oko na mwɛngi mowε.

¹⁵Nakapala bokɔ na likonja limbi boa, modi mojɔ mombi mɛnε. Odi na mbi lipɔle mojɔ bo nadi na likabo?

¹⁶Oko boa baya basuka badi boda boso, na baya baboso badi boda oko a suka.

Yesu Abala a Mojɔ moBogwa Bonde

¹⁷Iyana adaka Yesu a njea bo akεe a Yelusalema, abea bacingami domi-nababae a dɔŋɔ dimɔci, na abala na bu a njea bo,

¹⁸Hokeani; iso bokεkε a Yelusalema, na Mwana 'Moto âkabama ai basuku banganga na basɔni, baya bâjima bo agwε.

¹⁹Ibo bâmopa a mɔmɔ mabapakano bo bamopɔmbejae, bo bamotue na bamowoe a molemobokea; iyo ko âŋɔ koko a busa bomasato.

Bana baSebede

²⁰Nange ebana-bami baSebede adoa na bana bande ai Yesu, atita na magbunda a boso bonde a bomo'nga mokina mojɔ.

²¹Yesu abala na nde bo, Epalaka wε ndeni? Asɔmbeja Yesu bo, Jima bo bana-bami ba bambi babae bade a bidie a Bokumu bowε, okina a ebo ewε ebami, na otongo a ebo ewε ebali.

²²Yesu asɔmbeja bo, Otacingakani mua mongaka no. Ino obwanini bomwa kɔpɔ ekεkε mbi bomwa? Bamosɔmbeja bo, Bobwani.

²³Yesu abala na bu bo, Odini bomwa kɔpɔ embi soti; mojɔ moboda ko a bidie a ebo embi ebami, na a ebo embi ebali, mocingiti na mbi. Modi mojɔ moSangwa'mbi yona obihɛnɛ ai bato bahɔ yo.

²⁴Bacingami batongo domi, yana aka bo mojɔ momina, bakɛnɔ na bananango babae.

²⁵Yesu ko ababea ai yo na abala na bu bo, Ino ojebakani bo bakumu bamakota basakumejaka a boso bobato babu, na basuku babu badi na kpaci ai bo.

²⁶Motada nongo boa a tei enu. Isa okina apalaka bo adae moto monɛnɛ a tei enu, yε adae mokɔmɛli onu.

²⁷Isa okina apalaka bo adae kumu onu, yε adae oko mobuli onu,

²⁸o adi Mwana 'Moto yona odoa bo apε mohelo monde o lisiko libato banɛnɛ, te bo bato badi bomokɔmɛ.

Bami Babae Basɔ Njɛnɛ

²⁹Adongaka bo a Yeliko, bato badaka bacingi ngɔngɔ jinde banɛnɛ mɛnɛ.

³⁰Bakina bami babae baya bagwa miso badaka na mbondo a dɔngɔ dinjea. Yana aka 'bo bo Yesu akancɛ, babekoa bo, Kumu, Mwana 'Dawidi, ike so wa!

³¹Bato ko balemoa na bu, na babatɔndɔ bo bade bogo. Ibo ko bahɛjɛ bingi, na babekoa na bopipo mɛnɛ bo, Kumu, Mwana 'Dawidi, ike so wa!

³²Yesu ama, ababea na abala bo, Epalaka no bo nakɔe ai no ndeni?

³³Bamosɔmbeja bo, Kumu, yε bose njɛnɛ esu.

³⁴Yesu aba'kea wa, abɛnɛ miso mabu, na basɔ njɛnɛ ebu bokpa, na bacingama na nde.

Matayo 21

Yesu Akwea a Yelusalema

¹Babenga bomea a Yelusalema, na yana amea bo a Betepage, oko a Mono moOlive, Yesu aloma bacingami bande babae na bwɛnji.

²Abala na bu bo, Suani boso a ngando yena oho; ônɛni bokpa okina punda acingi, na mwana'nde pongono. Bacingoani, na doani na bu ai mbi.

³Moto akabala na nu a mojɔ momina, balani oko bo Kumu ababeaka; na adi bobalomia bokpa.

⁴Modaka boa a bongameja ekenge ebala motɔndɔi bo,

⁵Balani na mwamwali oSiona bo, Anja, Kumu owe akɛkɛ adoe ai wε. Adi na monganji; adi abaki a punda, Na a mwana-punda.

⁶Bacingami bakε, na bakɔ o ama bala Yesu na bu.

⁷Bahula na punda na mwana'nde. Babakea bisenja bibu ai bo na Yesu akonda.

⁸Bato banen̄e baemumu batanda bisenia bibu a njea, na batongo balena mandend̄e na bamasambea a njea.

⁹Lindundu libato bayai badalaka a boso bonde na ngɔngɔ ende babekoa bo, Osana ai Mwanai 'Dawidi! Bojongoa ai yona odoaka a kombe eKumu! Osana oho Diko!

¹⁰Amea yo a Yelusalema, ngando esusu edaka na wokowoko. Bato babala bo, Iyo moto ndani?

¹¹Bato bayi badaka bacingi na nde basɔmbeja bo, Iyo adi motɔndɔi, Yesu oNasaleta oho Galile.

Yesu a Tempelo

¹²Yesu akwea a tempelo eNjambe, na abengana bato basusu baya bakɔkɔ bwasa a tempelo, Akukea mesa mabasɔmbɔtɔni balikonja, na bidie bibato baya bangejekɛ sungu.

¹³Abala na bu bo, Mosɔnɔmɔ bo, Ndako embi êda na kombe Ndako ebo'nga. Ino ko oehekojaini bo edae esika etitanaka mibengo.

¹⁴Bato bayi bagwa miso, na bato bamitengu, badoa ai yo a tei etempelo, na abaheleja oko ena.

¹⁵Basuku banganga na bassoni bakɛnɔjɔ oko bokɛnɔjɔ yana anɛ bo mindumba mikɔkɔ yo, na yana aka bo bɛnge bakabekoe a tempelo bo, Osana ai Mwana oDawidi!

¹⁶Babala na Yesu bo, Okakadea mojɔ mobalaka bo? Iyo abasɔmbeja bo, Ee; ino ko olangakinini ekenge yeye? Obɔngejai njembo jibosakoa a minɔkɔ mibana bakɛke na bana bamabei.

¹⁷Abakina boa na adonga a ngando bo akee a Betania, na ahwe oko oho.

Mondɛ Momole Mua Mogwa

¹⁸Yana ahulaka Yesu a Yelusalema ehuma, aka nja.

¹⁹Anɛ mokina mole a dɔŋgɔ dinjea, na ake oko a mole momina, pɛ ko bone nongo mbuma, oko kasa pɛ. Abala na mole bo, Otabota koko mbuma na ikina. Na mole mohɔlɔngɔnɔ bokpa.

²⁰Yana anɛ bacingami mojɔ momina, bakamo a bou mɛnɛ, na babala bo, Mole mohɔlɔngɔnɔ bokpa bo na ye?

²¹Yesu abasɔmbeja bo, Mbi natɔndɔkɔ no na soti bo okadani na ejimeli, pɛpɛ nongo boboma kitɛ, otakɔni oko mojɔ mo'mi mbi kɔ a mole pɛ; odini bobala na mono mu bo modonge ena a bokwa a madiba-mamukwa, na modi bokɔ bo.

22Oka'ngani na ejimeli a bo'nga bonu, odini boso ngando jesusu jingaka no.

Yesu na Nganga

23Yesu akwea a tempelo, na yana akojaka yo ena, basuku banganga na basuku bangando badoa na bamohoję bo, Wε okokɔ̄ ngando jiji na kpaci enda?

24Yesu abasɔ̄mbeja bo, Mbi nadi koko ha lihɔ̄jɔ̄ a bohɔ̄jɔ̄ no. Okasɔ̄mbejani, mbi nadi bojebeja no yona opani kpaci ebokɔ̄ na ngando jiji.

25Batisimo eYoane ehula jɔ̄? Edi mojɔ̄ moDiko isa mobato? Ibo babomana kite, na babalana bo, Bokabala bo ehula Diko, yo adi bohɔ̄jɔ̄ so bo, Oko boa, oimojimeani mojɔ̄ moye?

26Bokabala bo edi mojɔ̄ momoto pε, bodi na bɔ̄ a mojɔ̄ mobato bangando, cina bo bajimaka bo basusu bo Yoane adaka motɔ̄ndɔ̄i.

27Oko boa, basɔ̄mbeja Yesu bo, Botajebakadea. Na Yesu abala na bu bo, Mbi koko boa, nitajebeja no yona opani kpaci ebokɔ̄ na ngando jiji.

Mondε moBana Babae

28Ino olékəni bo? Okina momi adaka na bana-bami babae. Ake ai mosuku na abala na nde bo, Mwana'mbi, ke akɔ̄e elomu a gbie busa bu.

29Iyo asɔ̄mbeja bo, Mbi naloni. Ambejε ko molema ngɔ̄ngɔ̄, na ake.

30Abala na mwana otongo koko boa. Mwana omina asɔ̄mbeja bo, Ee sesa, najimi. Iyo ko aike.

31Obu babae, yona okɔ̄ bolulea bosangwa'nde nda? Ibo bε bo, Oko yona oboso. Yesu abala na bu bo, Mbi natɔ̄ndɔ̄kɔ̄ no na soti bo baputeja batako, na bato babɔ̄ɔli, badi bonɔ̄ boso bonu a njea eBokumu boNjambe.

32Mojɔ̄ bo Yoane adoa ai no a njea ebodongo, ino ko oimojimeani. Baputeja batako ko na bato babɔ̄ɔli bamojimea. Ino ko, nongo yana anε no mojɔ̄ momina, oihekojani milema minu ngɔ̄ngɔ̄ bo omojimeni.

Mondε moBasali a Gbie

33Hokeani monde mosusu. Okina momi adaka na ndako, na ana gbie evine. Aehika na mongba, na aselingoa eboka a bonda mbuma. Apika ndako esinjili, akina gbie a mɔ̄mɔ̄ mabasali, na ake mokina mɔ̄ngɔ̄.

34Yana amea ehole ebobisa mbuma, yo aloma bakɔ̄meli bande ai basali bo base libondo linde.

35Basali bagbie ko bapea bakɔ̄meli bande. Eatua okina, bawa otongo, na ba'la okina otongo matai.

³⁶Aloma koko bakina bakɔmeli batongo; etango ebu enɔ bay a baboso; na bakɔ na bu koko boa.

³⁷Suka mɛnɛ, aloma mwana'nde mɛnɛ ai basali. Abala bo, Badi bosuma mwaria'mbi.

³⁸Basali bagbie ko, yana ane bo mwana, bajɔ bo, Sangoli yona! Kɔni bomowoe, na bokatoe lisango linde,

³⁹Oko boa bamopea, bamodumba a sokolu egbie na bamowa.

⁴⁰Moswa 'gbie akadoa, âkɔ na basali bamina bo?

⁴¹Bamosɔmbeja bo, Âwa bato ba babe na sanga, na âkina gbie ende a mɔmɔ mabato batongo bay a badi bomopa libondo linde a ehole ebobisa.

⁴²Yesu abala na bu bo, Ino olangakinini bikenge bi a Misɔnɔ? Litai lidumbi bayoi Lidi edεye litai limogbukusu. Njambe akɔi mojɔ mu, Na modi mojɔ mobokamoa a miso masu.

⁴³A mojɔ momina, mbi nabalaka na nu bo, Bokumu boDiko bôka-toama ai no, na bôpama a likina likota lia libotaka mbuma jiBokumu.

⁴⁴Moto akasaka a litai di, âbukana na du; likakwa ko diko dimoto, lîmominakaka oko bominakaka.

⁴⁵Yana aka BaPalusi na nganga mindɛ mi miYesu, basipoa bo abalaka a mojɔ mobu,

⁴⁶na baduka njea bo bamopee. Badaka ko na bɔ a mojɔ mobato bangando, cina bo, ibo bajimaka bo adi motɔndɔi.

Matayo 22

Mondɛ moLihonje Lilihango

¹Yesu abakoja koko namindɛ.

²Abala bo, Bokumu boDiko bodi o kumu omɔci yona okalea libonje lilihango limwana'nde momi,

³Aloma bakɔmeli bande a ndɔsɔ ebato bay a bama yo bea a lihango. Ibo ko balona bodoa.

⁴Aloma koko bakɔmeli batongo. Abala na bu bo, Jebejani bato babea mbi bo naselingoi libonje lilihango. Nawoi ngɔmbɔ na bingbende bimbi bimuta. Leka losusu lobwani. Doani a libonje lilihango.

⁵Bato bamina ko baihokea nongo bwɛnji, na bakes, okina a gbie ende, na otongo a elomu ende ebwasa,

⁶Bakina batongo bapea bakɔmeli bande, babasamboja, na babawa.

⁷Kumu agbilimwana kɛnɔ̄. Aloma basoda bande a bowa bawoi bamina, na batumba ngando ebu.

⁸Abala koko na bakɔmeli bande bo, Libonje lilihango libwani, Bato ko babea mbi babɔngiti.

⁹Oko boa, toma kɛni a mɛlɛ manjea, na beani bato basusu bâtana no oho bo badoe a libonje lilihango.

¹⁰Bakɔmeli bamina bamana, bakɛ a macilinga, na batitaneja bato basusu batana bo oho, na babe na bapele pongono, Ndako elibonje eluma na bato botɔ̄.

¹¹Yana akwea kumu a bonja bato, anɛ momi omɔci yona oidaka na molilo molibonje lilihango.

¹²Abala na nde bo, Moninga, okwei jɔ̄no, pɛ bopeta lwa molilo molihango mojɔ moye? Moto omina aidipoa nongo monɔ̄ko.

¹³Kumu abala na bakɔmeli bande bo, Mokandani mɔmɔ na mako, na modumbani sokolu a modidi, a esika êda bio na bokpɛkpene bomino.

¹⁴Mojɔ bo, bato banɛnɛ babeamaka, baya bahɔmɔkɔ ko badi oko baleka pɛ.

Lihɔjɔ̄ liBaPalusi

¹⁵Ngɔngɔ̄ jimina, BaPalusi bake na badumba ndungu bo badumbe Yesu na poloso a mojɔ moebaeli ende.

¹⁶Bamolomea bakina bacingami babu, na bakina bato baElode, a bohɔjɔ̄ Yesu bo, Mokoja, iso bojebaka bo we odi moto osoti. Okojaka njea eNjambe na soti mɛnɛ. Otabangaka nongo moto, mojɔ bo ekumu emoto edi eka engasa a miso mawɛ.

¹⁷Oko boa, cingea so mojɔ mu; wɛ olɛkɛ bo? Ebɔ̄ngi bo bopute tako ai Kaisala, isa ebɔ̄ngiti?

¹⁸Yesu ko acingea ndungu ebu ebe, na abala bo, Ino bakosei, odingeakani mbi mojɔ moye?

¹⁹Anejani mbi ekenge elikonja liputaka no na tako, Bamopeja flanka,

²⁰na yo abahɔjɔ̄ bo, Elimo ye na mosɔ̄nɔ̄ mu monda?

²¹Bamosɔ̄mbeja bo, Oko moKaisala. Iyo abala na bu bo, Kabani ai Kaisala libondo liKaisala, ai Njambe ko, libondo liNjambe.

²²Yana aka bo ekenge emina bakamoaioko bokamoaioko; bamokina boa na bayana.

Lihɔjɔ̄ liBaSadoki

²³BaSadoki badoa koko ai yo a busa bomina. Ibo te bajimake bo bato badi bongɔ a bogwa,

²⁴Bahɔjɔ Yesu bo, Mokoja, Mose abala bo moto akagwa, pε bokina bana, mwangwa'nde adi bossɔ mwali onde bo abote na nde bana a mojɔ momwa'nango.

²⁵Oko boa so bodaka na bato bami sambo a ngando esu, bana banange emɔci. Yona oboso aso mwali, na agwa, pε bobota nongo bana. Mbakeli onde adika na mwali onde.

²⁶Iyo ko agwa koko boa, na yona obasato pongono, na bo basusu sambo.

²⁷Suka mɛnɛ, mwali agwa pongono.

²⁸Oko boa, bagwake bakangɔ, mwali omina adi boda mwali onda? Mojɔ bo, ibo basusu sambo bamosɔ.

²⁹Yesu abasɔmbeja bo, Odini na libunga, mojɔ bo otacingeakani Misɔnɔ na ngulu eNjambe.

³⁰Bagwake bakangɔ, batassɔ nongo bali, na batahangā bali ta meki. Bâda o babwɛnji baNjambe.

³¹Ino olangakinini ekenge ebala Njambe na nu a mojɔ mo bongɔ bobagwake? Iyo abala bo,

³²Mbi nadi Njambe oAbalayama, Njambe oIsaka, na Njambe oYakobo. Njambe aditi Njambe obagwake. Adi oko Njambe obato bayā badi mɔ.

³³Bato baemumu baka ekenge emina, na bakamoa a mojɔ mobokoja bonde.

Lihɔjɔ liBaPalusi

³⁴Iyana aka BaPalusi bo Yesu ama gbokeja BaSadoki, ibo batitana ai yo;

³⁵na okina obu, mokoja oMibeko, amomeka na lihɔjɔ bo,

³⁶Mokoja, mobeko mua modi boso bomibeko misusu mitongo modi bo?

³⁷Yesu amosɔmbeja bo, Toma pala Kumu Njambe owe na molema mowɛ mosusu, na mwembo mowɛ mosusu, na bole bowɛ bosusu.

³⁸Mobeko moboso, mobeko mua monɔi misusu mitongo oko mobeko momina.

³⁹Mobeko momibae modi koko boa, Toma pala motuteano mowɛ o asapalaka wɛ mɛnɛ.

⁴⁰Alibeko misusu, na misɔnɔ misusu mibatɔndɔi, micingi oko na mibeko mi mibae.

Lihɔjɔ liYesu

⁴¹Adaka BaPalusi baboli boa, Yesu abahojø lihøjø pongono.

⁴²Abala bo, Ino olékèni bo a mojø moMasiya? Adi Mwana onda? Ibo bε bo, Mwana oDawidi.

⁴³Yesu abala na bu bo, Oko boa, yana adaka Dawidi a Mwembo, yo amobeaa Kumu mojø moye? Iyo abala bo,

⁴⁴Kumu abali na Kumu ombi bo, Da ya a ebɔ̄ embi ebami, Oko a ehole êdumba mbi soki jiwe a cina jibibota biwε.

⁴⁵Isa Dawidi amobeaka Kumu, adi boda koko Mwana onde o bo?

⁴⁶Ibo basusu bahogoga bogo, pε bomosɔ̄mbeja nongo ekenge. Donga oko a busa bomina, badaka na bɔ̄ a bomohojø koko mahojø.

Matayo 23

Eleho eYesu a Mojo moBaPalusi

¹Yesu aleha bato na bacingami bande a ehole emina.

²Abala bo, Basɔ̄ni na BaPalusi badi a mongbelengø moMose.

³Oko boa sumani na kɔ̄ni ngando jisusu jikojaka bo no. Pε ko bokoanani na bikɔ̄meli bibu, cina bo bikɔ̄meli bibu na bibaeli bibu bisangiti.

⁴Bakandaka mina mimanji mia midi na kpɔ̄kɔ̄sɔ̄ a botomba, na bamilwajaka a malɔ̄kubku mabato, bo bɛnε ko pe bongojø nongo mosapi a bokɔ̄meja,

⁵Bilomu bibu bisusu bidi oko na njingo bo bato babanεe. Balwaka misɔ̄nɔ̄ minenεnε a macinga mambanda, na kasaka jibu jidi na manyanga manenεnε.

⁶Bapalaka bisika biekumu a mabonje, na bidie biboso a matitana.

⁷Bapalaka bo bato bababεjεe njεbε a esanjo, na bo bababee Labi.

⁸Ino ko, t'ojimeni oko bo bato babee no na kombe Labi; mojø bo mokoja onu adi, na odini baninga no bɛnε.

⁹T'obeeni oko moto ya nase sangwa'nu; mojø bo odini na Sangwa'nu oko omɔ̄ci, na yo adi a Diko.

¹⁰T'ojimeni oko bo bato babee no baswa'bu; mojø bo, ino bɛnε odini na Moswa'nu omɔ̄ci, oko Masiya.

¹¹Okina onu akada monεnε a tei enu, yε adae mokɔ̄meli onu.

¹²Moto akasakumeja, adi bosamboa; na moto akasatiteja yo mεnε, adi bossɔ̄ ekumu.

¹³Monɔngɔ ai no basɔni na BaPalusi, no bakosei! Mojɔ bo odipakani njea eBokumu boDiko ai bato. Otakweakani ena no bene, na otapakani njea ebokwea ai bato bay a bapalaka bokwea.

¹⁴Monɔngɔ ai no basɔni na BaPalusi, no bakosei! Okatoakani ndako jibali-babogwa, na okoseakani mojɔ na bingeeli binu biyaibiyai. Mokindo monu mɔnɔ na bopipo a mojɔ momina.

¹⁵Monɔngɔ ai no bassoni na BaPalusi, no bakosei! Odini boleka madiba na bokɛ mɔnɔ moyai a ngondo, a bohekoja mopakano omɔci a dɔnɔ dinu. Akahekoa ko, okɔkɔni bo adae mwana oGehena, na bo anɔe no bene na bobe.

¹⁶Monɔngɔ ai no bay a bagwa miso na onejakani bato batongo njea! Obalakani bo moto akabelɛ bɛli na tempelo, edi bɛli engasa; na akabelɛ bɛli na wɔlɔ etempelo, bɛli ende edi epipo.

¹⁷Ino bigegele bay a bagwa miso! Edi boso nde? isa wɔlɔ etempelo? isa tempelo mɛnɛ yena ekɔkɔ bo wɔlɔ emina edae ehɛngɛmɛke ai Njambe?

¹⁸Obalakani koko bo moto akabelɛ bɛli na litumbu litempelo, edi eka engasa; na akabelɛ bɛli na epeeli yena edi a litumbu, bɛli ende edi epipo.

¹⁹Ino bato bamiso mago! Edi boso nde? isa epeeli? isa litumbu lia lihɛngɛkɛ epeeli ai Njambe?

²⁰Moto akabelɛ bɛli na litumbu, abelɛkɛ bɛli na leka losusu lua lodi a litumbu.

²¹Moto akabelɛ bɛli na tempelo, abelɛkɛ bɛli na tempelo, na Yona odi a tei etempelo pongono.

²²Moto akabelɛ bɛli na Diko, abelɛkɛ bɛli na mongbelengɔ moNjambe, na Yona odi a mongbelengɔ pongono.

²³Monɔngɔ ai no basɔni na Bapalusi, no bakosei! Opakani bipeeli ai Njambe, libondo lidomi limondumbamba, na aneto, na kumini. Obosakani ko mijɔ minenɛne miMibeko, bodongo, na wa, na ejimeli, Obwanini bokɔ ngando jiji, na obwanitini bobosa ngando jia jitongo.

²⁴Odini na miso mago, na onejakani bato batongo njea. Okangoakani mongi, na omeakani kamela!

²⁵Monɔngɔ ai no basɔni na BaPalusi, no bakosei! Osenojakani kɔpɔ na saani oko a sokolu; jilumi ko a tei oko na liba na lisɔngi.

²⁶We MoPalusi yona ogwa miso! Peta sosa saani na kɔpɔ a tei, osa ko osose sokolu pongono.

²⁷Monɔngɔ ai no basɔni na BaPalusi, no bakosei! Odini o bisemɔ bia bidi na pɛmbɛ, bia bidi na esengɔ a sokolu; bilumi ko a tei oko na kua, na njemba jibato, na tungu jisusu jibikuulu.

²⁸Ino odini koko boa. Bato bakanja no a sokolu, badi bolɛ bo odini bato bapele. A tei enu ko, olumini oko na bokosea, na bobe oko botɔ.

²⁹Monɔngɔ ai no basɔni na BaPalusi, no bakosei! Okɔkɔni raiboku mimatai a bisemɔ bibatɔndɔi; obɔngejakani bisemɔ bibato babodongo;

³⁰obalakani bo, Akɔkɔ so da a masu mabasangwa'su, ka so boicingama na bu a bowa batɔndɔi.

³¹A mojɔ momina, onejakani no bɛnɛ bo odini bana babato baya bawa batɔndɔi.

³²Sejani ko elomu ebanga basangwa'nu.

³³Ino njo! Ino bana bababate! Njea enu ebohela a mokindo moGehena edi jo?

³⁴A mojɔ momina, mbi nalomeaka no batɔndɔi, na bawɛi, na basɔni. Ôwani na ôbakeani bakina babu a mele-mibokea. Ôtuani batongo a sinagogue, na ôbabenganani a ngando na ngando.

³⁵A mojɔ momina, lindo jimakia mabato basusu babodongo, maya masopea a ngondo, jîda oko ai no; makia maAbela, moto obodongo boso; suka oko makia maSekalaya, mwana oBalakia, moto oweja no a sibano etempelo na litumbu.

³⁶Mbi nabalaka na nu soti bo mijɔ mi misusu midi bokwa na elulu ye.

³⁷Ee, Yelusalema. Yelusalema! Ino owakani batɔndɔi, na o'lakani bato matai baya badoa na bwɛnji ai no. Mbi nadaka na posa bihole binɛnɛ bo nabolee bana banu, o aboleaka kɔkɔ bana bande cina jimapapulapu mande; ino ko oipalani nongo.

³⁸Ndako enu edikai ngasa edɛye o mopɔtu.

³⁹Mbi natɔndɔkɔ no bo otanɛni mbi koko, oko adi no pɛ bopeta bala bo, Bojongoa ai yona odoaka a kombe eKumu.

Matayo 24

Minɔngɔ Misuka

¹Yesu amana a tempelo, na yana adaka yo a njea eboyana, bacingami bande badoa bo bamonejae eyoeli etempelo.

²Iyo ko abasɔmbeja bo, Onɛkɛni leka lu losusu? Mbi natɔndɔkɔ no na soti bo pepe nongo litai limɔci lidi bodika diko dilitai litongo a esika ye; mâdumbama masusu.

³Yana adaka Yesu yo buki a Mono moOlive, bacingami badoa ai yo, na babala na nde bo, Mojɔ momina môda a ehole eni? Embete ebodoa bowε na esuka engondo edi boda bo?

⁴Yesu abasɔmbeja bo, Anganjamani na bato, bo basaka laboja no.

⁵Mojɔ bo bato badi bodoa banεnε a bobala bo, Mbi nadi Masiya; na badi bolaboja bato bou mεnε.

⁶Ô'kani koko mojɔ mobila na bijoki bibila; pε ko bodani na mokakwano, mojɔ bo ngando ji jibwani bodoa. Suka engondo ko êda oko ngɔngɔ, te a ehole emina.

⁷Mojɔ bo likota lidi bona na likota; bokumu bodi bona na bokumu; manjale na majonga mangondo mâda a bikina bisika.

⁸Ngando jimina ko jîda oko bobanga bomonɔngɔ.

⁹A ehole emina, bâsenjoja no bo badingojae no, bâweja no, na bato bamakota masusu bâlona no a mojɔ mokombe embi.

¹⁰Bato banεnε bâsaka libaku a ehole emina, bâkambana na bâlonana.

¹¹Batɔndɔi babokosea bâdoa na bâlaboja bato banεnε.

¹²Epaeli ebato banεnε êda etitamake, mojɔ bo bobe bodi bogbasoa.

¹³Moto ko akada na lingbangba oko a suka, moto omina âhela.

¹⁴Mwako mu moBokumu môpeta tɔndɔmɔ a ngondo esusu, bo makota masusu majebe; suka esa ko edoe.

¹⁵Oko boa, yana ânε no eka yena emaneene a esika yena ehɛngɛmɛ ai Njambe, o abala motɔndɔi Daniele, (yona olangaka, ye acingee)

¹⁶baya badi a Yuda ehole emina badi bocia a meno,

¹⁷Moto yona odi a diko dietondo abwaniti botita a botomba leka londe a ndako tei.

¹⁸Moto yona odi a gbie abwaniti bosɔmbɔ a botomba kasaka ende.

¹⁹Bali baya badi na memi, na baya banungejaka bana, bâda na monɔngɔ a masu mamina.

²⁰Ingakani Njambe bo ehole enu ebocia etada a edidi epio, isa a busa boSabata.

²¹Mojɔ bo bodingoa bodi bogbasoa a ehole emina; tungu emina eipaka da, nongo a bobanga bongondo, suka oko busa bu, na botaya da boa.

²²Masu mamina makayeyoa, pεpε nongo moto omɔci odi bohela; matada ko manεnε, a mojɔ mobato bahɔ Njambe.

²³Moto akabala na nu a ehole emina bo, Anjani, Masiya adi yaya! isa, Adi bobo! t'ojimeni oko.

²⁴Mojo bo BaMasiya babokosea bâdoa banené a masu mamina. Bâneja bimbete na mindumba mibokamoa, na êdika mweka pε bo balabojae bahomoke baNjambe.

²⁵Hokeani bopele. Mbi najebejaka no yana adi mijɔ mimina pε bopeta doa.

²⁶Bakabala na nu bo, Anjani, adi oho ta esika! t'okeeni oko oho. Na bakabala bo, Anjani, adi a ndako tei! t'ojimeni oko.

²⁷Mojo bo bodoa boMwana 'Moto bôda o mokalimo. Mohulaka a dɔngɔ diɛsɛta, na mokoko njee oko a wɛsɛta.

²⁸Miambenga badi botitana oko a esika edi ekuulu.

²⁹Minɔngɔ mimasu mamina mikasia, modika-busa môhinda bokpa, na songe atada na monjolo. Njɔtɔ badiko bâkwa nase, na ngulu jibusu jidi bombe.

³⁰Embete eMwana 'Moto êmana oho Diko a ehole emina. Makota masusu mangondo mâyea bio, na bâne Mwana 'Moto akadœ a biyembi bidiko na kpaci na ekumu enené.

³¹Iyo aloma babwènji bande a bohuea mondule na doi linené, na bâbolea bahomoke bande a pamba jesusu jinei, a suka ebusa emoci, oko a suka etongo.

³²Ikoani na monde momole *mofiguier*. Bitape bika'mbε, na bisanga biyene bikatɔ, ojebakani bo yanga esii.

³³Oko boa pongono, okaneni ngando ji jesusu, ôjebani bo yo adi hulelu, adi oko a modipe mené.

³⁴Mbi natɔndɔkɔ no bo ngando ji jesusu jidi bodoa oko elulu ye esiakini.

³⁵Busa bodi bogwa, na ngondo edi bodimoa, bikenge bimbi ko bitakputoa.

³⁶Pεpε nongo moto omoci ko ojebaka busa bomina na ehole emina, nongo babwènji baDiko isa Mwana; ojebaka oko Sango pε.

³⁷Bodoa boMwana 'Moto bodi boda o adaka masu maNoa.

³⁸A masu mamina, adaka pela eelalo pε bopeta doa, bayakaka na bamwakaka, basɔkɔ bali na bahangaka bali ta meki, oko a busa botamba Noa a masua.

³⁹Baijeba nongo, oko a ehole edoa pela eelalo na ebadongeja basusu. Bodoa boMwana 'Moto bôda koko boa.

⁴⁰Bami babae badi boda a gbie a ehole emina; okina obu âtombama, na otongo âdika.

⁴¹Bali babae bâda a elomu endongo bonda; okina obu âtombama, na otongo âdika.

⁴²A mojɔ momina, toma kengeleni, mojɔ bo otajebakani busa bohulaka Kumoune.

⁴³Pε ko bobosani mojɔ mumu; akɔki yo jeba ehole edoaki mobi na bulu, ka moswa 'ndako amosei, na ajimiti bo aluse ndako ende.

⁴⁴Ino pongono, toma dani na moselingo boa, cina bo Mwana 'Moto âdoa a ehole edi no pε bole.

⁴⁵Mokɔmeli olisuma na bopasa adi jɔ, yona obwani boso kpaci ai moswa'nde a bobanea ndako ende, na a bopa bato mia a ehole eboyaka?

⁴⁶Moswa'nde akahula, na akamotana a elomu, adi bosepa na mokɔmeli omina.

⁴⁷Mbi natɔndɔkɔ no na soti bo adi bokina leka londe losusu a mɔmɔ mande.

⁴⁸Mokɔmeli omina ko akada mobe, na akalε a molema monde bo, Kumoumbi atahula bwango;

⁴⁹na akabanga botua bina'nde, na akayaka na akalangoa na balangoi,

⁵⁰moswa omokɔmeli omina adi bohula bokina busa yana adi yo pε bole, na a ehole edi yo pε bojeba.

⁵¹Âmodingoja, na âmo'sa ta libondo libakosei, a esika ebio na bokpεkpεnε bomino.

Matayo 25

Mondε moBaseka Domi

¹A ehola emina, Bokumu boDiko bôda obaseka domi. Ibo batomba paka jibu, na bakε a bolenoana momi obolongana.

²Ba'bu batano badaka na bondanga, na batano koko badaka na bowεi.

³Bindanga batomba paka jibu ngasa, pε botomba nongo munε.

⁴Bayá badaka na bowεi batomba paka jibu na milangi mimunε pongono.

⁵Yana ayeyoa momi obolongana a njea, ibo basusu bapɔngɔpɔngɔ na hiɔ, na bahwε oko bohwε.

⁶Na bulu tei, moto abekoa bo, Momi obolongana akεke adoe. Kεni a bomolenoana.

⁷Baseka bamina basisoa basusu, na baselingoa paka jibu.

⁸Bindanga babala na baseka babowei bo, Pani so ekenge emunε monu, mojɔ bo paka jisu jibengi bodimoa.

⁹Babowei ko babasɔmbeja bo, Pεrε, motabwana na su na nu pongono. Kεni ai bato babwasa, okasombeni a mojɔ monu bεnε.

¹⁰Ama bo kε a bosomba munε, momi obolongana ami mea oko bomea; baya badaka na moselingo bakwea na nde a libonje lilihang, na modipe modipama.

¹¹Baseka batongo badoa ngɔngɔ, na babala bo, Kumu, kumu, kina so bokwee.

¹²Iyo ko abasɔmbeja bo, Mbi natɔndɔkɔ no na soti bo nitajebaka no.

¹³A mojɔ momina, toma sεnjεlεni, mojɔ bo otajebakani busa na ehole.

Monde moKumu na Bato Bande

¹⁴Mojɔ momina modi koko o moto yona okε mokina mɔngɔ. Abea bakɔmeli bande, na akaba na bu likonja linde.

¹⁵Apa okina talenta jitano, yona otongo talenta jibae, na otongo koko talenta emɔci. Angε oko na mwεngi mua mobwana na moto na moto, na akε a mɔngɔ monde.

¹⁶Moto yona osɔ talenta jitano, akε a bokɔ bwasa na likonja, na ahεjε likonja limina na talenta jitongo jitano.

¹⁷Oko boa koko, yona osɔ talenta jibae akε na akɔ bwasa na likonja, na ahεjε likonja limina na talenta jibae jitongo.

¹⁸Yona ko asɔ talenta emɔci akε a bolonga mombɔndɔ, na abomba likonja limoswa'nde oko ena.

¹⁹Moswa obakɔmeli bamina ayeyoa ekoka. Yana ahula yo, akokeleja elomu ebu ebwasa.

²⁰Yona osɔ talenta jitano adoa na likonja limina, na abakea koko talenta jitano. Abala bo, Moswa'mbi, opani talenta jitano; anja edεyε; nabolojai litomba, talenta jitano.

²¹Moswa 'nde abala na nde bo, Bopele! wε odi mokɔmeli mopele; obɔngi. Alongi wε na libondo likekε, nadi bokina leka lonεnε a mɔmɔ mawε. Doa a bosepa na moswa'wε.

²²Yona osɔ talenta jibae adoa, na abala bo, Moswa'mbi, opani talenta jibae. Anja edεyε; nabakei diko talenta jibae jitongo,

²³Moswa'nde abala na nde bo, Bopele! wε odi mokɔmeli mopele; obɔngi. Alongi wε na libondo likekε, nadi bokina leka lonεnε a mɔmɔ mawε. Doa a bosepa na moswa'wε.

²⁴Yona oso oko talenta emɔci pε adoa pongono. Iyo abala bo, Moswa'mbi, najebaka bo wε odi moto mopipo. Obukaka ndongo a esika edi wε pε bona, Otombaka a esika edi wε pε bohehe.

²⁵A mojɔ momina, mbi nadaka na bɔ, Nakε, nabomba likonja liwε a kpɔtɔ. Anja, likonja liwε didi.

²⁶Moswa'nde amosɔmbeja bo, Wε mokɔmeli mobe, mokɔmeli obomeli! Isa ojebaka bo mbi nabukaka ndongo a esika edi mbi pe bona, na bo natombaka a esika edi mbi pe bohehe,

²⁷oikɔ bwasa na likonja limbi mojɔ moye, bo nasε likonja limbi a lihule limbi, na litomba pongono?

²⁸Katoani likonja limina ai yo, na pani ai yona odi na talenta domi.

²⁹Mojɔ bo, yona opeli asɔ koko, bo adae na lituna. Moto ko akada ngasa, badi bokatoa oko eka epeli yo.

³⁰Dumbani mokɔmeli omina yona odi edada sokolu a modidi, a esika ebio na bokpækpenε bomino.

Esambi eMakota

³¹Mwana 'Moto akadoa na babwεnji bande basusu a ekumu ende, adi boda a ngεndε eekumu ende.

³²Âbolea makota masusu a boso bonde, Âbabɔteja, o abɔtejaka mobanei bata na kambeli.

³³Âkaba bata a dɔngɔ diebɔ ende ebami, kambeli ko a dɔngɔ diebɔ ende ebali.

³⁴A ehole emina, Kumu âbala na bato a dɔngɔ diebɔ ende ebami bo, Doani. Bojongoa boSangwa'mbi bodi ai no, Sangoani Bokumu bua boselingoama a mojɔ monu oko a bobanga bongondo.

³⁵Mojɔ bo, adaka mbi na nja, ino opakani mia. Ekangola ekɔkɔni, na onusakani madiba. Adaka mbi mokɛndɛli, ino osɔni mbi a ndako jinu.

³⁶Adaka mbi oko mbundu, ino olwajakani mbi. Adaka mbi nasambi na yogo, ino obaneakani mbi. Nadaka a blɔkɔ, na odoakani a bonja mbi.

³⁷Bato babodongo ko badi bomosɔmbeja bo, Kumu, Iso bone wε na nja, na bopa wε mia a ehole eni? Bone wε na ekangola, na bonusa wε madiba a ehole eni?

³⁸Iso botana wε mokɛndɛli, na bossɔ wε a ndako jisu a ehole eni? Botana wε mbundu na bolwaja wε a ehole eni?

³⁹Iso bone wε osambi na yogo, isa a blɔkɔ, na bokε a bonja we a ehole eni?

⁴⁰Kumu ko âbasombéja bo, Mbi nabalaka na nu na soti bo, Bihole bisusu bikɔ no
boa ai okina obaninga bambi yona onɔi na bokɛkɛ, okɔni ai mbi mɛnɛ.

⁴¹Adi bobala na bato baebɔ ebali bo, Dongani ai mbi, ino bato bandakeja. Kɛni
oko a mosa mua motadimea, mua mohengɛmɛ ai Satana na babwɛnji bande.

⁴²Mojɔ bo, yana adaka mbi na nja, oipakani nongo dia diboyaka. Adaka mbi na
ekangola, oinusan mbi madiba.

⁴³Adaka mbi mokendɛli, oisɔni nongo mbi a ndako jinu. Adaka mbi mbundu,
oilwajani mbi, Adaka mbi nasambi na yogo na a blɔkɔ, oidoani a bonja mbi.

⁴⁴Ibo koko bâmosombéja bo, Kumu, ehole enɛ so wɛ na nja, isa na ekangola, isa
mbundu, isa na yogo, isa a blɔkɔ, na so pɛ bokɔmeja we, ehole eni?

⁴⁵Iyo âbasombéja na âbala bo, Mbi natɔndɔkɔ no na soti bo, Oikɔmejani nongo
okina mokɛkɛ obaninga bambi; oko boa oikɔmejani mbi.

⁴⁶Bato bamina badi bokɛ oko a bodingoa bua bopeliti nongo suka. Bato
balilonga ko badi bokɛ oko a bomɔ, oko na bosusu.

Matayo 26

Ndungu a Bowa Yesu

¹Iyana asieja Yesu bikenge bi bisusu bobala, abala na bacingami bande bo,

²Ojebakani bo Kola eBonɔ edikai oko masu mabae pɛ, na badi bopea Mwana
'Moto bo bamowoe a mole-mobocea.

³Basuku banganga na basuku bangando batitana a ehole emina, a ndɔngɔ
enganga monɛne, kombe ende Kayapa.

⁴Badumba ndungu a bopea Yesu na poloso bo bamowoe.

⁵Endele ko, babala bo, Te a ehole eKola bo bato basaka'ngɔ na dane.

Yesu a Ndako eSimona

⁶Yesu adaka a ndako eSimona, moto omaba, a ngando kombe Betania.

⁷Okina mwali adoa ai yo na molangi momalasi mabobuno bonɛnɛ mɛnɛ, na
asopa malasi mamina a molo moYesu yana adaka yo a mesa.

⁸Bacingami bande, yana anɛ bo mojɔ momina, bakɛniɔ oko bokeniɔ. Babala bo,
Eka emina enami boa mojɔ moye?

⁹Akɔki so ngɛlɛ malasi mamina, ka bosi likonia linɛnɛ a bokaba na bato
babokwali.

¹⁰Yesu ko acingea mojɔ, na abala na bu bo, Opukejakani mwali yo mojɔ moye? Akɔi mojɔ mopele mɛnɛ ai mbi.

¹¹Bato babokwali badi na nu na bosusu; mbi ko naditi na nu na bosusu.

¹²Asopi yo malasi mamina a mokuku mombi, akɔi boa a mojɔ mobopusea bombi.

¹³Mbi natɔndɔkɔ no na soti bo badi botundeja gala emwali yo a bisika bisusu bitɔndɔkɔ bo Mwako mu Mopele a ngondo esusu, cina emojɔ mokɔi yo.

Yuda Iskalio

¹⁴Okina obu Domi-na-babae, kombe ende Yuda Iskalio, ake ai basuku banganga.

¹⁵Abala na bu bo, Nakamokaba ai no, êpa no mbi nde? Bamopa pata domi-isato.

¹⁶Oko boa yo abanga boduka njea a ehole emina bo akabe Yesu.

Yesu na Bacingami a Kola

¹⁷Bacingami badoa ai Yesu a busa boboso boMolembɛ mua mopoliti lipetu. Bamohɔjɔ bo, Opalaka bo boselingoe jɔ a boyaka Kola-eBono?

¹⁸Iyo abasɔmbeja bo, Kεni boso Songolo oho a ngando. Mojebejani boMokoja abali bo, Ehole embi edikai oko mweka pε. Napalaka nayake Kole-eBono a ndako ewε, oko mbi mɛnɛ na bacingami bambi.

¹⁹Bacingami bakɔ o ama bala Yesu, na baselingoa Kola-eBono.

²⁰Yesu adaka na bacingami bande domi-na-babae a mesa a ehole emɔkɔmɔkɔ.

²¹Yana ayakaka bo, Yesu abala bo, Mbi natɔndɔkɔ no na soti bo okina onu adi bokaba mbi.

²²Ibo badaka na mobimba mɛnɛ a mojɔ momina, na babanga bomohɔjɔ moto na moto bo, Kumu, moto nda? Isa mbi?

²³Iyo abasɔmbeja bo, Okina yona oyaki na mbi a saani emɔci adi bokaba mbi,

²⁴Mwana'Moto bodonga ya soti a njea ejebekaka Misɔnɔ a mojɔ monde. Monɔngɔ ko ai yona odi bokaba Mwana 'Moto! Moto omina, akɔki ya da pε bobotama nongo, ka enɔi na bopele a mojɔ monde,

²⁵Yuda, mokabi onde, abala bo, Labi, moto nda? Isa mbi? Yesu abala na nde bo, O abali wε.

²⁶Adaka bo bakayake, Yesu atomba molembɛ. Ajongoa na abuka molembɛ momina; amopa ai bacingami, na abala bo, Asɔni, yakani; imu modi mokuku mombi.

²⁷Atomba koko kɔpɔ; ajongoa na abapa. Abala bo, Mwakani no basusu.

²⁸Mojo bo kɔpɔ ye edi makia mambi maMokongo, maya masopei a mojo mobato banene, a bobacingoa a jibe.

²⁹Mbi natɔndɔkɔ no bo nitamwaka koko muswa mu mombuma jivine, oko a busa bomwakabi mbi koko na nu a Bokumu boSangwa'mbi.

³⁰Aseja bo yembo bo'mba, bakes a Mono moOlive.

Gɛtɛsemane

³¹Yesu abala koko na bu bo, Ôsakani libaku ino basusu na bulu bu a mojo mombi. Cina bo, mosɔnɔmɔ bo, Nâboma mobanei, na bwela bobata bônangana.

³²Mbi ko nadi bongɔ a bogwa, na nâke boso bonu a Galile.

³³Petelo ko amosɔmbeja na abala bo, Nongo ibo basusu bakasaka libaku a mojo mowε, mbi nitasaka nongo libaku.

³⁴Yesu abala na nde bo, Mbi natɔndɔkɔ wε na soti bo odi bongana mbi ngana jisato na bulu bubu, oko kɔkɔ abelekoakini.

³⁵Petelo amosɔmbeja bo, Nongo nakagwa na wε, nitangana wε! Bacingami basusu bajima koko boa.

³⁶Yesu amea na bu a ekina esika yena edi na kombe Gɛtɛsemane. Abala na bacingaimi bo, Ino dikani yaya; mbi nakεkε bobo a mojo mobo'nga.

³⁷Abea oko Petelo na babami babae baSebede bo bamopakae, na abanga boda na wa na molɔbɔ.

³⁸Abala na bu bo, Molema mombi modi na wa te'pele, oko yogo mεne. Ambani ya a bokengεlε na mbi.

³⁹Akε koko boso mweka, asadumba nase, boso bonde oko a kpɔtɔ, na angɔɔnɔ bo, Sesa, kina kɔpɔ ye enɔe mbi isa njea edi. Endelete ko, te mojo mopalaka mbi, oko mojo mopalaka wε.

⁴⁰Ahula ai bacingami na abatana bahweli. Abala na Petelo bo, Boni! Ino otahɔnɔkɔni boda misu na mbi nongo heure emɔci?

⁴¹Kengeleni; ingakani bo otakweani a bomeka. Mwembo modi na mokano soti, mokuku ko modi na bwɛmbu.

⁴²Asɔmbɔ koko na angɔɔnɔ bo, Sesa, isa njea editi bo kɔpɔ ye enɔe mbi, oko adi mbi pe bopeta mwaka, yε modae o apalaka wε.

⁴³Ahula koko ai bacingami na abatana bahweli, mojo bo bangbɔngɔkɔ na hiɔ.

⁴⁴Oko boa abakina, asɔmbɔ koko na angɔɔnɔ ngɔɔnɔ ejisato, o ama yo ngɔɔnɔ boso.

⁴⁵Ahula koko ai bacingami, na abala na bu bo, Ino ohwεkεni oko hič? Ohemakani? Hokeani; edikai mweka pε, na Mwana'Moto âkabama a mɔmɔ mabato babe.

⁴⁶Angɔni so bokε! Anjani, mokabi ombi akεkε adoe.

⁴⁷Iyana abalaka Yesu boa, Yuda, okina obu Domi-na-babae, adoa na lindundu libato baya bapeaka babεnε na pεngu. Basuku banganga na basuku bangando babaloma.

⁴⁸Mokabi onde ama pa bato bamina ekina embete. Abajebeja bo, Mbi nakahia okina obu, mopeani; edi oko yo.

⁴⁹Iyo adoa ai Yesu bokpa na amobεjε bo, Labi, mbalea! Na amohia.

⁵⁰Yesu abala na nde bo, Moninga, odoi mojɔ? Kɔ mojɔ momina. Bato badoa a ehole emina na bapea Yesu oko bopea.

⁵¹Okina obu baya badaka bacingi na Yesu ahwa abεnε onde, akwεle mobuli onganga monεnε pola, na amolena litoi.

⁵²Yesu ko abala na nde bo, Sɔmbeja abεnε owe ta ligbogbo; cina bo bato basusu baya batombaka abεnε, yogo ebu oko abεnε.

⁵³Otajebaka bo mbi nakabea mbuni ai Sangwa'mbi, abwani bolomeani babwεnji-baDiko, mandundu domi-na-mabae?

⁵⁴Mbi ko nakakɔ̄ boa, Misɔnɔ̄ midi bongama na ye, mia mitɔndɔ̄kɔ̄ bo mojɔ mumu modi boda boa?

⁵⁵Yesu abala na lindundu libato a ehole emina bo, Odoini na babεnε na pεngu a bopea mbi; adi mbi mobengo? Mbi nadaka na mobondo a bokoja a tei etempelo busa na busa, na oipeani mbi.

⁵⁶Mojɔ mu mosusu ko modi boa a bongameja misɔnɔ̄ mibatɔndɔ̄i. Bacingami basusu bamokina a ehole emina, na bacia oko bocia.

Yesu a Esambi eKayapa

⁵⁷Yana apea bo Yesu, bakε na nde a ndako eKayapa yona odaka nganga monεnε. Basɔni na basuku bangando bama titana oko ena.

⁵⁸Pεtelo asusa Yesu bohali mweka, oko a lopango longanga monεnε. Akwea a tei elopango, na ada na mobondo a esika edaka bapolisi, bo anεe suka emojɔ.

⁵⁹Basuku banganga, na likita lisusu libajuji, baduka mokina mojɔ mobokosea a bodumba Yesu, bo bamowoe.

⁶⁰Bakina bato badoa a botata, pε ko mojɔ boboloa.

⁶¹Bakina babae ko badoa ngɔngɔ na babala bo, Moto yoyo abali bo, Mbi nabwani bobuka tempelo eNjambe na boeyoa koko na masu masato.

⁶²Nganga monenε angɔ na abala bo, Otassɔmbejaka nongo ekenge? Cina etati ebato bamina a mojɔ mowε edi bo?

⁶³Yesu ko ahogoga oko bogo, Oko boa nganga monenε abala na nde koko bo, Mbi nabekeaka wε a kombe eNjambe obomɔ; tɔndɔ so isa we odi Masiya, Mwana oNjambe.

⁶⁴Yesu amosɔmbeja bo, O abali wε. Mbi ko natɔndɔkɔ no bo odini bone Mwana 'Moto na mobondo a dɔngɔ diebɔ ebami eNdangasa, na akادoe a diko dibiyembi biDiko.

⁶⁵Nganga monenε ala bisenja binde oko bo'la, na abala bo, Iyo atangolaka Njambe, Bodi boduka banjεnεki batongo mojɔ moye? O'kini no bεnε bo atangoli Njambe.

⁶⁶Ino olεkeni bo? Bamosɔmbeja bo, Mokindo monde oko bogwa!

⁶⁷Bamotwea masɔi a boso bonde; bamonda bibɔtu, bamola bipapata,

⁶⁸na babala bo, We, Masiya! Tɔndɔ so; obomi wε nda?

Pεtεlo Angana Yesu

⁶⁹Pεtεlo adaka na mobondo a sokolu, oko a lopango. Okina moseka adoa ai yo na abala na nde bo, Wε odaki koko na Yesu oGalile.

⁷⁰Iyo angana a boso bobu basusu; abala bo, Nitacingeaka mojɔ mobalaka wε.

⁷¹Akεkε yo amane a dɔngɔ dimonɔkɔ molopango, moseka otongo amonε, na yo abala na bato baya badaka baboli ena bo, Moto yoyo adaki na Yesu oNasaleta.

⁷²Pεtεlo angana koko na abεlε bεli bo, Nitajebaka moto omina.

⁷³Ngɔngɔ mweka, bakina baya badaka hulelu badoa ai Pεtεlo na babala na nde bo, Wε odi okina obu soti. Bombeteaka we na likεkɔ liwε likɔpi.

⁷⁴Iyo ko abanga bosinga, na abεlε bεli bo, Nitajebaka moto omina. Oko aehole emina, kɔkɔ abelekoaka oko bobelekoaka.

⁷⁵Pεtεlo asi ko alei ekenge ema bala Yesu bo, Wε ôngana mbi ngana jisato oko kɔkɔ abelekoakini. Na amana sokolu na ayea bio na molɔbɔ mεnε.

Matayo 27

Bogwa boYuda

¹Iyana ahoa busa, basuku banganga basusu na basuku bangando babalana bo baduke njea eboweja na Yesu.

²Bamokanda mboci, bakes na nde, na bamokina a momo maPontio Pilato yona odaka *gouverneur*.

³Yana ane Yuda, mokabi onde, bo bama dumba Yesu, yo ajasa dosa, na asombé na pata domi-isato ai basuku banganga na basuku bangando.

⁴Abala na bu bo, Mbi nakoi mojo mobe. Nakabi mopindea. Bamosombeja bo, Mojo mowé mené, te mosu!

⁵Iyo adumba likonja lisusu a tei etempelo, amana, aké na asa'wa yo mené na likimba.

⁶Basuku banganga bandoa likonja limina, na babala bo, Ebongiti bo bose likonja didi a nguku ebipeeli bitempelo, mojo bo lidi likonja limakia.

⁷Babalana mojo momina, na basomba mokpoto momobomi-oteni na likonja, bo bapusee bakendeli a esika emina.

⁸A mojo momina, esika emina edi na kombe Mokpoto-momakia oko busa bu.

⁹Ekenge ebala motondji Yisaya engama na mojo momina. Iyo abala bo, Batombi pata domi-isato; bamobuni oko na bobuno bomina. Bana baYisalaele bajimi bobuno bomina a mojo monde;

¹⁰Na bapi likonja limina a mojo momokpoto momobomi oteni, O abali Kumu na mbi.

Yesu na Pilato

¹¹Yesu adaka ami a boso *bogouverneur*, na yo ahɔjɔ Yesu bo, We odi Kumu oBaYuda? Yesu amosombeja bo, O abali we.

¹²Yana ko abala basuku banganga, na basuku bangando mojo monde, Yesu aisombeja nongo ekenge.

¹³Oko boa Pilato abala na nde bo, We t'okake ngando ji jine né jibalaka bo a mojo mowé?

¹⁴Yesu ko aimosombeja nongo ekenge, na *gouverneur* akamo a bou mené a mojo momina.

¹⁵*Gouverneur* adaka na ekina ekomeli a kola emina, bihole bisusu. Acingoaka moto omoci a blokɔ, oko moto ojimaka bato bangando.

¹⁶Okina moto ogala ebe adaka a blokɔ a ehole emina, kombe ende Balaba.

¹⁷Oko boa, yana adaka bo baboli, Pilato abahɔjɔ bo, Opalakani bo nacingoe nda? Balaba, isa Yesu yona odi na kombe Masiya?

¹⁸Mojo bo Pilato ajeba bo bama pea Yesu oko cina elisoki.

¹⁹Yana adaka Pilato a mongbelengo moesambi, mwali onde amolomea monɔkɔ bo, Pe bokɔ nongo mojɔ ai moto yona obodongo; mojɔ bo mbi nati njɔti a mojɔ monde, na nadi na monɔngɔ monene a mojɔ momina busa bu.

²⁰Basuku banganga ko, na basuku bangando bajimeja likita libato bo babee oko Balaba, na bo Yesu agwε.

²¹Gouverneur abahɔjɔ koko bo, Obu babae, opalakani bo nacingoe nda? Ibo bamosɔmbeja bo, Balaba.

²²Pilato abala na bu bo, Oko boa êkɔ mbi ndeni na Yesu yona odi na kombe Masiya? Ibo basusu basɔmbeja bo, Yε agwε a mole-mobokea!

²³Iyo abala bo, Boni; mojɔ mobe mokɔi yo nda? Ibo ko babekoa na bopipo bo, Yε agwε a mole-mobokea!

²⁴Pilato anε bo mojɔ mobeha, na bo wokowoko ekεke oko bohε. Oko boa yo atomba madiba, asosa mɔmɔ mande a boso bolikita, na abala bo, Lindo jimakia mamoto yo obodongo jiditi nongo ai mbi. Edi oko mojɔ monu.

²⁵Bato basusu bamosɔmbeja bo, Yε makia mande madae ai so na bana basu.

²⁶Oko boa yo acingoa Balaba ai bo. Atueja Yesu ko, na araopeja a mɔmɔ mabu bo bamobakee a mole-mobokea.

Bapɔmbeja Yesu

²⁷Basoda *bagoumeyeur* bakwea na Yesu a ndako eesambi, na babea basoda batongo bapɔlɔtɔ.

²⁸Bahwa bisenja binde, na bamolwaja kasaka eyai ekpetu.

²⁹Badinga likongo linjubε, na balibakea a molo monde. Basa koko mongendu a ebɔ ende ebami; batita na magbunda a boso bonde na bamopɔmbeja bo, Mbalea! Kumu oBaYuda!

³⁰Bamotwea masɔi, bamokatoa mongendu, na bamobimboa ta molo.

³¹Aseja bo bomoko pɔmboli, bamohwa kasaka eyai, bamolwaja bisenja binde mεnε, na bake na nde bo bamobakee a mole-mobokea.

Bogwa boYesu

³²Ama bo mana, ba'mi songana oko na moto omɔci oKulene, kombe ende Simona, na bamopea bo bamotombejae mole-mobokea moyesu.

³³Amea bo a esika yena edi na kombe Gɔlɔgɔta, (cina emina edi Esika eEbebele)

³⁴bamonusa vino yena eputoana na njɔngɔ. Iyo ko, yana alεlε yo, alona bomwa.

³⁵Bamobakea a molemobokea, baboma jonga a mojɔ mobisenja binde, na babikabana.

³⁶Ngɔngɔ jimina, bada na mbondo oko ena bo bamonje.

³⁷Babakea koko mosɔnɔ mu a diko dimolo monde a bojebaja mojɔ monde; IYO ADI YESU KUMU OBAYUDA.

³⁸Babakea koko mibengo mibae a mele-mibokea a dɔngɔ dinde, okina a dɔngɔ diebɔ ebami, yona otongo a dɔngɔ diebɔ ebali.

³⁹Bato bay a badaka bakancé bamokotoa na bosɛtɔ. Babala bo,

⁴⁰Saheleja wε mεnε, wε yona obwani bobuka tempelo na boengɔjɔ koko na masu masato! Isa odi Mwana oNjambe, donga a mole-mobokea, na tita ya.

⁴¹Basuku banganga, na basɔni, na basuku bangando pongono, bamosékε oko bosékε.

⁴²Babala bo, Iyo aheleja bato batongo; atahɔnɔkɔ ko bo asahelejae yo mεnε. Isa adi Kumu oYisalaele, ye atite cdεye a molemobokea bo bomojimee.

⁴³Adaka na ejimeli ai Njambe. Isa Njambe amopalaka, yε amohelejae edεye; mojɔ bo abali bo, Mbi nadi Mwana oNjambe.

⁴⁴Mibengo pongono, bay a badaka na nde a mele-mibokea, bamololea koko boa.

⁴⁵Modidi modoa a ngondo esusu a ehole emidi, na moyeyoa oko a *trois heures*.

⁴⁶Yesu abekoa na bopipo a ehole *etrois heures* bo, Eli, Eli, lama sabakatani? Cina emina edi, Njambe ombi, Njambe ombi, obulei mbi mojɔ moye?

⁴⁷Bakina bay a badaka ba'mi ena babala bo, Abeaka Elia.

⁴⁸Oko boa okina obu apota bokpa, atomba limbusu, aligbɔmeja na vino ekpo, alihangea a mongendu, na amonusa.

⁴⁹Batongo ko babala bo, Kina, bonje isa Elia adi bodoa a bomoheleja.

⁵⁰Yesu ko abekoa koko na bopipo, na ameja mwembo monde.

⁵¹A ehole emina, esenja enεnε yena ekabaka tempelo a tei o ekɔmeli engbungbu, elea oko bo'lea, bikenge bibae, diko oko a nase. Ngondo ejonga pongono; matai manεnε malea;

⁵²bisɛmɔ bidipoama, na mikuku mibasɛnɔke bay a bama hwε mingɔ oko bongɔ.

⁵³Bamana a bisɛmɔ yana angɔ Yesu a bogwa, bake a ngando esɛnɔke, na ba'nεnε na bato banenε.

⁵⁴Kapiteni obasoda, na baya badaka na nde a bokengelé Yesu, yana ane bo bojonga bongondo, na mijø mia mitongo, bangbengbemè na bø. Babala bo, Moto yoyo adaki Mwana oNjambe soti!

⁵⁵Bali banenø badaka ena pongono, oko bohali mweka a bonja, oko bali baya badonga na Yesu a Galile bo bamokømæe.

⁵⁶Bakina babu oko ba, Malia oMagadala, Malia nange eYakobo na Yosepa, na nange ebana baSebede.

Bapusea Yesu

⁵⁷Iyana adipa busa, okina moto oAlimate amea, kombe ende Yosepa. Iyo adaka konji. Adaka koko mocingami oYesu.

⁵⁸Iyo ake ai Pilato, na amonga mokuku moYesu. Pilato apa monøkø bo bamopø ai yo.

⁵⁹Oko boa Yosepa atomba mokuku, amobulaka na esenja eyai epu,

⁶⁰na amosa ta esemø ende eyene, oko esemø ema yo tø a litai limono. Ahilingoja litai linenønø a monøkø moesemø, na ayana.

⁶¹Malia oMagadala, na Malia yona otongo badika ko, na badaka bayeli esemø.

⁶²Ahua busa, oko yana asia busa boMoselingo, basuku banganga, na BaPalusi, bakø engbanga ai Pilato.

⁶³Babala na nde bo, Kumu, iso boløke mojø mobala mokosei yona, oko apetakini gwa. Abala bo, masu makasia masato, mbi nadi bongø koko.

⁶⁴A mojø momina, bekea bo basenjøle esemø na bopele menø masu masato, bo bacingami bande batadoa a bomoba, na båtøndø bato bo angøi a bogwa. Ekada boa, bokosea bongøngø bodi bonø bokosea boboso na bobe.

⁶⁵Pilato abassømbeja bo, Odini na basoda a bosenjøle. Yanani; køni bo basenjøle na tøopele menø.

⁶⁶Oko boa bakø, badipa esemø na bopipo, babakea embete a diko dilitai, na bakina basoda ena a bosenjøle.

Matayo 28

Yesu Angø a Bogwa

¹Malia oMagadala na Malia yona otongo, bakø a bonja esemø a ehole emojukakeli a busa boboso, yana asia busa boSabata.

²Ngondo ejonga a ehole emina, bojonga bonenø; cina bo okina obwønji oKumu adonga oho Diko, atita ya nase, ahilingoja litai, na ada na mobondo a diko dilitai.

³Elimo ende edaka o mokalimo, na bisenia binde bidaka bipu bopɛɛ o makambule.

⁴Basoda bay a basenjeléké baluluma na bɔ a mojɔ momina; badaka o bagwake mɛnɛ.

⁵Obwɛnji ko abala na bali bo, Ino, yɛni bobanga! Najebaka bo odukakani Yesu yona okaalejamabi a mole-mobokea.

⁶Aditi nongo ya, mojɔ bo angɔi o abala yo. Doani onjeni esika edaka yo asambi.

⁷Na kɛni mbango a botɔndɔ bacingami bande bo angɔi a bogwa. Hokeani ko; iyo akéké boso bonu a Galile. Odini bomonɛ oko oho. Mojɔ mobali mbi mosi

⁸Oko boa badonga a esɛmɔ bokpa, oko na bɔ na sepi enɛnɛ, na bapota mbango a bojebeja bacingami bande mojɔ momina.

⁹Yesu ko asongana na bu, na abala bo, Niɛbɛ! Ibo babatama na nde, bamopea a bibota, na batita na magbunda a boso bonde.

¹⁰Yesu abala na bu bo, Yɛni bobanga! Kɛni atɔndɔeni baninga bambi bo bakɛɛ a Galile. Badi botana mbi oko oho.

¹¹Adaka bo a njea eboyana, bakina basoda pongono bakɛ a ngando, na batɔndɔ basuku banganga mijɔ mi misusu.

¹²Ibo babolea likita libasuku bangando a bobalana mojɔ momina. Bapa basoda likonja linɛnɛ.

¹³Babala na bu bo, Balani bo bacingami bande badoi na bulu, na bamobi yana ahwɛki so hiɔ.

¹⁴Gouverneur aka'ka mojɔ momina, iso bodi bokolea mojɔ na nde a boheleja no.

¹⁵Oko boa basoda batomba likonja limina, na bako o ama bo sɔ eleho. Mwako momina monangana a tei eBaYuda, na babalaka mojɔ momina oko busa bu.

Yesu Añɛnɛ Na Bacingami

¹⁶Bacingami domi-na-omɔci bakɛ a Galile, a mokina mono, o ama bala Yesu na bu.

¹⁷Yana ane bo Yesu, basumana ai yo, Bakina babu ko badaka na kite.

¹⁸Yesu abatama na bu, na abala na bu bo, Kpaci esusu epami ai mbi oho Diko na ya nase.

¹⁹A mojɔ momina, kɛni, kɔni bacingami a makota masusu, na babatisani a kombe eSango na Mwana na Mwembo Mosɛnɔke.

²⁰Bakojani bo bakœ ngando jesusu iikoja mbi no, na mbi nâda na nu oko na bosusu.

Malako

Malako 1

- ¹Bobanga boMwako Mopele moYesu Masiya, Mwana oNjambe.
- ²Mosconom a mokanda momotondji Yisaya bo, Mbi nalomaka obwənji ombi a boso bowε. Iyo âselingoa njea ewε.
- ³Kɔpi emoto yona obekoaka a lisobe bo, Selingoani njea emokengε moKumu; Tangbojani njea iinde.
- ⁴Yoane Mobatisi amana na akε a lisobe a botondɔ mwako bo bato bahekojae milema mibu a mojɔ moboyε bojibe, na a mojɔ mobatisimo.
- ⁵Bato badonga a makota masusu maYuda na Yelusalema a bokε ai yo. Baboloja jibe jib, na yo ababatisa a dua yena edi na kombe Yoladene.
- ⁶Yoane alwaka bisenja bia biyoama na ngungi jikamela. Asadinga na ekpoka eyobo etito a bongo bonde. Mia mande madaka oko bapaala na pɔki eesika.
- ⁷Bwənji bonde bodaka oko bu,—Okina akεkε adoe ngɔngɔ jimbi yona onɔi mbi na ngulu. Mbi nabɔngiti bo nasumane a bocingoa mokɔ li mosapata jinde.
- ⁸Mbi nabatisi no a madiba. Iyo ko âbatisa no a Mwembo Mosenɔke.

Yesu Abanga Elomu Ende

- ⁹Yesu adonga a Nasaleta, ngando eGalile, a masu mamina, na Yoane amobatisa a Yoladene.
- ¹⁰Yana aduboaka yo a madiba, Yesu anε bokpa bo Diko didipoama, na anε Mwembo mokatite ai yo o ekɔmeli esungu.
- ¹¹Kɔpi emana koko oho Diko bo, Wε odi Mwana 'mbi ongenjɔ; sepi embi esusu edi ai wε.
- ¹²Mwembo momolindea bokpa a lisobe,
- ¹³Ayeyoa masu domi-inεi a lisobe, na Satana amomeka a masu *mvinaigre*. amina. Adaka oho na tito baesika, na babwənji baDiko bamokɔmε.
- ¹⁴Iyana asa bo Yoane a blɔkɔ, Yesu akε a Galile a botondɔ Mwako Mopele moNjambe.
- ¹⁵Abala bo, Ehole ebwani. Bokumu boNjambe bobengi bodoa. Hekojani milema minu. Jimani Mwako Mopele.
- ¹⁶Adaka Yesu akadale a mbongu elibale liGalile, anε Simona, na Andalea mwanange 'Simona, bakasope biyoma bibu ta madiba, mojɔ bo badaka badukeli baswi.

¹⁷Yesu abala na bu bo, Doani, cingamani na mbi, na mbi nâkɔ no badukeli babato.

¹⁸Ibo bakina bwato bobu bokpa mɛnɛ, na bacingama na nde.

¹⁹Anɔ yo koko mweka, ane Yakobo mwana oSebede, na mwangwa'nde Yoane. Ibo badaka koko a bwato bobu, na batataka biyoma bibu.

²⁰Yesu ababea bokpa, na bakina sangwa'bu Sebede na basali a bwato a bocingama na nde.

Yesu a Kapalanauma

²¹Bakε a Kapalanauma. Yana ahoa busa a busa boSabata, Yesu akwea a sinagoge a bokoja.

²²Bato bakamo a mojɔ mobokoja bonde, cina bo abakoja na kpaci, te nongo na ekɔmeli ebasɔni.

²³Okina moto yona odaka na mwembo mobe adaka a sinagoge ebu a ehole emina.

²⁴Iyo abekoa bo, Wε, Yesu oNasaleta; mojɔ mosu na wε modi bo? Odoi a bowa so? Mbi najebaka wε. Odi yona Mose nɔke oNjambe.

²⁵Yesu amosia. Abala na nde bo, Da bogo; imana ai yo.

²⁶Mwembo mobe momolulumeja, na momana ai yo na bobekoa bopipo.

²⁷Bato basusu bakamo a bou. Bahɔjɔnɔ bo, Iye ndeni? Bokina bokoja boyene? Iyo adi na kpaci. Nongo abekeaka yo miembo mibe, mimosumaka.

²⁸A mojɔ momina, gala ende enangana bokpa a likota lisusu liGalile.

²⁹Amana Yesu a sinagoge, ake na Yakobo na Yoane a ndako eSimona na Andalea.

³⁰Bokio boSimona adaka asambi na yogo, na batɔndɔ Yesu bokpa mojɔ monde.

³¹Iyo ake ai yo, apea ebɔ ende, na amongɔjɔ. Mɔɔlɔ monde mosia bokpa boa, na yo abanga bobakɔmɛ.

³²Yana adipa busa a ehole emɔkɔ, badoa ai yo na bato basusu baya badaka na bego, na bato baya badaka na Iniembo mibe.

³³Bato basusu bangando batitana a boso bondako.

³⁴Iyo aheleja bato banɛnɛ baya badaka na bego tungu na tungu. Ameja miembo mibe minɛnɛ, na aijima bo miembo mibe mibale, cina bo miembo milɔe mimojobaka.

Yesu a Bonga

³⁵Yesu asisoa a ehole emojukakeli, oko yana adaka busa pε bopeta hoa. Amana na ake a ekina esika a lisobe a bonga oho.

³⁶Simona na batongo bay a badaka na nde bamosusa oho.

³⁷Iyana aholoja lɔo Yesu, babala na nde bo, Bato basusu badukaka wε.

³⁸Iyo abasɔmbeja bo, Kinani bokεe a ngando jitongo jia jidi hulelu, ho natɔndε mwako oho pongono. Mbi nadoi oko a mojɔ momina.

³⁹Oko boa adala a likota lisusu liGalile, akatɔndε mwako a sinagoge jibu na akamejae miembo mibe.

Yesu Aheleja Moto oMaba

⁴⁰Okina moto omaba adoa ai Yesu, atita na magbunda a boso bonde, na amongɔnɔ bo, Wε okapala, odi boheleja mbi.

⁴¹Yesu amokea wa enεnε, aninoja ebɔ, na amobεnje oko bobεnje. Abala na nde bo, Mbi najimi; hela oko bohela.

⁴²Maba mande masia bokba mεnε, na asεnoa oko bosεnoa.

⁴³Yesu amoyaneja bokpa na eleho epipo.

⁴⁴Abala na nde bo, Yε bobala na moto. Kε ko, saneja ai nganga, na pa epeeli ebekeea Mose a mojɔ mobohela bowε, bo bato bajebε.

⁴⁵Iyo ko ake, abanga botɔndε bato mojɔ momina, na ananganeja mwako momina. Oko boa, Yesu aihɔnɔ bokwea koko a ngando a bohu. Ayeyoa oko a esika, na bato badonga a ngando jisusu bo badoe ai yo.

Malako 2

Moto oMokɔbεlε

¹Yana anɔ makina masu, Yesu asɔmbɔ koko a Kapalanauma. Mwako monangana bo adaka andako,

²na bato batitana banεnε mεnε. Ndako embambama; pεpε nongo pokiso edika, nongo a monɔkɔ mondako, yana atɔndɔkɔ yo mwako.

³Bakina bato badoa ai yo na moto omokɔbεlε, na bato banεi bamosongaka.

⁴Ibo ko baine nongo njea a bobatama na nde a mojɔ moembamba ebato. Oko boa, bahoja njea a mwanja mondako edaka Yesu; basoloja esambe oko a lipose limina, na moto omokɔbεlε adaka asambi ena.

⁵Iyana anε Yesu ejimeli ebu, abala na moto omokɔbεlε bo, Mwana, jibe jiwε jikinami.

- ⁶Bakina basɔni ko badaka ena baya basahɔjɔkɔ a milema mibu bo,
- ⁷Moto yoyo abalaka boa mojɔ moye? Atangolaka Njambe. Odi bokina jibe nda, te Njambe pε?
- ⁸Yesu ajeba a mwembo monde bo badi na mahɔjɔ mamina a milema mibu, na abala na bu bokpa bo, Ino odini na mahɔjɔ mamina a milema minu mojɔ moye?
- ⁹Mojɔ monɔi na bopipo nda? A bobala na moto omokɔbelɛ bo, Jibe jiwε jikinami; isa, Angɔ, tomba esambe ewε na dala?
- ¹⁰Ino ko odini bojeba bo Mwana 'Moto adi na kpaci ya nase a bokina jibe. Oko boa abala na moto omokɔbelɛ bo,
- ¹¹Mbi nabalaka na wε; Angɔ, tomba esambe ewε, yana a ndako ewε.
- ¹²Iyo angɔ, atomba esambe ende bokpa, na amana a boso bobu basusu. Ibo basusu bakamoa a mojɔ momina, bakumeja Njambe, na babala bo, Iso bopakiti nε mokina mojɔ boa.

Yesu Abea Lewi

- ¹³Yesu akε koko a dɔngɔ dimbongu elibale. Bato basusu badoa ai yo na abakoja.
- ¹⁴Yana adalaka yo a njea, anε Lewi, mwana oAlapayo; adaka na mobondo a bilo etako, na abala na nde bo, Gingama na mbi. Iyo angɔ oko bongɔ, na acingama na Yesu.
- ¹⁵Adaka Yesu a mesa a ndako eLewi, baputeja batako, na bato bagala ebe banεnε, badaka na Yesu na bacingami bande a mesa, mojɔ bo banεnε babu bamosusaka.
- ¹⁶Yana anε Basɔni na BaPalusi bo Yesu ayakaka na bato bagala ebe na baputeja batako, babala na bacingami bande bo, Iyo ayakaka na baputeja batako na bato bagala ebe mojɔ moye?
- ¹⁷Aka Yesu mojɔ momina, abala na bu bo, Bato banjilake babwaniti na monganga, oko baya bapekaka. Mbi nadoiti a bobe a bato babodongo, nadoi oko a bobe a bato babe.
- ¹⁸Bacingami baYoane na BaPalusi badaka na bikia. Bato badoa ai Yesu na babala na nde bo, Bacingami baYoane na bacingami baBaPalusi badi na bikia. Bacingami bawε ko te bakiaké mojɔ moye?
- ¹⁹Yesu abala na bu bo, Bato badi bokia mia a lihangó yana adi bo a dɔngɔ dimomi obolongana? Babwaniti bokia nongo eka yana adi momi obolongana a tei ebu.
- ²⁰Endele ko, momi obolongana adi bobakina a masu mangɔngɔ. Badi bokia a busa bomina.

21 Pépé nongo moto obambaka kasaka eyou na ebolo eyene. Akakɔ̄ boa, ebolo eyene edi bodonga, na edi bohɛjɛ lipose oko bohɛjɛ.

22 Pépé nongo moto olumejaka bikutu biyou na vino eyene. Akakɔ̄ boa, vino eyene edi bobatoja bikutu. Vino edi bonama, na bikutu pongono. Vino eyene ebwani oko na bikutu biyene.

Mojo moSabata

23 Yesu alena njea egbie jilɔ̄sɔ̄ bokina busa boSabata. Yana adalaka bo a njea, bacingami bande babanga botwa jikina ngbelenga jilɔ̄sɔ̄.

24 BaPalusi ko babala na nde bo, Anja; ibo bakɔ̄kɔ̄ boa, na basopaka mobeko moSabata mojo moye?

25 Yesu abasɔ̄mbeja bo, Ino olangakinini mojo mokɔ̄ Dawidi? Yana adaka yo na nja na taka, yo mènè na bato bande,

26 akwea a ndako eNjambe a ehole edaka Abiatale nganga otempelo; ayaka milɛmbɛ mimokako na amikaba na bato baya badaka na nde, oko milɛmbɛ mia mihɛngɛmɛ ai nganga pɛ.

27 Yesu abala na bu bo, Busa boSabata bodi a mojo mobato; bato ko baikoɔ̄mɔ̄ a mojo moSabata.

28 Oko boa, Mwana 'Moto adi Kumu oSabata.

Malako 3

Yesu Aheleja Moto na Ebɔ̄ Endɔ̄ke

1 Yesu akwea koko a sinagogue, na moto yona odaka na ebɔ̄ endɔ̄ke adaka ena.

2 Bato badoa kengi a bonja isa yo adi bomosengoa a busa boSabata, bo bamodumbe na mojo.

3 Yesu abala na moto yona odaka na ebɔ̄ endɔ̄ke bo, Imana ya; ima a boso bobu.

4 Abala na bato bamina bo, A busa boSabata bobwani bokɔ̄ bopele isa bobe? Bobwani boheleja moto isa bomowa? Ibo ko baisɔ̄mbeja nongo ekenge.

5 Yesu abanja na kɛlɛ, na adaka koko na wa, mojo bo milema mibu midaka Inipipo. Abala na moto omina bo, Ninoja ebɔ̄. Iyo aninoja ebɔ̄ ende, na yogo eebɔ̄ ende esia oko bosia.

6 BaPalusi basi ko bamani, na badumba ndungu na bato baElode bo bawoe Yesu.

7 Yesu ake na bacingami bande a dɔ̄ngɔ̄ di madiba. Bato banɛnɛ mènɛ bamosusa oho; bato baGalile, na Yuda,

⁸na Yelusalema, na Bdome; bato badongo ditongo diYoladene, na l̄oato baTula na Sidona pongono, bato kanga banen̄e m̄en̄e. Badoa ai yo moj̄ bo ba'kaka mwako mongando iik̄ok̄o yo.

⁹Yesu ajebeja bacingami bande bo baselingoe bwato, bo atabambama na bato, moj̄ bo badaka bato banen̄e m̄en̄e.

¹⁰Iyo aheleja bato banen̄e a bego bibu. A moj̄ momina, bato basusu baya bapekaka baswianaka a bomea ai yo, bo bamoben̄j̄ee na m̄om̄o.

¹¹Yana an̄e miembo mibe Yesu, mikwa a boso bonde, na mibekoa bo, We odi Mwana oNjambe!

¹²Iyo ko abaleha na bopipo bo batajeba bato moj̄ monde.

Yesu Ah̄ Domi-na-Babae

¹³Yesu awea a mokina mono monen̄e. Abea ai yo bato bajimaka yo m̄en̄e, na bakes ai yo.

¹⁴Ab̄ domi-na-babae a boyeyoa na nde, bo abalome a botond̄ mwako,

¹⁵na bo badea na kpaci a bomeja miembo mibe. Ah̄ domi-na-babae, oko ihaba;

¹⁶Simona; amobakea kombe etongo, Petelo;

¹⁷Yakobo mwana oSebede, na Yoane mwananango; ababakea kombe etongo, oko Boanajisi. Cina ekombe emina edi Bana baBei.

¹⁸Andalea na Pilipo, Ealatelemi na Matayo, Toma ha Yakobo mwana oAlapayo, Tadayo na Simona moto oKanana,

¹⁹na Yuda Iskalio yona omokaba.

Moj̄ Momiembo Mibe

²⁰Yesu ahula a ndako, na bato batitana koko banen̄e m̄en̄e. A moj̄ momina bain̄e nongo pokiso a moj̄ moboyaka.

²¹Yana aka bato badenga dinde m̄en̄e moj̄ momina, badoa bo bamopee; moj̄ bo, babala bo, Iyo adi na lilale!

²²Bas̄ni baya badonga a Yelusalema babala bo, Iyo adi na Balasebuba a tei ende. Amejaka miembo mibe oko na kpaci ekumu omiemb̄o mibe.

²³Yesu ababea ai yo, abala na bu na mind̄e bo, Satana adi bodumba Satana?

²⁴Bokina bokumu bokada na bob̄t̄o, bokumu bomina botayeyoa.

²⁵Oenga dikada na bob̄t̄o, denga dimina ditayeyoa.

²⁶Satana aka'na bila na yo mènè, na akada na lisoki ai yo mènè, atayeyoa nongo; na mojɔ monde modi bosia.

²⁷Pèpè nongo moto odi bokwea a ndako emoto mopipo a boba leka londe; adi bopeta gbokeja moto mopipo, asa ko abe leka londako emoto omina.

²⁸Mbi natɔndɔkɔ no na soti bo jibe jesusu jibana babato j̄ikinama, na bibaeli bibu bisusu bibosambolu pongono.

²⁹Moto ko akatangola Mwembo Mosènɔke, atakinama nongo. Lindo jibobe bonde jidi oko na bosusu.

³⁰Yesu abala boa cina bo bama bala bo, Iyo adi na mwembo mobe a tei ende.

Yesu na Nango na Bananango

³¹Nange 'Yesu adoa na bananango. Bama oko sokolu na bamolomea monɔkɔ bo amane.

³²Bato banènè badaka ena na bamohikaka. Bakina babala na nde bo, Ngwao na banangwao badi oho sokolu, na babeaka we.

³³Iyo abasɔmbeja bo, Ngwa'mbi na banangwa'mbi banda?

³⁴Ahekoja miso mande a dɔngɔ na dɔngɔ a bonja bato bay a bamohikaka, na abala bo, Anjani, ngwa'mbi na banangwa'mbi oko ba.

³⁵Moto yona okɔkɔ bolulea boNjambe, yo adi mwangwa 'mbi na ngènè embi na ngwa'mbi.

Malako 4

Mondɛ Mongua

¹Abanga koko lɔokoja a mbongu ehbale. Bato batitana ai yo kanga banènè mènè. Oko boa yo atamba na ada a bokina bwato a madiba, na bato basusu badaka oko a mbongu.

²Abakoja ngando jinènè na mindɛ. Yana akojaka yo, abala na bu bo,

³Hokeani! Okina moto ake a bomɛsɛ ngua a gbie.

⁴Yana amesekɛ yo, jikia ngua jikwa a dɔngɔ dinjea. Mbulu badoa na bakoma ngua jimina.

⁵Ngua jitongo jikwa a kpɔtɔ jia jidaka na matai Inanènè, kpɔtɔ mènè oko mweka pɛ. Ngua jimina jitɔ lɔokpa, mojɔ bo kpɔtɔ jidaka oko mweka pɛ.

⁶Akonda ko modika-busa, jiwɔssɔ na jihɔlongɔnɔ, cina bo jitaka njeli.

⁷Jikina ngua jitongo jikwa a tei enjani. Njani jidaka na bohohu, na jidimoja ngua, na jiibota nongo.

⁸Jikina ngua jitongo jikwa a kpɔtɔ jipele. Ngua jimina jitɔ, jihe, na jibota, jikina domi-isato, jitongo domi-isamano, na jitongo koko mokama.

⁹Yesu abala na bu koko bo, Isa moto adi na matoi manjoki, ye ahokee.

¹⁰Yana adaka Yesu yo buki, bacingami domi-na-babae, na batongo bay a badaka na nde, bamohɔjɔ cina emonde momina.

¹¹Iyo abasɔmbeja bo, Mojɔ moBokumu boNjambe mua modaka mobo-mbamake, modi oko bohu ai no. Baya badi sokolu ko basɔkɔ ngando jimina na mindɛ.

¹²Oko boa, yana anjaka bo, banjaka pε ko bone. Yana akaka bo na matoi, bakakadea, pε ko bocingea, bo basaka hekoa, na iihe iibu iisaka kinama.

¹³Abala na bu koko bo, Otaci-ngeakani monde momina Ekada boa, odini bocingea mindɛ mitongo na ye?

¹⁴Iyona omesekε ngua, amesekε oko Ebaeli.

¹⁵Bakina badi a dɔngɔ disanjea, esika ekwaka ngua. Ibo baka'ka, Satana adoaka bokpa, na acinoaka Ebaeli yena emesemi a milema mibu.

¹⁶Bakina batongo basɔko ngua boa a kpɔtɔ jia iidi na matai. Akaka bo Ebaeli, baesɔkɔ bokpa na sepi;

¹⁷te bayeyoake ko ekoka, mojɔ bo bapeliti nongo njeli a tei ebu. Mokina monɔngɔ mokadoa, isa bokina bodingoa a mojɔ moEbaeli, badi bongwa.

¹⁸Batongo koko basɔkɔ ngua a tei eniani. Ibo badi oko bato bay a bakaka Ebaeli;

¹⁹Ebaeli ko egboki, na edikaka edada, mojɔ bo minɔngɔ mingondo ye, na bokosea bolikonia, na posa engando jitongo, jikweaka a tei ebu.

²⁰Bakina batongo basɔkɔ ngua a kpɔtɔ iipele. Ibo badi oko bato bay a bajimaka Ebaeli yana akaka bo, na babotaka, bakina domi-isato, batongo domi-isamano, na batongo koko mokama.

Minde Mitongo

²¹Abala na bu koko bo, Moto adi bodoa na paka bo aese a cina eteni, isa a cina ebagba Ataebakea a mesa?

²²Oko boa ngando jibombamake jikundoama kanga iisu, na ndungu jisusu jilibombi iiboloa a bohu.

²³Isa moto adi na matoi manjoki, ye ahokee.

²⁴Ahala na bn koko bo, Toma 'nganjamani na mijɔ mikaka no. Libondo likabaka wε, libondo lisɔkɔ wε mεnε, oko libondo limina, na babakea koko diko.

²⁵Mojɔ bo yona opeli âsɔ koko; yona odi oko ngasa kobadi bokatoa ai yo oko yena epeli yo.

²⁶Abala koko bo, Bokumu boNjambe bodi o moto yona omɛsɛ ngua a gbie.

²⁷Ngua jidi botɔ na leka lodi bokandoa, moto omina akada mosu isa akahwε pε mojɔ, na atacingea mojɔ momina.

²⁸Mojɔ ho kpɔtɔ mεnε jibotaka; boso mεnε oko ekasa, mbakeli ko epapa, na ngɔngɔ ndongo mεnε.

²⁹Jikakpeta, ajijuaka, mojɔ bo ehole ebojua ebwani.

³⁰Abala koko bo, Bodi bongε Bokumu boNjambe na ye? Mokina mondε mobwani boneja so cina emina?

³¹Bokumu boNjambe bodi o mongua mosinape. Monɔi ngua iisusu jingondo na bojio a ehole ebomɛsɛ a gbie.

³²Mokamɛsɛmɛ ko, na mokatɔ, modi lɔokaa na bohobu a bonɔ njua jisusu na buke. Momejaka bitape binɛnɛnɛ, na mbulu badiko babwani bohwε a esie emina.

³³Yesu abatɔndɔ mwako na mindε minɛnɛ boa, o adaka bo na matoi a bohokea.

³⁴Abala na bu oko na mindε pε. Acingea ko bacingami bande mijɔ misusu yana adaka yo na bu oko bo buki pε.

Yesu Agɔleja Mopomba

³⁵A busa bomina, oko a ehole emɔkɔmɔkɔ, Yesu abala na bu bo, Kinani bolekele oho dɔngɔ dia.

³⁶Bakina emumu ebato, bamotambeja a bwato o adaka yo, na bake na nde. Makina mato matongo make koko na bu.

³⁷Mopomba monɛnɛ ko modoa. Bwato bobanga bolɛbɛbɛ a mojɔ momula, na edika mweka pε bo bwato bodinde.

³⁸Yesu ko adaka oko ahweli a esukakulu a mbolo engɔngɔ. Bamosisoja, bajɔ na nde bo, Mokoja, iso bogwi; wε ko pε nongo mokakwano!

³⁹Iyo asisoa, alema na pwea, na abala na madiba bo, Yεyɔ; da bogo! Mopomba mogɔlɔ oko bogɔlɔ, na bowi bodaka bowi mεnε.

⁴⁰Iyo abala na bu bo, Odakani na bɔ mojɔ moye? Ejimeli enu edoni?

⁴¹Ibo ko baluluma na bɔ, na babalana bo, Iyo moto ndani? Nongo pwea na madiba mamosumaka.

Malako 5

Moto Akela a Mwembo Mobe

¹Bamea a dɔ̃ngɔ ditongo dilibale, a ngunda eBaGelasa.

²Ama yo duboa a bwato, okina momi ami songana oko na nde. Iyo amana a bisɛmɔ, na adaka na mwembo mobe.

³Moto omina ahwɛkɛ oko a bisɛmɔ pɛ. Baihɔnɔ bomodeja bogo, nongo na minyɔlɔ.

⁴Bamosa mikɛsɛ, na bamokanda na minyɔlɔ bihole hinɛnɛ. Iyo ko atwa minyɔlɔ, na abuka mikɛsɛ. Pɛpɛ nongo moto ohɔnɔ bomogbokeja.

⁵Iyo abekoaka na asakwɛlɛkɛ na matai na bulu na moi, a bisɛmɔ na a meno.

⁶Yana anɛ yo Yesu bohali, apota ebango, na asumana a boso bonde.

⁷Abekoa na bopipo bo, Yesu, Mwana oNjambe oBonɔ, mojɔ mosu na wɛ modi bo? Mbi nangɔɔnɔkɔ wɛ a kombe eNjambe bo otadingoja mbi.

⁸Gina bo, Yesu ama bala na nde bo, Wɛ mwembo mobe, imana ai moto omina.

⁹Yesu amohɔjɔ bo, Kombe ewɛ nda? Iyo asɔmbeja bo, Kombe embi Lindundu, mojɔ bo, bodi banɛnɛ.

¹⁰Angɔɔnɔ Yesu na bopipo bo atayaneja miembo a ngunda emina.

¹¹Bwela bonɛnɛ bongulube bodaka a boyaka, a dɔ̃ngɔ dimono.

¹²Oko boa, miembo mingɔɔnɔ Yesu bo, Loma so ai ngulube bo bokwee a tei ebu.

¹³Iyo ajima bo bakɔe boa. Miembo mibe mimana, mikwea a tei engulube, na babikoa mbango a mono, basadumba a madiba na bagwa a madiba. Ngulube badaka koto jibae na dea a bwela bomina.

¹⁴Banjeli bangulube bacia, batɔndɔ mojɔ momina a ngando na a likota dia lisusu. Oko boa, bato badoa a bokokeleja mojɔ.

¹⁵Yana amea bo ai Yesu, banɛ moto omiembo mibe na mobondo a esika emina. Adaka na bisenja; adaka koko na yongi epele, oko yona odaka boso na lindundu limiembo. A mojɔ momina, badaka na bɔ.

¹⁶Bato bay a banɛ mojɔ babatɔndɔ mojɔ mosusu momoto omiembo tnibe, na ngulube.

¹⁷Oko boa babanga bongɔɔnɔ Yesu bo adonge a ngunda ebu.

¹⁸Atambaka yo a bwato, moto yona omaka da na miembo mine ami 'ngɔɔnɔ oko Yesu njea a boke na nde.

¹⁹Iyo ko aijima. Abala na nde bo, Kε a ngando ewε, ai bato bawε mεnε. Batɔndɔ mojɔ mosusu mokɔi Kumu ai wε, na bo aokei wa.

²⁰Oko boa ayana na abanga botɔndɔ a Dekapoli mojɔ monεnε mokɔ Yesu ai yo. Bato basusu bakamoa bou a mojɔ momina.

Mwamwali oYailo

²¹Yesu alekela koko na bwato, na amea a ngunda etongo. Bato batitana ai yo banεnε mεnε yana adaka yo a mbongu.

²²Okina mosuku osinagoge adoa koko, kombe ende Yailo. Yana anε yo Yesu, atita na magbunda a boso bonde.

²³Amongɔɔnɔ bo, Mwamwali ombi mokεkε atimbaka oko botimba. Doa omobakee mɔmɔ a boseja yogo ende bo ahele.

²⁴Yesu ake na nde; bato batongo banεnε badaka bacingi na nde engbanga, na bamombambamejaka.

²⁵Okina mwali omɔci apekaka na ekia bianga domi-na-bibae.

²⁶Iyo adingoa bou a mɔmɔ manganga basengo, na amaja likonja linde lisusu; yogo ende ko eisɔkɔtɔnɔ nongo; ehε oko bohε.

²⁷Iyo aka mojɔ moYesu, na adoa ngɔngɔ jinde a tei eemumu ebato. Abεnje kasaka ende na ebɔ,

²⁸mojɔ bo ama bala bo, Nakabεnje oko bisenja binde na ebɔ, nadi bohela a yogo embi.

²⁹Oko boa ekia ende ekoka bokpa mεnε, na aka a mokuku monde bo yogo ende esia.

³⁰Yesu ko asipoa bo ngulu emana ai yo. Ahekɔa bokpa a tei ebato, na ahɔjɔ bo, Obεnjei bisenja bimbi nda?

³¹Bacingami bande bajɔ na nde bo, Onεkε bo bato bambambejaka wε boa na ohɔjɔkɔ bo, Obεnjei bisenja bimbi nda?

³²Iyo ko anja isa adi lɔone moto yona omobεnje.

³³Mwali omina ko ajeba bo mojɔ momina mokwa oko ai yo. Oko boa amana na bɔ na mongongoma. Asadumba a boso bonde na amotɔndɔ mojɔ mosusu.

³⁴Yesu ko abala na nde bo, Mwana'mbi, ejimeli ewε ehelejai wε. Yana na bowi. Hela a monɔngɔ mowε.

³⁵Yana abalaka yo, bato bandako emosuku osinagogue bamea na mwako bo, Mwana'we agwi. Ye bonongeja Mokoja.

³⁶Yesu ko, aka yo mojɔ momina, abala na mosuku osinagogue bo, Ye bobanga; jima oko bojima.

³⁷Yesu ajima bo Petelo na Yakobo na Yoane mwanange eYakobo bakɛe na nde, pɛpɛ moto otongo.

³⁸Yana amea bo a ndako emosuku osinagogue, Yesu anɛ oko wokowoko pɛ, na bato banɛnɛ baya bayeaka na balebɛkɛ.

³⁹Akwea yo a tei, abahɔjɔ bo, Mojɔ modi bo? Oyeakani mojɔ moye? Mwamwali agwiti, ahwɛkɛ oko hiɔ pɛ.

⁴⁰Ibo ko bamosɛkɛ oko bosekɛ. Oko boa abameja basusu sokolu. Abea sango na nango, na baya badaka na nde mɛnɛ, na akwea a ekenge endako edaka mwana.

⁴¹Amopea ebo, na abala na nde bo, Talita kumi. Gina emina edi, Mwamwali, mbi nabalaka na wɛ; angɔ.

⁴²Mwamwali angɔ bokpa mɛnɛ, na adala, mojɔ bo adaka na bianga domi-nabibae. Ibo bakamo na bokamo bonɛnɛ.

⁴³Iyo ko abaleha na bopipo bo batajebeja bato mojɔ momina. Apa koko monɔkɔ bo bapɛ mwamwali dia diboyaka.

Malako 6

Yesu a Nasaleta

¹Yesu adonga a esika emina. Ake a likota linde mɛnɛ, na bacingami bande bamosusa oho.

²Yana ahoa busa a busa boSabata, abanga bokoja a sinagogue. Bato banɛnɛ baya bamoka bakamo. Bajɔ bo, Iyo moto asi ngando jimina jɔ? Gina ebɔwei bu edi bo? Bimbete bibokamo bikɔkɔ yo, cina nda?

³Iyo, te sapante, mwana oMalia? Bananango, te baYakobo, na Yose, na Yuda, na Simona? Na ngɛnɛ jinde baditi na su ya? Oko boa, yo adaka o libaku a njea ebu.

⁴Yesu abala na bu bo, Batabeteaka motɔndɔi oko a ngando ende mɛnɛ, a tei ebato bande mɛnɛ, na denga dinde mɛnɛ.

⁵Aihɔnɔ bokɔ ekina embete enɛnɛ a esika emina. Abakea oko mɔmɔ mande ai bakina bato babego pɛ, na abaheleja.

⁶Na akamo bou a mojɔ mokitɛ ebu.

Yesu Aloma Babwɛnji Domi-na-Babae

Yesu akε akadale a ngando na ngando a bokoja.

⁷Abolea bacingami domi-na-babae, na abanga bobaloma babae-babae. Abapa kpaci a bomeja miembo mibe.

⁸Abaleha bo batatomba eka a mojɔ momɔngɔ mobu, oko pango pε; pεpε molɛmbε, pεpε litongi, pε nongo likonja a kamba jibu.

⁹Abaleha bo balwae sapata, pε ko botomba kasaka jibae.

¹⁰Abala koko na bu bo, Okakweani a ndako a ekina ngando, dani a ndako emina oko a ehole enu ebongɔ ena.

¹¹Batniti sɔ no bopele, na bamiti hokea no a esika emina, toma hakoani kpɔtɔ jia jicingi na bilɔta binu, yana adongaka no, o embete ai bo.

¹²Oko boa, balte na baleha bato bo bahekojae milema mibu.

¹³Bameja miembo mibe minɛnɛ; basuoa koko bato babego banɛnɛ munɛ na babaheleja.

Bogwa boYoane Mobatisi

¹⁴Kumu Elode aka mojɔ moYesu, cina bo gala ende eke bohali. Bakina babala bo, Yoane Mobatisi ahuli a hogwa. Edi oko a mojɔ momina bo adi na ngulu emina a tei ende a bokɔ ngando jimina.

¹⁵Bakina batongo babala bo, Iyo adi Elia. Bakina koko babala bo, Adi motɔndɔi o adalta batɔndɔi baehelehele.

¹⁶Elode ko, yana aka yo mojɔ momina, abala bo, Adi oko Yoane. Mbi namotendɔ molo; yo ko ahuli a hogwa.

¹⁷Mojɔ bo Elode ama loma bato a bopea Yoane, na amosa ta blɔkɔ a mojɔ moElodia, mwali omwananango. Elode asɔ mwali omina,

¹⁸na Yoane abala na Elode bo, Ebɔngiti bo ose mwali omwangwao.

¹⁹A mojɔ momina, Elodia adaka na kεlε enɛnɛ ai Yoane, na apalaka bo amowoe.

²⁰Aihɔnɔ ko, mojɔ bo Elode abangaka Yoane. Ajebaka bo adi moto obodongo, moto mosenɔke, na amokakela. Nongo adaka yo na mokakwano a molema yana akaka yo Yoane, amoka na sepi.

²¹Ekina ndɔndɔ ko, yana asepaka bo a mojɔ mobusa bobobotama boElode, abea bakumu na bakapitɛni bande, na basuku baGalile, a libonje linɛnɛ.

²²Mwamwali oElodia akwea, abua ngɔmɔ, na asepeja Elode na bato babea yo. Kumu abala na mwamwali bo, Inga eka emungoaka wε ai mbi, nongo napε wε.

²³Amobelé beli bo, Nadi bopa wε eka engaka wε, nongo ekada ekenge ebokumu bombi.

²⁴Mwamwali ake na abala na ngwa'nde bo, Mbi nâga nde? Iyo amosombéja bo, Oko molo moYoane.

²⁵Mwamwali asombé bokpa ebango ai kumu, na amonga bo, Mbi napalaka bo openi molo moYoane Mobatisi a saani, edeye mεnε.

²⁶Kumu ajasa dosa linεnε. A mojɔ mobeli ende ko, na bato babea yo, aihɔnɔ bomolona.

²⁷Oko boa aloma soda omɔci na monɔkɔ bo amolwe molo moYoane. Iyo ake, na atendɔ molo monde a blokɔ.

²⁸Ahula na molo monde a saani, amopa ai moseka omina, na yo amopa ai ngwa'nde.

²⁹Yana aka bacingami baYoane mojɔ momina, badoa, batomba njemba ende, na baepusea a esemɔ.

Bato Koto Jitano Bayaka

³⁰Babwεnji batitana ai Yesu, na bamotɔndɔ ngando jesusu jima bo kɔ, na jima bo koja.

³¹Iyo abasombéja bo, Doani; yεni so bokε a ekina esika ebowi, a bohema mweka. Mojɔ bo bato banεnε badoaka bonɔnɔ, na baidaka na pokiso, nongo a mojɔ moboyaka.

³²Oko boa batamba a bwato a bokε a ekina esika ebowi, oko bo buki pε.

³³Bato banεnε ko babatana bakayane, na babambetea. Bato badonga koko a ngando jinεnε, banɔ mbango a njea engondo, na bamea a esika ekεkε Yesu na bacingami, oko bo bameakini.

³⁴Oko boa, yana aduboa Yesu, anε emumu ebato banεnε. Badaka o bata baya bapeliti mobanei, na yo aba'kea wa. Abanga bobakoja, na abakoja mijɔ minεnε.

³⁵Yana alεnge busa, bacingami bande badoa ai yo, bajɔ na nde bo, Iso bodi ya a esika. Busa bobengi bodipa.

³⁶Yaneja bato bamina bo bakε a bosomba leka loboyaka a ngando jia jibati na su, na ai bato bagbie.

³⁷Yesu abasombéja bo, Bapani leka loboyaka no bεnε. Babala na nde bo, Iso bôkε a bosomba milεmbε na flanka koto jibae, bo bobapε a boyaka?

³⁸Abahɔjɔ bo, Odini na milεmbε meka? Kεni anje. Balanga, na bajɔ na nde bo, Mitano, na swi babae.

³⁹Iyo abatɔndɔ bo badejae bato nase a njienjie, mongbangba-mongbanga.

⁴⁰Oko boa bato bada na mbondo, mongbanga-mongbanga, bakina mokama-mokama, batongo domi-itano, domi-itano.

⁴¹Yesu atomba milembɛ mimina mitano na swi babae. Akaho a miso a Diko, ajongoa, abuka milembɛ, na amipa ai bacingami bo batnikabe na bato. Akaba koko swi babae bo basusu base libondo.

⁴²Bato basusu bayaka, na bagola.

⁴³Bandoa bikenge bimilembɛ na swi bia bidika, sanga domi-na-jibae boto.

⁴⁴Bato baya bayaka badaka bami koto jitano.

Yesu Adala a Diko diMadiba

⁴⁵Yesu atambeja bacingami bande bokpa a bwato a bosua lɔoso a Betesaida, a dɔngɔ ditongo dihbale, bo ayanejae bato yo mɛnɛ.

⁴⁶Yana aseana yo na bato, akɛ a mokina mono a mojɔ mobo'nga.

⁴⁷Yana adipa busa, bwato bodaka a boliko, na Yesu adaka a ngondo yo buki.

⁴⁸Iyo ko anɛ bo bapukaka na kai boduka, mojɔ bo pwea ebassɔmbejaka oko bosɔmbeja. A ehole emojukakeli, yo akɛ ai bo, akadale a diko dimadiba, na akɔ bo anɔe.

⁴⁹Ibo ko, yana amonɛ bo akadale a diko dimadiba, balɛ bo adi oko mwembo, na balɛbɛ hulɔ.

⁵⁰Mojɔ bo, ibo basusu bamonɛ, na babanga, bɔ bonɛnɛ. Iyo ko abala na bu bokpa; ajɔ bo, Titejani milema minu; mbi yoyo; yɛni bobanga!

⁵¹Atamba yo a bwato a tei ebu, pwea egɔlɔ oko bogɔlɔ, na bakamo a dilese.

⁵²Mojɔ bo, baipaka cingea mondumba momilembɛ, na badaka oko bingingi pɛ a milema mibu.

⁵³Ama bo lekela, ba'mi sɛmɛ oko a Genesaleta, na bacingea bwato a mbongu.

⁵⁴Aduboa bo ko, bato bambetea Yesu bokpa.

⁵⁵Oko boa, banangana a likota dia lisusu, na yana aka 'bo bo Yesu adi a ekina esika, batomba bato babego a bitambe bibu a esika emina.

⁵⁶Basambea bato babego a macilinga, na bamongoɔnɔ bo babenjɛe gbomba ekasaka ende na mɔmɔ mabu, bisika bisusu bikɛkɛ yo, a ngando jinɛnɛnɛ na jikɛkɛ, na a bisika bigbie.

⁵⁷Bato basusu baya bamo-benjɛ boa, bahela a bego bibu.

Malako 7

BaBalusi na Mijo miBatata

- ¹BaPalusi na bakina basoni badonga a Yelusalema, na badoa ai yo.
- ²Ibo banε bo bakina bacingami baYesu bayakaka, pε ko bopeta sosa mɔmɔ, oko na mbindo.
- ³Mojo bo BaPalusi na BaYuda bamiti sosa mɔmɔ na bopele mεnε, batayaka nongo, cina elisuma a ngando jibatata.
- ⁴Bamiti sasenoja a lihule lihu a jando, batayaka nongo. Basumaka koko mibeko mitongo minεnε, bososa bokɔpɔ na teni na saani.
- ⁵A mojo momina, BaPalusi na basoni bamohɔjɔ bo, Bacingami bawε batasumaka ngando jibatata, na bayakaka, pε bopeta sosa mɔmɔ mojo moye?
- ⁶Iyo abala na bu bo, Yisaya alonga soti yana abala yo a mojo monu bakosei, o adi mosɔnɔ bo, Bato ba basumaka mbi na minɔkɔ mibu; Milema mibu ko midi na mbi bohali.
- ⁷Basakoaka mbi oko esakoasakoa; Mijo mikojaka bo midi oko mibeko mibato pε.
- ⁸Ino okinakani mobeko moNjambe na osumakani oko ngando jibato pε.
- ⁹Abala na bu koko bo, Soti mεnε, ino olonakani mobeko moNjambe bo osumeni ekɔmεli ebatata.
- ¹⁰Mojo bo, Mose abala bo, Toma suma sangwao na ngwao, na, Yona osingaka sangwa'nde Isa ngwa'nde, ye agwε oko bogwa.
- ¹¹Ino ko obalakani bo, Moto akabala na sangwa'nde isa ngwa'nde bo, Nabwani bopa no likonja di; lidi ko Kɔlɔbana; (cina emina edi, Lilekeama ai Njambe)
- ¹²ojimakani bo abwaniti bokɔmeja koko sangwa'nde isa ngwa'nde.
- ¹³Oko boa, Ebæli eNjambe mεnε edi eka engasa ai no, mojo bo osumakani oko ekɔmεli ebatata banu. Ngando jitongo jinεnε jikɔkɔ no, jidi koko boa.
- ¹⁴Abolea koko bato ai yo. Abala na bu bo, Ino basusu, hokeani! Gingeani mojo mu.
- ¹⁵Moto atabeha nongo na cina eeka yena ekweaka a tei ende. Abehaka oko a mojo mongando jia jimanaka ai yo.
- ¹⁶Isa moto adi na matoi manjoki, ye ahokee.
- ¹⁷Yana akwea yo a ndako bo akine bato, bacingami bande bamohɔjɔ cina emonde momina.

¹⁸Iyo abasɔmbeja bo, Ino odini koko na libunga? Otacingeakani bo eka esokolu ekakwea a moto, ebwaniti bomobeja.

¹⁹Gina bo, etakweaka nongo a molema monde. Ekweaka oko a sɔɔ, na emanaka a njima; oko boa, mia masusu mabwani na boyaka.

²⁰Abala koko bo, Moto abehaka oko na ngando jia jimanaka ai yo.

²¹Mojo bo, bileli bibe, ndukeli ebe, liba, bowa, bɔɔli, lisɔngi,

²²lisoki, bokosea, posa iibe, mbengea, pɔmbɔli, egbo, bondanga, jimanaka oko a molema momoto a tei.

²³Ngando ji jisusu jibe jimanaka ai moto a tei; jia jibejaka moto oko ji.

Mwali oSilapoinike

²⁴Adonga Yesu ena, akε a dɔŋɔ diTula na Sidona. Akwea a ekina ndako, pε ko bopala bo bato bajebe bo adi ena. Iyo ko aihɔnɔ bobombama.

²⁵Okina mwali yona oka mojo monde adoa na asadumba a bibota binde. Mwana'nde mwali adaka na mwembo mobe.

²⁶Mwali omina adaka MoEla; likota linde mɛnɛ lidaka Silapoinike. Iyo angɔɔnɔ Yesu bo amejae mwembo mobe ai mwana'nde.

²⁷Yesu ko abala na nde bo, Kina bana bapete gola. Ebɔngiti bo botombe milɛmbɛ mibana a bopa bana-bambwa.

²⁸Iyo amosɔmbeja bo, Ee Kumu; bana-bambwa ko bayakaka mbumbu jimilɛmbɛ mibana a cina emesa.

²⁹Yesu abala na nde bo, Yana a ngando ewε. Mwembo mobe momani ai mwana'wε mwali a mojo moekenge emina.

³⁰Mwali akε a ndako, atana mwana'nde asambi a gbagba, na mwembo mobe moma mana.

Moto oBohoka

³¹Yesu adonga a likota liTula. Ahula a njea eSidona, na alena njea eDekapoli bo amee a libale liGalile.

³²Badoa ai yo na moto yona odaka na bohoka na likekuma, na bamongɔɔnɔ bo amobakee ebb ende.

³³Yesu amohɛnɛ mweka ai bato; asa sapi a matoi mande, atwea masɔi, na abakea sapi a yemi ende.

³⁴Akahoa miso oho Diko, asopa pema, na abala na nde bo, Epapata. (Gina emina edi, Ditoama.)

³⁵Matoi mande maditoama bokpa; yemi ende ecingoama, na abala na bopele mènè.

³⁶Yesu ko abaleha bo batatondɔ nongo moto. Nongo abaleha yo na hopipo, ibo bahèje oko bingi a botondɔ mojɔ momina.

³⁷Bato bakamo a bou mènè. Babala bo, Ngando jikɔkɔ yo jibɔngi kanga jesusu mènè. Apaka njoki ai bato bay a badi na bohoka, na kɔpi ai bay a badi bimimi.

Malako 8

Bato Koto Jinεi Bayaka

¹Bata batitana koko banènè mènè a ehole emina, na baidaka nongo na eka eboyaka. Yesu abea bacingami bande, abala na bu bo,

²Mbi nadi na wa a mojɔ moemumu ebato ba. Bayeyoi na mbi edεye masu masato, na bapeliti nongo eka eboyaka.

³Nakabayaneja na nja a ngando jibu, badi bokwa na limama a njea, mojɔ bo bakina babu badongi bohali.

⁴Bacingami bande bamosɔmbeja bo, Iso bodi bogoleja bato ba na milɛmbɛ ya a esika na ye?

⁵Iyo abahɔjɔ bo, Odini na milɛmbɛ meka? Ibo bajɔ bo, Sambo.

⁶Adeja bato nase. Atomba milɛmbɛ sambo, ajongoa, abuka milɛmbɛ, na amipa ai bacingami bo bamikabe, na bamikaba na bato basusu.

⁷Badaka na bakina swi babojio pongono. Yesu ajongoa swi na apa monɔkɔ bo bamikabe na bato.

⁸Bayaka na bagola; na bandoa bikenge bia bidika, sanga sambo boto.

⁹Bay a bayaka badaka koto jinεi na dea.

¹⁰Ngɔngɔ jimina, abayaneja, atamba na bacingami bande a bwato, na ake a dɔngɔ diDalamanuta.

BaPalusi Baduka Embete

¹¹BaPalusi badoa koko ai Yesu na babanga boboma na nde kite. Bapala bo abanejae ekina embete eDiko, oko a bomodingea.

¹²Iyo apuka a molema monde, na abala bo, Elulu ye edukaka embete mojɔ moye? Mbi natɔndɔkɔ no na soti bo elulu ye eta'ne nongo embete.

¹³Abakina boa, atamba koko a bwato, na alekela a dɔngɔ ditongo.

¹⁴Bacingami ko babosa milembé botomba. Badaka oko na molembé momoci pε a bwato.

¹⁵Na Yesu abaleha bo, Toma nganjamani na mojɔ molipetu liBaPalusi, na lipetu liElode.

¹⁶Bacingami babalana a tei ebu bɛnɛ; bajɔ bo, Edi cina bo bopeleti milembé.

¹⁷Yesu ajeba mojɔ momina na abala na bu bo, Ekakwanani no bo opelitini milembé cina eye? Osipoakinini? Otacingeakani mojɔ? Milema minu midi oko mipipo?

¹⁸Adi no na miso, pεpε njɛnɛ ko? Adi no na matoi, pεpε njoki? Odini oko na libosa pε?

¹⁹Yana abukabi mbi milembé mitano a mojɔ mobato koto jitano, ondoabini cikalike sanga jeka? Bamosɔmbeja bo, Domi-na-jibae.

²⁰Abahɔjɔ koko bo, Yana abukabi mbi milembé sambo a mojɔ mobato koto jinei, ondoabini cikalike sanga jeka? Bamosɔmbeja bo, Sambo.

²¹Abala na bu koko bo, Otacingeakani edεye?

Moto oMiso Mago a Betesaida

²²Amea bo a Betesaida, bato badoa ai yo na moto omiso mago. Bamongɔɔnɔ bo abakee ebɔ ende ai yo.

²³Iyo apea ebɔ emoto ogwa miso, na amana na nde a ngando. Atwea masɔi a miso mande, na abakea mɔmɔ mande ai yo. Amohɔjɔ isa anɛkɛ ekina eka na miso.

²⁴Moto omina anja, na abala bo, Nanɛkɛ bato; badi ko o mele mia midalaka.

²⁵Yesu abakea koko mɔmɔ a miso mande, na yana anja yo a boso bonde, anɛ bohu mɛnɛ na njɛnɛ ende esusu.

²⁶Yesu amoyaneja a ngando ende mɛnɛ; abala na nde bo, Pε bohula koko a ngando ye.

Mojimo moPɛtɛlo

²⁷Yesu akε na bacingami bande a ngando jiKaisalia Pilipo. Adaka bo a njea, yo abahɔjɔ bo, Bato babalaka bo mbi nadi nda?

²⁸Ibo basɔmbeja bo, Yoane Mobatisi; bakina batongo ko babalaka bo odi Elia, na batongo koko babalaka bo odi okina obatɔndɔi.

²⁹Abahɔjɔ koko bo, Ino bɛnɛ ko obalakani bo mbi nadi nda? Pɛtɛlo amosɔmbeja bo, Wε odi Masiya.

30Yesu ko abaleha na bopipo bo batatɔndɔ nongo moto mojɔ momina.

31Iyo abanga bobajeba bo Mwana 'Moto adi bodingoa bou, bo basuku bangando, na basuku banganga, na basɔni, badi bomolona, na badi bomowa, na bo adi bongɔ a bogwa na masu masato.

32Abala mojɔ momina a bohu mɛnɛ. Pɛtɛlo ko amosia, na alemoa na nde.

33Yesu ko ahekua, anja bacingami bande, alemoa na Pɛtɛlo na abala na nde bo, Sangɔngɔ jimbi Satana, donga! Mojɔ bo ngando jilekɛ wɛ jiditi nongo jiNjambe, jidi oko jibato pɛ.

Mojɔ moBocingama na Yesu

34Yesu abolea bato na bacingami bande pongono. Abala na bu bo, Isa okina moto apalaka acingame na mbi, ye asalone yo mɛnɛ, atombe mole-mobokea monde bo acingame na mbi.

35Mojɔ bo, yona opalaka bobanea mohelo monde âmonameja oko bonameja. Na yona onamejaka mohelo monde a mojɔ momhi, na a mojɔ moMwako Mopele, âmobanea oko bobanea.

36Nongo moto akakonja ngondo esusu mɛnɛ, na akabungeja mohelo monde, adi bobɔngɔ na ye?

37Moto adi bosikoa mohelo monde na ye?

38Moto na moto yona okaka sɔni a mojɔ mombi na bikenge bimbi a tei eelulu ye ebɔɔli na bobe, Mwana 'Moto âmokea sɔni a bodoa bonde a ekumu eSangwa 'nde na babwɛnji basɛnɔke baDiko.

Malako 9

1Abala na bu koko bo, Mbi natɔndɔkɔ no na soti bo bakina baya ba'mi yaya badi bonɛ bodoa boBokumu boNjambe na ndangasa oko bapetakini gwa.

Yesu Akindoa Elimo Etongo

2Yana anɔ masu masato, Yesu abea Pɛtɛlo na Yakobo na Yoane, bo akɛe na bu a mokina mono monɛnɛ, oko bo buki pɛ. Iyo akindoa elimo etongo a boso bobu.

3Bisenja binde bipua bopɛɛ, oko na bolailai mɛnɛ; nongo nganga ebososa bisenja abwaniti bopueja bisenja boa.

4Na lɔanɛ Elia na Mose baya badaka bakabale na Yesu.

5Oko boa Pɛtɛlo abala na Yesu bo, Labi, mojɔ mopele mɛnɛ bo so bodaɛ ya! Kina so bopike Inaako masato; dikina diwɛ, ditongo diMose, na ditongo koko diEha.

6Aijeba na soti mojɔ mobobala, cina bo badaka na bɔ bonɛnɛ.

⁷Eyembi ko etita na ebahua. Kɔpi emana a eyembi bo, Iyo adi mwana'mbi ongenjɔ; mohokeani.

⁸Bundumo mɛnɛ, oko yana anjaka bo, bainɛ koko moto a esika emina; banɛ oko Yesu pɛ.

⁹Yana atitaka bo a mono, yo abaleha bo batatɔndɔ nongo moto mojɔ monɛ bo, oko adi Mwana 'Moto pɛ bopeta ngo a bogwa.

¹⁰Ibo babanea ekenge emina a milema mibu; bahojɔnɔ ko a tei ebu, a boduka cina ebongɔ a bogwa.

¹¹Bahɔjɔ Yesu bo, Basɔni babalaka bo Elia adi bopeta doa mojɔ moye?

¹²Iyo abasɔmbeja bo, Eha adi bodoa soti a bobɔngeja ngando jisusu. Mosɔnɔ ko a mojɔ moMwana 'Moto modi bo? Modi oko bo adi bodingoa bou, na âlonama na bato.

¹³Mbi ko natɔndɔkɔ no bo Elia adoa eyou, na bato bakɔ na nde o apalaka bo; mojɔ monde modi a Misɔnɔ boa.

Yesu Aheleja Mwamomi a Yogo

¹⁴Yana amea bo ai bacingami, banɛ bo bato banɛnɛ babahikaka, na bo basɔni babomaka na bu kite.

¹⁵Emumu ebato ko, yana anɛ bo Yesu, bakamo na bokamo bonɛnɛ. Bapota ai yo a bomobɛje njɛbɛ.

¹⁶Yesu abahɔjɔ bo, Mijo mibalaka no midi bo?

¹⁷Okina moto yona odaka a tei ebu amosɔmbeja bo, Mokoja, mbi nadoi na mwana'mbi momi ai wɛ, mojɔ bo adi na mwembo moengomba.

¹⁸Mwembo mokamopea, momodumbaka bisekpe; mapuli mamanaka a monɔkɔ monde; asakokalaka mino, na ahɔngɔkɔ. Mbi nagɔɔnɔki bacingami bawɛ bo bamejae mwembo; ibo ko bahɔniti bomo-meja.

¹⁹Yesu abala na bu bo, Elulu ye epɛndɔ! Mbi nadi boda na nu ekoka? Nadi bohɔnɔ no ekoka? Doani na mwana ai mbi.

²⁰Oko boa badoa na mwana ai yo. Yana anɛ yo Yesu, mwembo mopea mwana na bopipo. Akwa gbu, asadumba mangbendele, na mapuli mamana a monɔkɔ monde.

²¹Yesu ahɔjɔ sange 'mwana bo, Adi boa ekoka? Iyo asɔmbeja bo, Oko adaka yo mwana mokɛkɛlɛkɛ;

²²momodumbaka bihole binɛnɛ a mosa na a madiba bo momowoe. Wɛ ko, isa obwani bokɔ mokina mojɔ, ike a so wa; kɔmeja so.

²³Yesu abala na nde bo, Isa obwani bokɔ! Isa moto ajimaka, ngando jisusu jibwani bokɔɔmɔ ai yo.

²⁴Sange 'mwana abekoa bokpa bo, Mbi najimaka; bɔmeja mbi a mojɔ mokitε embi.

²⁵Yana anε Yesu bo bato bambambaka, abala na mwembo mobe bo, Wε, mwembo moengomba na bohoka, imana ai yo; t'okwee oko a tei ende na ikina.

²⁶Mwembo mogama, momodumba mangbendele, na momana ai yo boa. Mwana ko adika o mogo, na bato banεnε babala bo, Agwi!

²⁷Yesu ko amopea ebo, amongɔjɔ, na ama mema.

²⁸Yana akwea bo koko a ndako, bacingami bamohɔjɔ bo, Iso bohɔniti bomomeja mojɔ moye?

²⁹Iyo abala na bu bo, Tungu emina edi bomana oko a mojɔ mobo'nga pε.

Mojɔ moBogwa boYesu

³⁰Badonga a esika emina, na lɔalena njea eGalile. Yesu ko aipala bo bato bajebé mojɔ momina.

³¹Mojɔ bo akojaka bacingami bande, na abala na bu bo, Mwana 'Moto adi bokwa a mɔmɔ mabato babe, na badi bomowa; iyo ko adi bongɔ na masu masato.

³²Ibo ko baicingea ekenge emina, na baimohɔjɔ a mojɔ mobo.

Mosoo moBacingami

³³Bamea a Kapalanauma, na yana adaka bo a ndako tei, Yesu abahɔjɔ bo, Mijɔ mibalanki no a njea midaki bo?

³⁴Ibo badaka oko bogɔ, cina bo bama bomana kitε a mojɔ mobosuku.

³⁵Iyo adana mobondo, abea bacingatni domi-na-babae, na abala na bu bo, Isa okina apalaka bo adae boso, yε adae oko suka, na mokɔmeli obasusu batongo.

³⁶Atomba koko mwana mokekεlεkε, amodeja a ndanda ebu, amodinga na mɔmɔ mande, na abala na bu bo,

³⁷Moto na moto yona osɔkɔ bopèle okina mwana mokεkεlεkε o boa, asɔkɔ mbi; na yona osɔkɔ mbi, asɔkɔ yona olomani, te mbi.

³⁸Yoane abala na nde bo, Mokoja, iso bo'ni okina moto akamejae miembo mibe a kombe ewε, na bolemoi na nde, mojɔ bo atacingamaka na su.

³⁹Yesu ko abasɔmbeja bo, T'omolembeni oko; mojɔ bo, moto akakɔ mondumba a kombe embi, ebaeli ende a mojɔ mombi etada nongo ebalabala.

⁴⁰Yona oditi na su soki adi a dɔngɔ disu.

⁴¹Mbi natɔndɔko no na soti bo moto akapa no kɔpɔ emadiba mabomwa cina bo odini bato baMasiya, atataka boso ndese ende.

⁴²Moto ko akasakeja okina obana ba bakεkεlεkε bayajimeaka mbi, enɔi na bopele bo bakande litai linɛnɛnɛ a dɔli dinde bo bamodumbe a madiba.

⁴³Okakɔ bobe cina eebɔ ewε, tɛndɔ ebɔ emina. Na bokwea a bomɔ na eyεmε, na bokwea a Gehena na mɔmɔ mabae, oko a mosa mua modi na bosusu, enɔi na bopele bo moto akwee a bomɔ na eyεmε.

⁴⁴Okakɔ bobe cina eebota ewε, tɛndɔ ebota emina.

⁴⁵Na bokwea a bomɔ na motɛngu, na bokwea a Gehena na bibota bibae,

⁴⁶enɔi na lɔopele bo okwee a bomɔ oko na motɛngu.

⁴⁷Okakɔ bobe cina ediso diwε, ihwa diso dimina. Na bokwea a Bokumu boNjambe na diso dimɔci, na bodumbama a Gehena na miso mabae, bokwea a Bokumu boNjambe na diso dimɔci lɔonɔi na bopele,

⁴⁸mojɔ bo ngusu babu batagwa a Gehena, na mosa motadimea oho.

⁴⁹Bahengaka masiko malitumbu na mukwa, na bahengaka moto na moto oko na mosa.

⁵⁰Mukwa modi eka epele; mokabeha ko, modi bobɔngɔ koko na ye? Dani na mukwa a tei enu bɛnɛ, na dani na bowi, moto na mina 'nde moto.

Malako 10

MoJɔ moBolongana

¹Yesu adonga a esika emina, akaa Yoladene na ake a ngando jiYuda a dɔŋɔ dia. Bato banɛnɛ mɛnɛ batitana ai yo, na abakoja o akɔkɔ yo bihole bisusu.

²BaPalusi badoa ai yo, na bamohɔjɔ na ndingea isa momi abwani boyaneja mwali onde.

³Iyo abasɔmbeja bo, Mobeko modumbea Mose ai no modi bo?

⁴Ibo babala bo, Mose ajima bo moto akapa mwali onde mokanda mobobɔtɔnɔ, abwani bomoyaneja.

⁵Yesu abasɔmbeja bo, Mose asɔnea no mobeko momina cina ebopipo bomilema minu.

⁶A libangake ko, yana ayoa Njambe ngondo, Abakɔ momi na mwali.

⁷A mojɔ momina, momi adi bokina sangwa 'nde na ngwa 'nde a bokatana na mwali onde,

⁸bo basusu babaе bадае око munу momoci. Oko boa baditi koko babaе, badi око omoci pε.

⁹Njambe akabakataneja, t'okine око moto ababotejae.

¹⁰Adaka bo a ndako tei bacingami bande bamohojо koko a mojо momina.

¹¹Iyo abala na bu bo, Moto akayaneja mwali onde na akasо otongo, angeke na nde bɔɔli.

¹²Na mwali akadonga ai muma 'nde bo akεe ai momi otongo, mwali omina angeke bɔɔli.

Yesu Apamboa Bana Bakεkεlεkε

¹³Bato badoa na bana bakεkεlεkε ai yo bo ababakee mɔmɔ mande. Bacingami bande ko balemoa na bato baya batombaka bana.

¹⁴Yana anε Yesu mojо momina akεnjо око bokεnjо, na abala na bu bo, Kinani bana bakεkεlεkε bадое ai mbi; yεni bobasia, mojо bo Bokumu boNjambe bodi око ai bato baya badi o bana baba.

¹⁵Mbi natɔndɔkɔ no na soti bo moto amiti sɔ Bokumu boNjambe o eltɔmeli emwana mokekεlεkε, atakwea nongo ena.

¹⁶Oko boa abatomba a mɔmɔ mande, ababakea mambu na abapamboa.

Konji Ahɔjɔ Yesu Lihɔjɔ

¹⁷Aмана Yesu a bodala a njea, moto omoci apota ai yo. Atita na magbunda a boso bonde na amohojо bo, Mokoja mopele, êkɔ mbi ndeni bo nasangoe bomɔ bua bodi na bosusu?

¹⁸Yesu abala na nde bo, Obeaka mbi mopele mojо moye? Pεрε nongo omoci odi mopele, око Njambe pε.

¹⁹Ojebaka mibeko; T'ongεе око bɔɔli; t'owoe око moto; t'obe око; t'otate око tati ebokosea; t'okosee око mojо; toma da na lisuma ai sangwao na ngwao.

²⁰Moto omina amosɔmbeja bo, Mokoja, mbi namisumaka misusu, donga око a bwεngε bombi.

²¹Yesu amonja na amopala. Abala na nde bo, Mojо motakaka na wε око momoci pε; ke angeje leka lowε losusu. Pa likonja limina ai bato baya badi na bokwali, na ôda na likonja linεnε liyumu oho Diko. Osa ko odoe a bocingama na mbi.

²²Ama yo ka ekenge emina, ami yana око na wa enεnε, mojо bo adaka na makonja manεnε.

²³Yesu ahekoja miso a mɔngɔ masusu. Abala na bacingami bande bo, Baya badi na likonja linεnε badi bokwea a Bokumu boNjambe око na kpɔkɔsɔ.

²⁴Bacingami bakamoa a mojɔ mobikenge bia binde. Iyo ko abala na bu koko bo, Bana, bato bakabakea milema mibu oko a likonja pε, badi bokwea a Bokumu boNjambe oko na kpɔkɔsɔ mɛnɛ.

²⁵Kamela adi bonɔ a lipese litonga oko moto olikonja akweakini a Bokumu boNjambe.

²⁶Ibo bakamoa bou mɛnɛ a mojɔ momina, na babalana bo, Ekada boa, odi bohela nda?

²⁷Yesu abanja, na abala bo, Mojɔ mu modi bogbasoa na bato; motagbasoa ko na Njambe. Mojɔ bo Njambe abwani bokɔ ngando jesusu.

²⁸Petelo abanga bobala na nde bo, Hokea; iso bokina leka losusu a bocingama na wε.

²⁹Yesu amosɔmbeja bo, Mbi natɔndɔkɔ no na soti bo, Moto na moto yona okina ndako, isa bananango, isa ngɛnɛ, isa sango, isa nango, isa mwali, isa bana, isa gbie, a mojɔ mombi, na a mojɔ moMwako Mopele,

³⁰atadimboa bosɔ likabo lia linɔi; a ngondo yeye, oko ndako, na bananango, na ngɛnɛ, na banango, na bana, na gbie, ee na minɔngɔ pongono; na bomɔ bua bodi na bosusu a ngondo ebodoa.

³¹Banɛnɛ ko baya badi boso edεye badabi oko ngɔngɔ, na banɛnɛ baya badi ngɔngɔ edεye badabi oko boso.

Mojɔ moBogwa boYesu

³²Adaka bo a njea a bokε a Yelusalema, Yesu adaka akadale a boso bobu. Bato baya badaka bacingi na nde ngɔngɔ badaka na mokakwano na bɔ. A mojɔ momina, yo ababea koko, oko Domi-na-babae, na abajebeja ngando jia jidi bokwa na nde.

³³Abala bo, Hokeani; iso bokεkε a Yelusalema, na Mwana 'Moto âkabama ai basuku banganga na ai basɔni. Ibo bâjima bo agwε, na bâmopa a mɔmɔ mabapakano

³⁴baya bâmopɔmbeja, bâmotuea masɔi, bâmotua, na bâmowa. Iyo ko ângɔ koko a busa bomasato.

Bonga boYakobo na Yoane

³⁵Yakobo na Yoane, bana baSebede, badoa ai Yesu. Babala na nde bo, Mokoja, iso boka'nga wε mokina mojɔ, bopaka bo okɔe mojɔ momina ai so.

³⁶Iyo abahɔjɔ bo, Mojɔ mopalaka no bo nakɔe ai no modi bo?

³⁷Ibo bamosɔmbeja bo, Jima bo so bodae, okina a ebo ewε ebami, na otongo a ebo ewε ebali a ekumu ewε.

38Yesu ko abala na bu bo, Otacingeakani mojɔ mongaka no. Ino obwanini bomwaka kɔpɔ emwakaka mbi? Obwanini bobatisama na batisimo embi?

39Ibo bamosɔmbeja bo, Bobwani. Yesu ko abala na bu bo, Ômwakani soti kɔpɔ emwakaka mbi, na ôbatisamani na batisimo embi.

40Endele ko, moditi mojɔ mombi a bopa edie a ebo embi ebami, isa a ebo embi ebali. Bihengemɛ oko ai bato baya bahɔmɔ a mojɔ momina.

41Yana aka bacingami batongo domi mojɔ mu, bakɛnɔ na Yakobo na Yoane.

42Yesu ko ababea, abala na bu bo, Ino ojebakani bo bakumu bamakota basakumejaka a boso bobu, na basuku babu badi na kpaci ai bato.

43Ino ko oditini nongo boa. Yona opalaka adae mosuku onu, yε adae mokɔmeli onu.

44Na isa okina onu apalaka boda boso bonu, yε adae mobuli obasusu.

45Mojɔ bo Mwana 'Moto yo mɛnɛ adoi, te bo bamokɔmɛe, oko bo akɔmɛe bato, na apɛ mohelo monde lisiko libato banɛnɛ.

Balatimai

46Bamea a Yeliko. Adonga yo a Yeliko na bacingami bande na bato batongo banɛnɛ, Balatimai, mwana 'Timai, moto omiso mago, adaka a dɔngɔ dinjea a bo'nga linga.

47Yana aka yo bo edi Yesu oNasaleta, abanga bobekoa bo, Yesu, Mwana 'Dawidi, ikeani wa!

48Bakina balemoa na nde bo adae bogo; yo ko ahɛjɛ hingi, na ahekua na bopipo bo, Wε Mwana 'Dawidi, ikeani wa!

49Yesu ama oko bo'ma, na abala bo, Mobeani adoe. Babea moto omiso mago, bajɔ na nde bo, Titeja molema, angɔ, abeaka wε.

50Iyo adumba kasaka ende eyai, angɔ bokpa, na adoa ai Yesu.

51Yesu abala na nde lɔo, Opalaka bo nakɔe ndeni a mojɔ mowε? Moto omiso mago amosɔmbeja bo, Moswa'mbi, yε nase njɛnɛ embi.

52Yesu abala na nde bo, Yana; ejimeli ewε ehelejai wε. Oko boa asɔ njɛnɛ ende lɔokpa, na acingama na Yesu a njea.

Malako 11

Yesu Akwea a Yelusalema

1Yana abengaka bo Yelusalema, bamea a Betepage na Betania, hulelu na Mono moOlive. Yesu aloma bacingami bande babae na monɔkɔ bo,

²Keni a ngando yena edi saboso; okameani oho, odini bone okina punda acingi yona otombakini moto. Mocingoani na doani na nde jono.

³Moto akahoję no bo, Okökoni boa mojō moye? balani bo Kumu amobeaka, na bo adi bomosombéja bokpa.

⁴Akε bo, batana punda acingi a monokɔ mondako a licilinga, na bamocingoa.

⁵Bakina bato baya badaka a esika emina babahoję bo, Ino ocingoakani punda mojō moye?

⁶Ibo basombéja o ama bala Yesu, na bato bajima bo bakεe.

⁷Badoa na punda ai Yesu, babakea bisenja bibu a punda, na babakea Yesu diko.

⁸Bato banenε banda bisenja bibu a njea. Batongo balena mandendε a gbie, na bamasambea a njea.

⁹Baya badaka boso, na baya badaka bacingi engbang, babekoa bo, Osana! Bojongoa ai yo yona odoaka a kombe eKumu!

¹⁰Bojongoa a bokumu botata osu Dawidi bua bokehε adoe! Osana a Diko yena enɔi!

¹¹Yesu akwea a Yelusalema na a tempelo. Anja leka a mɔngɔ masusu, na asombɔ na bacingami domi-na-babae a Betania, mojō bo busa bobenga bodipa.

Mole Motete

¹²Yana aboa busa, badonga a Betania, na Yesu adaka na nja.

¹³Anε yo mokina mole bohali mweka mua modaka na kasa, akε a boduka isa modaka na mbuma. Amea yo ko a mole, atana oko kasa pε, mojō bo ehole embuma eipaka mea.

¹⁴Adipoa monokɔ na abala na mole bo, Moto atayaka mbuma jiwε na ikina. Na bacingami bande baka ekenge emina.

Yesu Asenoja Tempelo

¹⁵Yana amea bo a Yelusalema, Yesu akwea a tempelo, na abanga bobengana baya bakokɔ bwasa a tempelo. Akukea mesa mabato baya basombɔtɔnɔkɔ likonja, na bidie bibato baya bangεjekε sungu.

¹⁶Aijima nongo bo moto anɔe a tei etempelo yona otombaka ekina eka.

¹⁷Abaleha, na ahala na bu bo, Moisɔnɔmɔ bo? Ndako embi êda na kombe, Ndako eBo'nga, a mojō momakota masusu. Ino ko oehekojaini bo edae esika etitanaka mibengo.

¹⁸Basɔni na basuku banganga baka mojɔ momina, na baduka njea bo bamowoe. Ibo bamobanga oko bobanga, mojɔ bo bato basusu basepaka bou a mojɔ mobokoja bonde.

¹⁹Yesu ko adonga a ngando tu busa a ehole emɔkɔmɔkɔ.

Mojɔ moEjimeli

²⁰Anɔkɔ bo a njea ehuma, bacingami banε bo mole modaka mohɔlɔngɔnɔke oko a cina mɛnɛ.

²¹Pεtelo ale; abala na Yesu bo, Labi, anja mole mosingabi wε; mohɔlɔngɔnɔbi!

²²Yesu asɔmbeja, na abala na bu bo, Dani na ejimeli ai Njambe.

²³Mbi natɔndɔkɔ no na soti bo, Moto akabala na mono mu bo modonge ena a bokwa a tei emadiba-mamukwa, na yo pε boda nongo na kite a molema monde, na akajima bo mojɔ mobalaka yo modi bokɔɔmɔ, môda boa soti.

²⁴A mojɔ momina, mbi natɔndɔkɔ no bo, Yana angaka no, jimani bo osini ngando jesusu jingɔɔnɔkɔ no, na ôsɔni.

²⁵Okangɔni a mojɔ mobo'nga yana adi no na moto mojɔ, mokinani,

²⁶bo Sangwa'nu yona odi oho Diko akine jihe jinu pongono.

Lihɔjɔ liNganga

²⁷Bamea koko a Yelusalema. Yana adaka Yesu akadale a tei etempelo, basuku banganga, na basɔni, na basuku bangando, badoa ai yo.

²⁸Babala na nde bo, Kpaci ewε a bokɔ ngando ji ehuli jɔ? Opi wε kpaci nda ho okɔe ngando ji?

²⁹Yesu abasɔmbeja bo, Mbi napalaka bohɔjɔ no koko lihɔjɔ. Okasɔmbejani, mbi nadi botɔndɔ no yona opani kpaci yena ekɔkɔ na mbi ngando ji.

³⁰Batisimo eYoane ehuli jɔ, oho Diko, isa ai bato?

³¹Ibo bale, na babalana bo, Bokabala bo edonga oho Diko, yo adi bohɔjɔ so bo, Oko boa oimojimeani mojɔ moye?

³²Na bokabala bo ehula ai bato?—babangaka bato mojɔ bo bato basusu bangando bajimaka bo Yoane adaka motɔndɔi osoti.

³³A mojɔ momina, basɔmbeja Yesu bo, Botajebakadea. Na Yesu abala na bu bo, Mbi pongono, nitajebeja no a mojɔ mokpac̄i yena ekɔkɔ na mbi ngando ji.

Malako 12

Mondε moBasali Babe

¹Yesu abanga bobatondə koko mində bo, Okina moto ana gbie evine. Aehika na mongba. Alonga mombəndə a mojɔ moeboka. Apika ndako. Akina gbie a mɔmɔ mabasali, na ake mɔngɔ mobohali.

²Yana akpeta mbuma, yo aloma mokɔmeli ai basali bo asε libondo limbuma jigbie.

³Ibo ko bapea mokɔmeli, bamotua, na bamoyaneja boa ngasa.

⁴Abalomea koko okina mokɔmeli otongo. Babeneja mokɔmeli omina a molo, na bamosamboja.

⁵Aloma koko okina otongo, na bamowa oko bowa. Aloma koko batongo banεnε. Batua bakina babu, na bawa batongo.

⁶Iyo adika na omɔci pε, oko mwana'nde mεnε ongenjɔ. Suka mεnε, abamolomea yo. Abala bo, Badi bosuma mwana'mbi.

⁷Basali ko babalana bo, Sangoli yona! Kɔni bomowoe, nongo bosangoe so bεnε.

⁸Bamopea, bamowa, na bamodumba a sokolu egbie.

⁹Iyo moswa ogbie âkɔ bo? Adi bodoa, âwa basali bamina, na âpa gbie ai batongo.

¹⁰Ino olangakinini mojɔ mu a Misɔnɔ? Litai lidumbi bayoi Lidi edεye litai limogbukusu.

¹¹Njambe akɔi mojɔ mu, Na modi mojɔ mobokamoa a miso masu.

¹²Bakenga bomopea; badaka ko na bɔ a mojɔ mobato. Basipoa bo Yesu abala monde momina oko na bu. Oko boa bamokina na bayana.

Lihɔjɔ liBaPalusi

¹³Bamolomea bakina BaPalusi na baElode, bo bamogegeanejae na bibaeli binde.

¹⁴Ibo badoa, na babala na nde bo, Mokoja, iso bojebaka bo wε odi moto osoti. Otabangaka nongo moto, mojɔ bo ekumu ebato edi eka engasa a miso tnawε, na okojaka njea eNjambe na soti mεnε. Ebɔngi bo bopute Kaisala tako isa ebɔngiti?

¹⁵Bobwani bopa isa botapa? Yesu ko anε poloso ebu, na abasɔmbeja bo, Odingeakani mbi mojɔ moye? Panini ekina flanka bo naenje.

¹⁶Badoa na Banka, na yo abahɔjɔ bo, Elimo ye na mosɔnɔ mu monda? Ibo basɔmbeja bo, Oko moKaisala.

¹⁷Na Yesu abala na bu bo, Kabani ai Kaisala libondo liKaisala, na libondo liNjambe oko ai Njambe. Oko boa abakamoja bou mεnε.

Lihɔjɔ liBaSadoki

18 Bakina Basadoki badoa ai yo pongono. Ibo bajimaka bo bongo a bogwa boditi.

¹⁹Bamobjo bo, Mokoja, Mose asœnea so mobeko bo momi akagwa, na akakina mwali ngasa, pεpε bana, mwananango adi bosɔ mwali bo abote na nde bana ai mwangwa'nde.

²⁰Oko boa bananange jibato badaka sambo. Yona mosuku aso mwali, na agwa pε bobota nongo mwana.

²¹Yona mbakeli onde aso mwali onde, na yo agwa pongono, pe ko bobota nongo mwana; yona obasato koko boa.

²²Ibo basusu sambo bamoso boa, na bagwa, pε ko bokina mwana. Suka mεne, mwali agwa pongono.

²³Oko boa, bagwake baka'ngɔ, yo adi boda mwali onda? Mojɔ bo adaka mwali obu basusu sambo.

²⁴Yesu abasombéja bo, Ino otacingeakani Misongo na ngulu eNjambe. A moç momina, odini na libunga.

²⁵Mojo bo, bato bakango a bogwa, bataso nongo bali, na batahangala bali ta meki; badi boda o babwənji baDiko.

²⁶A mojɔ mobo'ngɔ bobagwake, olangakinini mojɔ molipumba a mokanda moMose? Njambe abala na nde bo, Mbi nadi Njambe oAbalayama, Njambe oIsaka, Njambe oYakobo

²⁷Iyo aditi Njambe obagwake; adi oko Njambe obaya badi mo. Ino odini na libunga linene.

Lihōjɔ liBasɔni

²⁸Okina obasɔni ahokea mijɔ mibalanaka bo. Yana anε yo bo Yesu alonga na masɔmbeja mande, abatama na nde, na amohɔjɔ bo, Mobeko mua monɔi mibeko misusu mitongo modi bo?

²⁹Yesu amosɔmbeja bo, Mobeko moboso modi oko mu; Hokea Yisalaele! Kumu, Njambe osu, Kumu adi oko yo omɔci pe.

³⁰na Toma pala Kumu Njambe owe na molema mowε mosusu, na mwembo mowε mosusu, na bole bowε bosusu, na ngulu ewε esusu.

³¹Mobeko momibae modi oko mu; Toma pala motuteano mowε o asapalaka wε mεnε. Mobeko mua monɔi mibeko mimina moditi.

³²Mosɔni abala na nde bo, Bopele mɛnɛ Mokoja. Olongi soti yana abali wɛ bo, Iyo adi oko omɔci, na pɛpɛ okina otongo odi, oko Iyo pɛ.

³³Epaeli emolema mosusu, na bole bosusu, na ngulu esusu, enɔi bipeeli na masiko masusu.

³⁴Yana anε Yesu bo asɔmbeja na bowεi, abala na nde bo, Wε oditi na Bokumu boNjambe bohali. Pεpε nongo moto otongo ko okenga bomohɔjɔ mahɔjɔ a mojɔ mobɔ.

Lihɔjɔ liYesu

³⁵Adaka Yesu akakojae a tempelo, abala bo, Basɔni babalaka bo Masiya adi Mwana oDawidi mojɔ moye?

³⁶Mwembo Mosenɔke mobaleja Dawidi yo mεnε, yana abala yo bo, Kumu abali na Kumu ombi bo, Da a ebɔ embi ebami, Oko a ehole êdumba mbi soki jiwe A cina jibibota biwε.

³⁷Isa Dawidi yo Inεnε amobeaka Kumu, adi boda mwana'nde na ye?

³⁸Bato baemumu enεnε bamohokea na sepi. Yana akojaka yo, Yesu abala bo, Toma dingani a mojɔ mobasɔni. Ibo bapalaka bolwa bisenja biyai-biyai a bongε bisika na bisika. Bapalaka bo bato bababεjεe njεbε a jando;

³⁹Bapalaka bidie biboso a sinagogue, na bisika bia binɔi na bopele a malɔonje.

⁴⁰Bayakaka ndako jibali-babogwa, na bakoseaka mojɔ oko na bingeeli biyai-biyai. Ibo bâsamba na bopipo mεnε.

Epeeli eMwali-Obogwa

⁴¹Yesu adaka a edie a dɔngɔ diesei ebipeeli, na anjaka bato baya basaka likonja a eseい ebipeeli. Bakina bato balikonja basa bipeeli binεnεnε.

⁴²Okina mwali-obogwa ko adoa, moto obokwali. Iyo asa bikenge bilikonja bibojio bibae bia bibwani na likota limɔci pε.

⁴³Yesu abea bacingami bande, abala na bu bo, Mbi natɔndɔkɔ no na soti bo epeeli epi mwali-obogwa yona obokwali, enɔi bipeeli bibu basusu baya basi bipeeli a eseい.

⁴⁴Mojɔ bo, ibo basi oko libondo likekεlεkε pε lilikonja libu linεnε. Iyo ko, nongo adi yo na taka, asi likonja linde kanga lisusu mεnε, oko likonja lisusu lia lidaka na nde a mojɔ moboyaka.

Malako 13

Bileho Bisuka

¹Yana amanaka Yesu a tempelo, mocingami onde omɔci abala na nde bo, Mokoja, anja matai ma, na eyoeli endako ye enεnεnε!

²Yesu amosɔmbeja bo, Onɛkɛ eyoeli endako ye enɛnɛnɛ? Pɛpɛ nongo litai limɔci ya lidi bodika a diko dilitai litongo. Mâdumbama kanga masusu mɛnɛ.

³Adaka yo a Mono-moOlive mua moyεyεkɛ tempelo, Pɛtelo, na Yakobo, na Yoane, na Andalea, bamohɔjɔ yana adaka yo buki bo,

⁴Mojɔ momina modi bokwa a ehole eni? Embete ôda bo, a bojebeja so bo ngando ji jesusu jidi hulelu?

⁵Yesu abanga bobatɔndɔ bo, Toma nganjamani bo moto atalaboja no.

⁶Mojɔ bo bato banɛnɛ badi bodoa a kombe embi; bâbala bo, Mbi nadi Masiya; na bâlaboja bato banɛnɛ.

⁷Ino oka'kani bato bakabale a mojɔ mobila na bijoki bibila, t'odaeni oko na mokakwano; mojɔ lɔo ngando ji jesusu jibwani bodoa; suka ko te yena.

⁸Likota l'na na likota. Bokumu bô'na na bokumu. Majonga mangondo mâda a bisika na bisika, na manjale pongono. Ngando jimina ko jîda oko bobanga bojɔɔcɔ.

⁹Toma nganjamani a mojɔ monu bɛnɛ. Badi bopeja no a mɔmɔ mabajuji. Badi botua no a sinagoge. Odini bo'ma a boso bobasuku babato, na a boso bobakumu a mojɔ mombi, bo otateni tati ai bo.

¹⁰Endele ko, Mwako Mopele môteta tɔndɔmɔ a makota masusu.

¹¹Bakapea no, na bakake na nu a bisambi, t'odaeni oko na mokakwano a mojɔ mobikenge bibobala. Balani oko bikenge bia bipama ai no a ehole emina. Mojɔ bo Mwembo Mosenɔke modi bobala, te no bɛnɛ.

¹²Moto adi bokaba mwangwa'nde bo agwɛ. Sange'moto adi bokaba mwana'nde. Bana bâlona baboti babu, na bâbawea.

¹³Bato basusu bâlona no a mojɔ mokombe embi. Moto ko yona ôda mombi-limake oko a suka mɛnɛ, yo âhela.

¹⁴Okanɛni eka yena emaneene na bosambolu epikami a esika yena ebɔngiti na eka emina, (kina yona olangaka acingee) baya bâda a Yuda a ehole emina badi bocia oko a meno.

¹⁵Moto akada a diko dindako, abwaniti botita a bokwea a ndako bo atombe leka.

¹⁶Moto yona odi a gbie abwaniti bohula a botomba kasaka ende.

¹⁷Bali ko baya badi na memi, na baya banungeaka, bôda na monɔngɔ a masu mamina.

¹⁸Ingakani bo ngando jimina jitada a ehole epio.

¹⁹Mojo bo, molobɔ̄ momasu mamina maipaka da, nongo a bobanga bongondo eyoa Njambe, oko a busa bu; na motaya da boa.

²⁰Eipeta da bo Njambe akueja masu mamina, ka pεpε nongo moto odi bohela. Iyo ko amakueja a mojo mobahεngεmεkε bahɔ̄i yo.

²¹Moto akabala na nu a ehole emina bo, Anja! Masiya adi jɔ̄no! isa, Anja! Adi bobo! Yojimeni oko.

²²Mojo bo, BaMasiya babokosea na batɔ̄ndɔ̄i babokosea badi bodoa. Bâkɔ̄ bimbete na mindumba. Akɔ̄ki bo hɔ̄nɔ̄, ka balabojae bahεngεmεkε mεnε.

²³Toma dingani. Mbi nâjebejai no ngando ji jesusu, oko jipetakini doa.

²⁴Molobɔ̄ momina mokasia a masu mamina, modika busa môhinda oko bohinda. Songe âtaneja koko monjolo.

²⁵Njɔ̄tɔ̄ badiko bâkwa nase, na ngulu jidiko jidongosana.

²⁶A ehole emina, bâne Mwana 'Moto akadoe a tei ebiyembi, na kpaci na ekumu enεnε.

²⁷A ehole emina, yo âloma babwεnji bande a bobolea bahɔ̄mɔ̄ke bande bamɔ̄ngɔ̄ masusu manεi, oko a suka engondo, na a suka ebusa.

²⁸Ikoani mojo na monde momole. Bitape bikambe, na bisanga biyene bikatɔ̄, ojebakani bo yanga esi.

²⁹Oko boa koko, omaka nεni ngando ji jesusu, osa ko ojebeni bo yo adi hulelu mεnε, oko a monɔ̄kɔ̄ mondako.

³⁰Mhi natɔ̄ndɔ̄kɔ̄ no na soti bo mijɔ̄ mi misusu midi bongama oko elulu ye esiakini.

³¹Nongo Diko na nase jikadimoa, bibaeli bimbi bitakputoa.

³²A mojo mobusa bomina ko, na ehole emina, pεpε nongo moto ojebalta, te nongo babwεnji-baDiko, isa Mwana; ojebaka oko Sango pe.

³³Toma nganjamanji; toma sεnjεlεni, na ingakani; mojo bo otajebakani yana âdoa ehole emina.

³⁴Mojo momina modi o moto yona okεkε mokina mɔ̄ngɔ̄. Akinaka ndako ende a mɔ̄mɔ̄ mabakɔ̄mεli bande, moto na moto na elomu ende, na akinaka monɔ̄kɔ̄ na sinjili bo abanee ngando bopele.

³⁵Sεnjεlεni boa, mojo bo otajebakani ehole ehulaka moswa 'ndako, isa a ehole emɔ̄kɔ̄, isa na bulu tei, isa a mojukakeli, isa ehole eehuma.

³⁶Sεnjεlεni, asaka hula bundumo na âtana no ohwεlini.

³⁷Mbi nabalaka na bato basusu oko ekenge ebali mbi na nu bo, Senjeleni.

Malako 14

Ndungu a Bowa Yesu

¹Edika oko masu mabae pε a Kola-eBonc, na a ehole eboyaka milembε mia mipeliti lipetu. A mojɔ momina, basuku banganga na basɔni badumba ndungu a bopea Yesu na poloso bo bamowoe.

²Mojɔ bo babala bo, Te a ehole ekola, bo bato basaka da na ejoki.

Yesu a Ndako eSimona

³Yesu adaka a ndako eSimona, moto omaba, a ngando kombe Betania. Yana adaka yo a mesa, okina mwali akwea. Iyo adoa na molangi moalabasata mua modaka na malasi botɔ, malasi mayumu mεnε. Abuka molangi, na asopa malasi a molo moyesu.

⁴Bakina bato bakεnjɔ. Babala bo, Malasi ma manami boa mojɔ moye?

⁵Mabwanaki oko a bongejε na pata mikama misato na dea, bo bato babokwali base likonja limina. Na balemoa na mwali oko bolemoa.

⁶Yesu ko abala bo, Kinani adae. Omonɔngejakani mojɔ moye? Akɔi mojɔ mopele mεnε ai mbi.

⁷Odini na bato babokwali a tei enu masu masusu, na obwanini bobaltɔ monganji yana apalaka no. Mbi ko naditi na nu na bosusu.

⁸Iyo akɔi mua mobwani na nde a bokɔ; asuoi mokuku mombi a mojɔ moesεmɔ.

⁹Mbi natɔndɔkɔ no na soti bo mojɔ mokɔi mwali yo môtɔndɔmɔ a bisika bisusu bitɔndɔkɔ bato Mwako Mopele, kanga a ngondo esusu mεnε, bo bato bamolεe.

Yuda Iskalio

¹⁰Okina obu Domi-na-babae, kombe ende Yuda Iskalio, ake ai basuku banganga bo amokabe ai bo.

¹¹Ibo baka mojɔ momina na sepi enεnε, na bajima bo bamopε likonja. Oko boa yo aduka ehole yena ebwana bo amokabe ai bo.

Kola eYesu na Bacingami Bande

¹²Yana amea busa boboso bo Milembε mia mipeliti lipetu, oko yana awaka bo mwana-bata a mojɔ moKola eBonc, bacingami bande babala na nde bo, Opalaka bo bokεe jɔ a boselingoa Kola-eBonc a mojɔ mowε bo oyake?

¹³Iyo aloma bacingami bande babae na monɔkɔ bo, Kεni oho a ngando, na ôsonganani na moto yona oto-mbaka teni emadiba; mosusani.

¹⁴Akakwea a ekina ndako, balani na moswa 'ndako emina bo, Mokoja altojokɔ bo, Ekenge endako edi jɔ, bo nayake Kola-eBonɔ na bacingami bambi?

¹⁵Iyo adi boneja no ekenge enεnε a mboba ediko yena edi na leka lua lobwani, na edi engεbenεke. Selingoani Kola-eBonɔ a mojɔ mosu oko ena.

¹⁶Baci-ngami bakε a ngando, na batana o ama yo bala na bu, na baselingoa Kola-eBonɔ.

¹⁷Yana adipa busa, Yesu adoa na bacingami domi-na-babae.

¹⁸Adaka bo a mesa a boyaka, Yesu abala bo, Mbi natɔndɔkɔ no na soti bo okina onu bay a bayakaka na mbi adi bokaba mbi.

¹⁹Ibo babanga boka monɔngɔ a mojɔ momina, na bamohɔjɔ omɔci-omɔci bo, Edi mbi?

²⁰Iyo abala na bu bo, Oko okina onu Domi-na-babae, okina yona odubeaka molembε na mbi a saani emɔci.

²¹Mwana 'Moto adi bokε oko a njea esɔnɔmɔ a Misɔnɔ a mojɔ monde. Monɔngɔ ko ai moto yona odi bokaba Mwana 'Moto! Akɔki ya da pε nongo bobotama, ka enɔi na bopele.

²²Yana ayakaka bo, Yesu atomba molembε, ajongoa, abuka molembε, na abapa. Abala bo, Asɔni; imu modi mokuku mombi.

²³Atomba kɔpɔ pongono, ajongoa, abapa, na bamwaka 'bo basusu.

²⁴Iyo abala na bu bo, Iye edi makia mambi mamokongo, maya masopei a mojɔ mobato banεnε.

²⁵Mbi natɔndɔkɔ no na soti bo nitaya mwaka Inadiba mavine, oko a busa bomwabí mbi mayene a Bokumu boNjambe.

²⁶Asieja bo yembo bo'mba, bakε a Mono moOlive.

²⁷Yesu abala na bu bo, Ino basusu ôsakani libaku; mojɔ bo mosɔnɔmɔ bo, Nâboma mobanei, na bata bânangana.

²⁸Nakango ko a bogwa, nadi bokε boso bonu a Galile.

²⁹Petelo abala na nde bo, Nongo 'bo basusu bakasaka libaku, mbi nitasaka nongo libaku.

³⁰Yesu abala na nde bo, Mbi natɔndɔkɔ wε na soti bo odi bongana mbi ngana jisato na bulu bu, oko kɔkɔ abelekoakini belekoa jibae.

³¹Petelo ko abala na bopipo mεnε bo, Nongo nakagwa na wε, nitangana wε! Ibo basusu babala koko boa.

Gɛtɛsemane

³²Bamea a ekina esika yena edaka na kombe Gëtësemane. Yesu abala na bacingami bande bo, Ehole edi mbi a bo'nga, ino dikani yaya.

³³Abea Pëtelo na Yakobo na Yoane; ake na bu, na abanga boda na moltakwano monëne na monongo.

³⁴Abala na bu bo, Molema mombi modi na wa enëne, oko yogo mëne. Dikani yaya na seani.

³⁵Ake boso mweka, asadumba nase, na anga bo ehole emina emobambe isa njea edi.

³⁶Abala bo, Aba, Sesa, wë obwani bokɔ ngando jesusu. Dongeja kɔpɔ ye ai mbi. Pë ko mojɔ. Te mojɔ mopalaka mbi, oko mua mopalaka wë.

³⁷Yana ahula yo, ane bo bacingami bahwëke hiɔ. Abala na Pëtelo bo, Ohwëi hiɔ? Otahɔnɔkɔ boda mosu heure emɔci?

³⁸Dani Inisu, na ingakani bo osaka kweani a bopamba. Mwembo modi na mokano soti, mokuku ko modi na bwëmbu.

³⁹Asɔmbɔ koko, na anga o ama yo nga boso.

⁴⁰Ahula yo, abatana bahweli koko, mojɔ bo bangbongɔkɔ na hiɔ, na baijeba mojɔ mobomosɔmbeja.

⁴¹Ahula koko, ndɔndɔ ejisato, na abatana koko bahweli. Abala na bu bo, Odini oko na hiɔ? ohemakani? Kinani boa. Ehole emei. Anjani, Mwana 'Moto akabami a mɔmɔ mabato babe.

⁴²Angɔni so bokɛe! Anjani, yona okabi mbi adi hulelu.

Bopea Yesu

⁴³Yuda, okina ohu Domi-na-babae, amea bokpa yana abalaka Yesu. Bato banëne badaka bacingi na nde, baya badaka na babenë na pengu. Basuku banganga, na basɔni, na basuku bangando, baloma bato bamina.

⁴⁴Mokabi oYesu ama pa bato bamina embete lɔo, Mbi nakahia okina obu, edi oko moto omina; mopeani bopele, na keni na nde.

⁴⁵Yana amea yo, ake bojo ai Yesu bokpa. Abala na nde bo, Labi! na amohia.

⁴⁶Oko boa bato bamina babakea Inɔtnɔ ai Yesu, na bamopea.

⁴⁷Okina obu ko yona odaka ena ahwa abenë onde, akwële mosuku onganga, na amolena litɔi.

⁴⁸Yesu abala na bu bo, Ino odoini na babenë na pengu a bopea mbi. Mbi nadi mobengo?

⁴⁹Adaka mbi na nu busa na busa a bokoja a tempelo, oipeani mbi. Mojɔ mu ko modi boa a bongameja Misɔnɔ.

⁵⁰Bacingami basusu basi ko bamokini; na bacia oko bocia.

⁵¹Okina mwenga ko amosusa. Iyo amadinga esenja eyai epu a mokuku monde, pεpε bisenja bitongo.

⁵²Bamopea; iyo ko akina esenja eyai epu a mɔmɔ mabu, na apinoa a mɔmɔ mabu oko mbundu.

Bsambi eYesu

⁵³Bakε na Yesu ai mosuku onganga. Basuku banganga basusu, na basuku bangando, na basɔni, batitana oko ena.

⁵⁴Pεtelo amosusa bohali mweka, na akwea a lopango lomosuku onganga. Ada na mobondo a dɔngɔ dibapolisi, na akaka mosa.

⁵⁵Basuku banganga, na likita lisusu libasuku, baduka mokina mojɔ mua mobwana bodumba Yesu bo agwε, pε ko boboloja mojɔ.

⁵⁶Banεnε babala ngando jibokosea a mojɔ monde; bibaeli bibu ko bikεsεnε.

⁵⁷Bakina batongo, batati babokosea, bangɔ na babala bo,

⁵⁸Iso bomoka yana abala yo bo, Mbi nadi bobuka tempelo ye, yena eyoama na mɔmɔ mabato, na nāyoa etongo, te nongo na mɔmɔ ko.

⁵⁹Bikenge bibu bikεsεnε koko a mojɔ momina.

⁶⁰Mosuku onganga angɔ a ndanda ebu, na ahɔjɔ Yesu bo, Wε pε bosɔmbeja nongo ekenge? Gina emijɔ mibalaka bato ba a mojɔ mowε edi bo?

⁶¹Yesu ko ahogoga oko bogo, pε bosɔmbeja. Mosuku onganga amohɔjɔ koko bo, Wε odi Masiya, Mwana oYona oBojongoa?

⁶²Yesu amosɔmbeja bo, Mbi nadi yo. Ino ônεni Mwana 'Moto akadae a ebɔ ebami endangasa eNjambe, na akadoe na biyembi biDiko.

⁶³Mosuku onganga ala kasaka ende. Abala bo, Bôduka koko batati mojɔ moye?

⁶⁴Ino o'kini bikenge binde bibosambolu. Odini bolena mojɔ o bo? Ibo basusu bamodumba, na bajima bo abwana bosɔ mokindo mobogwa.

⁶⁵Bakina babanga bomotwea masɔi. Bahuoa boso bonde na litambala. Bamo'la ndumo, na babala na nde bo, Pa eseko. Bapolisi bamo'la bipapata pongono.

Bεtelo Angana Yesu

⁶⁶Adaka Pεtelo sokolu a lopango, okina moseka, mokɔmeli omosuku onganga, adoa.

⁶⁷Yana anε yo Petelo a mosa, amonja ngbe, na abala na nde bo, Wε odaki koko na Yesu oNasaleta.

⁶⁸Iyo ko angana oko bongana. Abala bo, Nitajebaka, nitacingeaka nongo mojɔ mobalaka wε. Asi ko amani a lopango, na kɔkɔ abeleko a ehole emina.

⁶⁹Moseka omina amonja koko, na abala na bato bay a badaka ena bo, Moto yoyo adi okina obu.

⁷⁰Iyo ko angana koko. Ngɔngɔ mweka, bay a badaka ena babala na Petelo bo, Wε odi moto obu soti mεnε, mojɔ bo odi moto oGalile.

⁷¹Petelo abanga bosinga, na abεlε bεli bo, Mbi nitajebaka nongo moto obalaka no.

⁷²A ehole emina, kɔkɔ abeleko a koko. Petelo asi ko alei ekenge ema bala Yesu na nde bo, Wε ḥongana mbi ngana jisato oko kɔkɔ abelekoakini beleko jibae. Ale yo mojɔ momina, ayea bio.

Malako 15

Yesu a Boso boPilato

¹Yana ahoa busa, basuku banganga babolea likita libasuku, na basɔni, na bajuji basusu, bo bakokelejae mojɔ. Bakanda Yesu mbɔci, bakes na nde, na bamomeja a boso boPilato.

²Pilato amohɔjɔ bo, Wε odi kumu oBaYuda? Yesu amosɔmbeja bo, O abali wε.

³Basuku banganga bameja mijɔ minde mitongo, na Pilato amohɔjɔ koko bo,

⁴Otasɔmbeja nongo ekenge? Oki mijɔ mi minεnε mimejai bo a mojɔ mowε.

⁵Yesu ko aimosɔmbeja nongo ekenge, na Pilato akamoa a mojɔ momina.

⁶Pilato adaka na ekɔmeli ebocingoa moto oblɔkɔ omɔci a ehole ekola emina, oko moto ojimaka bato.

⁷Okina moto adaka a blɔkɔ, kombe ende Balaba. Iyo adaka acingi na bakina batongo bay a bato a ehole edane.

⁸Oko boa, bato balikita babatama, na babanga bo'nga Pilato bo akɔe o amaka yo kɔ ai bo bihole bisusu.

⁹Pilato abasɔmbeja bo, Opalakani bo nacingoe kumu oBaYuda ai no?

¹⁰Gina bo Pilato asipoa bo basuku banganga bapea Yesu oko a mojɔ molikaka.

¹¹Basuku banganga ko balejε bato balikita na bopipo bo ba'nge Pilato a bocingoa oko Balaba.

¹²Pilato abahɔjɔ koko bo, Mbi nakɔ bo na moto obeaka no kumu oBaYuda?

¹³Ibo babekoa bo, Mobakea a mole-moboakea!

¹⁴Pilato abahɔjɔ koko bo, Gina eye? Bobe bokɔj yo nda? Ibo ko babekoa na bopipo bo, Mobakea a mole-moboakea!

¹⁵Pilato apala bo agɔmbejae tnilema mibato balikita. Oko boa, acingoa Balaba ai bo. Atueja Yesu ko, na amopa a mɔmɔ mabu bo bamobakee a mole-moboakea.

Bogwa boYesu

¹⁶Basoda bagbula Yesu a tei elopango londako *egouverneur*, na babea basoda batongo bapɔlɔtɔ.

¹⁷Bamolwaja bisenja bikpetu; badinga likongo linjubɛ, na balibakea a molo monde.

¹⁸Babanga bomobɛjɛ bo, Mbalea! Kumu oBaYuda!

¹⁹Bamoboma a molo na mongendu, bamotuea masoi, na batita na magbunda bo bamo-sakoe.

²⁰Asieja bo bomota mota boa bamohwa bisenja bikpetu, bamolwaja bisenja binde mɛnɛ, na bakɛ na nde bo bamobakee a mole-moboakea.

²¹Simona oKulene, sange eAlesandele na Lupu, adaka a njea elihule a esika, na akanɔe a ehole emina. Oko boa, bamopea bo asonge mole-moboakea moYesu.

²²Bakɛ na Yesu a ekina esika yena edi na kombe Golgotha. (Gina ekombe emina edi Esika eEbebele.)

²³Bamopa vino yena eputoana na mila a mojɔ mobomwaka. Iyo ko aipala bomwaka.

²⁴Bamobakea a mole-moboakea. Baboma jonga a mojɔ mobisenja binde, a bojeba libondo limoto na moto, na bakaba bisenja binde a tei ebu.

²⁵Babakea Yesu a mole-moboakea a ehole *eneuf heures* ehuma.

²⁶Bosɔnɔ bodaka bobaki a bojebaja mojɔ mobodumba bonde bo, KUMU OBAYUDA.

²⁷Bakaaleja na nde mibengo mibae pongono, okina a dɔngɔ diebɔ ebami, otongo a dɔngɔ diebɔ ebali.

²⁸Oko boa Mosɔnɔ mongama bo, Bamo'sa ta libondo libato babe.

²⁹Bato bayo badaka bakancé bamokotoa na bosetɔ. Babala bo, Wε yona obwani bobuka tempelo na boengɔjɔ koko na masu masato,

³⁰saheleja wε mɛnɛ; tita a mole-moboakea.

³¹Basuku banganga na basɔni bamosekε, na babalana bo, Aheleja batongo; t'ahɔnɔke ko bo asahelejae yo mɛnε.

³²Kina Masiya kumu oYisalaele atite a mole-mobokea edεye bo bonε na bojime. Baya badaka a mele-mibokea tnitongo bamololea pongono.

³³Modidi modoa a ngondo esusu a ehole emidi, na moyeyoa oko a *trois heures*.

³⁴A ehole *et trois heures*, Yesu abekoa bo, *Eloi, Eloi, lama sabakatani?* (Gina emina edi, Njambe ombi, Njambe ombi, obulei mbi mojɔ moye?)

³⁵Aka bo ekenge emina, bakina bato bay a badaka hulelu babala bo, Hokeani; abeaka Eha!

³⁶Oko boa, okina obu apota, agbɔmeja limbusu na vino egbɔ, alihangea a mongendu, amonusa, na abala bo, Kinani nakɔe. Bodi bonja isa Eha adi bodoa a bomotiteja.

³⁷Yesu ko abekoa na bopipo, na molema monde motwea.

³⁸A ehole emina, ehuako enɛnɛ etempelo elea a tei, diko oko a nase.

³⁹Kapitεni yona odaka ayεli Yesu, yana anε yo bo agwa boa, abala bo, Moto yo adaka Mwana 'Njambe soti mɛnε.

⁴⁰Bakina bali pongono badaka bohali mweka a bonja; Malia oMagadala, Maha nange eYakobo (yona ongɔngɔ), Yose, na Salome, badaka a tei ebu.

⁴¹Bali bamina bama cingama na nde yana adaka yo a Galile, na bamokɔmε. Bali batongo banɛnɛ bay a bodoa na nde a Yelusalema badaka koko a esika emina.

Bapitsea Yesu

⁴²Yana adipa busa, (busa bomina bodaka busa boMoselingo a mojɔ moSabata) Yosepa, moto oAlimate adoa.

⁴³Iyo adaka moto olikita libasuku, moto oesako epele mɛnε yona ombaka Bokumu boNjambe na tendε. Iyo ake ai Pilato, pεpε nongo bobanga, na amonga mokuku moYesu.

⁴⁴Pilato akamo a bo agwa bokpa boa, na abea kapitεni bo amohɔjɔe isa agwa soti.

⁴⁵Yana amojebeja kapitεni bo Yesu adaka mogo, ajima bo Yosepa atombe mokuku monde.

⁴⁶Yesu amobakoa a mole mobokea, na amodinga na esenja enɛnɛ epu ema yo somba. Amo'sa ta engbungulu ema bo tɔ a litai limono, na ahilingoja litai linɛnɛ a bodipa monɔkɔ moesɛtnɔ.

Malako 16

Yesu Angɔ a Bogwa

¹Iyana asia busa boSabata, Malia oMagadala, Malia nange eYakobo, na Salome, basomba malasi bo bakɛe a bomosuoa malasi.

²Bakɛ a esemɔ a busa boboso, oko ehuma mènɛ yana ahoa busa.

³Bahɔjɔnɔ bo, Odi bohilingoja litai a mojɔ mosu nda, a bodipoa monɔkɔ moesemɔ? Mojɔ bo litai limina lidaka linɛnɛ mènɛ.

⁴Yana ko anja bo, banɛ bo litai lima hilingojama.

⁵Akwea bo a esemɔ, banɛ okina mwenga yona odaka na mobondo a dɔngɔ diebɔ ebami, na alwaka kasaka eyai epu. Ibo bagasima na bɔ.

⁶Iyo ko abala na bu bo, Yeni bobanga! Odukakani Yesu oNasaleta yona ogwabi a mole-moboakea. Iyo angɔi a bogwa. Aditi nongo ya. Anjani esika edaka yo asambi.

⁷Keni ko; tɔndɔni bacingami bande na Petelo bo yo akɛke boso bonu a Galile. Odini bomonɛ oko oho, o abala yo na nu.

⁸Bali bamana a esemɔ, na bacia, mojɔ bo badaka na bɔ na mongongoma. Baijebeja ko nongo moto, mojɔ bo badaka oko na bɔ.

Yesu Añenɛ na Bacingami

⁹Yana amana Yesu a esemɔ a busa boboso, asaboloja boso mènɛ ai Malia oMagadala yona oma hela na nde a miembo mibe sambo.

¹⁰Iyo akɛ a botɔndɔ bacingami bande yana ayeaka bo kɔndɔ.

¹¹Ibo ko, yana aka 'bo bo Yesu adi mɔ, na bo yo amonɛ, baijima nongo.

¹²Ngɔngɔ jimina, asaboloja ai bakina babu babae na elimo etongo, yana adalaka bo a njea eesika.

¹³Bahula a bojebeja bacingami batongo; ibo ko baijima nongo.

¹⁴Suka mènɛ, asaboloja ai bacingami domi-na-omɔci yana adaka bo a mesa. Alemoa na bu cina ekitɛ ebu, na a mojɔ mobopipo bomilema mibù, mojɔ bo baijima bato baya bamonɛ yana angɔ yo a bogwa.

¹⁵Abala na bu koko bo, Keni a ngondo esusu; tɔndɔni bato basusu boy a Mwâko Mopele.

¹⁶Yona ôjima na ôbatisama a kombe embi âhela. Yona odi pε bojima ko âdumbama.

¹⁷Baya bâjima badi bokɔ bimbete bi; lôâmeja miembo mibe a kombe embi. Bâbala na kɔpi jitongo.

¹⁸Bâpea njɔ na tnɔmɔ, na baka'mwaka ekina eka yena ebwani bowa, batapeka nongo. Bâbakea mɔmɔ mabu ai bato babego, na badi bohela.

¹⁹Oko boa, yana abala yo na bu, Kumu Yesu atombama oho Diko, na ada a ebɔ ebami eNjambe.

²⁰Ibo ko bake, na batɔndɔ Mwako Mopele a bisika bisusu. Kumu abakɔmeja a elomu, na angameja Ebaeli na bimbete bia bidaka bicingi na Ebaeli.

Luka

Luka 1

¹Bato banené batomba bosonj mikanda a mojɔ mongando jia jikwa a tei esu,
²o aka so na bato baya banε na miso, baya badaka a elomu eMwako Mopele oko a bobanga.

³Mbi nakokelejai ngando ji jesusu na bopele mεnε, oko a bobanga. Oko boa, kumu Teopilo, mbi koko najimi bo nabwani bosonea wε mokanda a mojɔ mongando jimina.

⁴Oko boa odi bojeba bo ngando jika wε jidi ngando jisoti.

Sako eBobotama boYoane Mobatisi

⁵Okina nganga otempelo adaka a ehole eElode kumu oYuda, kombe ende Sekalaya. Adaka moto olibondo liAbia. Adaka na mwali olıkota liAlona, kombe ende Elisabeta.

⁶Ibo basusu babae badaka bato babodongo a miso maNjambe. Basumaka mibeko na ngando jiNjambe jesusu na soti mεnε.

⁷Baidaka ko na mwana, mojɔ bo Elisabeta adaka motete, na bo basusu babae bama kɔmɔ.

⁸Sekalaya adaka a elomu ende enganga bokina busa a boso boNjambe, mojɔ bo libondo linde linganga lidaka a elomu.

⁹Oko boa, yo ahɔmɔ bo akwee a tempelo a botumba kasa jilitindi, o akɔkɔ nganga basusu.

¹⁰Bato basusu, bato banené mεnε, badaka sokolu a bonga a ehole ebotumba.

¹¹Obwεnji oKumu asaboloja ai yo. Adaka ami a litumbu, a dɔngɔ diebɔ ebami.

¹²Sekalaya ayegebana, na abanga bou mεnε yana amonε yo.

¹³Obwεnji ko abala na nde bo, Sekalaya, ye bobanga! Mojɔ bo bonga bowε bo'kami. Mwali owε Elisabeta âbotea wε mwana-momi, na ômobakea kombe Yoane.

¹⁴Wε ôda na sepi na enanga, na bato banené badi bosepa a mojɔ mobobotama bonde.

¹⁵Mojɔ bo, yo âda moto monenε a boso boKumu. Iyo atamwaka nongo vino, isa ekina emwakeli ebolangoa. Âluma na Mwembo Mosenɔke oko a bobotama bonde.

¹⁶Âhekoja bana banenε baYisalaele ai Kumu obu Njambe.

¹⁷Âdala a boso boNjambe na mwembo na ngulu eElia, a bohekoja milema mibasango ai bana, na hohekoja bato balipanga a howei bobato babodongo, bo aselingoe bato babongoke a moj̄ moKumu.

¹⁸Sekalaya abala na obw̄enji bo, Êjeba mbi ko moj̄ mu na ye? Mbi nadi mosuku m̄en̄e, na mwali ombi ak̄om̄obi pongono.

¹⁹Obw̄enji amos̄mbeja bo, Mbi nadi Gabaliele. Esika embi edi a boso boNjambe. Mbi nalomami a bobala na w̄e, bo nat̄ond̄e w̄e mwako mu mopele.

²⁰W̄e ko ôda emimi, na otabala nongo k̄opi, oko a busa bôkwa ngando jimina, cina bo ojimiti bikenge bibali mbi. Ehole ekamea ko, bikenge bimina bidi bongama.

²¹Bato bambaka Sekalaya, na badaka na bokamoa a moj̄ moehole eyai eyeyoaka yo a tei etempelo.

²²Yana ko amana yo, aih̄on̄ bobala na hu. Abajebeja oko na bimbete, p̄e bobala nongo k̄opi, na basipoa bo ane mokina moj̄ a tei etempelo.

²³Ama sia masu mande maelomu, ami yana oko a ngando ende.

²⁴Nḡnḡo jimina, mwali onde Elisabeta alwa demi, na adaka a ndako songe batano.

²⁵Iyo abala bo, Kumu ak̄oi mbi monganji mu, yana anjaki yo mbi, bo adongjae s̄oni embi a miso mabato.

Sako eBobotama boYesu

²⁶Njambe aloma obw̄enji onde Gabaliele a Nasaleta, ngando eGalile, a songe obasamano,

²⁷ai okina moseka yona oijebéana nongo na momi, kombe ende Malia. Okina momi amopanda, kombe ende Yosepa, moto ombota eDawidi.

²⁸Obw̄enji akwea a esika edaka Malia. Amob̄ej̄e nj̄eb̄e bo, Mbalea! w̄e yona osi monganji. Kumu adi na w̄e.

²⁹Iyo agasima a moj̄ moekenge emina, na ale a molema monde a boduka cina enj̄eb̄e emina.

³⁰Obw̄enji ko abala na nde bo, Malia, ye bobanga! moj̄ bo Njambe ak̄oi w̄e monganji.

³¹Ika! w̄e ôlwa demi; ôbota mwana-momi, na ômobakea kombe Yesu.

³²Iyo âda na ekumu enen̄e. Bâmobakea kombe Mwana oYona oBon̄o. Kumu Njambe âmopa mongbelenḡo mobokumu bo-Tata onde Dawidi.

³³Iyo ada Kumu ombota eYakobo oko na bosusu mene, na bokumu bonde botasia nongo.

³⁴Malia abala na obwensi bo, Mojo momina moda boa na ye, adi mbi pe bojeba nongo momi?

³⁵Obwensi amosombeja bo, Mwembo Mosenke moda ai we. Ndangasa eYona oBonc éhua we, na yona ôbotama na we âbeama mosenke, Mwana oNjambe.

³⁶Anja pako ewe Elisabeta. Nongo akomobi yo, alwabi demi, oko mwana momi. Bamobe motete; edeye ko songe bande basamano.

³⁷Mojo bo Njambe abwani bokc ngando jisusu.

³⁸Maha abala bo, Ika, mbi nadi mobuli oKumu; ye modae na mbi o ami we bala. Obwensi amokina oko bokina boa.

Malia Ake ai Blisabeta

³⁹Malia angc a masu mamina, na ake pelepele a ekina ngando eYuda a tei emeno.

⁴⁰Akwea a ndako eSekalaya, na abejc Ehsabeta njebc.

⁴¹Yana aka Elisabeta njebc eMaha, mwana akumana a tei esopc ende. Elisabeta alumna na Mwembo Mosenke

⁴²na abekoa na bopipo bo, Bojongoa bowe bonci bua bobali basusu; bojongoa ai yona ôbotama na we!

⁴³Ekci mbi ndeni bo nange 'Kumu ombi adoe ai mbi?

⁴⁴Ika! Aki mbi doi linjebc ewe, mwana akumani na sepi a scopc a ehole emina.

⁴⁵We odi na bojongoa soti, we yona ojima bo mijc mibala Kumu na we midi bongama.

⁴⁶Malia abala bo, Molema mombi mokumejaka Kumu;

⁴⁷Na mwembo mombi mosepaka na Njambe Moheleja omhi,

⁴⁸Mojo bo anji bokwali bombi mobuli onde. Ika; banga na busa bu, bato babilulu bisusu bâbala bo mbi nadi na bojongoa;

⁴⁹Mojo bo Yona onci na ndangasa akci mbi ngando jinenene, Na kombe ende edi esencke.

⁵⁰Monganji monde modi ai baya bamosumaka a bilulu bisusu.

⁵¹Iyo anejai ngulu eebc ende, Ananganejai baya badaka na egbo a milema.

⁵²Adongejai bakumu a ngende jibu, Na akumejai bato bangasa.

⁵³Agolejai bato banja na leka lopele, Na ayaneja bato balikonja boangasa.

⁵⁴Akɔmejai mokɔmeli onde Yisalaele, Mojɔ bo aibosa monganji monde,

⁵⁵O akinea Yo batata basu sako, Abalayama na bana bande oko na bosusu.

⁵⁶Malia ayeyoa na nde songe basato, na ahula a ngando ende mɛnɛ.

Bobotama boYoane Mobatisi

⁵⁷Ehole emea bo Elisabeta abote, na abota mwana-momi.

⁵⁸Mitureano minde, na bato badenga dinde, baka bo Kumu amokɔ monganji monɛnɛ, na basepa na nde.

⁵⁹Bakε a bolena mwana ganda a busa bobomwambe, na bapala bo bamobakee kombe esangwa 'nde Sekalaya.

⁶⁰Ngwa 'nde ko ajo na bu bo, Te boa; kombe ende edi oko Yoane.

⁶¹Ibo babala na nde bo, Pερε nongo moto odenga diwε odi na kombe emina.

⁶²Na bakɔ bimbete ai sangwa 'nde bo bajebé kombe epalaka yo a mojɔ momwana.

⁶³Iyo abea litai libosɔnɔ, na asɔnɔ bo, Kombe ende edi Yoane; na bo basusu bakamoa.

⁶⁴Yemi ende eloloa, na kɔpi ehula a monɔkɔ monde a ehole emina, na abanga bobala na bosakoa Njambe.

⁶⁵Mitureano mibu misusu midaka na bɔ mɛnɛ, na mijɔ mimina minangana a ngondo esusu emeno miYuda.

⁶⁶Bato basusu baya baka mijɔ mimina bamile a milema mibu, na babala bo, Iyo mwana âda boni? Mojɔ bo ebɔ eKumu edaka na nde.

⁶⁷Sangwa'nde Sekalaya alumna na Mwembo Mosenɔke, na abala o motɔndɔi bo,

⁶⁸Bojongoa ai Kumu, Njambe oYisalaele, Mojɔ bo adoi ai bato bande na abasikoi.

⁶⁹Iyo abolojai Mohelejai monɛnɛ a mojɔ mosu A tei edenga dimokɔmeli onde Dawidi,

⁷⁰O ama yo bala ehele na minɔkɔ mibatɔndɔi bande basenɔke,

⁷¹A boheleja so a soki jisu Na a mɔmɔ mabato baya balonaka so;

⁷²Akɔi monganji modikeja yo ai basangwa'su, Na alei mokongo monde mosenɔke,

⁷³Na bɛli ebɛlɛ yo ai tata osu Abalayama

- ⁷⁴Bo, bokahela a mɔmɔ masoki jisu,
- ⁷⁵Bodi bomokɔmɛ masu ma'su masusu
- ⁷⁶Wε mwana, ôbeama motɔndɔi oNjambe oBono, Mojɔ bo ôdala boso boKumu a boselingoa njea jinde,
- ⁷⁷Bo ojebjae bato bande mojɔ moboheleja, Oko na boyε bojibe jibu,
- ⁷⁸A mojɔ mowa enεnε eNjambe osu Yona ohojai so husa,
- ⁷⁹Bo ahojae bay a badi a modidi na a esie ebogwa, Na a bodaleja mako masu a njea ebowi.
- ⁸⁰Mwana akandoa, apinga a mwembo, na ayeyoa a esika oko a busa boboloa yo ai Yisalaele.

Luka 2

Bobotama boYesu

- ¹Kaisala Auguseto abakea mobeko bo basɔne kombe jibato bamakota masusu a mikanda.
- ²Ibu boda bosɔnɔ boboso mεnε, na Kuilinu adaka kumu oSilia a ehole emina.
- ³Bato basusu bake, moto na moto a ngando ende mεnε, bo basɔne kombe jibu.
- ⁴Yosepa pongono adonga a ngando kombe Nasaleta a likota liGalile, na akε Betelεmɛ, ngando eDawidi, a likota liYuda,
- ⁵bo basɔne kombe ende, na kombe eMalia, mwali oma yo panda, yona odaka na demi; mojɔ bo Yosepa adaka moto ombota na denga diDawidi.
- ⁶Ehole eMalia ebobota emea yana adaka bo oho.
- ⁷Abota mwana'nde oboso, mwana-momi. Amodinga na bisenja, na amosambea a yulu edia dibingbende, cina bo ndako epasaje eidaka na pokiso a mojɔ mobu.
- ⁸Bakina banjeli babata balikota limina badaka a esika a bobanea mela mabu mabata na bulu.
- ⁹Obwɛnji oKumu adoa ai bo; ekumu eKumu echoja esika edaka bo, na balulumna bɔ.
- ¹⁰Obwɛnji ko abala na bu bo, Yeni bobanga! Mojɔ bo mbi nadoi na mwako mopele ai no, mua môda mojɔ mosepi enεnε ai bato basusu.
- ¹¹Moheleja abotami ai no busa bu a ngando eDawidi, Kumu Masiya.
- ¹²Ômombeteani na mojɔ mu; ônени mwana mokɛkɛlɛkɛ adingi na bisenja bimwana, na asambi a yulu edia dibingbɛndɛ.

¹³Babwənji baDiko bamana bombelele a ehole emina, mandundu mənə, na badaka bacingi na obwənji yona otongo; basakoa Njambe bo,

¹⁴Ekumu ai Njambe oho Diko; Bowi a ngondo a tei ebato bapalaka Yo.

¹⁵Ama səmbə babwənji oho Diko, banjeli ba'mi bala oko bo, Yəni so bokəe a Bətələmə, bokanje mojə mobali Kumu na sn.

¹⁶Bakə mbango, na batana Malia na Yosepa, na mwana asambi a yulu.

¹⁷Yana amonə bo, batəndə bwənji boso bo a mojə momwana.

¹⁸Bato basusu bay a baka mojə mobala banjeli, bakamo aoko bokamo.

¹⁹Malia ko abomba ngando ji jesusu na ajile a tei emolema monde.

²⁰Banjeli badonga ena, bakakumejae na bakasakoe Njambe a mojə mongando jesusu jika bo na jine bo, o ama bo ka boso.

Bakə na Yesu a Tenipelo

²¹A busa bobolena ganda, oko a busa bobomwambe, bamobakea kombe Yesu, kombe epa obwənji oko nango alwakini demi.

²²Yana asia masu mabu maekia mabekeaka mobeko moMose, bakə na nde a Yelusalema bo bamopejae ai Kumu,

²³(Mojə bo mosənəmə a Mibeko miKumu bo, Bana basusu basəmi bâhəngəmə ai Kumu,)

²⁴na a bopeja bidoa babae isa bana basungu babae, epeeli ebekeama a Mibeko miKumu.

²⁵Okina momi adaka a Yelusalema, kombe ende Simeona; yo adaka moto obodongo, moto olisuma ai Njambe. Ambaka bogɔmbeja boYisalaele na təndə, na Mwembo Mosənəke modaka ai yo.

²⁶Mwembo Mosənəke moma mojebeja bo atagwa, oko adi yo pε bopeta nε Masiya oKumu.

²⁷Mwembo momolindea bo akwee a tempelo, na yana akwea baboti na mwana Yesu

²⁸bo bakoe ai yo mua mobekeaka Mibeko, yo amosə a mɔmɔ mande, asakoa Njambe bo,

²⁹Kumu, kina mobuli owε ayane na bowi edεye o akina wε sako;

³⁰Mojə bo miso mambi mani boheleja bowε,

³¹Bua boselingoi wε a mojə mobato basusu,

³²Bohu a bohoja makota, Na ekumu a mojɔ moYisalaele bato bawɛ.

³³Sango na nango bakamo a bikenge bibala yo a mojɔ monde.

³⁴Simeona abapamboa, na abala na Maha nange 'mwana bo, Mwana yoyo ahɛngɛmɛ a bodumba na a bongɔjɔ bato banɛnɛ baYisalaele; ahɛngɛmɛ bo adae embete; bato ko bâmolona, mojɔ bo âmeja bileli bibato banɛnɛ a bohu.

³⁵Na molema mowɛ mɛnɛ môbena na abɛnɛ.

³⁶Okina mwali adaka koko ena, kombe ende Ana. Iyo adaka motɔndɔi; adaka mwana oPanwɛlɛ, moto olıkota liAsele, na adaka mobange. Boso mɛnɛ, ama yo kandoa, adaka na muma'nde bianga sambo.

³⁷Adika yo mwali-obogwa, adaka na bianga domi-bomwambe na binɛi. Iyo aikina nongo tempelo; asakoaka Njambe na ma'nga na bikia na bulu na moi.

³⁸Iyo adoa pongono a ehole emina; asakoa Njambe, na abala na bato basusu baya bambaka bosikoa bo-Yelusalema a mojɔ moYesu.

³⁹Ama bo sieja ngando jesusu jibekeaka Mibeko miKumu, Yosepa na Malia ba'mi yana oko a Nasaleta, ngando ebu bɛnɛ, a likota liGalile.

⁴⁰Mwana akandoa na apinga; adaka na bowɛi bonɛnɛ, na monganji moNjambe modaka na nde.

Yesu Akɛ a Yelusalema

⁴¹Baboti bande bakɛkɛ a Yelusalema yanga na yanga a mojɔ moKola-eBono.

⁴²Oko boa, yana adaka Yesu na bianga domi-na-bibae, bake koko a Kola, o akɔkɔ bo bihole bisusu.

⁴³Adaka bo a njea elihule ngɔngɔ jiKola, yɛngɛ Yesu adika oko a Yelusalema, baboti bande ko pɛ bojeba.

⁴⁴Badingaka bo acingi na bu engbanga, na badala busa bosusu boa. Bamoduka a tei ebina'bu na mela mabu

⁴⁵pɛ ko bomotana; oko boa basɔmbɔ nduki ende a Yelusalema.

⁴⁶Yana anɔ masu masato, bamoboloja a tei etempelo. Adaka na mobondo a ndanda ebakoja; abahokeaka na abahɔjɔkɔ mahɔjɔ.

⁴⁷Bato basusu baya bamoka, bakamo a mojɔ mobowɛi na masɔmbeja mande.

⁴⁸Yana amotana bo, bakamo a bou mɛnɛ; na ngwa'nde abala na nde bo, Mwana'mbi, okɔi na su boa mojɔ moye? Iso na sangwao bodukaki wɛ na mokakwano monɛnɛ.

⁴⁹Iyo abala na bu bo, Odukakini mbi mojɔ moye? Ojebitini bo mbi nabwani boda a ndako eSangwa'mbi?

⁵⁰Ibo ko baicingea mojɔ mobala yo na bu.

⁵¹Iyo ayana na bu a Nasaleta, na adaka na lisuma ai bo. Ngwa'nde ko abanea ngando ji jesusu a molema monde.

⁵²Yesu akandoa, na ahε na bowei na monganji a miso maNjambe na a miso mabato.

Luka 3

Blomu eYoane Mobatisi

¹Ebaeli eNjambe edoa ai Yoane, mwana oSekalaya a esika, yana adaka Kaisala Tibelia kumu biango domi-na-bitano. Pontio Pilato adaka *gouverneur* oYuda a ehole emina; Elode adaka kumu oGalile; mwangwa'nde Pilipo adaka kumu oItulia na Tulakomte;

²Lusania adaka kumu oAhilene; Ana na Kayapa badaka basuku banganga.

³Yoane akε adale a bisika bisusu a dɔ̃ngɔ̃ diYoladene, a botɔ̃ndɔ̃ mwako mobatisimo cina ebobekoja bomilema, bo bato base boyε bojibe.

⁴Mojɔ momina mosɔ̃nɔ̃mɔ̃ boa a mokanda momotɔ̃ndɔ̃ Yisaya bo, Kɔpi emoto yona obekoaka a lisobe bo, Selingoani mokɛngɛ moKumu; Tangbojani njea jinde.

⁵Mibukubɔ̃ngɔ̃ misusu miluma; Meno minenene na mikɛkɛleke mîda yeyi; Makulu masusu mâtangboa; Njea jia jidi na bibubɔ̃ndɔ̃ jitambuma,

⁶Bato basusu bâne boheleja boNjambe.

⁷Bato bake ai Yoane banεnε mεnε bo ababatise. Iyo ko abala na bu bo, Ino bana banjɔ! Olehi no nda bo ocieni likundu lia likekε adoe?

⁸Anejani bikɔ̃meli a bongameja dosa linu. Yεni bobala bo, Abalayama adi tata osu. Mbi natɔ̃ndɔ̃kɔ̃ no bo Njambe abwani botomba matai ma bo angɔ̃jɔ̃e bana ai Abalayama.

⁹Epondo esambi edεye a cina jimele. Mole mobotiti mbuma jipele môkwεlεmε, na môdumbama a mosa.

¹⁰Bimumu bibato bamohɔ̃jɔ̃ bo, Êkɔ so ndeni?

¹¹Iyo abasɔ̃mbeja bo, Isa moto adi na simisi jibae abwani bopa emɔci ai moto yona odi ngasa. Yona odi na mia abwani bokɔ̃ koko boa.

¹²Baputeja batako badoa ai yo pongono bo ababatise. Ibo bamohɔjɔ bo, Mokoja, êkɔ so ndeni?

¹³Iyo abasɔmbeja bo, T'onojɔeni oko bobuno botako yena ebwani.

¹⁴Basoda bamohɔjɔ koko bo, Iso ko bôkɔ boni? Iyo abasɔmbeja bo, T'odaeni oko na sanga ai bato bo bapute no likonja. T'odumbeni oko moto na bokosea. Jimani oko bo likonja lisɔkɔ no libwani.

¹⁵Bato badaka na njingo a mojɔ moYoane. Ibo basusu badaka na bolε a milema mibu isa yo adi Masiya.

¹⁶Yoane ko abasɔmbeja, abala na bu basusu bo, Mbi nabatisaka no oko a madiba. Okina otongo ko akɛke adoe yona onɔi mbi na ngulu. Mbi nitabɔŋgɔ bo nacingoe licinga lisapata jinde. Iyo adi bobatisa no a Mwembo Mosenɔke na a mosa.

¹⁷Adi na ehɛihɛi a ebɔ ende a boseñoja moboku monde kanga bopεε mεnε. Abolea ndongo a edejai ende; âtumba ko poso oko a mosa mua mobwaniti bodimea.

¹⁸Yoane atɔndɔ bato Mwako Mopele boa, na abaleha na hileho binεnε.

¹⁹Kumu Elode ko abakea mojɔ mu mobe a ngando jesusu jibe jima yo kɔ,—asa Yoane a blɔkɔ.

²⁰Mojɔ bo Yoane alema na Elode a mojɔ moElodia, mwali omwananango, na ngando jesusu jibe jima yo kɔ.

Batisimo eYesu

²¹Yana abatisama bato basusu, Yesu abatisama pongono. Yana angaka yo, Diko didipoama oko bodipoama,

²²na Mwembo Mosenɔke motita ai yo o ekɔmeli esungu. Kɔpi emana koko oho Diko bo, Wε odi Mwana'mbi ongenjɔ. Nadi na sepi enεnε a mojɔ mowε.

Batata baYesu

²³Yana abanga Yesu elomu ende, adaka na bianga domi-isato na dea. Bato bamonjaka o mwana oYosepa,

²⁴mwana oEli, mwana oMatata, mwana oLewi, mwana oMeleki, mwana oYanai, mwana oYosepa,

²⁵mwana oMatatia, mwana oAmosa, mwana oNauma, mwana 'Eseli, mwana oNaga,

²⁶mwana oMata, mwana oMatatia, mwana oSimi, mwana 'Yoseke, mwana 'Yoda,

²⁷mwana 'Yoana, mwana oLesa, mwana oSelubabela, mwana oSalatiele, mwana oNeli,

²⁸mwana oMeli, mwana 'Adi, mwana oKosama, mwana 'Elamadama, mwana 'Ele, mwana 'Yesu,

²⁹mwana 'Eliasele, mwana 'Yolima, mwana oMatata, mwana oLewi,

³⁰mwana oSimeona, mwana 'Yuda, mwana 'Yosepa, mwana 'Yonama, mwana 'Eliakima,

³¹mwana oMelea, mwana oMena, mwana oMatata, mwana oNatana, mwana oDawidi,

³²mwana 'Yisai, mwana 'Obede, mwana oBoasa, mwana oSalamona, mwana oNasona,

³³mwana 'Aminadaba, mwana 'Aluni, mwana 'Eselona, mwana oPalese, mwana 'Yuda,

³⁴mwana 'Yakobo, mwana 'Isaka, mwana 'Abalayama, mwana oTela, mwana oNakola,

³⁵mwana oSeluga, mwana oLeu mwana oPalega, mwana 'Ebelle, mwana oSela,

³⁶mwana oKainana, mwana 'Alapasada, mwana oSema, mwana oNoa, mwana oLameka,

³⁷mwana oMatusala, mwana 'Enoka, mwana 'Yaleda, mwana oMalalele, mwana oKainana,

³⁸mwana 'Enosa, mwana oSete, mwana 'Adama, mwana oNjambe.

Luka 4

Bomeka boYesu

- ¹Yesu aluma na Mwembo Mosenke na ahula Yoladene. Mwembo momolindea a lisobe, na Satana amomeka oho masu domi-insei.
- ²Aiyaka nongo eka a masu mamina, na aka nja a suka eehole emina.
- ³Satana abala na nde bo, Isa we odi Mwana oNjambe, bala na litaidi bo libongoe molembé.
- ⁴Yesu amosombeja bo, Mosonombé bo, Moto t'ahelake na molembé pe.
- ⁵Satana ake na nde diko, amoneja makumu masusu mangondo a ehole emoci.
- ⁶Abala na nde bo, Mbi nadi bopa we kpaci emina esusu, na ekumu emakumu ma masusu; moj bo madi oko ai mbi bo napé moto ojimaka mbi.

⁷Oko boa, okatita na magbunda a boso bombi, mojɔ mosusu môda oko ai wε.

⁸Yesu amosɔmbeja bo, Mosɔnɔmɔ bo, Toma sakoa Kumu Njambe owe; toma kɔmε oko yo pε.

⁹Satana ake na nde a Yelusalema, amobakea diko dimonjongele motempelo, na abala na nde bo, Isa wε odi Mwana oNjambe, sadumba oho nase.

¹⁰Mojɔ bo, mosɔnɔmɔ bo, Âpa babwɛnji bande mobeko bo babanee wε.

¹¹Mosɔnɔmɔ koko bo, Bâbanda wε na mɔmɔ mabu, Bo ebota ewε esaka lakimea a litai.

¹²Yesu amosɔmbeja bo, Ebæli edi bo, T'odingee oko Kumu, Njambe owe.

¹³Yana amaja yo bomeka bosusu, Satana amokina bo ambe ekina ehole etongo.

Yesu a Nasaleta

¹⁴Yesu adoa koko a Galile na ngulu eMwembo, na esakoli ende enangana a makota ma masusu.

¹⁵Akojaka bato a sinagoge jibu, na bato basusu bamokumejaka.

¹⁶Amea a Nasaleta, oko a ngando ema yo kandoa, na akwea a sinagoge a busa boSabata, mojɔ bo ekɔmeli ende edaka boa. Angɔ bo alange mokanda,

¹⁷na bamopa mokanda momotɔndɔi Yisaya. Adipoa yo mokanda, anε esika yena edi na mosɔnɔ bo,

¹⁸Mwembo moKumu modi ai mbi, Gina bo ahɛngɛ mbi a botɔndɔ bato babokwali Mwako Mopele; Alomini bo najebejae masungu mojɔ mobocingoa, Bo natɔndɔe bato baya bagwa miso mojɔ mosengo emiso; Alomini bo nabuke minyɔlɔ mibato baya bagboki,

¹⁹Na a botɔndɔ mojɔ moyanga emonganji moKumu.

²⁰Adipa mokanda, amosɔmbeja ai mokoja, na akada. Ibo basusu baya badaka a sinagoge bamonja ngbe.

²¹Iyo abanga bobatɔndɔ bo, Mosɔnɔ moki no mongami busa bu.

²²Ibo basusu bamosakoa, na bakamoa a mojɔ mobikenge bimonganji bibala yo. Babala bo, Iyo, te mwana 'Yosepa?

²³Yesu abala na bu bo, Nadingaka bo odini bobala na mbi oko monde mu, bo, Monganga, sesengoa wε mεnε. Kɔ jɔno a likota liwε mεnε, ngando jikaka so bo okɔi oho Kapalanauma.

²⁴Abala na bu koko bo, Soti mεnε, te basɔke nongo motɔndɔi a ngando ende mεnε.

²⁵Mbi natɔndɔkɔ no na soti bo, bali-babogwa badaka banɛnɛ a Yisalaele a masu maEha, yana adipama Diko bianga bisato na songe basamano, a ehole edaka linjale linɛnɛ a ngondo esusu.

²⁶Elia ko ailomama ai okma obu. Alomama oko ai okina mwali-obogwa oSalepeta pɛ, a likota liSidona.

²⁷Bato bamaba badaka koko banɛnɛ a Yisalaele a masu mamotɔndɔi Ehse. Pɛpɛ nongo omɔci obu ohela ko; yona ohela, oko Namana pɛ, moto oSilia.

²⁸Yana aka ho bikenge bimina, bato basusu bay a badaka a sinagoge bakɛnɔjɔ oko bokɛnɔjɔ.

²⁹Bango, bamobengana a ngando, na bake na nde a diko dimono bo bamodumbe nase, mojɔ bo ngando ebu edaka a mono momina.

³⁰Iyo ko anɔ a tei ebu, na ayana.

Yesu a Kapalanauma

³¹Yesu ake a ekina ngando eGalile, kombe Kapalanauma. Yana akojaka yo bato a busa boSabata,

³²bakamo a mojɔ mobokoja bonde, cina bo ebaeli ende edaka na kpaci.

³³Okina momi adaka a sinagoge yona odaka na mwembo mobe, na yo abekoa bo,

³⁴Wε, Yesu oNasaleta, mojɔ modukaka wε na su nda? Odoi jɔno a bowa so? Mbi najebaka wε. Odi Yona Moṣenɔke oNjambe.

³⁵Yesu alema na nde, na abala bo, Wε, da bogo; imana ai moto omina! Mwembo mobe modumba moto omina gbu a ndanda ebato, na momana ai yo pɛ bomobeneja nongo.

³⁶Bato basusu babanga, bɔ mɛnɛ, na babalana bo, Gina eekenge emina edi bo? Iyo abekeaka miembo mibe na kpaci na ndangasa bo mimane, na mimanakadea.

³⁷Na esako ende enangana a ngando jesusu jilikota limina.

³⁸Amana Yesu a sinagoge, ake a ndako eSimona. Bokio boSimona adaka asambi na mɔlɔ, na ba'nga Yesu a mojɔ monde.

³⁹Iyo ama a dɔngɔ dinde, alema na yogo, na esia oko bosia. Na mwali angɔ bokpa na abakɔmɛ.

⁴⁰Basusu bay a badaka na bato babego tungu na tungu, badoa na bu ai Yesu a ehole edipaka busa. Iyo abakea mɔmɔ mande ai bo, moto na moto, na abaheleja basusu.

⁴¹Miembo mibe pongono mimana ai bato banené na migboma bo, Wε odi Mwana oNjambe. Iyoko alemao na miembo; aijima bo mibale, cina bo mijebaka bo adi Masiya.

⁴²Yana ahoa busa, amana na akε a ekina esika a lisobe. Bato banené ko babanga bomoduka, na bamea oko ai yo. Bapala bo bambo-dipe njea bo atabakina.

⁴³Iyo ko abala na bu bo, Ebongi bo natɔndœ Mwako Mopele moBokumu boNjambe a ngando jitongo pongono. Mbi nalomami oko a mojɔ momina.

⁴⁴Oko boa akε atɔndœ Miako Mipele a sinagogue jiGalile.

Luka 5

Eweeli Eswi Enεnε

¹Yana adaka Yesu a mbongu elibale liGenesaleta, bato banené bamohika a boka mwako moNjambe.

²Iyo anε mato mabae masεmi a mbongu; badukeli ko baidaka a mato, mojɔ bo basosaka biyoma bibu.

³Atamba a bwato bomɔci, oko bwato boSimona, na amonga bo asεngojae bwato bosine. Ada na mobondo a bwato, na akoja bato boa.

⁴Asieja yo mwako botɔndœ, abala na Simona bo, Sengoja bwato oho a boliko, na dumba bikoto binu a mojɔ moboduka swi.

⁵Simona amosɔmbeja bo, Moswa'mbi, so bodukaki na bulu bosusu oko na edukea pε; pε mojɔ, mbi nadi bodumba bikoto a mojɔ moekenge ewε.

⁶Akɔ bo boa, bawa swi kanga banené mεnε. Bikoto bibu bibanga botweana

⁷na babea bina'bu baya badaka a bwato botongo, bo badoe a bokɔmeja. Adoa bo, balumeja mato mabae botɔ na mapaka dinda.

⁸Simona Petelo, yana anε yo mojɔ momina, akwa nase a boso boYesu; abala bo, Kumu, pε bobatama na mbi, mojɔ bo nadi moto mobe.

⁹Iyo adaka na bɔ mεnε a mojɔ moeweeli ebu eswi, na bo basusu baya badaka na nde,

¹⁰na Yakobo na Yoane pongono, bana baSebede baya badaka na Simonaa elomu. Yesu abala na Simona bo, Ye bobanga; banga na busa bu, ôda modukeli obato.

¹¹Ama bo semeja mato mabu, ba'mi kina oko leka losusu na bacingama na nde.

Moto Omaba Ahela

12Adaka Yesu a ekina ngando, okina moto yona odaka na maba botə adoa ai yo, asadumba nase, boso bonde oko a kpɔtɔ, na amongɔɔnɔ bo, Kumu, wε okapala, obwani boheleja mbi.

13Yesu aninoja ebɔ, amobɛŋjε, abala na nde bo, Najimi; hela oko bohela; na maba mande masia oko bosia.

14Yesu amoleha na bopipo bo atatɔndɔ nongo moto. Abala bo, Kε asanejae ai nganga; pa epeeli ebekeea Mose a mojɔ mobohela bowε, bo bato bajebé.

15Gala ende ehε oko bohε, na eke hohali. Bato hadoa banεnε mεnε a bomoka, na bo abahelejae a bego bibu.

16Iyo ko adonga ena, na akε a lisobe yo buki pε a mojɔ mobo'nga.

Moto oMokɔbεlε Ahela

17Yana akojaka Yesu bokina busa, BaPalusi na nganga baMibeko badaka ena. Ibo bama donga a ngando jisusu jiGalile na Yuda na Yelusalema. Ngulu eKumu edaka na nde a mojɔ mobosengoa.

18A ehole emina, bakina bami badoa na moto omokɔbεlε. Bamotombaka a litɔkɔ, na bakenga bokwea na nde a tei, bo bamosambee a boso boYesu.

19Bainε ko nongo pokiso a bokwea a tei, a mojɔ moembamba ebato. Oko boa, bawea diko dindako na bamosoloja a esambe ende a njea eetondo, a ndanda ebato na a boso boYesu.

20Yana anε Yesu ejimeli ebu, abala bo, Momi, jibe jiwε jikinami.

21Basɔni na BaPalusi ko babanga bobomana kite; babala bo, Iyo moto ndani yona obalaka mijɔ mibosambolu? Odi bokina jibe nda, te Njambe pε?

22Yesu acingea bilεli bibu, na abasɔmbeja bo, Odini na bilεli bimina a milema minu mojɔ moye?

23Mojɔ monɔi na bopipo nda?—bobala bo, Jibe jiwε jikinami, isa bobala bo, Angɔ, dala?

24Ino ko odini bojeba bo Mwana 'Moto adi na kpaci ya nase a bokina jibe;—oko boa abala na moto omokɔbεlε bo, Mbi natɔndɔkɔ wε; angɔ, tomba litɔkɔ liwε, kε a ndako ewε.

25Iyo angɔ bokpa a boso bobu, atomba litɔkɔ linde, na akε a ndako ende oko na bosakoa ai Njambe.

26Bato basusu bakamo a bou mεnε. Bakumeja Njambe, na badaka koko na bɔ a milema. Babala bo, Iso boni mijɔ mibokamoa busa bu.

Yesu Abea Lewi

²⁷Amana Yesu ngongo, atana okina moputeja otako, kombe ende Lewi, yona odaka a bilo etako. Yesu abala na nde bo, Gingama na mbi.

²⁸Iyo akina leka losusu, ang, na acingama na Yesu.

²⁹Lewi aselingoa libonje linene a ndako ende. Bato banene badaka na bu a mesa, baputeja batako, na bato batongo pongono.

³⁰BaPalusi na basoni ko babala na bacingami baYesu oko na manungunungu bo, Ino oyakakani na omwakakani na baputeja batako na bato babe moj moye?

³¹Yesu abasombeja bo, Babwani na monganga oko baya bapekaka, te baya badi banjilake.

³²Mbi nadoiti a bobea bato babodongo bo bahekojae milema; nadoi a bobea oko bato babe.

³³Ibo babala na nde bo, Bacingami baYoane bakiaka mia bihole binene, na bakke a bonga. Bacingami baBaPalusi badi koko na ekomeli emina. Bacingami bawé ko te bakiaka moj moye?

³⁴Yesu abasombeja bo, Momi obolongana akada na bina'nde a lihango, odingakani bo badi bokia mia?

³⁵Momi obolongana ko adi boboto na bu a masu mangongo, na badi bokia mia a masu mamina.

³⁶Abatond mond mu pongono. Moto t'alake eyale ekasaka eyene bo abambe na kasaka eyou. Akak bo, adi bobea kasaka eyene; na ebolo eyene, na kasaka eyou bisangiti.

³⁷Moto t'ahangojake vino eyene ta bikutu bibiobo biyou. Akak bo, vino eyene edi bobatoja bikutu bibiobo, na ésopea; bikutu bibiobo binama pongono.

³⁸Vino eyene ebwani oko na bikutu bibiobo biyene.

³⁹Isa moto amwaki vino eyou, atapala vino eyene. Adi bobala bo, Yena eyou enoi na bopele.

Luka 6

Moj moSabata

¹Bokina busa boSabata, Yesu alena njea egbie jilso. Bacingami bande batwa jikina ngbelenga jilso, baji'b na momo, na bayaka.

²Bakina BaPalusi babala na bu bo, Ino okokoni boa moye? Osopakani mobeko moSabata.

³Yesu abasɔmbeja bo, Ino olangakinini mojɔ mokɔ Dawidi yana akaka yo nja, yo mɛnɛ na bato bay a badaka na nde?

⁴Iyo akwea a ndako eNjambe, atomba milɛmbɛ mimokako mia mihɛngɛmɛ oko ai nganga pɛ. Ayaka milɛmbɛ mimina, na amikaba na bato bay a badaka na nde.

⁵Yesu abala na bu bo, Mwana 'Moto adi Kumu oSabata.

Yesu Aheleja Moto na Ebɔ Endɔke

⁶Yesu akwea a smagoge, na akoja bato bokina busa boSabata. Momi omɔci adaka ena, yona odaka na ebɔ endɔke.

⁷Basɔni na BaPalusi bamonja na bopipo, a bone isa adi bosengoa a busa boSabata, bo bamodumbe na mojɔ momina.

⁸Yesu ko ajeba bilɛli bibu, na abala na moto yona odaka na ebɔ endɔke bo, Angɔ; ima ya a ndanda. Iyo angɔ na ama mema.

⁹Yesu abala na bato bamina bo, Mbi nahɔjɔkɔ no mojɔ; Njea eMibeko edi bo? Bobwani boko bopele isa bobè, bobwani boheleja isa bowa, a busa boSabata?

¹⁰Abanja basusu a dɔngɔ na dɔngɔ, na abala na moto omina bo, Ninoja ebɔ ewɛ. Iyo akɔ boa, na ebɔ ende eninoa oko boninoa.

¹¹Bato bamina ko bakɛnjɔ kɛnjɔ enɛnɛ, na babalana a boduka njea a bodumba Yesu.

Yesu Ahɔ Bacingami Domi-na-Babae

¹²Yesu ake bokina busa a mono a mojɔ mobo'nga, na ayeyoa na bulu bosusu oka a bonga Njambe.

¹³Yana ahoa busa, abolea bacingami bande. Ahɔ domi-na-babae a tei ebu, na ababakea kombe babwɛnji.

¹⁴Simona (amobakea koko kombe Petelo), mwangwa 'nde Andalea, Yakobo na Yoane,

¹⁵Pilipo na Balatelemi, Matayo na Toma, Yakobo mwana oAlapayo, na Simona yona odaka na kombe Selote;

¹⁶Yuda mwana oYakobo, na Yuda Iskalio yona omokaba.

¹⁷Yesu atita na bu a mono, na ama a molaba. Bacingami bande banɛnɛ badaka na nde. Bato banɛnɛ batongo batitana ai yo bo bamoke, na bo bahele a bego bibu, bato bangando jesusu jiYuda na Yelusalema, na bato baTula na Sidona a dɔngɔ dimadiba-mamukwa.

¹⁸Bato bay a badingoaka a mojɔ momiembo mibe bahela pongono.

¹⁹Bato basusu baemumu bakenga bomobenje na momo, mojo bo ekina ngulu emanaka ai yo na ebaheleja basusu.

Yesu Akoja Bato

²⁰Yesu anja bacingami bande, na abala bo, Bojongoa ai no bato babokwali, mojo bo Bokumu boNjambe bodi ai no.

²¹Bojongoa ai no baya badi na nja edeye, mojo bo ôgolani. Bojongoa ai no baya bayeaka bio edeye, mojo bo ôsepani.

²²Bato bakalona no, bakabengana no, bakanongeja no, na baka-Pombeja kombe enu a mojo moMwana 'Moto,—bojongoa ai no.

²³Sepani a busa bomina; pimboani na enanga; ndese enu êda enene oho Diko, mojo bo basangwa 'bu bako koko boa na batondji.

²⁴Bodingoa ko ai no konji; ino osini ndese enu.

²⁵Bodingoa ai no baya badi na ligola edeye; ino ôyeani bio na mbisoli.

²⁶Bocingoa ai no yana asakoaka bato basusu no, mojo bo basangwa 'bu bako koko boa na batondji babokosea.

²⁷Mbi ko natondoko no baya ba'kaka mbi bo, Palakani soki jinu; kôkoni bopele ai baya balonaka no.

²⁸Jongoakani baya balakejaka no; ingakani a mojo mobato baya banongejaka no.

²⁹Moto akabimboa we a mobanga momoci, mohekoja yo mobanga motongo. Moto akakatoa kasaka ewe, t'ojume oko yo simisi ewe pongono.

³⁰Moto na moto yona ongaka we eka, mopa yo; na moto akatomba leka lowe, t'obee bko leka lomina.

³¹Koni ai bato batongo o apalaka no bo bakoe ai no.

³²Isa odini na epaeli oko ai bato baya badi na epaeli ai no, obwanini boss ndese a mojo momina? Nongo bato babe bakoko boa pongono ai baya badi na epaeli ai bo.

³³Okakoni bopele oko ai bato baya bakoko bopele ai no, obwanini boss ndese a mojo momina? Nongo bato babe bakoko boa.

³⁴Okabekejani mbeka oko ai baya badi bosombeja koko ai no, bopele bodi jo? Nongo bato babe babojonoko njabo bo bajise koko.

³⁵Ino ko, toma dani na epaeli ai soki jinu; kôkoni bopele; bekejani na t'odaeni oko na tende eboso koko, na ndese enu êda enene, na ôdani bana baYona oBono; mojo bo yo akoko monganji ai baya badi na lima, na ai bato babe.

³⁶Ikeani bato wa o adi Sangwa'nu na wa.

³⁷T'osambejaeni oko, na ôtasambani; t'odumbeni oko na ôtadumbamani; kinani jibe, na bâkina jibe jinu.

³⁸Dani na likabo, na bâda na likabo ai no; bâhangaja libondo lipele a eseï ewe; bâedehé na bâepukusa bo edae bôto mènè; mojô bo bâ'ngé libondo liwé oko na mwèngi mongéké na wé mènè.

³⁹Abala na bu monde bo, Moto yona ogwa miso abwani bopaka moto otongo yona ogwa miso bo amonejae njea? Ibo basusu babae batakwa a libengé?

⁴⁰Moto yona okoaka adi ngóngó jimokoja onde; akabóngó ko na bokoa bonde, adi bobwana na mokoja onde.

⁴¹Onjaka mobumbu a diso limwangwao, pë bone epaso yena edi a diso liwé mènè mojô moye?

⁴²Obwani bobala na mwangwao bo, Mwangwa 'mbi, yé nahwé mobumbu mua modi a diso liwé, ena ko wé pë bone nongo epaso yena edi a diso liwé mènè? Mokosei, peta hwa epaso a diso liwé mènè; oko boa odi bone bohu a bohwa mobumbu a diso limwangwao.

⁴³Mole mopele te mobotake mbuma jibe, na mole mobe te mobotake mbuma jipele.

⁴⁴Odi bombetea mole oko na mbuma jimole momina. Te batwake mbunga a bolongo, na mamwe a likpanda.

⁴⁵Moto mopele adi na ekômeli epele mojô bo amejaka ngando jipele a molema monde; na moto mobe adi na ekômeli ebe, mojô boamejaka ngando jibe a molema monde. Mojô bo monôkô momejaka oko ngando jia jinèngi a molema.

⁴⁶Obeakani mbi Kumu, Kumu, mojô moye, pë ko bokô ngando jitôndôkô mbi no?

⁴⁷Mbi nadi boneja no elimo emoto yona odoaka ai mbi na okôkô ngando ji'kaka yo na mbi.

⁴⁸Adi o moto yona opika ndako; alonga mombôndô na ndinda, na ayoa eyoeli ecina a diko dilitai. Yana apetoa pela, mopimbola molakimea ndako emina, na moibwana boebuka, mojô bo edaka embilimake.

⁴⁹Moto ko aka'ka pë nongo bokô, yo adi o moto yona opika ndako a diko dikpôtô, te nongo a diko dilitai. Mopimbola molakimea ndako emina, na ekwa bokpa mènè. Ndako emina ebeha esusu, mojô monènè.

Luka 7

Yesu Aheleja Mobuli oKapitèni

¹Yana asieja Yesu bobala mijɔ minde misusu na bato baya bamohokeaka, akε a Kapalanauma.

²Okina kapiteni obasoda adaka na mobuli, na amopalaka bou. Iyo apekaka, na yogo ende egbasoa.

³Kapiteni, ama yo ka mojɔ moYesu, ami loma oko bakina basuku baBaYuda ai yo na bo'nga bo adoe a boheleja mobuli onde.

⁴Amea bo ai Yesu, bamongɔɔnɔ na bopipo, na babala bo, Obwani bokɔ mojɔ mu ai yo, mojɔ bo adi moto mobɔngɔke.

⁵Adi na epaeli ai bato basu, na ayoa sinagogue a mojɔ mosu.

⁶Yesu akε na bu; abatama yo ko na ndako, kapiteni amołomea monɔkɔ na bina 'nde bo, Kumu, yε bosanɔngeja; mbi nitabɔngɔ bo nase wε a ndako embi.

⁷Mbi nakεiti ai wε mbi mεnε, mojɔ bo naleki bo nabɔngiti. Bala oko ekenge emɔci pε, na mobuli ombi âhela.

⁸Mbi mεnε nasumaka baya badi boso bombi. Nadi koko na basoda ngɔngɔ jimbi. Nakabala na okina bo akεe, adi boke. Nakabala na otongo bo adoe, adi bodoa. Nakabala na mobuli ombi bo akεe ekina elomu, adi bokɔ.

⁹Yesu akamoa bou a mojɔ mokapiteni yana aka yo bikenge bimna. Ahekua, na abala na bato baya badaka bacingi na nde engbanga bo, Mbi natɔndɔkɔ no na soti bo napakiti ne ejimeli enεnε boa, nongo a Yisalaele mεnε.

¹⁰Baya badoa na bwεnji basɔmbɔ a ndako, na banε bo mobuli ama hela a yogo ende.

Yesu Angɔjɔ Moto oNaina

¹¹Yana ahoa busa, Yesu akε a ekina ngando kombe Naina. Bacingami bande bakε na nde, na bato batongo banεnε pongono.

¹²Yana abatama yo na toolo engando, bato bamana baya batombaka okina momi yona oma gwa. Ngwa'nde adaka mwali-obogwa na adaka namwana yona omɔci pε. Bato bangando banεnε badaka bacingi na nde.

¹³Kumu, yana anε yo mwali omina, amokea wa. Abala na nde bo, Yε boyea!

¹⁴Abatama na ekinda, abakea ebo ai yo, na baya baetombaka ba'ma. Yesu abala bo, Mwamomi, mbi natɔndɔkɔ wε; angɔ!

¹⁵Yona mogo angɔ oko bongɔ, abanga bobala kɔpi, na Yesu amopa ai ngwa'nde.

¹⁶Bato basusu bagasima, bɔ bonεnε. Basakoa Njambe, na babala bo, Motɔndɔi monεnε angɔi a tei esu! Njambe adoi a bonja bato bande.

¹⁷Batɔndɔ mojɔ mu a ngando jesusu jiYuda, na gala ende enangana a makota matongo a mojɔ momina.

Lihɔjɔ liYoane

¹⁸Bacingami baYoane bamojebeja ngando ji jesusu.

¹⁹Oko boa, Yoane abea bacingami bande babae, na abaloma na lihɔjɔ ai Yesu bo, Edi wε yona odaka na sako ebodoa, isa bombe okina otongo?

²⁰Amea bo ai Yesu, babala na nde bo, Yoane Mobatisi alomi so ai wε na lihɔjɔ di; Edi wε yona odaka na sako ebodoa, isa bombe okina otongo?

²¹A ehole emina, Yesu ahelejaka bato banεnε a bego, na bipeko, na miembo mibe; adipoaka koko miso mabato banεnε baya bagwa miso.

²²Iyo abasɔmbeja bo, Kεni atɔndɔe Yoane mijɔ mini no na mijɔ miki no. Baya bagwa misɔ basɔkɔ njεnε; bato bamitengu badalaka; bato bamaba bahelaka; bato babohoka badi na njoki; bagwake basɔkɔ bomɔ; bato babokwali bakaka Mwako Mopele.

²³Isa mbi naditi libaku a njea emoto, moto omina âda na sepi.

²⁴Ayana bato baloma Yoane na bwεnji, Yesu abanga bobala na emumu ebato a mojɔ moYoane. Abala bo, Ino okεkεni oho a lisobe a bonja ndeni? mongongo mokakumane na pwea?

²⁵Ee, okεkεni oho a honja ndeni? moto yona olwaka bisenja biyεmbuyεmbu? Ikani, baya balwaka bisenja bibobuno na bibomwenga, na bayakaka oko leka lopele pε, badi oko a ndako jibakumu.

²⁶Okεkεni oho a bonja ndeni? isa Motɔndɔi? Ee, mbi natɔndɔkɔ no bo, Na yo na motɔndɔi, yo anɔi bou mεnε.

²⁷Ekenge ye esɔnɔmɔ a Misɔnɔ oko a mojɔ monde bo, Anjani, mbi nalomaka obwεnji ombi a boso bowε; Iyo âsεimgoa njea ewε boso bowε.

²⁸Mbi natɔndɔkɔ no bo pεpε nongo moto yona obotama na mwali onɔi Yoane; endele ko, yona odi moto osuka a Bokumu boDiko adi boso boude.

²⁹Bato basusu baya baka mojɔ momina, ee, na baputeja batako pongono, bakumeja Njambe, mojɔ bo bama batisama na batismo eYoane.

³⁰BaPalusi ko, na bakoja baMibeko, balona mokano moNjambe a mojɔ mobu, na baibatisama na Yoane.

³¹Yesu abala bo, Mbi nadi bongε bato baelulu ye na ye? Bâdi o bo?

³²Badi oko na ekɔmeli ebɛngɛ bay a badi a ndanda engando, na bakina babu babalanaka na batongo bo, Iso bobomi ebumba a mojɔ monu, ino ko pε bobua; abomi so lingondo, no pε boyea.

³³Mojɔ bo Yoane Mobatisi adoi, pε boyaka molembɛ, pε bomwaka vino, na obalakani bo adi na mwembo mobe.

³⁴Mwana 'Moto adoi, akayake na akamwake, na obalakani bo, Anjani mogbuko na molangoi, monengi mobaputeja batako na bato babe!

³⁵Bowei bodi bolonga oko na bana babowei.

Mwali Asuoa Yesu Malasi

³⁶MoPalusi omɔci abea Yesu bo ayake na nde. Yesu akwea a ndako eMoPalusi omina na ada a mesa.

³⁷Okina mwali ongando emina, mwali ogala ebe, aka bo Yesu adaka a mesa a ndako eMoPalusi. Oko boa yo adoa na molangi moalabasata mua modaka na malasi botɔ.

³⁸Ama a ngɔngɔ jiYesu, oko a bibota binde. Ayeaka bio, na mbisoli jinde jitanga a diko dibibota biYesu, na abihakoa na swe jimolo monde. Ahia bibota binde na abisuoa malasi.

³⁹Iyo MoPalusi ko yona obea Yesu a boyaka, yana anɛ yo mojɔ momina, ale a molema monde bo, Moto yo, akɔki yo da motɔndɔi soti, ka ajebi mwali omina yona omobenjekɛ na mɔmɔ, na ajebi koko ekɔmeli ende, mojɔ bo adi moto mobe.

⁴⁰Yesu ko amosɔmbeja, abala na nde bo, Simona, mbi nadi na mokina mojɔ a bobala na wɛ. Iyo ajɔ bo, Mokoja, bala ke.

⁴¹Yesu abala bo, Bato babae babeka likonja ai moto, okina obu, pata mikama mitano, yona otongo pata domi-itano.

⁴²Ibo ko baidaka na likonja a bosieja nongo, na yo abakinea oko bokinea. Obu babae, odi bonɔ na epaeli ai moto omina nda?

⁴³Simona asɔmbeja bo, Yona olɛkɛ mbi, oko yona odaka na nongo enenɛ na amokinea. Yesu abala na nde bo, Olongi.

⁴⁴Ahekoai ai mwali, na ahala na Simona bo, Onɛkɛ mwali yoyo? Akwei mbi a ndako ewɛ, opiti mbi madiba a mojɔ mobibota bimbi. Iyo ko atangejai mbisoli jinde a bibota bimbi, na abihakoi na swe jinde.

⁴⁵Wɛ pε bohia mbi nongo; akwei mbi ya ko, yo akiniti bibota bimbi bohia.

⁴⁶Wɛ osuoiti molo mombi sali. Iyo ko asuoi bibota bimbi malasi.

⁴⁷A mojɔ momina, mbi natɔndɔkɔ wε bo jibe jinde jia jidi jinεnε, jikinami, mojɔ bo adi na epaeli enεnε. Moto ko akasɔ boyε bokεkε, adi oko na epaeli ekekε.

⁴⁸Yesu abala na mwali bo, Jibe jiwε jikinami.

⁴⁹Baya badaka na nde a mesa babanga bobalana bo, Iyo moto ndani yona okinaka jibe?

⁵⁰Yesu ko abala na mwali bo, Ejimeli ewε ehelejai wε; yana na bowi.

Luka 8

¹Ngɔngɔ mweka, Yesu akε mokina mɔngɔ a ngando na ngando, ngando jinεnεnε, na ngando jikεkε. Atɔndɔ Mwako Mopele, na ajebeja bato mojɔ moBokumu boNjambe.

²Bacingami bande domi-na-babae bamopaka, na bakina bali baya bama hela a miembo mibe na bego; Malia oMagadala yona oma hela a miembo mibe sambo,

³Yoana mwali oKusa yona odaka mokɔmeli oElode, na Susana, na bakina batongo koko baya bamokɔkɔ monganji na likonja libu.

Mondε Mongua

⁴Yana atitana bato banεnε mεnε, na adonga bato a ngando na ngando bo badoe ai yo, abala na bu monde mu.

⁵Okina moto akε a bomεsε ngua a gbie. Yana amεsεkε yo, jikina ngua jikwa a dɔngɔ dinjea. Bato badεhε ngua jimina na bibota bibu, na mbulu bajikoma.

⁶Jikina jitongo jikwa a diko dilitai linεnεnε; ama ju tɔ, jimi wɔcsɔsɔ oko bowɔcsɔsɔ cina etaka emadiba.

⁷Jikina jitongo jikwa a tei enjani; njani jidaka na bohohu, na jigbokeja ngua.

⁸Jikina jitongo koko jikwa a kpɔtɔ jipele, jikandoa na jibota mokama-mokama. Asieja yo bobala mojɔ momina, abekoa bo, Isa moto adi na matoi manjoki, ye ahokee.

⁹Bacingami bande bamohɔjɔ cina emonde momina.

¹⁰Iyo abasɔmbeja bo, Mijɔ miBokumu boNjambe miboloi ai no bo omijebeni; midi a tei emindε ko a mojɔ mobato batongo, bo batanε, nongo adi bo na njεnε, na bo batacingea, nongo adi bo na njoki.

¹¹Gina emonde oko ye; ngua jidi Ebaeli eNjambe.

¹²Ijia jidi a dɔngɔ dinjea, oko baya bakaka. Satana ko adoaka na acinoaka ebaeli emina a milema mibu, bo basaka jima na basaka hela.

¹³Ijia jidi a litai, oko baya bakaka na basoko ebaeli na sepi. Bapeliti ko njeli; ejimeli ebu etayeyoaka ehole eyai, na bangwaka a ehole ebomeka.

¹⁴Ngua jia jikwa a tei enjani jidi oko bato baya bakaka, bayanaka na bakinaka bo ebaeli egboke na mikakwano, na likonja, na ngando jingasangasa jingondo. Ibo babotaka oko mipapa pe.

¹⁵Ijia jikwa a kpoto jipelejidi oko baya bakaka na babaneaka ebaeli a milema mipele mibowi. Ibo badi na lingbangba, na babotaka mbuma.

¹⁶Moto akayoja paka, atabomba paka emina a cina eteni isa cina egbagba. Aebakeaka a mesa, bo baya bakweaka banee bohu.

¹⁷Mojo bo ngando jibombamake jiboloa jesusu, na jia jikundami jikukuoama jesusu, bo bato bajewe.

¹⁸Toma nganjamani na mijɔ mikaka no. Mojo bo, yona opeli a‰o koko; yona ko odi oko ngasa, badi bomokatoa leka lodingaka yo bo apeli.

¹⁹Nange eYesu na bananango badoa a ehole emina. Bainε ko njea a bobatama na nde a mojɔ moembamba ebato.

²⁰Bakina babala na nde bo, Ngwao na banangwao badi oho sokolu. Bapalaka bo banenee na we.

²¹Iyo asombeja bo, Ngwa'mbi na banangwa 'mbi badi oko baya bahokeaka na basumaka Ebaeli eNjambe.

Yesu Agoleja Mopomba

²²Yesu atamba na bacingami bande a bwato bokina busa. Abala na bu bo, Yeni so bolekele oho a dɔngɔ ditongo dilibale. Oko boa bake.

²³Alekelaka bo, yo ahwe hi. Mopomba modoa a libale; madiba manene makwea a bwato, na bapa njupi menε.

²⁴Babatama na Yesu, bamosisoja, babala na nde bo, Moswa'su, moswa'su; iso bodindi! Iyo asisoa, asia pwea na mula monene, na mopomba moyeyo bowi menε.

²⁵Abala na bu bo, Ejimeli enu edoni? Ibo ko bagbεlεmwana na bɔ. Bakamo bou, na babalana bo, Iyo moto ndani? Nongo akabala na pwea na madiba, bamosumaka.

Moto Omiembo Mibe

²⁶Baseme a ngunda eBaGelasa yena eyeli Galile.

²⁷Yana aduboa yo a ngondo, asongana na okina momi ongando emna yona odaka na miembo mibe. Ama yeyoa ekoka, pe bolwa nongo bisenja, pe boda nongo a ndako, oko a bisem̄o pe.

²⁸Yana ane yo Yesu, agboma, na akwa a boso bonde. Abekoa bo, Yesu, Mwana oNjambe oBono! Odoi a boduka na mbi mojɔ? Yε bodingojani! mbi na-ngɔɔnɔkɔ wε.

²⁹Mojɔ bo Yesu atɔndɔ mwembo mobe bo momane ai moto omina. (Mwembo momina momodumbaka mandeli-mandeli. Bamo'saka mikɛsɛ, na bamokandaka na minyɔlɔ. Iyo ko amitwaka oko botwa, na mwembo mobe momolabojaka a esika.)

³⁰Yesu amohɔjɔ bo, Kombe ewε nda? Iyo asɔmbeja bo, Lindundu, cina bo miembo mibe minɛnɛ mima kwea a tei ende.

³¹Miembomibe mingɔɔnɔ Yesu bo atamibengana a mombɔndɔ mua mopoliti cina.

³²Bwela bonenɛ bongulube bodaka bokayake a mono. Oko boa, miembo mibe mingɔɔnɔ Yesu bo amipε njea a bokwea a tei engulube, na yo ajima.

³³Miembo mibe mimana ai moto, na mikwea a tei engulube. Bwela bosusu bokilima mbango a mono oko a libale, na bagwa a madiba.

³⁴Yana ane banjeli bangulube mojɔ momina, bacia oko bocia. Batɔndɔ bato mojɔ momina a ngando na a njea jigbie.

³⁵Oko boa bato bakε a bokokeleja mojɔ. Amea bo ai Yesu, batana moto yona ohela a miembo mibe. Iyo adaka na mobondo a bibota biYesu. Ama lwa bisenja, adaka na yongi epele, na babanga oko bobanga.

³⁶Bato bay a banε mojɔ babajebeja njea ema bela na moto omina a miembo mibe.

³⁷A mojɔ momina, bato basusu balikota liBaGelasa bangɔɔnɔ Yesu bo ayane, mojɔ bo badaka na bɔ bonenɛ mɛnɛ. Oko boa yo atamba a bwato, na ayana.

³⁸Moto yona ohela a miembo mibe amonga njea bo akεe na nde. Yesu ko amoyaneja; abala na nde bo,

³⁹Sɔmbɔ a ngando ewε, tɔndɔ mojɔ monɛnɛ mokɔi Njambe ai wε. Oko boa, yo ayana, akε atɔndɔe bato a ngando esusu mojɔ mosusu mokɔ Yesu ai yo.

Mwana 'Yailo Ahela

⁴⁰Bato banenɛ basɔ Yesu na sepi a lihule linde, mojɔ bo ibo basusu badaka na njingo ai yo.

⁴¹Okina momi adoa, kombe ende Yailo. Iyo adaka mosuku osinagogue; asadumba a bibota biYesu na amongōnō bo akēe a ndako ende.

⁴²Mojō bo adaka na mwamwali omoci pε yona odaka na bianga domi-na-bibae na dea, na adaka asambi na yogo egbasoake mēnē. Yana adalaka yo a njea, bato bamombambameja bou.

⁴³Okina mwali adaka acingi na nde engbanga yona odaka na yogo eekia bianga domi-na-bibae. Ama sieja likonja linde lisusu na nganga basengo; ibo ko baihōnō bomoholeja a yogo ende.

⁴⁴Mwali omina abenjε gbomba ekasaka eYesu na ebɔ ende, na ekia ende ekoka bokpa.

⁴⁵Yesu ko abala bo, Obenjεi mbi na ebɔ nda? Bato basusu bangana. Pεtelo ko na batongo bayo badaka na nde, babala na Yesu bo, Moswa'su, bato bahikaka wε banēnē mēnē, na bambambamejaka wε.

⁴⁶Yesu ko abala bo, Moto omoci abakei ebɔ ai mbi. Najebi bo ekina ngulu emani ai mbi.

⁴⁷Yana anε mwali bo mojō monde moboloa, adoa na mongongoma na asadumba a boso boYesu. Atɔndo mojō mosusu a boso bobato basusu, bo ahela a yogo ende bokpa a eholeebenjε yo Yesu na ebɔ.

⁴⁸Yesu abala na nde bo, Mwana'mbi, ejimeli ewε ehelejai wε; yana na bowi.

⁴⁹Abalaka yo boa, okina moto omosuku osinagogue adoa na abala bo, Ye bonɔngeja koko Mokoja! Mwana'wε agwi.

⁵⁰Yana aka Yesu ekenge emina, abala na mosuku bo, Ye bobanga! Jima oko bojima na yo âhela.

⁵¹Amea Yesu a ndako, ajima bo Pεtelo, na Yoane, na Yakobo, na sange'mwana na ngwa'nde, bakwee na nde a tei, pεpε nongo okina otongo.

⁵²Bato basusu badaka bakayee a mojō mobogwa bomwamwali. Yesu abala bo, T'oyeeni oko. Iyo aditi mogo. Ahwεi oko hio pε.

⁵³Ibo ko bamosεkε, mojō bo bajebaka bo agwa.

⁵⁴Iyo ko apea ebɔ ende, amobea bo, Mwana, angɔ!

⁵⁵Mwembo monde mohula, na angɔ bokpa. Na Yesu abatɔndo bo bamopε ekina eka eboyaka.

⁵⁶Baboti bande bakamoa na bokamoa bonēnē. Yesu ko abaleha bo batatɔndo nongo moto mojō momina.

Luka 9

Yesu Aloma Domi-na-Babae a Blomu

- ¹Yesu abolea bacingami bande domi-na-babae. Abapa ngulu na kpaci a bodumba miembo mibe, na a boheleja bato a bego.
- ²Abaloma a botəndə mwako moBokumu boNjambe, na a bosengoa babego.
- ³Abala na bu bo, T'otombeni oko leka a mojɔ momɔngɔ monu; pεpε nongo pango, isa litɔngi, isa molɛmbɛ, isa likonja, na pε botombani kasaka jibae.
- ⁴Okakweani a ekina ndako, yevoani a ndako emina oko a ehole enu ebodonga.
- ⁵Bato bamiti sɔ no bopele a ekina ngando, okadongani a ngando emina, toma hakoani dutu libibota bmu, o eleho ai bo.
- ⁶Oko boa bake bakatəndə Mwako Mopele a ngando na ngando, na basengoa babego a bisika bisusu.
- ⁷Yana aka kumu Elode mwako mongando jisusu jikɔkɔ Yesu, adaka na mokakwano. Mojɔ bo bakina babalaka bo Yoane adaka koko mɔ.
- ⁸Batongo babalaka bo Elia ahula; na batongo koko babalaka bo okina motəndɔi oehelehele angɔ a bogwa.
- ⁹Elode abala bo, Mbi natəndə Yoane molo; ngando ko jikaka mbi a mojɔ momoto omina,—iyo ndani? Oko boa adaka na posa bo amonɛe.

Yesu Ayakeja Bato Koto Jitano

- ¹⁰Yana ahula babwənji, batəndə Yesu ngando jima bo kɔ. Iyo ababea bo bakεe na nde a esika ebowi a dɔngɔ dingando, kombe Betesaida.
- ¹¹Bato ko, aka bo mojɔ momina, bamokimana oho. Iyoaba'sɔ bopele, abala na bu a mojɔ moBokumu boNjambe, na aheleja bato baya badaka na bego.
- ¹²Abenga busa bodipa, bacingami domi-na-babae badoa, babala na nde bo, Yaneja bato edεye bo bakεe a ngando jia jibati na su, na a ngando jibato bagbie, a mojɔ mobohwε, na a boduka leka loboyaka; mojɔ bo esika ye edi so edi oko ngasa.
- ¹³Iyo abala na bu bo, Bapani leka loboyaka no bɛnɛ. Ibo basɔmbeja bo, Iso bodi oko na milɛmbɛ mitano pε, na swi babae,—bomiti kε a bosomba mia a mojɔ mobato ba basusu.
- ¹⁴Mojɔ bo bato badaka koto jitano na dea. Yesu abala na bacingami bande bo, Dejani bato nase mongbanga-mongbanga, bato domi-itano domi-itano.
- ¹⁵Ibo bakɔ boa, na badeja bato basusu nase.

¹⁶Yesu atomba milembé mitano na swi babae; akaho miso diko, ajongoa milembé na swi, amibuka, na amipa ai bacingami bo bamikabe na bato.

¹⁷Ibo bayaka kanga basusu, ligola mènè. Bandoa koko bikenge bia bidika, sanga domi-na-jibae botø.

Mojimo moPëtelo

¹⁸Yana adaka Yesu a bonga yo buki, bacingami badaka na nde hulelu. Iyo abahøjø bo, Bato babalaka bo mbi nadi nda?

¹⁹Bamo-sɔmbeja bo, Yoane Mobatisi; bakina batongo ko babalaka bo odi Elia, na bakina batongo koko babalaka bo okina motɔndɔi oehelehele ahuli.

²⁰Ahahøjø koko ho, Ino bñè ko obalakani bo mbi nadi nda? Pëtelo amosɔmbeja bo, Masiya oNjambe.

²¹Iyo ko abaleha na bopipo, na abalemba bo batatɔndɔ nongo moto mojɔ momina.

²²Abala bo, Mwana 'Moto adi bodingoa bou mènè. Basuku, na basuku banganga, na basɔni, badi bomodumba na bâmowa, na ângɔ koko a busa bomasato.

Mojɔ Mobosusa Yesu

²³Abala na bu basusu bo, Isa okina moto apalaka bosusa mbi, yε apete salona yo mènè, atombe mole-mobokea monde tu busa bo asuse mbi.

²⁴Mojɔ bo, moto na moto yona opalaka bobanea mohelo monde, âmonameja oko bonameja. Moto ko yona onamejaka mohelo monde a mojɔ mombi, âmoheleja.

²⁵Mojɔ bo, moto akakonja ngondo esusu mènè, na akanameja mohelo monde, isa akasabungeja, adi bobɔngɔ na ye?

²⁶Isa moto a'kaka sɔni a mojɔ mombi na bibaeli bimbi, Mwana 'Moto âmokea sɔni yana âdoa yo a ekumu ende na ekumu eSango na babwɛnji basenɔke.

²⁷Mbi natɔndɔkɔ no na soti bo bakina badi ya mema baya bata'nɛ bogwa oko banekini Bokumu boNjambe.

Yesu Akindoa Elimo Etongo

²⁸Bikenge bimina bisia, na yana anɔ masu bomwambe, Yesu abea Pëtelo na Yoane na Yakobo, na ake na bu a mono a mojɔ mobo'nga.

²⁹Yana angaka yo, boso bonde bokindoa elimo etongo; bisenja binde bipua bopɛɛ mènè, na bidaka na bolailai.

³⁰Bato bami babae, oko Mose na Elia, badoa bundumo na basola na nde.

³¹Ibo bamana a eyembi eekumu, na babala a mojɔ mobogwa bonde bokɛke yo agwε a Yelusalema.

³²Pɛtelo ko na bacingami batongo bay a badaka na nde, bangbɔngɔkɔ na hiɔ; endele ko, badika misu. Oko boa banε ekumu ende, na bami babae bay a badaka na nde.

³³Yana abɔtɔnɔkɔ bato bamina na Yesu, Pɛtelo abala na nde bo, Moswa'su, modi mojɔ mopele bo so bodaε ya. Kina bopike maako masato, dikina a mojɔ mowε, ditongo a mojɔ moMose, na ditongo koko a mojɔ moElia,—cina bo aijeba mojɔ mobobala.

³⁴Abalaka yo boa, eyembi etita na ebahua. Ibo badaka na bɔ yana akwea bo a eyembi.

³⁵Na kɔpi emana a eyembi bo, Iyo adi Mwana'mbi. Mbi namobɔ; mohokeani.

³⁶Yana abalaka kɔpi emina, Yesu adika yo buki pε. Bacingami babomba mojɔ momina. Baitɔndɔ nongo moto a masu mamina mojɔ mone bo.

Yesu Aheleja Mwana-Momi

³⁷Batita a mono yana ahoa busa, na bato banεnε badoa a bosongana na nde.

³⁸Okina momi adaka a tei eemumu ebato, na yo abekoa bo, Mokoja, mbi nangɔɔnɔkɔ wε bo onje mwana'mbi momi; mwana'mbi omɔci oko yo.

³⁹Mokina mwembo momopeaka, na agamaka bokpa. Mwembo momodumbaka gbu, na mapuli mamanaka a monɔkɔ monde; monaka na nde na bopipo mεnε, na mokamana ai yo momokinaka na pola jinεnε.

⁴⁰Nangɔɔnɔki bacingami bawε bo bamejae mwembo, bo ko pε bohɔnɔ.

⁴¹Yesu asɔmbeja bo, Elulu epεndɔ na libwano! enina ôda mbi na nu? nâhɔnɔ mijɔ minu ekoka o bo? Doa na mwana 'wε jɔno.

⁴²Yana adoaka yo, mwembo mobe momodumba na momolulumeja. Yesu ko alema na mwembo mobe, aheleja mwa'momi na amosɔmbeja ai sangwa'nde.

⁴³Bato basusu bakamoa a mojɔ mongulu enεnε eNjambe.

Mojɔ Mobogwa na Bongɔ boYesu a Bogwa

Adaka bo basusu na bokamoa a mojɔ mongando jisusu jikɔkɔ Yesu, yo abala na bacingami bande bo,

⁴⁴Hokeani bopele bikenge bimina, mojɔ bo Mwana 'Moto adi bokabama a mɔmɔ mabato.

⁴⁵Bacingami ko baicingea ekenge emina; cina emina ebombama ai 'bo, bo batacingea; na baimohɔjɔ cina emina a mojɔ mobɔ.

⁴⁶Bacingami babanga bobomana kite a mojɔ momoto yona odaka na bosuku a tei ebu.

⁴⁷Yana anε Yesu cina emojɔ mobomaka na bu kite a milema mibu, atomba mwana mokekεlεkε, amodeja a dɔngɔ dinde,

⁴⁸na abala na bu bo, Yona osɔkɔ mwana yoyo mokekεlεkε a kombe embi, asɔkɔ mbi mεnε; na yona osɔkɔ mbi asɔkɔ yona olomani. Mojɔ bo yona odi ngɔngɔ jinu basusu, odi ng bosuku oko yo.

⁴⁹Yoane amosɔmbeja bo, Moswa 'su, iso boni okina moto akadumbe miembo mibe a kombe ewε, na bomolembi, mojɔ bo atacingamaka na su.

⁵⁰Yesu abala na nde bo, T'omolembeni oko; mojɔ bo isa moto aditi na su soki adi a dɔngɔ disu.

Njea eYelusalema

⁵¹Yana abatama ehole ende ebodonga a ngondo, Yesu anda ngapa bo akεe a Yelusalema, na asueja bato boso na bwεnji.

⁵²Ibo bakε, na bamea a ekina ngando eBaSamalia bo baselingoe esika a mojɔ monde.

⁵³Bato ko baipala bo bamo'sε, mojɔ bo boso bonde bonjaka oko njea eYelusalema.

⁵⁴Yana anε bacingami bande Yakobo na Yoane mojɔ momina, babala bo, Kumu, opalaka bo bobee mosa mohule Diko a botumba bato bamina?

⁵⁵Iyo ko ahekua na alemoa na bu.

⁵⁶Oko boa bake a ekina ngando etongo.

⁵⁷Amaka bo dala a njea, okina momi ami bala oko na nde bo, Mbi nadi bosusa wε a bisika bisusu hikεkε wε.

⁵⁸Yesu amosɔmbeja bo, Kpia badi na mikpo; mbulu badiko badi na mobo; Mwana 'Moto ko apeliti esika a bosuka molo monde.

⁵⁹Abala na moto otongo bo, Gingama na mbi. Iyo ko asɔmbeja bo, Kumu, kinani napete kε a bopusea sangwa'mbi.

⁶⁰Yesu abala na nde bo, Kina bagwake bapusee bagwake babu bεnε. Wε ko, kε ananganejae mwako moBokumu boNjambe.

⁶¹Okina otongo koko abala na Yesu bo, Kumu, mbi nadi bosusa wε; kinani ko napete kε a ndako embi bo naseane na bato bambi.

⁶²Yesu abala na nde bo, Moto yona obanga bolia gbie akangwa, atabɔngɔ na Bokumu boNjambe.

Luka 10

Yesu Aloma Bacingami Domi-Sambo a Eloniu

- ¹Ngɔngɔ jima, Kumu ahɔ bacingami batongo domi-sambo. Abaloma boso bonde, bato babae babae, a ngando jesusu, na bisika bisusu bikanaka yo boke.
- ²Abala na bu bo, Lituna lindongo lidi linɛnɛ; basali ko badi oko baleka pε. Oko boa, mgakani Kumu olituna bo alome basali a lituna linde.
- ³Keni; hokeani ko; mbi nalomaka no o bana babata baya bahikami na swa.
- ⁴T'otombeni oko litɔŋgi lilikonja, nongo libenga, nongo sapata; pε bobɛjɛni moto a njea.
- ⁵Omaka kweani a ekina ndako, peta balani bo, Bowi a ndako ye!
- ⁶Moto obowi akada ena, bowi bonu bodi boyeyoa na nde; isa aditi, bowi bonu bodi bohula ai no hɛnɛ.
- ⁷Dani oko a ndako emina; yakani na mwakani leka lopaka bato no, mojɔ bo mosali abwani bosɔ pɔsɔ ende. Pε bokɛni a ndako ndako.
- ⁸Okameani a ekina ngando, na bakasɔ no bopele, na bakapa no boyaka, yakani oko leka lomina.
- ⁹Helejani babego a ngando emina; balani na bu bo, Bokumu boNjambe bobatami na nu.
- ¹⁰Okameani a ekina ngando, na bato pε bosɔ no bopele, dalani a licilinga lingando na balani bo,
- ¹¹Iso bohakoaka dutu lingando enu lia licingi na bibota bisu, o eleho ai no; pε mojɔ, toma jebani bo Bokumu boNjambe bobatami.
- ¹²Na mokindo mongando emina, na mokindo moSɔdɔmɔ, mbi natɔndɔkɔ no bo mokindo mongando emina monɔbi mua moSɔdɔmɔ na bopipo a busa bomina.
- ¹³Ee Kolasina, monɔngɔ ai no! Ee Betesaida, monɔngɔ ai no! Akɔkɔ bo nɛ mindumba minɛkɛ no, ka Tula na Sidona bahekoja milema mibu eyou, balwa bipupu, na basasuoa mihulu.
- ¹⁴A mojɔ momina, mokindo monu monɔbi mua moTula na Sidona na bopipo a busa boEsambi.
- ¹⁵Ee Kapalanauma, odingaka bo odae na ekumu eDiko? Odi botita nase oko a Seolo.
- ¹⁶Moto akahokea no, ahokeaka mbi. Moto ko akalona no, alonaka mbi. Na yona olonaka mbi, alonaka yona olomani.

¹⁷Ibo Domi-sambo bahula na sepi. Babala bo, Kumu, nongo miembo mibe misumaka so a kombe ewε.

¹⁸Yesu abala na bu bo, Satana yona odaka Diko akwa o mokalimo; mbi namone.

¹⁹Mbi napi no kpaci soti a bodehε njɔ, na koolo, na a hogbokeja ndangasa esoki; pεpε nongo eka edi bopekeja no.

²⁰Endele ko, t'osepeni oko a mojɔ momina, bo miembo mibe misumaka no. Dani oko na sepi cina bo kombe jinu jisɔnɔmɔ oho Diko.

²¹Yesu alumna na sepi eMwembo Mosenɔke a ehole emina, na abala bo, Sesa, Kumu oDiko na nase, mbi nasakoaka wε, cina bo obomba ngando ji ai bato babowεi na bato baejebeli, na ojibolojai ai bana bakεkε. Ee Sesa, monganji momina modaka bolulea bowε.

²²Sangwa'mbi apa leka losusu ai mbi. Pεpε nongo moto ojebaka yona odi Mwana; Sango pε ajebaka. Na pεpε nongo moto ojebaka yona odi Sango; Mwana pε ajebaka. Mwana akapala, adi bomoboloja ai moto.

²³Yesu ahekoai bacingami bande na abala oko na bu pε; abala bo, Miso maya manεkε ngando jinεkε no madi na bojongoa.

²⁴Mojɔ bo mbi natɔndɔkɔ no bo batɔndɔi banεnε, na bakumu banεnε, badaka na posa a bone ngando jinεkε no; baijinε ko. Badaka koko na posa a boka ngando jikaka no; baijika ko.

Mondε moMoto oSamalia Mopele

²⁵Okina nganga oMibeko angɔ a bomeka Yesu. Abala bo, Mokoja, êkɔ mbi nda bo nasangoe bomɔ bua bodi oko na bosusu?

²⁶Yesu abala na nde bo, Mosɔnɔ a Mibeko modi bo? Mojɔ molangaka wε ena nda?

²⁷Iyo asɔmbeja bo, Toma pala Kumu Njambe owε na molema mowε mosusu, mwembo mowε mosusu, ngulu ewε esusu, bole bowε bosusu; na toma pala motuteano mowε o asapalaka wε menε.

²⁸Yesu abala na nde bo, Olongi; kɔ boa nongo ohele.

²⁹Iyo ko apala bo asalongejae, na abala na Yesu bo, Motuteano mombi nda?

³⁰Yesu amosɔmbeja bo, Okina momi adonga a Yelusalema bo akεe a Yeliko, na asaka na mibengo a njea. Ibo batomba leka londe losusu, bamotua na bopipo, na ayana bo, bamokina o mogo.

³¹Okina nganga otempelo adaka a njea emina pongono. Iyo ko, yana anε yo moto omina, amobamba oko bobamba, na anɔ.

³²Okina MoLewi koko boa; amea yo a esika emina, amonε, amobamba na ançoko bonç.

³³Okina MoSamalia ko yona okεke mokina mɔngɔ, amea a esika edaka moto omina. Yana amonε yo, amokea wa.

³⁴Abatama na nde, ahua pola jinde, na ajisuo sali na vino. Amobakea a punda onde mεnε, akε na nde a ndako epasaje na amohanea.

³⁵Yana ahoa busa, ameja bikenge bilikonja bibae, abipa moswa 'ndako, abala na nde bo, Mobanea bopele; okamosombea leka, na likonja didi pε bobwana, mbi nadi bolisɔmbeja ai wε a lihule limbi.

³⁶Motuteano momoto yona osaka na mibengɔ nda? Obu basato nda? Wε olekε bo?

³⁷Iyo asɔmbeja bo, Oko yona omokea wa. Yesu abala na nde bo, Wε, ke okakɔε boa pongono.

Malata na Malia

³⁸Yesu amea a ekina ngando a njea ebu, na mwali omɔci, kombe ende Malata amosɔ a ndako ende.

³⁹Iyo adaka na mwangwa 'nde omɔci, kombe ende Malia, na yo ada na mobondo a bibota biKumu a bohokea hokoja honde.

⁴⁰Malata ko adaka na mokakwano a mojɔ moelomu enεnε endako. Oko boa yo akε ai Yesu, abala na nde bo, Kumu, otajebaka bo mwangwa 'mbi akini elomu esusu endako oko ai mbi pε? bala na nde bo akɔmejae mbi.

⁴¹Kumu ko amosɔmbeja bo, Malata, Malata, wε okakwanaka na oyayoaka na mijɔ minεnε.

⁴²Mojɔ momɔci pε mobwani. Malia ahɔi libondo lipele, na moto atalikatoa ai yo.

Luka 11

Mojɔ Mobo'nga

¹Yesu adaka a bonga a ekina esika. Yana asieja yo bo'nga, mocingami onde omɔci abala na nde bo, Kumu, bokoja so bonga o akoja Yoane bacingami bande.

²Iyo abala na bu bo, Yana angaka no, balani bo, Sesa, ye kombe ewε esumame; Ye Bokumu bowε bodoe.

³Bopa so milembε busa na busa.

⁴Bokina so jibe jisu, Mojɔ bo so bokinaka moto na moto yona okɔi bobe ai so. Bambeja so a njea ebomeka.

⁵Abala na bu koko bo, Okina onu akada na mina'nde, adi bokε ai yo na bulu tei, adi bobala na nde bo, Moninga, bekejani milεmbε misato.

⁶Mojɔ bo okina mina'mbi amei a esika embi a mɔngɔ monde, na mbi napeliti eka a bomonea yo.

⁷Yona odi a ndako tei adi bomosɔmbeja bo, Yε bonɔngeja mbi! Nakandi modipe. Iso na bana bambi bosami. Ebɔngiti bo mbi nakine gbagba embi bo nape wε milεmbε.

⁸Mbi ko natɔndɔko no bo, Isa aditi bongɔ bo amope milεmbε mojɔ bo adi mina'nde, adi bongɔ ko na âpa moto omina leka losusu lua lotakaka na nde, akada na lingbangba, pε sɔni.

⁹Mbi natɔndɔkɔ no bo, Ingakani nongo oseni. Dukakani nongo obolojaeni. Bimboakani na modipe môdipoama ai no.

¹⁰Mojɔ bo moto na moto yona ongaka asɔkɔ. Yona odukaka abolojaka. Modipe modipoamaka ai yona obimboaka.

¹¹Okina onu akada sange'moto, na mwana'nde akamo'nga molεmbε, adi bomopa litai? Akamo'nga swi, adi bomopa njɔ?

¹²Akamo'nga litɔ, adi bomopa koolo?

¹³Oko boa, ino bato, nongo adi no bato babe, ojebakani bopa bana banu bipeeli bipele; esingaiti Sangwa'nu oho Diko! Iyo apaka Mwembo Mosenɔke ai bato baya bamongaka.

Mojɔ Momiembo Mibe

¹⁴Yesu ameja mwembo mobe moengomba. Yana amana mwembo mobe, moto oengomba abala, na bato basusu bakamo.

¹⁵Bakina babu ko babala bo, Iyo amejaka miembo mibe oko na kpaci eBalasebuba, kumu omiembo mibe.

¹⁶Bakina batongo bamodi-ngea, na bapala bo abanejae ekina embete eDiko.

¹⁷Iyo ko ajeba bileli bibu, na abala na bu bo, Boswiana bokada a tei ebokumu, bokumu bomina bodi bobeha. Boswiana bokada a ekina ndako, ndako emina edi bobeha.

¹⁸Oko hoa, isa Satana aswianaka na yo mεnε, bokumu bonde bodi boyeyoa na ye?

¹⁹Isa mbi nadumbaka miembo mibe na kpaci eBalasebuba, bana banu bamidumbaka na kpaci enda? Oko boa bana banu bâsambeja no.

²⁰Isa mbi ko nadumbaka miembó mibe na mosapi moNjambe, Bokumu boNjambe bodoi ai no.

²¹Moto mopipo akalwa molilo monde mobila a bobanea ndako ende, esika ende êda na bowi.

²²Okina otongo ko yona omonci na bopipo, adi bona na nde na âmogbokeja, âkatoa mohlo monde mobila mojimaka yo, na âkaba leka londe.

²³Moto yona oditi a dêngô dimbi, o ayeli mbi. Yona odi pë bondoa na mbi ananganejaka.

²⁴Mwembo mobe mokamana ai moto, mokalebaleba a mokonda mokakanake a boduka bowi, pë ko boboloja bowi. Oko boa modi bobala bo, Mbi nâsombô a ndako ekini mbi.

²⁵Makahula, modi bone ndako embôke na ekoleamake.

²⁶Oko boa, mwembo momina mokèke nduki emiembo mitongo sambo mia mimonci na bobe, na mi misusu midi bokwea a boda ena. Na moda momoto omina mongongo, na moda monde moboso, moda monde mongongo modi bonc na bobe.

²⁷Yana abala yo bikenge bimina, okina mwali yona odaka a tei ehkita libato abekoa bo, Bojongoa a sôpô yena ebota wë, na mabëi manunga wë!

²⁸Yesu ko abala bo, Badi na bojongoa soti oko bay a ba'kaka na basumaka Ebaeli eNjambe.

Mojo Moembete

²⁹Bato bahë bou mënë a ehole emina, na yo abanga bobala na bu bo, Elulu ye edi elulu ebe. Edukaka embete; eta'në ko nongo embete, oko embete ejona pë.

³⁰Jona adaka embete ai bato baNinewe. Mwana 'Moto ko âda koko embete a mojo moelulu ye.

³¹Kumumwali oSudo adi bongô na bato baelulu ye a Esambi, na abadumbabí. Mojo bo yo adonga a suka engondo, na adoa ai Sôlomô bo ahokee bowëi bonde. Okina ko yona onci Sôlomô adi yaya.

³²Bato baNinewe badi bongô na bato baelulu ye a Esambi, na babadumbabí. Mojo bo, ibo bahekoja milema mibu a mojo momwako motondô Jona. Okina ko yona onci Jona adi yaya.

³³Moto akayoja paka, ataehomba a ekina esika, isa a cina eteni. Adi boebakea a mesa, bo bay a bakweaka banëe bohu.

³⁴Paka emokuku edi diso diwë. Isa diso diwë didi dipele, mokuku mowë mosusu modi a bohu; isa didi dibe ko, mokuku mowë mosusu modi oko a modidi.

³⁵Oko boa, toma nganjama bo bohu bua bodi a tei ewε bosaka da oko modidi.

³⁶Isa mokuku mowε mosusu modi a bohu, pεpε nongo ekenge a modidi, modi bohoa mosusu mεnε, o ekɔmeli epaka yena ehojaka wε na eyoi ende.

Mojɔ moBaPalusi

³⁷Yana abalaka Yesu, okina MoPalusi amobea bo ayake a ndako ende. Oko boa yo akwea a ndako, na ada a mesa.

³⁸MoPalusi akamo a yana anε yo bo aisasosa oko apetakini yaka.

³⁹Kumu ko abala na nde bo, Ino BaPalusi osεnojakani kɔpɔ na saani oko sokolu pε; olumini ko a tei oko na liba na bikɔmeli bibe.

⁴⁰Ino bigegele! yona okɔ sokolu aikɔ tei pongono?

⁴¹Enɔi na bopele bo osεnojaeni ngando jia jidi a tei enu; oko boa bikɔmeli binu bisusu bidi bobɔngɔ.

⁴²Monɔngɔ ai no BaPalusi! Okabakani ai Njambe libondo lidomi limondumbamba, na sumba, na njua jesusu jibojio; otalekεni ko nongo mweka a mojɔ mobodongo na epaeli eNjambe. Obwanini bokɔ ngando jiji, na pε bodimboa bokɔ ngando jia jitongo pongono.

⁴³Monɔngɔ ai no BaPalusi! Ino opalakani oko bidie biboso a sinagoge, na njεbε jibato a licilinga.

⁴⁴Monɔngɔ ai no! Mojɔ bo odini oko bisεmɔ bia bibombami; bato badalaka diko pε bojeba.

⁴⁵Okina nganga oMibeko amosɔmbeja bo, Mokoja, abaliwε boa, okejaka so koko sɔni.

⁴⁶Yesu abala na nde bo, Monɔngɔ ai no nganga baMibeko pongono! Mojɔ bo ino olwajakani bato mina minεnεnε; ino bεnε ko otangɔjɔkɔni nongo mosapi momɔci a bokamo a mina mimina.

⁴⁷Monɔngɔ ai no! Basangwa'nu bawa batɔndɔi; ino ko olongakani bisεmɔ bibu.

⁴⁸Oko boa ojimakani bikɔmeli bibasangwa'nu, na obalongejakani. Ibo bawa batɔndɔi, ino ko olongakani bisεmɔ bibu.

⁴⁹Bowei boNjambe bobala a mojɔ momina bo, Mbi nâbalomea batɔndɔi na babwεnji; bâwa bakina, na bâdingoja batongo.

⁵⁰Oko boa, lindo jimakia mabatɔndɔi maya masopea oko a bobanga bongondo, jida a elulu ye,

⁵¹donga oko a makia maAbela, oko a makia maSekalaya yona ogwa a sibano elitumbu na tempelo. Ee, mbi natɔndɔkɔ no bo lindo Jimina jidi oko a elulu ye.

⁵²Monɔngɔ ai no nganga baMibeko! mojɔ bo okatoini sabe eejebeli; okweitini no bɛnɛ, na odipakani njea ai bato baya bakɔkɔ bo bakwee.

⁵³Amana yo a esika emina, basɔni na BaPalusi badaka na nde oko soki, na babanga bomodingea na mahɔjɔ manenɛ.

⁵⁴Badaka oko na nduki emijo, bo bamodumbe a mojɔ moekina ebaeli ende.

Luka 12

Bileho biYesu

¹Bato bama titana kanga koto jinɛnɛ, na bambambaka bou. Yesu abanga boleha bacingami bande bo, Toma nganjamani na lipetu liBaPalusi, oko na bokosea bobu.

²Isa mokina mojɔ modi mokundamake, môkundoama; isa modi mobombamake, môboloa.

³Oko boa ngando jisusu jibalaka no a modidi jitɔndɔmɔ a bohu; jia jibalaka no na popoli a ndako tei, jitɔndɔmɔ a diko dibilitondo.

⁴Mbi natɔndɔkɔ no bina 'mbi bo, T'obangeni oko baya bawaka mokuku, na bakawa mokuku batabwana bokɔ mokina mojɔ motongo.

⁵Mbi ko nadi boneja no yona obwani na nu a bobanga; okina adi, na yo akawa, adi na ngulu a bodumba no a Gehena; mohangani yo. Ee, mbi natɔndɔkɔ no bo, Mobangani yo.

⁶Bobuno bodekɛ batano, te makota mabae? endele ko, Njambe atababosaka nongo mweka.

⁷Na ajebaka etango eswe jimelo minu. Oko boa yɛni bobanga; na no na dekɛ, ino onɔini dɛkɛ banenɛ na bobuno.

⁸Mbi natɔndɔkɔ no bo, Moto na moto yona ojimaka mbi a boso bobato, Mwana 'Moto âmojimabi yo a boso bobabwɛnji baNjambe.

⁹Moto ko akalona mbi a boso bobato, alonamabi yo mɛnɛ a boso bobabwɛnji baNjambe.

¹⁰Moto akalɔngɔ Mwana 'Moto, mojɔ momina mobwani bokinama; yona osambojaka Mwembo Mosɛnɔke ko na ebaeli ebe, atakinama nongo.

¹¹Bakagbula no a boso bomakita masinagogé na bakumu na basuku, pɛ bodani na mokakwano a mojɔ mobikenge bibosɔmbeja na bobala.

¹²Mojɔ bo Mwembo Mosɛnɔke modi bojebaja no bikenge bia bîbwana na nu a bobala a ehole emina.

Mondɛ Moegegele

¹³Okina moto yona odaka a tei elikita libato abala na Yesu bo, Mokoja, bala na mwangwa 'mbi bo akabe na mbi likwa.

¹⁴Iyo amosɔmbeja bo, Obakei mbi juji na mokabi onu nda?

¹⁵Abala koko na bato bo, Toma nganjamani; toma lonani bimboli bisusu, cina bo mohelo momoto mocingiti na lituna lileka lopeli yo.

¹⁶Abala na bu monde mu; Okina konji adaka na gbie jia jibotaka leka lonεnε.

¹⁷Oko boa, yo ale a molema monde bo, Ekɔ mbi ndeni? Esika etakaka na mbi a bodeja leka lombi.

¹⁸Na abala bo, Nadi bokɔ oko mojɔ mu; nâbuka ndako jidejaka na mbi leka; nâyoa jitongo jinεnεnε bo nadjae ndongo jimbi na leka lombi losusu oko ena.

¹⁹Nâsa ko nabale na mwembo mombi bo, Mwembo mombi, odejai leka lonεnε mεnε edεye. Lobwani na bianga binεnε; peta hema; yaka, mwaka, sasepeja.

²⁰Njambe ko abala na nde bo, Wε egegele! odi bosɔmbeja mwembo mowε oko na bulu bu; na leka lu losusu loselingoi wε lôdika na nda?

²¹Edi oko boa na moto yona ohεjεkε likonja a mojɔ monde mεnε pε, na adi na bokwali a miso maNjambe.

Bileho biYesu ai Bato Bande

²²Yesu abala na bacingami bande bo, A mojɔ momina, mbi natɔndɔkɔ no bo, T'odaeni oko na mokakwano a mojɔ momohelo monu, a mojɔ moboyaka, na mokuku, na bisenja bibolwa.

²³Na mohelo, na dia, mohelo modi mojɔ moboso. Na mokuku na bisenja, mokuku modi mojɔ moboso.

²⁴Anjani gɔgɔ; te banake gbie; te bajuake leka a gbie; bapeliti magasini, isa edejai. Njambe ko ababɔkɔkɔ; esingaiti no, baya banɔi mbulu na yumu bou mεnε.

²⁵Okina onu adi bokaeja boyai bonde ebɔ emɔci na mokakwano?

²⁶Oko boa, isa otahɔnɔkɔni bokɔ mokina mojɔ mokɛkɛlɛkε boa, okakwanakanî a mojɔ mongando jitongo cina eye?

²⁷Anjani manga maesika; te makɔke elomu; te mayoake bisenja; endeles ko, madi na bohohu bopele. Mbi natɔndɔkɔ no bo elwali eSɔlɔmɔ a ekumu ende esusu eibwana na elwali edanga dimɔci diesika.

²⁸Oko boa, isa Njambe alwajaka njienjie jia jidi a gbie busa bu, na jitumbama a mosa puma, esingaiti no, mo bato baejimeli ekɛkɛlɛkε!

²⁹Pε bosabasabani a mojɔ moboyaka na bomwaka. Pε bodani na mokakwano.

³⁰Bapakano bangondo esusu badukaka oko leka lomina. Sangwa'nu ko ajebaka bo obwanini boso leka lomina.

³¹Ino ko, peta dukani Bokumu boNjambe, ôsa ko oseni leka lu losusu pongono.

³²Yeni bobanga, bwela bokɛke, mojɔ bo mokano mopele moSangwa'nu modi bo ape no Bokumu

³³Ingɛjɛni leka lonu; kɔni matɔngi malikonja a mojɔ monu maya matagwa; selingoani likonja liyumu oho Diko lia litasia nongo, mojɔ bo mobi atabatama oho, na mosokoto pε bobeja.

³⁴Mojɔ bo molema mowε mosambi oko a esika edi likonja liwε liyumu.

³⁵Kandani njingo a mongo manu. Yojani pakı jinu.

³⁶Dani na ekɔmeli ebato bay a banjaka kumu obu yona odi a libonje lilihango bo ahule. Akamea na akaboma modipe, badi bodipoa ai yo bokpa.

³⁷Kumu aka'tana bakɔmeli bande misu a lihule linde, bakɔmeli bamina bâda na sepi. Mbi natɔndɔkɔ no na soti bo yo âlwa bisenja bielomu, âbadeja a mesa, na âdoa bo abape mia.

³⁸Akadoa na bulu tei, isa a kɔkɔ oboso, na aka'tana bakɔmeli bande na mongangele, bâda na sepi.

³⁹Pε bobosani mojɔ mu; Moswa 'ndako, akɔki yo jeba ehole ekanaka mobi bodoa, ka adaki na mongangele, na ajimiti bo moto aluse ndako ende.

⁴⁰Ino toma dani na moselingo pongono, mojɔ bo Mwana 'Moto âbutoa no bobutoa.

⁴¹Pεtelo abala bo, Kumu, monde mobali wε, obali a mojɔ mosu isa a mojɔ mobato basusu?

⁴²Kumu abala bo, Kumu akapa okina mokɔmeli onde oejimeli na bowεi kpaci ai bato bande basusu, bo abakabe mia libondo libondo a ehole yena ebwani;

⁴³na kumu onde akahula na akamotana a elomu emina, mokɔmeli omina âda na sepi.

⁴⁴Mbi natɔndɔkɔ no na soti bo adi bomopa kpaci a leka londe losusu.

⁴⁵Mokɔmeli omina ko akalε a molema monde bo, Kumu ombi atahula bwango; na akabanga botua bakɔmeli batongo, na bami na bali pongono, na boyaka na bomwaka na bolangoa,

⁴⁶kumu omokomeli omina adi bodoa bokina busa yana adi yo pε bomonja, a ehole edi yo pε bojeba, âmotua bou mεnε na amo'sa ta libondo libato bay a bapehti ejimeli.

⁴⁷Mokomeli yona ojebaka bolulea bokumu onde, pε ko boselingoa, pε bokɔ o apalaka kumu onde, adi botuama na bopipo mεnε.

⁴⁸Yona odi pε bojeba ko, na akakɔ mijɔ mia mibwani na nji, atatuama na bopipo. Bato bakapa moto leka lonεnε, badingaka bo badi boso leka lonεnε ai yo; na bakamopa leka lonεnε a mojɔ mobobanea, badi bobe a leka lonεnε ai yo.

⁴⁹Mbi nadoi bo natumbe mosa a ngondo. Posa embi edi oko bo mongoe.

⁵⁰Mbi ko nabwani bobatisama na ekina batisimo, na nadi na posa enεnε bo esie.

⁵¹Ino odingakani bo mbi nadoi bo napε bowi a ngondo? Pεpε, te nongo bowi, gbo oko bobɔtɔ; mbi mεnε natɔndɔkɔ no.

⁵²Bato batano bakada a ndako emɔci, bâbɔtɔnɔ; bato basato a elingi emɔci, na babae a elingi etongo, isa bato babae a elingi etnɔci, na basato a elingi etongo.

⁵³Bobɔtɔnɔ bomina bôda bo sango âlona mwana 'nde momi, na mwana-momi âlona sangwa 'nde; nango âlona mwana 'nde mwali, na mwana-mwali âlona ngwa 'nde; mwali âlona bokio bonde mwali, na mwali omina âlona bokio bonde mwali.

⁵⁴Yesu abala koko na emumu ebato bo, Okanεni bo eyembi emanı a dɔngɔ diwεseta, obalakani bokpa bo mbua adi ta busa; na modi oko boa.

⁵⁵Na okanεni bo pwea ehulaka a dɔngɔ disudo, obalakani bo moi modi momana mopipo; na modi oko boa.

⁵⁶Ino bakosei! Ocingeakani bimbete bibusa na bingondo, pε ko bocingea bimbete bimasu mama.

⁵⁷Otasambejakani mijɔ a tei emilema minu mojɔ moye, a bojeba njea esoti?

⁵⁸Isa moto adi na wε mojɔ, na okεke na nde a esambi, meka bosieja mojɔ monu oko a njea, asaka gbula wε a boso bojuji, na juji âpa wε a mɔmɔ makɔmisɛlɛ, na kɔmisɛlɛ âsa wε a blɔkɔ.

⁵⁹Mbi natɔndɔkɔ wε bo, Omiti sieja nongo ewε esusu mεnε, otamana nongo.

Luka 13

Mojɔ Mobohekoja Molema

¹Bakina bato badaka ena a ehole emina haya batɔndɔ Yesu mojɔ mobato baGalile. Pilato ama putoana makia mabu na makia matito babu bamasiko.

²Iyo abasombéja bo, Ino olékéni bo BaGalile bamina ban̄ BaGalile basusu na bobe, cina bo badingoa boa?

³Pépé nongo mweka; mbi ko natondök̄ no bo omiti hekojani milema minu, ôgwani no basusu oko boa.

⁴Ndako enené ekwa oho Siloa na ewa bato domi-na-bomwambe; ino olékéni bo bato bamina ban̄ bato basusu baYelusalema na bobe?

⁵Ngasa; mbi ko natondök̄ no bo omiti hekojani milema minu, ôgwani no basusu oko boa.

⁶Iyo abala na bu monde mu. Okina moto adaka na mole a gbie ende. Adoa yo a boduka mbuma a mole momina, aitana nongo mbuma.

⁷Abala na monjeli ogbie bo, Ika; mbi nadoaka ya edeye bianga bisato a boduka mbuma a mole momina, p̄e ko bone mbuma. Kwélé mole momina; modi ya a kp̄t̄oko edada p̄e.

⁸Iyo ko amosombéja bo, Kumu, kina modae koko yanga ye. Mbi nadi bolonga kp̄t̄o a esika emina, na nâsa daa.

⁹Isa modi mobota mbumba ngõnḡ? Momiti bota ko, odi bomokwélé.

Mwali Ahela a Yogo

¹⁰Yesu akojaka a sinagogue bokina busa boSabata.

¹¹Okina mwali adaka ena yona odaka na yogo emonio bianga domi-na-bomwambe. Adaka mongundubanake, na aihõn̄ bo'ma bojo.

¹²Yesu amon̄, amobea na abala na nde bo, Mwali, oheli a yogo ew̄.

¹³Abakea mɔmɔ mande ai mwali, na yo ama bojo bokpa, na asakoa Njambe.

¹⁴Mosuku osinagogue ko akénj̄oko bokénj̄, cina bo Yesu amoheleja a yogo a busa boSabata. Iyo abala na bato bo, Masu maelomu madi oko masamano. Doani a moj̄ mosengo a masu mamina, te a busa boSabata.

¹⁵Kumu amosombéja bo, Ino bakosei! Ino basusu otacingoakani ngõmb̄ na punda banu a ndako a busa boSabata, a bok̄ na bu a ediba?

¹⁶Oko boa, ebɔngiti bo mwali yoyo, yona odi mwana oAbalayama, acingoame a monyɔl̄ momina? Moj̄ bo adaka a mbɔci ji Satana bianga domi-na-bomwambe.

¹⁷Abala yo boa, soki jinde basamboa basusu. Bato basusu ko bangando basepa a moj̄ momindumba misusu mikɔk̄ yo.

Mind̄ Mitongo

¹⁸Yesu abala koko bo, Bokumu boNjambe bodi o bo? Nadi bongε Bokumu boNjambe na ye?

¹⁹Modi o mongua mobojio mεnε. Okina moto amotomba na amona a gbie ende. Mongua mots na mohε mole monεnε, na mbulu badiko bakɔ mobo mabu a bitape bimole momina.

²⁰Abala koko bo, Mbi nadi bongε Bokumu boNjambe na ye?

²¹Bodi o lipetu litomba mwali; ali'sa ta eseи yena edaka na farini sanga jisato, na farini esusu ebongoa lipetu.

Modipe Mokototake

²²Yesu akoja a ngando jinεnεnε na ngando jikεkε jia jidaka a njea ende, yana akε yo a njea eYelusalema.

²³Okina moto abala na nde bo, Kumu, badi bohela oko bakina bato pε?

²⁴Iyo abala na bu bo, Koni na ngulu enu esusu bo okweeni a modipe mokototake. Mojɔ bo mbi natɔndɔkɔ no bo bato banεnε badi bokenga bokwea ena, na batabɔnɔ bokwea.

²⁵Moswa 'ndako akango, na akadipa modipe, ino ôdikani oko sokolu, na ôbangani boboma modipe. Ôbalani bo, Kumu, dipoa ai so. Iyo ko âsɔmbeja no bo, Mbi mtajebaka no isa esika ehuli no.

²⁶Oko boa, ôbangani bobala bo, Iso boyaka na bomwaka na wε a esika emɔci. Wε otɔndo mwako a macilinga masu.

²⁷Iyo ko âsɔmbeja bo, Mbi natɔndɔkɔ no bo nitajebaka nongo esika ehuli no. Dongani ai mbi ino basusu baya bakɔkɔ bobe.

²⁸Okanεni Abalayama, na Isaka, na Yakobo, na batɔndɔi basusu, a tei eBokumu boNjambe, yana âdumbama no bεnε sokolu, ôyeani bio, na ôdani na bokpεkρεnε bomino oho.

²⁹Bato hadi bodonga a dɔngɔ diɛsɛta na wɛsɛta, a pamba enɔdɔ, na pamba esudo, a boda a bidie bibu a Bokumu boNjambe.

³⁰Hokeani ko! Bakina baya badi oko ngɔngɔ bâdaboso, na bakina baya badi boso bâda oko ngɔngɔ.

³¹Bakina BaPalusi badoa a ehole emina, na babala na Yesu bo, Donga ya, kε a esika etongo, mojɔ bo Elode apalaka awoe wε.

³²Iyo abasɔmbeja bo, Kεni atɔndɔe mosɔlɔ omina bo mbi namejaka miembo mibe, nahelejaka bato a bego busa bu na puma; nadi bomaja ko a busa bomasato.

³³Ebɔngi ko bo nadale busa bu, na puma, na puma-sene; moj bo motɔndɔi abwani bogwa oko a Yelusalema, te nongo a esika etongo.

³⁴Ee Yelusalema! Yelusalema! Owakani batɔndɔi, na olakani bato matai baya badoaka na bwɛnji ai no. Mbi nadaka na posa bihole binɛnɛ bo nabolee bana banu, o aboleaka kɔkɔ bana bande bo babolame a cina jimapapulapu mande, ino ko oipalakani.

³⁵Edεye ko, ndako enu edikai mokpata. Mbi natɔndɔkɔ no bo otanɛni mbi koko, oko adi no pε bopeta bala bo, Bojongoa ai yona odoaka a kombe eKumu.

Luka 14

Yesu a Ndako eMoPalusi

¹Yesu ake a ndako emosuku omɔci oBaPalusi bokina busa boSabata, a moj moboyaka, na BaPalusi bamonjaka na bopipo.

²Okina momi adaka a boso bonde yona oma kɔnɔ ngbungbuma.

³Yesu ahɔjɔ hakoja baMibeko na BaPalusi bo, Mibeko mijimaka bo bosengoe a busa boSabata, isa mitajimaka?

⁴Ibo badaka oko bogo. Oko boa, Yesu aheleja moto omina a yogo ende, na amoyaneja.

⁵Abala koko na bu bo, Okina onu akada na punda isa ngɔmbɔ; na akakwa a mombɔndɔ, otamoduboja bokpa a busa boSabata?

⁶Ibo ko badaka oko bogo, pε bosɔmbeja nongo ekenge.

⁷Yesu anɛ bo bato baya badaka ena a boyaka bahɔkɔ bidie biekumu. Oko boa, abala monde mu a moj mobu.

⁸Abala bo, Moto akabea wε a libonje lilihango, pε boda nongo a esika eekumu, asaka bea okina otongo yona odi boso bowε.

⁹Moj bo, yona obea wε adi bodoa, âbala na wε bo, Kinea moto yo esika ye; na wε odi bokε a edie esuka, oko na sɔni.

¹⁰Bakabea wε, kε adae a esika esuka mɛnɛ. Oko boa, moto yona obea wε akakwea, adi bobala na wε bo, Moninga, nɔ oho boso; na wε odi boso ekumu a boso bobato basusu baya badi na wε a mesa.

¹¹Moj bo moto na moto yona osakumejaka, âsamboa. Yona ko osatitejaka, âsɔ ekumu.

¹²Yesu abala koko na moto yona omobea a boyaka bo, Okaselingoa libonje a ehole emidi, isa a ehole emɔkɔ, t'obee oko binao, na banangwao, na mela mawε,

na mituteano miwε, baya badi na likonja linεnε, baya babwani bobea wε bo bakεe wε monganji o akɔ wε na bu.

¹³Okaselingoa libonje, bea bato babokwali, bato baya badi na biεmε, bato bamitεngu, na bato bamiso mago.

¹⁴Oko boa ôda na bojongoa, mojɔ bo bato bamina bapeliti eka ebosɔmbeja ai wε. We ko ôssɔ ndese ewε yana ângɔ babodongo a bogwa.

¹⁵Okina obu yona odaka na nde a mesa, yana aka yo mojɔ momina, abala na Yesu bo, Moto akayaka molembε a Bokumu boNjambe âda na bojongoa.

¹⁶Iyo amosɔmbeja bo, Okina moto akalea libonje linεnε, na abea bato banεnε.

¹⁷Yana abwana libonje, aloma monɔkɔ na mobuli onde ai bato babea yo. Abala bo, Doani, mojɔ bo leka losusu lobwani edεye.

¹⁸Ibo basusu ko babanga botata mikalo. Yona oboso abala na nde bo, Mbi nasombi gbie. Ebɔngi bo nakεe naenje. Nangaka wε bo okine mbi nadae.

¹⁹Okina otongo abala bo, Mbi nasombi ngɔmbɔ domi. Nakεkε bo nabakokelejae; nangaka wε bo okine mbi nadae.

²⁰Okina otongo abala bo, Mbi nalongani na mwali. A mojɔ momina, mbi nitahɔnɔ bodoa.

²¹Ahula mobuli, atɔndɔ moswa'nde mijɔ mimina. Moswa 'ndako akεnɔ. Abala na mobuli onde bo, Kε bokpa a macilinga na a njea jingando; hula jɔno na bato babokwali, bato babiεmε, bato baya bagwa miso, na bato bamitεngu.

²²Yana abala mobuli na moswa'nde bo, Kumu, mbi nakɔi o ami wε bala, na bisika bidi oko ngasa.

²³Moswa 'ndako abala na mobuli bo, Kε oho a njea emokεngε, na a njea jigbie. Kɔ na bopipo bo bato badoe a bolumeja ndako embi boto.

²⁴Mojɔ bo mbi natɔndɔkɔ no bo bato babea mbi boso batayaka nongo eka elibonje limbi, pεpε nongo omɔci.

Mojɔ Mobosusa Yesu

²⁵Bato bapakaka Yesu a njea banεnε mεnε. Iyo ahekua, abala na bu bo,

²⁶Moto akadoa ai mbi, pε bopeta lona sango, na nango, na bana, na bananango, na ngεnε, ee, na mohelo monde mεnε pongono, moto omina atabɔngɔ bo adae mocingami ombi.

²⁷Moto amiti tomba mole-mobokea monde a bocingama na mbi, atabɔngɔ bo adae mocingami ombi.

²⁸Okina onu akakana ndako bopika, atapeta da na mobondo a bolanga bobuno bomina, bo ajebe isa likonja linde lidi bobwana a bomaja elomu endako esusu?

²⁹Mojo bo, akatandea elomu pε ko bohɔnɔ hoesieja, bato basusu bay a banεkε mojo momina badi bomosεkε.

³⁰Badi bobala bo, Moto omina abanga boyoa, aihɔnɔ ko bosieja elomu.

³¹Okina kumu yona odi na bato koto domi, akakana bila na kumu otongo yona odi na bato koto licinda, atapetada na mobondo bo alεe mojo, a bojeba isa adi bohɔnɔ bila na kumu yona otongo yona odi na bato koto licinda, na yo mεnε oko bato koto domi pε?

³²Isa atahɔnɔ, adi boloma bato na bwεnji ai yona otongo yana adi yo oko bohali, bo babakee mokongo mobosiili.

³³Edi oko boa na nu pongono; moto amiti lona leka londe losusu, atabɔngɔ bo adae mocingami ombi.

³⁴Mukwa modi eka epele. Mokapɔ ko, modi bobɔngɔ koko na ye?

³⁵Moditi nongo mopele a mojo mogbie, isa a mojo modaa egbie. Bato bamodumbaka oko bodumba. Moto yona odi na matoi manjoki, yε ahokee.

Luka 15

Mondε moBata Yona Olaboa

¹Baputeja batako na bato babikɔmεli bibe babatama na Yesu hulelu bo bamohokee.

²BaPalusi na basɔni ko banungu-bana. Babala bo, Moto yoyo asɔkɔ bato babe na sepi, na ayakaka na bu a esika emɔci.

³A mojo momina, Yesu abala na bu monde mu.

⁴Okina moto onu akada na bata mokama, na omɔci akabunga na nde, atakina bata domi-libwa na libwa a lisobe bo akεe nduki ebata yona obungi, oko a ehole êmoboloja yo?

⁵Akamoboloja, adi bomobakea a malɔkulɔku mande na sepi.

⁶Akamea a ndako ende, âbea bma'nde na mituteano minde, âbala na bu bo, Sepani na mbi, mojo bo nabolojai bata ombi yona odaka mobungake.

⁷Mbi natɔndɔkɔ no bo, Sepi êda koko boa oho Diko a mojo momoto omɔci mobe yona ohekojaka molema monde. Sepi emina edi bonɔ sepi a mojo mobato babodongo domi-libwa na libwa bay a baditi bohekoja milema mibu.

Mondε moLikonja Lia Libunga

⁸Isa okina mwali adi na likonja, pata domi, na emoci ekabunga na nde, atayoja paka a bo'mbo ndako a boduka na bingi oko a ehole êboloja yo pata emina?

⁹Akaeboloja, adi bobea bina'nde na mituteano minde, na âbala na bu bo, Sepani na mbi, mojɔ bo nabolojai pata yena ebungi na mbi.

¹⁰Mbi natɔndɔkɔ no bo sepi edi koko boa a tei ebabwɛnji baNjambe a mojɔ momoto omɔci mobe yona ohekojaka molema monde.

Monde moMwana Ongɔngɔ

¹¹Abala koko bo, Okina momi adaka na bana-bami babae.

¹²Yona ongɔngɔ abala na sangwa'nde bo, Sesa, pani libondo lilikonja libwani mbi bosangoa. Sangwa'bu akaba leka londe losusu, na abapa libondo-libondo.

¹³Ama nɔ makina masu, mwana ongɔngɔ ami tomba oko leka londe losusu, ake a ekina esika bohali mɛnɛ, na anameja likonja linde lisusu oho na bikɔmeli bibe.

¹⁴Ama yo sieja likonja linde kanga lisusu mɛnɛ, linjale linɛnɛ limi doa oko a esika emina, na yo abanga boda na taka.

¹⁵Oko boa ake acingame na moto omɔci ongando emina, na yo amoloma a gbie jinde a bopa ngulube boyaka.

¹⁶Iyo adaka na posa bo agole na leka loyakaka ngulube; pɛpɛ nongo moto ko omopa eka.

¹⁷Yana ale yo a molema monde, abala bo, Sangwa'mbi adi na basali banɛnɛ. Ibo te bahɔnɔke boyaka milɛmbɛ mibu misusu; mbi ko nagwi nja a esika yeye!

¹⁸Mbi nadi bongɔ; nâkε oko ai sangwa'mbi; nâbala na nde bo, Sesa, mbi nakɔi bobe a boso boNjambe na a boso bowɛ.

¹⁹Nitabɔngɔ koko bo nadae na kombe emwana owɛ. Kina nadae o mosali owɛ omɔci.

²⁰Oko boa yo angɔ, na ahula ai sangwa'nde. Sangwa'nde ko amonɛ yana adaka yo oko bohali. Amokea wa, apota ebango, amodinga lilɔbɔ, na amohia.

²¹Mwana abala na nde bo, Sesa, mbi nakɔi bobe a boso boNjambe na a boso bowɛ. Nitabɔngɔ koko bo nadae na kombe emwana owɛ.

²²Sangwa'nde ko abala na babuli bande bo, lmejani bokpa kasaka eyai yena enɔi na bomwenga, molwajani. Mo'sani pɛtɛ a mosapi; molwajani sapata a mako.

²³Doani na mwana-ŋɔmbɔ mojukamake, mowani. Kinani so boyake na bodae na sepi.

²⁴Mojo bo mwana yoyo ombi yona odaka mogwake, adi koko mo; adaka mobungake, na aboloi. Oko boa babanga bosepa.

²⁵Mwana'nde momi, mwana-sɔmi, adaka a gbie. Yana ahulaka yo, amea hulelu na ndako, na aka moliki na bobua bongɔmɔ.

²⁶Abea okina mosali, na amobɔjɔ cina emina.

²⁷Iyo abala na nde bo, Mwangwao ahuli. Sangwao awoi mwana-ngɔmbɔ mojukamake mojo bo amosi bopele.

²⁸Mwana omina akɛnɔjɔ na alona bokwea. Sangwa'nde amana, na amongɔɔnɔ bo akwee.

²⁹Iyo ko asɔmbeja sangwa'nde bo, Ika! Mbi nakɔmɛkɛ wε edεye bianga binεnε. Naisopa nongo mobeko mowε; wε ko opakini mbinongo mwana-kambeli bo nasepe na bma'mbi.

³⁰Ahuli ko mwana yo owe, yona onamejai likonja liwε na bali balisɔngi, omowei mwana-ngɔmbɔ mojukamake.

³¹Sangwa'nde amosɔmbeja bo, Mwana'mbi; wε odi na mbi na bosusu; leka lombi losusu lodi oko ai wε.

³²Ebɔngi ko bo boda na sepi na elɛndε, mojo bo yo mwangwao yona odaka mogwake, adi koko mo; adaka mobungake, na aboloi.

Luka 16

Mondε moKapita Mobe

¹Yesu abala koko na bacingami bande bo, Okina konji omɔci adaka na kapita, na bato bamotɔndɔ bo kapita omina abungejaka likonja linde.

²Iyo amobea, abala na nde bo, Mojo mokaka mbi mowε modi bo? Sɔmbeja mikanda mielomu ewε ekapita, mojo bo obwaniti boda koko kapita.

³Kapita ale bo, Mbi nakɔ boni? Moswa'mbi adongejaka mbi a elomu ekapita. Naditi na ngulu enεnε a mojo moelomu egbie. Nadi boda na sɔni a bo'mba yambo.

⁴Mbi ko najimi bo nakɔe mokina mojo, bo bato base mbi a ndako jibu yana âdonga mbi a elomu ye ekapita.

⁵Oko boa, abea bato bay a badaka na nongo ai moswa'nde. Abala na yona oboso bo, Nongo ewε ai moswa'mbi edi bo?

⁶Iyo asɔmbeja bo, Bisuku biminε mokama. Kapita abala na nde bo, Tomba mokanda monongo ewε, da ya, sɔnɔ domi-itano bokpa.

⁷Abala na otongo bo, Nongo ewε edi bo? Iyo asombaja bo, Saki jindongo mokama. Kapita abala na nde bo, Tomba mokanda mowε monongo, sɔnɔ domi-bomwambe.

⁸Kumu okapita mobe amosakoa a mojɔ mobowei bonde. Mojɔ bo, bana bangondo ye banɔi bana babohu na bowei a mojɔ mongando jibu.

⁹Mbi natɔndɔkɔ no bo, Bolojani babinao na likonja linu, nongo likada eka ebe, Oko boa likataka na nu, badi bosɔ no a ndako jibu na bosusu.

¹⁰Moto akada bojo a ngando jikɛkɛ, adi boda koko bojo a ngando jimɛnɛnɛ. Moto ko akakosea a ngando jikɛkɛ, adi bokosea koko a ngando jinɛnɛnɛ.

¹¹Oko boa, isa oditini bojo a mojɔ molikonja lingondo, odi bokina likonja lisoti a mɔmɔ manu nda?

¹²Isa oditini bojɔ a mojɔ moleka lomoto otongo, odi bopa no leka a mojɔ monu bɛnɛ nda?

¹³Mosali t'ajebake bokɔmɛ baswa babae. Adi bolona okina, na âpala yona otongo, isa adi boda na lisuma ai okina, na asetoja yona otongo. Otahɔnɔkɔni bokɔmɛ Njambe na likonja pongono.

¹⁴BaPalusi badaka na posa elikonja bou mɛnɛ. Yana aka bo mijɔ mi misusu, basɛkɛ Yesu oko bosekɛ.

¹⁵Iyo ko abala na bu bo, Ino odukakani lilonga a boso bobato. Njambe ko ajebaka milema minu. Gina bo, mojɔ mua modi na ekumu a miso mabato mokɔkɔ Njambe maneene.

¹⁶Ehole eMibeko na batɔndɔi esia oko na Yoane. Babanga botɔndɔ Mwako Mopele moBokumu boNjambe ngɔngɔ jimina, na bato basusu bakɔkɔ na bopipo bo bakwee ena.

¹⁷Endele ko, pεpε nongo litɔnɔ limɔci liMibeko lidi bogwa; Diko na nase jidi bopeta dimoa.

¹⁸Moto akayaneja mwali onde, na akasɔ okina otongo, angɛkɛ na nde bɔɔli. Na moto yona osɔkɔ mwali oma yo yaneja, angɛkɛ na nde bɔɔli pongono.

Lazalo na Konji

¹⁹Okina momi adaka konji. Elwaeli ende esusu edaka oko bisenja bibobuno bonɛnɛ bikpetu na bipu. Ayakaka leka lonɛnɛ lopele tu busa na busa.

²⁰Okina momi obokwali, kombe ende Lazalo, adaka asambi a monɔkɔ mondako emoto omina. Mokuku monde mosusu modaka oko pola pε.

²¹Iyo adaka oko na posa bo ayake bikenge bileka lua lokwaka a mesa makonji omina. Mbwa badoaka a bolepɔ pola jinde.

²²Moto obokwali agwa, na babwənji baDiko bamotomba oko a bupa boAbalayama. Konji agwa pongono, na bamopusea.

²³Adaka yo na mwano monənə a Seolo, yo akahoа miso diko, ane Abalayama oko bohali, na Lazalo a bupa bonde.

²⁴Abekoa bo, Tata Abalayama, ikeani wa! Loma Lazalo bo adubee sɔngɔ emosapi monde ta madiba a bogɔmbeja yemi embi, mojɔ bo nakaka mwano monənə a tei emosa mu.

²⁵Abalayama ko amosɔmbeja bo, Mwana, t'obosae oko bo wε ossɔ libondo liwε lipele yana adaka wε a ngondo; Lazalo ko asɔ oko libondo libe. Edεye ko yo adi na sepi ya, na wε odi na monɔngɔ.

²⁶Mokina mojɔ motongo,—mombɔndɔ monənə mənə modi a sibano esu na nu. A mojɔ momina, nongo bato bakapala bodonga ya a boke ai no, batanε njea. Na pεpε nongo moto odi bodonga oho a bodoa ai so.

²⁷Iyo ko abala bo, Sesa, ekada boa, mbi nangɔɔnɔkɔ wε bo olome Lazalo a ndako esangwa'mbi

²⁸a bolekea banangwa'mbi bo basaka doa koko a esika ye emwano; mojɔ bo banangwa'mbi badi batano.

²⁹Abalayama abala bo, Badi na Mose na batɔndɔi; yε babahokee.

³⁰Iyo ko asɔmbeja bo, Pεpε, sesa Abalayama; okina obagwake ko akakε ai bo, badi bohekoja milema mibu.

³¹Abalayama abala na nde bo, Bamiti hokea Mose na batɔndɔi, batajima, nongo okina obagwake akango.

Luka 17

Mabaku, Ejimeli, Elomu

¹Yesu abala na bacingami bande bo, Mabaku matakputoa boda a njea. Monɔngɔ ko ai yona osakejaka otongo!

²Moto akasakeja okina obana ba bakεkεlεkε, bopele bo bacingee litai linεnε a dɔli linde bo bamodumbe a madiba mambεngε.

³Toma nganjamani na bikɔmeli binu bεnε. Mwangwao akakɔ bobε, moleha. Akahekoja molema monde, moyε.

⁴Na akakɔ bobε ai wε mεnε bihole sambo a busa bomɔci, na akadoa ai wε bihole sambo a bobala bo, Mbi nadi na dosa; toma moyε.

⁵Babwənji babala na Kumubo, Hεjε ejimeli esu.

⁶Kumu abala bo, Akoki no da na ejimeli ekékéléké, o adi mongua mongbenji, ka obalini na mole mu bo, Sabikoa, kę asapike a madiba mamukwa, na modi bosuma no.

⁷Okina onu akada na mobuli yona olongeaka gbie isa abaneaka bata, na akahula a gbie, adi bobala na mobuli bo, Doa bokpa a mojɔ moboyaka?

⁸Atabala na nde bo, Kalea mia mambi; lwa bisenja biwε; kɔmε mbi. Nakasieja boyaka na bomwaka wε ôywaka na ômwaka ngɔngɔ?

⁹Adi bosakoa mobuli onde mojɔ bo akɔi mua mobali yo na nde?

¹⁰Ino koko boa; omaka kɔni mijɔ misusu o asɔ no monɔkɔ, balani bo, Iso bodi oko babuli, pɛpɛ boso likonja; bokɔi oko elomu yena abwani na su a bokɔ.

Bato Bamaba Domi

¹¹Yana akéké Yesu a Yelusalema, njea ende edaka a sibano eSamalia na Galile.

¹²Akweaka yo a ekina ngando, asongana na bato bamaba domi. Ibo bama bohali mweka

¹³na babekoa bo, Yesu, Kumu, ike a so wa.

¹⁴Yana anε yo bato bamina, abala na bu bo, Kεni asanejae ai nganga. Amaka bo kε a njea, ba'mi hela oko hohela.

¹⁵Okina obu omɔci, yana anε yo bo yogo ende esia, ahula na asakoa Njambe na bopipo.

¹⁶Asadumba a bibota biYesu, boso bonde oko a kpɔtɔ, na amosakoa. Moto omina adaka moto oSamalia.

¹⁷Yesu amosɔmbeja bo, Baheli, te bato domi? Ibo batongo libwa badi jo?

¹⁸Pɛpɛ nongo okina obu ohuli a bosakoa Njambe, oko yo modoa pε?

¹⁹Yesu abala na nde bo, Angɔ, yana a njea ewε; ejimeli ewε ehelejai wε.

Bodoa boMwana 'Moto

²⁰BaPalusi bahɔjɔ Yesu a mojɔ mobodoa boBokumu boNjambe. Iyo abasɔmbeja bo, Bodoa boBokumu boNjambe boditi na bimbete binɛkε bato na miso.

²¹Bato batabala bo, Anjani, bodi bobo! isa, Bodj jɔno! Mojɔ bo Bokumu boNjambe bodi a tei enu.

²²Yesu abala na bacingami bande bo, A masu mangɔngɔ, ino ôdani na posa a bone busa bomɔci boMwana 'Moto, na ôtabonəni.

²³Badi bobala na nu bo, Anjani, adi oho, isa, Anjani adi jɔno. Pε bokeni, pε bobasusani;

²⁴mojɔ bo bodoa boMwana 'Moto bôda o mokalimo. Mokalimo mokamana a dɔngɔ dimɔci dibusa, mohojaka dɔngɔ ditongo pongono; Mwana 'Moto âda koko boa a busa bonde.

²⁵Iyo ko adi bopeta dingoa bou, na bato baelulu ye badi bomolona.

²⁶Ekɔmeli yena edaka a masu maNoa, ôda koko boa a masu maMwana 'Moto.

²⁷Bato bayakaka na bamwakaka, basɔkɔ bali na bahangaka hali ta meki, oko a busa botamba Noa ta masua yana adoa pela, na basia likinda.

²⁸Modaka koko boa a masu maLoto; bayakaka na bamwakaka, basombaka na bangejɛkɛ leka, banaka gbie na bapikaka ndako.

²⁹Yana ko adonga Loto a Sɔdɔmɔ, mosa mohula Diko o ekɔmeli embua, na sufulu pongono, na mobawa kanga basusu a busa bomina.

³⁰Modi boda koko boa a busa bôboloa Mwana 'Moto.

³¹Isa moto adi a diko dindako a busa bomina, abwaniti botita a botomba leka londe lua lodi a ndako tei; moto yona odi ta gbie koko boa, abwaniti bosɔmbɔ.

³²T'obosaeni oko mwali oLoto.

³³Moto yona okengaka bobanea mohelo monde adi bomobungeja, na yona obungejaka mohelo monde adi bomohanea.

³⁴Mbi natɔndɔkɔ no bo bato babae badi boda a gbagba emɔci a bulu bomina; okina âtombama, yona otongo âdika.

³⁵Bali babae badi boda a elomu endongo bonda; okina âtombama, otongo adika.

³⁶Bami babae badi boda a gbie; okina âtombama, otongo âdika.

³⁷Bacingami bahɔjɔ Yesu bo, Jɔni, Kumu? Iyo abasɔmbeja bo, Miambenga batitanaka oko a esika edi ekuulu.

Luka 18

Mondɛ Mojuji Mobe

¹Yesu abala na bu mokina mondɛ. Cina emondɛ momina edi bo bato babwani bonga bihole bisusu, pε nongo bongwa.

²Abala bo, Juji omɔci adaka a ekina ngando. Iyo aibanga Njambo, na aidaka na lisuma ai bato batongo.

³Okina mwali-obogwa adaka a ngando emina, na yo akɛkɛ ai juji mandeli-mandeli; abalaka na nde bo, Longeja mbi na mojɔ mombi na soki embi.

⁴Juji alona ekoka. Iyo ko ale ngongo bo, Mbi mtabangaka nongo Njambe; naditi nongo na lisuma ai okina moto.

⁵Mwali yo ko apukejaka mbi; bopele bo namolongejae. Namiti kɔ̄ boa, adi bobeja molema mombi na bodoa bonde bihole bisusu.

⁶Kumu abala bo, Hokeani mojɔ̄ mobalaka juji mobe.

⁷Njambe ko? iyo atalongeja bato bande mɛnɛ bayamongoɔ̄nɔ̄kɔ̄ na bopipo na bulu na moi? Adi boyeyoa a bobakɔ̄meja?

⁸Mbi natɔ̄ndɔ̄kɔ̄ no bo adi bobalongeja bokpa mɛnɛ. Endelesko, Mwana 'Moto akadoa, âtana ejimeli a ngondo?

MoPalusi na Moto Otako

⁹Abala koko monde mu na bakina bato bayabadingaka bo badi bato babodongo na banyamoaka bato batongo.

¹⁰Abala bo, Bakina bato babae bakes a tempelo bo ba'nge Njambe. Okina adaka MoPalusi, yona otongo moputeja otako.

¹¹MoPalusi angɔ̄, anga a tei ende na bikenge bi, Njambe, mbi nasakoaka wɛ cina bo mbi naditi na ekɔ̄meli ebato batongo. Ibo badi bato bambengea, bato babokosea, bato babɔ̄oli; na so na moputeja yona otako, bosangiti nongo.

¹²Mbi nakiaka mia tu yenga bihole bibae. Napaka bipeeli, libondo lidomi likonja lisusu lisɔ̄kɔ̄ mbi.

¹³Moputeja otako ko ama bohali; aipala bokahoa miso mande diko; aboma bupa bonde na abala bo, Njambe, ikeani wa, mbi moto mobe!

¹⁴Mbi natɔ̄ndɔ̄kɔ̄ no bo yo ayana a ndako ende na lilonga, te nongo yona otongo. Mojɔ̄ bo moto na moto yona osakumejaka, âsamboa; yona ko osatitejaka âsɔ̄ ekumu.

Yesu na Bana Bakεkεlεkε

¹⁵Badoa ai yo na bana bakεkεlεkε bo ababakee mɔ̄mɔ̄ mande. Yana anɛ bacingami mojɔ̄ momina, balemoa na bu.

¹⁶Yesu ko ababea ai yo; abala bo, Kinani bana bakεkεlεkε badoe ai mbi; yɛni bobalemba, cina bo Bokumu boNjambe bodi oko ai bato bayabadi o bana ba.

¹⁷Mbi natɔ̄ndɔ̄kɔ̄ no na soti bo, moto amiti sɔ̄ Bokumu boNjambe na ekɔ̄meli emwana mokekεlεkε, atakwea nongo ena.

Yesu na Lihɔ̄jɔ̄ Limoto

¹⁸Okina kumu ahɔ̄jɔ̄ Yesu bo, Mokoja mopele, êkɔ̄ mbi ndeni bo nasangoe bomɔ̄ bua bodi na bosusu?

¹⁹Yesu amosɔmbeja bo, Obeaka mbi mopele mojɔ moye? Pερε nongo omɔci odi mopele, oko Njambe pε.

²⁰Ojebaka mibeko; T'ongee oko bɔɔli; T'owoe oko; T'obe oko; T'otate oko etateli ebokosea; Toma suma sangwao na ngwao.

²¹Iyo abala bo, Mbi namisumaka misusu, donga oko a bwɛngɛ bombi.

²²Aka Yesu ekenge emina, abala na nde bo, Mojɔ motaki na wε oko momɔci pε. Peta'ngɛjɛ Ieka lowε losusu, pa likonja limina ai bato babokwali, bo okonje leka lonɛnɛ loyumu oho Diko; osa ko odoe a bocingama na mbi.

²³Aka yo mojɔ momina, aka wa enɛnɛ a molema, mojɔ bo adaka na likonja linɛnɛ mɛnɛ.

²⁴Yesu amonja na abala bo, Bato balikonja badi bokwea a Bokumu boNjambe oko na kpɔkɔsɔ.

²⁵Na bokwea bokonji a Bokumu boNjambe, na bokwea bokamela a diso ditonga, bokwea bokonji a Bokumu bo-Njambe bonɔi na kpɔkɔsɔ.

²⁶Bay a baka mojɔ momina babala bo, Oko boa, odi bohela nda?

²⁷Yesu asɔmbeja bo, Njambe abwani bokɔ ngando jmina, bato ko pε bobwana nongo.

²⁸Petelo abala bo, Ika, so bokini leka losu losusu bo bocingame na wε.

²⁹Iyo abala na bu bo, Mbi natɔndɔkɔ no na soti bo, moto na moto yona okini isa ndako, isa mwali, isa bananango, isa baboti, isa bana, a mojɔ moBokumu boNjambe,

³⁰atakputoa bosɔ libondo lia linɔi na bopele a ngondo ye, na bomɔ bua bodi na bosusu a ngondo yena ebodoa.

Yesu Abala a Mojɔ Mobogwa Bonde

³¹Yesu abea bacingami domi-na-babae, abala na bu bo, Anjani, iso bokɛkɛ edɛye a Yelusalema, na ngando jisusu jisɔnɔ batɔndɔi a mojɔ moMwana 'Moto jidi bongama.

³²Mojɔ bo âkabama a mɔmɔ mabapakano; bâmotangola, bâmosamboja, bâmotuea masɔi,

³³bâmotua nji, na bamowa; yo ko angɔ na masu masato.

³⁴Ibo ko baicingea mijɔ mimina; bainε nongo cina eekenge emina, na baisipoa mojɔ mobala yo.

Moto Ogwa Miso Ahela

³⁵Abatama yo na Yeliko, okina moto omiso mago adaka na mobondo a dɔ̃ngɔ dinjea a bo'mba yambo.

³⁶Iyo aka bato banεnε bakane, na ahɔjɔ cina emina.

³⁷Bato bamotɔndɔ bo Yesu oNasaleta akεkε anɔe.

³⁸Iyo abekoa bo, Yesu, Mwana 'Dawidi, ikeani wa!

³⁹Bay a badalaka boso balemoa na nde, bamotɔndɔ bo adae bogo. Iyo ko ahεjε bingi, na abekoa na bopipo bo, Wε Mwana 'Dawidi, ikeani wa!

⁴⁰Yesu ama, abatɔndɔ bo badoe na nde. Yana abatama yo hulelu, Yesu amohɔjɔ ho,

⁴¹Epalaka wε bo nakɔe ai wε nda? Iyo asɔmbeja bo, Kumu, kina nase koko njεnε embi.

⁴²Yesu abala na nde bo, Asɔ njεnε ewε. Ejimeli ewε ehelejai wε.

⁴³Iyo asɔ njεnε ende bokpa, acingama na Yesu, na abanga bokumeja Njambe. Bato basusu baya banε mojɔ momina basakoa Njambe pongono.

Luka 19

Yesu na Sakayo

¹Yesu amea a Yeliko, na yana anɔkɔ yo a licilinga,

²okina momi adaka ena, kombe ende Sakayo. Iyo adaka mosuku oelomu etako, moto olikonja linεnε.

³Iyo adaka na posa a bone Yesu; aihɔnɔ ko, mojɔ ho adaka moto mokue, na embamba ebato edaka enεnε.

⁴Oko boa apota ebango, akε boso, na awea mokina mole bo anεe Yesu, mojɔ bo Yesu akεkε anɔe a njea emina.

⁵Yana amea Yesu a esika emina, akaho miso diko, na abala na Sakayo bo, Sakayo, tita bokpa, mojɔ bo mbi napalaka nadae a ndako ewε busa bu.

⁶Sakayo atita bokpa, na asɔ Yesu na sepi enεnε.

⁷Bato ko, yana anε bo mojɔ momina, babanga bobala na manungunungu bo, Akεi a boda a ndako emoto mobe!

⁸Sakayo ko ama; abala na Kumu bo, Kumu, ika; mbi nadi bokaba leka lombi mabondo mabae, na nāpa likina ai bato babokwali. Isa natombi eka emoto na bokosea, nāmosɔmbeja leka lonei.

⁹Yesu abala na nde bo, Mohelo modoi a ndako ye busa bu, mojɔ bo yo adi koko mwana oAbalayama.

¹⁰Mojɔ bo Mwana 'Moto adoi a boduka na boheleja yona odaka mobungake.

Mondɛ Mopata Koto

¹¹Ahokeaka bato ngando jimina, Yesu abanga bobatɔndɔ mondɛ motongo, cina bo abengeaka Yelusalema, na bato badaka na njingo bo Bokumu boNjambe bodi bodoa bokpa.

¹²Abala bo, Okina moto odenga dikumu akɛ bohali a likota litongo, a bosɔ bokumu oho, na sako ebohula.

¹³Abea babuli bande, na akaba na bu pata koto emɔci. Abala na bu bo, Kɔni masa na likonja di oko a lihule limbi.

¹⁴Bato bande ko badaka na nde soki, na baloma bwɛnji ngɔngɔ jinde bo, Iso botapalaka bo moto yo adae kumu osu.

¹⁵Yana asɔ yobokumu, ahula na abea babuli baya bama sɔ likonja linde, bo awoke-lejae mojɔ momasa mabu.

¹⁶Yona oboso adoa ai yo, abala bo, Kumu, likonja liwɛ, pata mokama, lihɛi na pata koto emɔci.

¹⁷Iyo abala bo, Bopele; wɛ mobuli mopele. Wɛ olongi na mojɔ mokɛkɛlɛkɛ; oko boa ôsɔ kpaci a ngando domi.

¹⁸Yona obabae adoa, abala bo, Kumu, likonja liwɛ, pata mokama, lihɛi koko na pata mikama mitano.

¹⁹Iyo amosɔmbeja bo, Wɛ odi bosɔ kpaci a ngando jitano.

²⁰Okina otongo adoa, na yo abala bo, Kumu, likonja liwɛ didi! Mbi nalikanda na litambala na nalibomba.

²¹Nadaka na bɔ a mojɔ mowɛ, cina bo odi moto mopipo; otombaka leka a esika edi wɛ pɛ bosambea; obukaka ndongo a esika edi wɛ pɛ bona.

²²Iyo amosɔmbeja bo, Mbi nadi bodumba wɛ oko na ekenge ebali wɛ, wɛ mobuli mobe. Ajebi wɛ bo nadi moto mopipo, bo natombaka leka a esika edi mbi pɛ bosambea, na nabukaka ndongo a esika edi mbipɛ bona,

²³oko boa oisa likonja limbi a banaki mojɔ moye, bo nalisɛ na kundo pongono a lihule limbi?

²⁴Abala na bato baya badaka ena bo, Mokatoani likonja limina, napani ai yona odi na pata koto emɔci.

²⁵(Ibo bamosɔmbeja bo, Kumu, yo adi na pata koto emɔci edɛye.)

²⁶Mbi natɔndɔkɔ no bo, Moto na moto yona opeli âsɔ koko; na yona odi oko ngasa, badi bomokatoa yena epeli yo.

²⁷A mojɔ mosoki jimbi ko; doani na bato bamina jɔno bay a baipala bo mbi nadae kumu obu; bawani ya a boso bombi.

Yesu Akwea a Yelusalema

²⁸Ama yo bala boa, ami nɔ oko bonɔ bo abenge Yelusalema.

²⁹Yana abatama yo na Betepage na Betania, na amea yo a mono mua modi na kombe Mono moOlive, aloma bacingami bande babae na monɔkɔ bo,

³⁰Suanı oho a ngando yena edi oho saboso; okameani a ngando emina, ônɛni punda acingi yona otombakini moto. Mocingoani, na hulani na nde jɔno.

³¹Moto akahɔjɔ no bo, Omocingoakani mojɔ moye? balani oko bo, Kumu amobækadea.

³²Bato baloma Yesu bakε, na batana punda o ama yo bala na bu.

³³Yana acingoaka bo punda, baswa bande babala na bu bo, Ocingoakani punda mojɔ moye?

³⁴Ibo basɔmbeja bo, Kumu amobækadea.

³⁵Badoa na nde ai Yesu, babakea bisenja bibu a punda, na babakea Yesu.

³⁶Adalaka yo boa, bato bandea bisenja bibu a njea.

³⁷Abengeaka yo ngando, amea a njea yena etitaka a Mono moOlive; na bacingami bande, emumu enɛnɛ mɛnɛ, babanga bo'mba njembo na bosakoa Njambe na bopipo a mojɔ momindumba misusu mima bo ne.

³⁸Ba'mba yembo bo, Bojongoa ai Koi yona odoaka a kombe eKumu; Bowi oho Diko, na ekumu a bisika bia binɔi Diko.

³⁹Bakina BaPalusi baya badaka bacingi na bu, babala na Yesu bo, Mokoja, sia bacingami bawε.

⁴⁰Iyo asɔmbeja bo, Mbi natɔndɔko no bo, Ibaba bakayεyɔ, matai mɛnɛ madi bobekoa.

⁴¹Yana amea yo hulelu na Yelusalema, anε ngando, na ayea bio a mojɔ momina.

⁴²Abala bo, Akɔki wε jeba busa bu mijɔ mia micingi na bowi! Edεye ko mibombami a miso mawε.

⁴³Baya badi na wε soki badi bohika wε a masu mangɔngɔ; bâlonga mabɛngε, na bâdipa njea jiwε a mɔngɔ masusu.

⁴⁴Bâdumba wε nase, na bana bawε bay a badi a tei ewε pongono. Batakina nongo litai liwε limoci a diko dilitai litongo, mojɔ bo oijeba ehole edoa Njambe ai wε.

⁴⁵Yesu akwea a tempelo, na abanga bomaneja bato bay a bakɔkɔ bwasa.

⁴⁶Abala na bu bo, Mosɔnɔmɔ bo, Ndako embi ôda ndako ebo'nga. Ino ko oehekojaini bo edae esika etitanaka mibengo.

⁴⁷Adaka a tempelo tu busa a mojɔ mobokoja. Basuku banganga, na basɔni, na basuku bangando, baduka njea bo bamowoe.

⁴⁸Baine ko njea, mojɔ bo bato basusu badaka bacingi na nde bo bake mwako monde.

Luka 20

Lihɔjɔ liNganga

¹Yesu adaka a tempelo bokina busa; akojaka bato na atɔndɔkɔ Mwako Mopele. Basuku banganga, na basɔni, na basuku bangando, badoa ai yo

²na babala na nde bo, Wε okɔkɔ ngando jiji na kpaci enda? Opa wε kpaci emina nda? tɔndɔ so.

³Iyo abasɔmbeja bo, Mbi nadi bohɔjɔ no lihɔjɔ pongono.

⁴Batisimo eYoane ehula Diko isa ai bato? tɔndɔni mbi.

⁵Ibo babalana a tei ebu a mojɔ momina, na babala bo, Bokabala bo ehula Diko, yo adi bohɔjɔ so bo, Oimojimani mojɔ moye?

⁶Na bokabala bo ehula ai bato, bato basusu badi bo'la so matai, mojɔ bo bajimaka bo Yoane adaka motɔndɔi.

⁷Oko boa basɔmbeja bo bajebiti esika ehula batisimo eYoane.

⁸Na Yesu abala na bu bo, Na mbi pongono, nitatɔndɔ no yona opani kpaci ebokɔ na ngando ji.

Mondɛ Mogbie na Basali Babe

⁹Yesu abala na bato mondɛ mu. Okina momi ana gbie. Aekina a mɔmɔ mabasali, na ake a likota litongo a boyeyoa.

¹⁰Yana akpeta mbuma, aloma mobuli ai basali bo bamope libondo limbuma jigbie. Basali ko batua mobuli, na bamoyaneja boa ngasa.

¹¹Aloma okina mobuli otongo. Bamotua, bamosamboja na bamoyaneja koko boa ngasa.

¹²Aloma koko mobuli obasato. Babeneja mobuli omina, na bamodumba a sokolu.

¹³Moswa'gbie abala bo, Mbi nâkɔ boni? Nâloma mwana'mbi ongɛnɔ; isa badi bomosuma.

¹⁴Basali ko, yana ane bo mwana, babalana bo, Sangoli yona! Koni bomowoe, nongo bosangoe so bɛnɛ.

¹⁵Oko boa, bamodumba a sokolu egbie na bamowa oko bowa. Moswa'gbie adi bokɔ bo ai bato bamina?

¹⁶Adi bodoa, âwa basali bamina, na âpa gbie ai batongo. Aka bo ekenge emina, babala bo, Yε bobala boa!

¹⁷Yesu ko abanja, abala na bu bo, Oko boa, cina eMosɔnɔ mu edi bo? Litai lilona bayoi Lidi edeye litai limogbukusu lindako.

¹⁸Moto akakwa a diko dilitai limina, âbukeana. Litai limina ko likakwa a diko dimoto, limopenjepenje.

Lihɔjɔ a Mojɔ Motako

¹⁹Basɔni na basuku banganga baduka njea bo bamopee a ehole emina, mojɔ bo bacingea bo ama bala monde momina oko a mojɔ mobu; badaka ko na bɔ a mojɔ mobato bangando.

²⁰Oko boa bamosea, na baloma bato kɔngi ai yo. Bato bamina bakosea bo badi bato basoti, bo balokobane mijɔ minde na njingo bo bamotembee, na bamope a momɔ *magonverneur* a bomosambeja.

²¹Oko boa, bahɔjɔ Yesu bo, Mokoja, iso bojebaka bo mijɔ mibalaka wε na mikojaka wε midi oko mipele. Bato basusu badi ameci a miso mawε, na okojaka njea eNjambe na soti mɛnɛ.

²²Ebɔngi bo so bopute tako ai Kaisala, isa ebɔngiti?

²³Iyo ko ane poloso ebu. Abala na bu bo,

²⁴Anejani Banka. Edi na elimo enda na kombe enda? Ibo bε bo, oko eKaisala.

²⁵Oko boa abala na bu bo, Kabani ai Kaisala libondo liKaisala, libondo liNjambe ko, oko ai Njambe.

²⁶Ibo bakamoa bou a mojɔ moekenge ebala Yesu, na badaka oko bogo. Oko boa baihɔnɔ bomodumba a boso bobato a mojɔ mongando jibala yo.

Lihɔjɔ liBaSadoki

²⁷BaSadoki bajimaka bo bato batangɔ nongo a bogwa. Oko boa, bakina babu badoa na lihɔjɔ ai Yesu.

²⁸Babala bo, Mokoja, Mose asonea so mobeko bo mwanange'moto akagwa, na akakina mwali ngasa, pεpe bana, yo adi bossɔ mwali omina bo abote na nde bana ai mwananango.

²⁹Badaka boa bananange jibato sambo. Yona mosuku assɔ mwali, na agwa pε bobota nongo mwana.

³⁰Mbakeli onde assɔ mwali omina,

³¹yona obasato koko, na basusu sambo koko boa, na bagwa pε bokina mongo mwana.

³²Mwali yo mεnε agwa ngɔngɔ.

³³Oko boa, bakangɔ a bogwa, yo adabi mwali onda? Mojɔ bo adaka mwali obu basusu sambo.

³⁴Yesu abala na bu bo, Bana bangondo ye basɔkɔ bali, na basɔnɔkɔ bali.

³⁵Bato ko baya babɔngi a bokwea a ngondo yena oho, na a bongɔ a bogwa, batasɔkɔ na batasɔnɔkɔ bali.

³⁶Ibo bataya gwa, mojɔ bo badi o babwɛnji baDiko; badi bana baNjambe, mojɔ bo badi bana babongɔ a bogwa.

³⁷Mose yo mεnε ajebuja bo bagwake badi bongɔ, a esika esɔnɔ yo mojɔ molipumba limole. Iyo aseomba Kumu bo, Njambe oAbala-yama, Njambe oIsaka, Njambe oYakobo.

³⁸Njambe ko aditi Njambe obagwake. Adi oko Njambe obato baya badi mɔ; na bato basusu badi mɔ a miso mande.

³⁹Bakina basɔni basɔmbeja bo, Mokoja, olongi.

⁴⁰Oko boa badaka na bɔ a bomohɔjɔ koko lihɔjɔ.

Lihɔjɔ liYesu

⁴¹Yesu abala na bu bo, Bato babalaka bo Masiya adi Mwana 'Dawidi mojɔ moye?

⁴²Dawidi yo mεnε abalaka a mokanda moNjambe bo, Kumu abali na Kumu ombi bo, Da a ebu embi ebami,

⁴³Oko a ehole êdumba mbi soki jiwe a cina jibibota biwe.

⁴⁴Isa Dawidi abeaka Masiya Kumu onde, abwani boda mwana'nde na ye?

⁴⁵Yesu abala na bacingami bande a boso bobato basusu bo,

⁴⁶Toma nganjamani na basɔni! Posa ebu edi oko a bongε na bisenja biyaibiyai, na bo bato bababεje njεbε a jando. Bapalaka bidie biboso a sinagogue, na bisika biekumu a mabonje.

⁴⁷Bapunjaka ndako jibali-babogwa, na bangaka bingeeli biyai oko a mojɔ mobokosea pε. Bato bamina bâsɔ mokindo monenɛ soti.

Luka 21

Epeeli eMwali-oBogwa

¹Yesu angɔjɔ miso na anɛ konji bayá basaka bipeeli bibu a nguku ebipeeli.

²Anɛ koko okina mwali-obogwa, moto obopu mɛnɛ, na yo asa sentini jibae.

³Na Yesu abala bo, Mbi natɔndɔkɔ no na soti bo, epeeli esi mwali-obogwa yo obopu enɔi bipeeli bibu basusu.

⁴Mojɔ bo, ibo basusu batongo bapi oko libondo likeke llikonja libu linɛnɛ; yo ko, nongo adi yo na bopu mɛnɛ, asi likonja linde kanga lisusu mɛnɛ.

Ngando Jisuka

⁵Bakina bato babala a mojɔ motempelo, a mojɔ moeyoeli epele ematai na leka lopa bato a bobɔngeja tempelo.

⁶Yesu ko abala na bu bo, Onjakani leka lomina edεye; bokina busa ko bodi bodoa yana âdumbama matai ma masusu, na pεpε nongo litai limɔci lîdika a diko dilitai litongo.

⁷Ibo bamohɔjɔ bo, Mokoja, mojɔ momina môda a ehole eni? Mojɔ momina mokabenga bomea, embete êda bo?

⁸Yesu asɔmbeja bo, Toma nganjamani bo bato basaka laboja no. Mojɔ bo bato banɛnɛ bâdoa a kombe embi na bâbala bo, Mbi nadi yo; na, Ehole eba'i mea. Pε bosusani bato bamina.

⁹Oka'kani miako mibila na bijoki bibato, yεni bobanga. Ngando ji jidi bopeta doa soti, suka ko etada bokpa.

¹⁰Abala koko na bu bo, Likota lîna na likota; bokumu bôna na bokumu;

¹¹Majonga mangondo mâda manenɛnɛ, na manjale, na bego bimoya a bisika na bisika. Beeto, na bimbete binenɛnɛ ta busa, bîda pongono.

¹²Oko ngando jia jidoakini ko, badi bopeta pea no, badingoja no, bâgbula no a smagogue na a blɔkɔ; bâkε na nu a boso bobakumu na bajuji a mojɔ mokombe embi.

¹³Oko boa ôdani na njea a botɔndɔ mwako mosoti.

¹⁴Sabekeani ko bo otadani na mokakwano a mojɔ mobikenge bibosɔmbeja.

¹⁵Mojɔ bo mbi napa no bεtε ebobala, na bowεi a bogbokeja, na bodumba soki jinu jesusu.

¹⁶Baboti banu bɛnɛ, na banangwao, na mela manu, na binao, badi bokaba no, na bweja bakina banu.

¹⁷Bato basusu bâda na nu soki a mojɔ mokombe embi.

¹⁸Endele ko, pɛpɛ nongo moswe momɔci momelo minu modi bobeha.

¹⁹Okadani na lingbangba ôhelejani miembo minu.

²⁰Omaka nɛni bo mandundu mabasoda bahiki Yelusalema, osa ko ojebeni bo etayeyoa a boda oko mopɔtu.

²¹Bay a badi a Yuda aehole emina babwani bocia oko a meno minɛnɛnɛ. Baya badi a ngando babwani bodonga, na bato bakada a esika, babwaniti bokwea a ngando.

²²Mojɔ bo, masu mamina mâda masu malikundu, na madi bongameja mijɔ misusu mia midi a Misɔnɔ.

²³Bali ko baya badi na memi, na baya banungeaka, bâda na jɔɔlɔ a masu mamina. Mojɔ bo monɔngɔ monɛnɛ môda a ngondo; na likota di lînɛ kɛnɔjɔ.

²⁴Badi bogwa bogwa boabɛnɛ. Bâbapea masungu, na bâkɛ na bu a makota masusu; na bapakano bâdɛhɛ Yelusalema oko a suka eehole ebapakano.

²⁵Bimbete bîda a modika-busa, a songe, na a njɔtɔ. Makota masusu mangondo mâda na bɔ na maneene a mojɔ mokɛnɔjɔ emadiba-mamukwa, na a mojɔ momula.

²⁶Bato bâsenjoa na bɔ, na maneene, a mojɔ mongando jia jîdoa a ngondo; mojɔ bo ngulu eDiko êdongosana.

²⁷A ehole emina, bâne Mwana 'Moto akadoe a eyembi, na ndangasa na ekumu enɛnɛ.

²⁸Omaka nɛni litanda lingando jimina, toma kahoani miso diko, na ninojani mɔli, mojɔ bo bosikoabonu bodi hulelu.

²⁹Abala na bu monde mu. Lɛni mojɔ molikɔkɔ na mele misusu.

³⁰Mikameja kasa jiyene, ojinekɛ na ojebakani bo ehole engange edi hulelu.

³¹Oko boa koko, okanɛni bo ngando jimina jidoi, odini bojeba bo Bokumu boNjambe bobengi bomea.

³²Mbi natɔndɔkɔ no na soti bo ngando ji jisusu jidi bongama oko elulu ye esiakini.

³³Nongo Diko na Nase jikadimoa, bikenge bimbi bitadimoa.

³⁴Toma nganjamani na nu bεnε ko, bo milema minu misaka beha na magola, na malango, na mikakwano mingondo ye, bo osaka nεni busa bomina mbalakaka;

³⁵mojɔ bo bodi bodoa ai bato basusu baya badi a ngondo o abomeaka elambo.

³⁶A mojɔ momina, toma sεnjεlεni; mgakani bihole hisusu bo ngulu enu ebwane a mojɔ mobohela a ngando ji jesusu jia jidoaka, na a bo'Ina a boso boMwana 'Moto.

³⁷Iyo adaka atempelo busa na busa a mojɔ mobokoja. Yana ko adipa busa, amana bo akahwεe a mono mua modi na kombe Mono moOlive.

³⁸Yana ahoa koko busa, bato basusu batitana ai yo a tempelo bo bamohokee.

Luka 22

Ndungu Ebowa Yesu

¹Edika oko mweka pε a Kola emilembε mia mipeliti lipetu, yena edi na kombe Kola-eBono.

²Basuku banganga na basɔni badaka na posa a bonε ekina njea bo bamowejae, cinabo badaka na bɔ a mojɔ mobato bangando.

³Satana ko akwea a tei eYuda yona odaka na kombe Iskalio, okina obu Domina-babae.

⁴Iyo akε adumbe ndungu na basuku banganga na basuku batempelo bo akabe Yesu ai bo.

⁵Ibo badaka na sepi, na bajima na nde bo bamopε likonja.

⁶Iyo ajima mojɔ momina, na abanga boduka ehole bo amokabe yana adaka pεpε bato bangando ena.

Yesu na Bacingami Bande a Kola

⁷Busa boMilεmbε mia mipeliti lipetu bohoa, oko busa bowaka bo mwana-bata a mojɔ moKola-eBono.

⁸Oko boa, Yesu aloma Pεtelo na Yoane, abala na bu bo, Kεni, selingoani Kola-eBono a mojɔ mosu bo boyake.

⁹Ibo babala na nde bo, Esika epalaka wε bo boselingoe edi jɔ?

¹⁰Iyo abasɔmbeja bo, Ikani; okameani a ngando, odini bosongana na okina momi yona otombaka teni emadiba; mosusani oko a ndako ekεkε yo.

¹¹Balani na moswa'ndako bo, Mokoja ahɔjɔkɔ wε bo, Ekenge endako edi jɔ, bo mbi nayake Kola-eBono na bacingami bambi?

¹²Iyo adi boneja no ekenge endako a mboba ediko yenaedi engεbεnεke. Selingoani oko ena.

¹³Oko boa bake, batana o ama yo bala na bu, na baselingoa Kola-eBonç.

¹⁴Iyana abwana ehole, Yesu ada a mesa na babwεnji bande.

¹⁵Abala na bu bo, Mbi nadaki na posa enεnε bo nayake na nu Kola ye eBonç, oko adi mbi pε bopeta dingoa.

¹⁶Mojɔ bo natɔndɔkɔ no bo mbi nitaeyaka koko, oko adi yo pε bopeta ngama a Bokumu bo-Njambe.

¹⁷Iyo atomba kɔpɔ, ajongoa, na abala bo, Asɔni, kabani a tei enu.

¹⁸Mojɔ bo, mbi natɔndɔkɔ no bo nitaya mwaka muswa mombuma jivine, oko adi Bokumu boNjambe pε bopeta doa.

¹⁹Atomba molεmbε pongono, ajongoa, abuka molεmbε na abapa. Abala bo, Imu modi mokuku mombi mua mopami a mojɔ monu. Kɔni mojɔ mu bo osalεjeni ai mbi.

²⁰Aseja bo boyaka, atomba kɔpɔ pongono, abala na bu bo, Kɔpɔ ye edi mokongo moyene momakia mambi maya masopei a mojɔ monu.

²¹Ikani ko; ebɔ emokabi ombi edi na mbi a mesa.

²²Mwana 'Moto adi boyana oko a njea yena ehεngεmε ai yo. Monongo ko ai moto yona odi bomokaba!

²³Oko boa babanga bobomana kitε a mojɔ momoto yona odi bokɔ mojɔ momina.

²⁴Banoana mwano pongono a mojɔ momoto obu yona obwana boda mosuku obu.

²⁵Yesu ko abala na bu bo, Bakumu bamakota badi na kpaci ai bo, na basuku babu badi na kombe bakɔmeja.

²⁶Ino ko otadani nongo boa. Yona odi mosuku onu, yε adae o yεngε. Yona odi boso, yε adae o mokɔmeli.

²⁷Odi boso nda? isa yona odi a mesa, isa yona okɔkɔ elomu emesa? Te yona odi amesa? Mbi ko nadi a tei enu o mokɔmeli.

²⁸Ino ko oyeyoini na mbi na lingbangba a tei eminɔngɔ mimbi.

²⁹Sangwa'mbi apani bokumu. A mojɔ momina, mbi napaka no bisika a bokumu bombi,

³⁰bo oyakeni na omwakeni a mesa mambi; na ôdani a mingbelengɔ a bosambeja makota maYisalaele domi-na-mabae.

³¹Kumu abala bo, Simona, Simona, Satana angaka na bopipo bo apee no a bohεhε no o ahεhεkε moto ndongo.

³²Mbi ko nangɔɔni a mojɔ mowε, bo ejimeli ewε etambε. Na okahekao koko ai mbi, toma mbilimeja baninga bawε.

³³Iyo amosɔmbeja bo, Kumu, mbi nadi na moselingo a bokε na wε a blɔkɔ na a bogwa na wε.

³⁴Yesu abala bo, Petelo, mbi natɔndɔkɔ wε bo odi bongana mbi ngana jisato bo otajebaka mbi, oko kɔkɔ abelekoakini busa bu.

³⁵Abala na bu koko bo, Yana aloma mbi no oko ngasa mεnε, pεpε litɔngi lilikonja, pεpε libenga, pεpε sapata, ekina eka etaka na nu? Ibo bε bo, Pεpε nongo eka.

³⁶Iyo abala na bu bo, Edεye ko, yona odi na litɔngi lilikonja abwani bohtomba, na libenga pongono. Isa moto apeliti embombo, abwani bongεjε kasaka ende bo asombe ekina.

³⁷Mbi natɔndɔkɔ no bo ekenge ye eMisɔnɔ edi bongama na mbi; Bamolanga a libondo libato babe. Mojɔ bo edikai mweka pε, bo ngando jesusu jia jisɔnɔmɔ a mojɔ mombi jidi bongama.

³⁸Ibo babala bo, Kumu, anja, iso bodi na bimbombo bibae! Iyo abala na bu bo, Ebwani boa.

Gɛtɛsemane

³⁹Yesu amana na ake a Mono moOlive o akɔkɔ yo masu masusu. Bacingami badaka bacingi na nde engbanga.

⁴⁰Yana amea yo a esika emina, abala na bu bo, Ingakani bo otakweani a njea ebomeka.

⁴¹Abakina, na ake bohali mweka, mosiso momoto aka'ma litai. Atita na magbunda, na angɔɔnɔ bo,

⁴²Sesa, dongeja kɔpɔ yeye ai mbi, isa bolulea bowε bodi boa. Endeles ko, yε modae o apalaka wε, te mua mopalaka mbi.

⁴³Okina obwɛnji oDiko adoa ai yo na amopa ngulu a molema.

⁴⁴Adaka yo na molɔbɔ mεnε, angɔɔnɔ na bopipo, na midungu minde mitanga a kpɔtɔ o matanga mamakia.

⁴⁵Asieja yo bo'nga, angɔ na adoa ai bacingami, na abatana bahwεli a mojɔ momo-bimba.

⁴⁶Abala na bu bo, Ino ohwεini hiɔ mojɔ moye? Angɔni, ingakani bo otakweani a bomeka.

Bapea Yesu

⁴⁷Amaka yo bala boa, bato ba'mi mea oko lindundu mεnε. Okina obu Domi-na-babae adalaka a boso bobu, kombe ende Yuda. Iyo abatama na Yesu bo amohie.

⁴⁸Yesu ko abala na nde bo, Yuda, opalaka bo okabe Mwana 'Moto na bohia?

⁴⁹Bato bay a badaka bacingi na Yesu, yana anε bo mojɔ mua mokεke adoe, babala bo, Kumu, bota'na na bimbombo edεye?

⁵⁰Okina obu akwεlε mobuli omosuku onganga, na amolena litoi liebɔ ebami.

⁵¹Yesu ko abala bo, Kimani boa! Abakea ebo ende a litoi linde, na amoheleja.

⁵²Basuku banganga, na basuku batempelo, na basuku bangando, badoa bo bamopee. Yesu abala na bu bo, Ino odoini a bona na mobengo, na makɔngɔ na pεngu?

⁵³Adaka mbi na nu masu masusu a tempelo, oininojani nongo ebo a bopea mbi. Pε mojɔ; ehole enu emei, ehole endangasa emodidi.

⁵⁴Bapea Yesu a ehole emina, na bake na nde a ndako emosuku onganga. Petelo abasusa bohali mweka.

⁵⁵Batokana mosa a ndanda elopango, na bada na mobondo oko ena. Petelo ada na mobondo a tei ebu.

⁵⁶Okina moseka yona okɔkɔ elomu endako, anε Petelo yana adaka yo na mobondo a mosa. Amonja linjenje lipipo, na abala bo, Moto yoyo adaki na nde pongono.

⁵⁷Iyo ko angana oko bongana. Abala bo, Mwali, mbi nitamojobakadea.

⁵⁸Okina moto otongo amone ngɔngɔ mweka, na abala bo, Wε odi koko moto obu. Petelo ko abala bo, Momi, te mbi.

⁵⁹Yana anɔ isa *heure emɔci*, okina otongo abala na bopipo bo, Moto yoyo adaki na nde soti mεnε, mojɔ bo adi moto oGalile.

⁶⁰Petelo ko assɔmbeja bo, Momi, mbi nitacingeaka mojɔ mobalaka wε. Amaka yo bala bikenge bimina, kɔkɔ ami belekoa oko bobelekoa bokpa.

⁶¹Kumu ahekhoa, na anja Petelo oko bonja. Bikenge bibala Kumu na nde bihula a molema monde bo, Wε ôngana mbi ngana jisato oko kɔkɔ abelekoakini busa bu.

⁶²Oko boa amana sokolu na ayea bio oko na molɔbɔ.

⁶³Bato baya basenjeléké Yesu bamololea na bamoboma.

⁶⁴Bakanda litambala a miso mande, na babala na nde bo, Hieja; obomi wε nda?

⁶⁵Babala na nde koko mijɔ minenε, na bamopɔmbeja.

⁶⁶Yana ahoa busa, babolea likita libasuku bangando, na nganga, na basɔni, na bake na nde a esambi ebu.

⁶⁷Babala na nde bo, Isa wε odi Masiya, tɔndɔ so. Iyo ko abasɔmbeja bo, Nongo nakatɔndɔ no, otajimani.

⁶⁸Mbi nakahɔjɔ no, ino otasɔmbejani.

⁶⁹Endele ko, donga oko a busa bu, Mwana 'Moto âda a ebo ebami endangasa eNjambe.

⁷⁰Ibo basusu bahɔjɔ bo, Wε odi Mwana oNjambe? Iyo abasɔmbeja bo, Ino obalakani bo mbi nadi yo.

⁷¹Ibo babala bo, Bodi boduka tati etongo mojɔ moye? Iso bɛnɛ boki monɔkɔ monde mɛnɛ.

Luka 23

Esambi ePilato

¹Bato balikita bangɔ basusu, na bake na Yesu boso Pilato.

²Babenga bomodumbea ebango bo, Iso bobolojai moto yo na mojɔ. Apangoaka bato balikota lisu, na alembaka bato bo bataputa tako eKaisala. Abalaka koko bo yo mɛnɛ adi Masiya na Kumu.

³Pilato amohɔjɔ bo, Wε odi Kumu oBaYuda? Iyo amosɔmbeja bo, Wε obali boa.

⁴Pilato abala na basuku banganga, na bato balikita bo, Mbi mtanɛkɛ nongo mojɔ na moto omina.

⁵Ibo ko bahεjε bingi. Babala bo, Iyo apangoaka bato a makota masusu maYuda. Abanga bokoja oho Galile, na edεye amei oko ya.

⁶Yana aka Pilato ekenge emina, ahɔjɔ isa Yesu adi moto oGalile.

⁷Ajeba yo bo adi moto olıkota liElode, amoloma ai Elode, mojɔ bo yo adaka a Yelusalema a ehole emina.

⁸Elode adaka na posa ehole eyai bo anee Yesu. Oko boa, yana amonɛ yo, adaka na sepi enɛnɛ. Mojɔ bo ama ka mijɔ minde, na adaka na njingo bo Yesu amonejae ekina embete.

⁹Oko boa, akokeleja Yesu na mahɔjɔ manεnε. Yesu ko aimosɔmbeja nongo ekenge.

¹⁰Basuku banganga na basɔni badaka hulelu, na bamodumbea ebango na bopipo mεnε.

¹¹Elode na basoda bande bamokotoa, bamota mota, bamolwaja kasaka eyai ekumu, na amosɔmbeja ai Pilato.

¹²Elode na Pilato bapanda limbaci a busa bomina, mojɔ bo bama da oko soki.

¹³Pilato abolea likita libasuku banganga, na bakumu, na bato bangando.

¹⁴Abala na bu bo, Ino odoini na moto yo a esambi embi o moto yona opangoaka bato. Ikani! Mbi namokokelejai a boso bonu, na nani bo aditi nongo na lindo a mojɔ mongando jilangaka no.

¹⁵Elode koko boa, mojɔ bo yo amosɔmbejai ai so. Ikani! yo akɔiti nongo mojɔ mua mobwani na mokindo mobogwa.

¹⁶Oko boa nadi bomotua, na nâmocingoa.

¹⁷(Cina bo acingoaka moto omɔci tu yanga a kola emina.)

¹⁸Ibo basusu ko babekoa na monɔkɔ momɔci bo, Ye agwε! Cingoa Balaba ai so!

¹⁹Balaba adaka a blɔkɔ a mojɔ mobowa, na a mojɔ modane a ngando.

²⁰Pilato abaleha koko, mojɔ bo yo adaka na posa bo acingoe Yesu.

²¹Ibo ko babekoa bo, Mobakea a mole-mobokea! Mobakea a mole-mobokea!

²²Pilato abala na bu bala ejisato bo, Mojɔ moye? Bobe bokɔi yo nda? Mbi naniti nongo mojɔ na nde mua mobwani na mokindo mobogwa. Oko boa nadi bomotua, na nâmocingoa.

²³Ibo ko babejε bingi; babekoa na bopipo, na ba'nga oko bo agwε a mole-mobokea. Oko boa Pilato aka minɔkɔ mibu.

²⁴Alena mojɔ boa, na ajima bo akɔe o apalaka bo.

²⁵Ba'nga koko bo acingoe moto yona odaka a blɔkɔ a mojɔ mobowa na dane, na amocingoa. Apeja Yesu ko a mɔmɔ mabu bo bakɔe na nde o apalaka bo.

Bogwa boYesu

²⁶Abenga bo bodala na Yesu, bapea moto oKulene, kombe ende Simona. Iyo adaka a njea elihule a esika, na bamotombeja mole-mobokea a ngɔngɔ jiYesu.

²⁷Bato badaka bacingi ngɔngɔ jinde lindundu linεnε; na bali basabimboaka ta mupa, na bayeaka bio a mojɔ monde.

²⁸Yesu ko ahekua, abala na bn bo, Ino bana-bali baYelusalema, t'oyeeni oko a mojɔ mombi; yeani oko a mojɔ monu bɛnɛ na bana banu.

²⁹Mojɔ bo, ikani; masu makɛkɛ adoe yana âbala bato bo, Badi na pasa oko batete, oko sɔpɔ jia jiditi na libota, na mabɛi maya madi pɛ bonungea.

³⁰Ehole emina ekamea, badi bobala na meno minenene bo, Bobumana so; na bâbala na meno bo, Puseani so.

³¹Isa bakɔkɔ mojɔ mu yana adi mole mɔ, badi bokɔ bo na mole mokakanake?

³²Bakɛ na bato batongo babae, bato babe; badaka bacingi na nde engbanga bo bagwɛ na nde.

³³Yana amea bo a esika yena edi na kombe Engɔngɔ, babakea Yesu a mole-mobokea oko ena, na baya babe pongono, okina a dɔngɔ diebɔ ebami, yona otongo a dɔngɔ diebɔ ebali.

³⁴Yesu abala bo, Sesa, kina bo, mojɔ bo batacingeaka mojɔ mokɔkɔ bo. Na bakina baboma jonga a mojɔ mobokaba bisenja bindé.

³⁵Bato bangando badaka hulelu a mojɔ mobonja. Basuku bangando ko bamokotoa; babala bo, Iyo ahelejai bato batongo; yε asahelejae yo mɛnɛ isa adi Masiya oNjambe, isa Njambe amohɔ.

³⁶Basoda bamopɔmbeja pongono; bamoyεjɛ madiba makpɔ,

³⁷na babala bo, Isa wε odi Kumu oBayuda, saheleja.

³⁸Mokina mosɔnɔ modaka a diko dinde bo, IYO ADI KUMU OBAYUDA.

³⁹Okina obu babe baya bakaalejama, ananga na nde; abala bo, Wε oditi Masiya? saheleja wε mɛnɛ na so pongono.

⁴⁰Yona otongo ko assɔmbeja na alema na nde bo, Wε, t'obangake Njambe, wε yona osi mokindo momina pongono?

⁴¹Iso bobwani na mokindo momina; bosɔkɔ oko ndese ejibe jisu; yo ko akɔiti nongo mojɔ mobe.

⁴²Na yo abala bo, Yesu, pɛ bobosa mbi okassɔ bokumu bowε.

⁴³Yesu amosɔmbeja bo, Mbi natɔndɔkɔ wε na soti bo odae na mbi a Paladiso oko busa bu.

⁴⁴A ehole emidi, modidi modaka a ngondo esusu, na moyeyoa oko a *trois heures*.

⁴⁵Modika-busa mohinda, na ehuako enɛnɛ yena ekabaka tempelo a tei elea oko bolea, bikenge bibae.

⁴⁶Na Yesu abekoa na kɔpi epipo bo, Sesa, asɔ mwembo mombi a mɔmɔ mawɛ. Ama yo bala boa, mwembo monde mo'mi mana oko bomana.

⁴⁷Yana anε kapitεni obasoda mojɔ momina, asakaoa Njambe, na abala bo, Iyo adaki moto mopele soti.

⁴⁸Bato basusu baya badaka ena a bonja, babule oko bobule yana anε bo mojɔ momina, na basabimboa ta mupa.

⁴⁹Bina'nde basusu, na bali baya bama donga na nde a Galile, badaka ba'mi bohali mweka, na hanε mojɔ mosusu.

⁵⁰Okina momi adaka ena, kombe ende Yosepa, moto oAlimate a likota liYuda. Iyo adaka moto olikita libasuku, moto mopele, moto ohodongo.

⁵¹Iyo ajima nongo bosambeja bobu na mojɔ mokɔ bo. Ambaka koko Bokumu boNjambe na tɛndε.

⁵²Moto omina akε ai Pilato, na amonga mokuku moYesu.

⁵³Amotiteja, amodinga na esenja enεnε epu, na amosambea a esεmɔ, oko atei eengbungulu yena etɔmɔ a litai. Baipaka sa moto ena.

⁵⁴Busa bomina bodaka busa boMoselingo, cina bo busa boSabata bobenga bomea.

⁵⁵Bali baya bama donga na Yesu a Galile, basusa Yosepa oho, na banε esεmɔ na esika edaka mokuku moYesu.

⁵⁶Oko boa basɔmbɔ a ngando, na baselingoa malasi, na kasa jisoo epele. Bahema a husa boSabata a mojɔ momobeko.

Luka 24

Yesu Angɔ a Bogwa

¹Yana abenga bohoa busa boboso, bali batomba malasi maselingoa bo, na bake a esεmɔ a elɔngɔ mεnε.

²Bane bo litai lima hilingojama, na lidonga a esεmɔ.

³Akwea bo ko a tei, bainε nongo mokuku moKumu Yesu.

⁴Akakwanaka bo a mojɔ momina, bato-bami babae bamana mbalakaka, na ba'ma a dɔngɔ dibu. Bisenja bibu bidaka na bolailai.

⁵Bali baluluma na bɔ, na basunea maso mabu oko a kpɔtɔ. Bami babahɔjɔ bo, Ino odukakaniyona odi mɔ a esika ebagwake mojɔ moye?

⁶Iyo aditi ya; angɔ! Leni mojɔ mobala yo na nu yana adaka yo a Galile.

⁷Abala bo badi bokaba Mwana 'Moto a Inɔmɔ mabato babe, bo badi bomowa amole-mobokea, na bo adi bongɔ a bogwa na masu masato.

⁸Oko boa bikenge biYesubihula a milema mibu.

⁹Badonga a esemɔ, basɔmbɔ a botɔndɔ babwɛnji domi-na-omɔci mojɔ momina mosusu, na batɔndɔ bacingami batongo pongono.

¹⁰Baya batɔndɔ babwɛnji ngando Jimina badaka Malia oMagadala, na Yoana, na Malia nange eYakobo, na bakina bali batongo bayabada na bu.

¹¹Babwɛnji ko bale bo bikenge bimina bidaka oko ebalabala pε; baijima nongo.

¹²Petelo ko angɔ, na apota ebango a esemɔ. Asasunea a bonja a tei, na anε oko bisenja pε bisambi, na asɔmbɔ a ngando oko na bokamo a mojɔ momina.

Njea eEmau

¹³Bakina babu babae bakes busa bomina a ekina ngando kombe Emau, mosiso o kilometra domi-na-jibae.

¹⁴Ibo basolanaka a mojɔ mongando ji jesusu.

¹⁵Abalanaka bo boa na masolo mabu, Yesu yo mεnε abatama, na abapaka a njea.

¹⁶Ibo ko baimombetea na miso mabu.

¹⁷Iyo abala na bu bo, Mijɔ misolanaka no a njea enu midi bo? Ibo ba'maoko bo'ma, na badaka na wa a miso mabu.

¹⁸Okina obu, kombe ende Kelɔpa, amosɔmbeja bo, Mokendeli omɔci a Yelusalema yona odi pε bojeba mijɔ mia mikwabi oho na masu ma, oko wε pε?

¹⁹Yesu abala na bu bo, Mijɔ mimina nda? Ibo bamosɔmbeja bo, Oko mojɔ moYesu oNasaleta yona odaka motɔndɔi. Bilomu binde, na bibaeli binde, bidaka na ndangasa a boso boNjambe, na a boso bobato basusu.

²⁰Basuku banganga ko, na bakumu basu, bamopeabi, bajimabi bo agwε, na bamowabi a mole-mobokea.

²¹Iso ko bodaka na njingo bo yo adae mosikoi oYisalaele. Ee, ngando ji jidakiboa, masu masi edεye masato.

²²Bakina bali basu ko bakamojai so bou.

²³Ibo bakes a esemɔ ehuma mεnε, na baniti nongo mokuku monde. Oko boa babuli ai so, na batɔndɔi so bo bani bakina babwɛnji baDiko bayababali bo adioko mɔ.

²⁴Bakina bato basu bakes a esemɔ, na bani o ami bala bali bamina. Iyo ko—bamotaniti.

²⁵Yesu abala na bu bo, Ino bato balibunga! Milema minu midi na kite a mojɔ mongando jesusu jibala batɔndɔi cina eye?

²⁶Ebɔngiti bo Masiya adingoe boa, bo akwee a ekumu ende?

²⁷Oko boa, yo abanga na mikanda miMose na batɔndɔi basusu, na abacingea ngando jesusu jia jidi a Misɔnɔ a mojɔ monde mɛnɛ.

²⁸Babatama na ngando ekɛkɛ bo. Iyo ko akɔ bo adojae.

²⁹Ibo ko bamongɔnɔ bo, Da na su, mojɔ bo busa bɔselei edɛye. Edika mweka pɛ bo busa bodipe. Oko boa akwea bo adae na bu.

³⁰Adaka yo na bu a mesa, atomba molɛmbɛ, ajongoa, abuka molɛmbɛ na abapa.

³¹Miso mabu mahoa na bamombetea. Iyo ko adimoa, na baimone koko na miso.

³²Ibo babalana bo, Milema misu mingoiti mosa a tei esu, yana asolaki yo na su a njea, na yana acingeaki so Misɔnɔ?

³³Oko boa, bangɔ bokpa, basɔmbɔ a Yelusalema, na batana bacingami domi-na-omɔci baya bama titana na bakina batongo.

³⁴Ibaba babala bo, Kumu angɔi a bogwa soti, na asabolojai ai Simona!

³⁵Ibo pongono batɔndɔ mojɔ mua mokwa na bu a njea, na bo bamombetea yana abukaka yo molɛmbɛ.

Yesu Asaneja ai Bacingami

³⁶Amaka bo bala bikenge bimina, Yesu ami ma oko bo'ma a ndanda ebu. Abala na bu bo, Bowi ai no!

³⁷Ibo ko bagasima, na bangbɔngbemɛ bou, mojɔ bo balekɛ bo banekɛ oko mwembo.

³⁸Iyo abala na bu bo, Ebangaka no ndeni? Odini na kite a milema minu mojɔ moye?

³⁹Anjani mɔmɔ mambi na bibota bimbi, bo edi oko mbi mɛnɛ. Benjɛni mbi na mɔmɔ manu. Anjani na miso; mojɔ bo mwembo mopoliti mini na kua o anekɛ no bo mbi napeli.

⁴⁰Abala yo boa, abaneja mɔmɔ mande na bibota bindé.

⁴¹Ibo ko badaka oko na kite; bayegebana koko na bokamoa na sepi.

⁴²Oko boa Yesu abala na bu bo, Odini na eka eboyaka ya? Bamopa ekenge eswi ekaleamake,

⁴³na atomba swi na ayaka a boso bobu.

⁴⁴Abala na bu bo, Mijo mibalaka mbi na nu yana adaka mbi na nu oko mimi, bo ngando jesusu jia jisɔnɔmɔ a mojɔ mombi a Mibeko miMose, a mikanda mibatɔndɔi, na mokanda moNjembo, jidi bongama soti.

⁴⁵A ehole emina, abapa bohu a milema mibu bo bacingee Misɔnɔ.

⁴⁶Abala koko na bu bo, Oko boa, mosɔnɔmɔ bo Masiya adi bodingoa soti, bo angɔe a bogwa na masu masato,

⁴⁷na bo batɔndɔe mwako a kombe ende a Yelusalema boso, na a makota masusu, a mojɔ mobokina bojibe na bohekoja bomilema.

⁴⁸Ino odini batati bangando jimina.

⁴⁹Ikani ko! mbi nalomeaka no mua modikeja Sangwa'mbi. Toma mbani ko a ngando oko adi ndangasa eDiko pε bopeta lwaja no.

Yesu Asɔmbɔ Oho Diko

⁵⁰Asi ko akεi na bu oko a Betania. Angɔjɔ mɔmɔ mande na abapamboa.

⁵¹Yana abapamboaka yo, abɔtɔnɔ na bu na atombama oho Diko.

⁵²Ibo ko bamosakoa, basɔmbɔ a Yelusalema na sepi enεnε,

⁵³na bakεkε a tempelo masu masusu a bosakoa Njambe.

Yoane

Yoane 1

- ¹Ebaeli edaka kanga a bobanga mènè. Ebaeli edaka na Njambe. Ebaeli edaka Njambe.
- ²Iyo adaka na Njambe a bobanga mènè.
- ³Iyo akɔ leka losusu boyo. Pερε nongo eka emɔci edi, yena edi yo pε boko.
- ⁴Bomɔ bodaka a tei ende, na bomɔ bomina bodaka bohu bobato.
- ⁵Bohu bohoa a tei emodidi na modidi moigbokeja bohu.
- ⁶Njambe aloma moto, kombe ende Yoane.
- ⁷Iyo adoa bo adae motati, a bojebeja bato a mojɔ mobohu, bo bato basusu badi bojima oko na nde.
- ⁸Iyo mènè aidaka bohu bomina. Adoa oko bo adae motati obohu.
- ⁹Bohu bomina bodaka bohu bosoti, na bodoa a ngondo a bopa bato basusu bohu.
- ¹⁰Iyo adaka a ngondo, oko ngondo ekɔ yo; ngondo ko eimojeba.
- ¹¹Adoa a ngando ende mènè; bato bande mènè ko baimosɔ.
- ¹²Ibaya ko bamosɔ, oko baya bamojimeaka, yo abapa kpaci bo badae bana baNjambe.
- ¹³Ibo baibotama nongo na makia, isa na bolulea bomokuku, isa na bolulea bomoto; babotama oko na Njambe.
- ¹⁴Ebaeli ekindoa moto, na yo ayeyoa a tei esu; alumna na monganji na Soti. Iso bone ekumu ende, ekumu eMwana-sɔmi omɔci yona odonga ai Sango.
- ¹⁵Yoane adaka motati onde. Iyo abala a mojɔ monde bo, Yana abala mbi bo, Iyona okɛkɛ adoe ngɔngɔ jimbì anɔi mbi, mojɔ bo yo adaka oko mbi napetakini da,—edi oko yo.
- ¹⁶Iso basusu bosɔkɔ monganji monde, monganji oko na bonetɔ.
- ¹⁷Mibeko mibakeama oko na Mose. Yesu Masiya ko adoa na monganji na Soti.
- ¹⁸Pερε nongo moto onε Njambe; Mwana-sɔmi omɔci ko yona odi a bupa boSango amobolojai ai so.

Tati eYoane

¹⁹Tati eYoane edi yeye. BaYuda baYelusalema baloma bakina nganga na BaLewi ai yo na lihɔjɔ bo, Wε odi nda?

²⁰Yoane ajima, pε nongo bongana; ajima oko bo aditi Masiya.

²¹Oko boa, bamohɔjɔ bo, Odi ko nda? Odi Elia? Iyo abala bo, Naditi nongo yo. Bamohɔjɔ koko bo, Odi motɔndɔi yona? Iyo asɔmbeja bo, Pερε.

²²Oko boa babala na nde bo, Odi nda? Jebeja so a mojɔ mowε mεnε, bo botɔndɔe bato baya balomi so.

²³Yoane abala bo, Mbi nadi, Kɔpi emoto yona obekoaka a esika bo, Tangbojani njea eKumu; O abala motɔndɔi Yisaya.

²⁴Bakina baya balomama ai yo badaka BaPalusi.

²⁵Ibo bamohɔjɔ bo, Isa oditi Masiya, na oditi Elia, na oditi motɔndɔi, obatisaka mojɔ moye?

²⁶Yoane abasɔmbeja bo, Mbi nabatisaka a madiba; okina ko adi a tei enu na otamojobakani.

²⁷Iyo akεkε adoe ngɔngɔ jimbi, na mbi nabɔngiti bo nacingoe mokɔli mosapata jinde.

²⁸Mojɔ mu modaka a Betania, a dɔngɔ ditongo diYoladene, a esika ebatisaka Yoane.

²⁹Yana ahoa busa, Yoane anε Yesu akadoe ai yo, na abekoa bo, Anjani Mwana-Bata oNjambe yona odongejaka bobe bongondo!

³⁰Yana abalabi mbi bo, Okina moto akεkε adoe ngɔngɔ jimbi yona odi boso bombi, mojɔ bo yo adaka oko mbi nadakini, nabalabi oko a mojo monde.

³¹Mbi mεnε naimojebaka; endele ko mbi nadoi bo namobolojae ai Yisalaele oko na batismo a madiba.

³²Na Yoane atɔndɔ koko bo, Mbi nani Mwembo mokadonge oho Diko o ekɔmeli esungu, na mobakami ai yo.

³³Mbi naimojebaka mbi mεnε; yona olomani ko bo nabatise a madiba, abala na mbi bo, Okanε Mwembo mokatite na mokabakame ai moto, edi oko yo yona abatisaka a Mwembo Mosenɔke.

³⁴Mbi namoni mbi mεnε, na natɔndɔkɔ na soti bo Iyo adi Mwana 'Njambe.

Bacigami Baboso

³⁵Ahoa koko busa, Yoane adaka ami na bacingami bande babae.

³⁶Iyo anε Yesu akadale, na abala bo, Anjani Mwana-Bata oNjambe!

³⁷Bacingami ba babae baka bikenge bibala Yoane, na bakimana Yesu.

³⁸Yesu aheko, na ane bo bacingi ngɔngɔ jinde. Abala na bu bo, Epalaka no nde? Bamosɔmbeja bo, Labi, (cina emina edi Mokoja) osamaka jo?

³⁹Iyo abala na bu bo, Doani okanjeni. Oko boa bakes, na banε esika edaka yo; na badika na nde busa bomina, mojɔ bo edaka isa *quatre heures* na dea.

⁴⁰Andalea, mwanange 'Simona Petelo, adaka okina obu babae baya baka ebaeli eYoane na bakimana Yesu.

⁴¹Iyo akε nduki emwangwa 'nde Simona bokpa, na abala na nde bo, Iso bobolojai Masiya (cina emina edi Klisto).

⁴²Adoa na nde ai Yesu. Yesu amonja, na abala na nde bo, Wε odi Simona, mwana oJona. Kombe ewε êda Kepa (cina emina edi Petelo—Litai).

⁴³Ahoa koko busa, Yesu adaka na mokano a bokes a Galile. Atana Pilipo, na abala na nde bo, Cingama na mbi.

⁴⁴Pilipo adaka moto oBetesaida, ngando eAndalea na Petelo.

⁴⁵Pilipo aduka Natanaele, na abala na nde bo, Mose asɔnɔ a Mibeko, na batɔndɔi basɔnɔ pongono, a mojɔ mookina moto; iso bomobolojai, oko Yesu oNasaleta, mwana oYosepa.

⁴⁶Natanaele amosɔmbeja bo, Ekina eka epele edi bomana a Nasaleta? Pilipo abala na nde bo, Doa okanje

⁴⁷Yesu ane Natanaele akadøe ai yo, na abala a mojɔ monde bo, Anjani MoYisalaele osoti! Poloso editi nongo a tei ende.

⁴⁸Natanaele abala na nde bo, Wε ojebi mbi na ye? Yesu amosɔmbeja bo, Mbi nanεki wε yana adaki wε a cine elikɔkɔ, yana adaki Pilipo pε bopeta bea wε.

⁴⁹Natanaele amosɔmbeja bo, Labi, wε odi Mwana oNjambe. Odi Kumu oYisalaele.

⁵⁰Yesu abala na nde bo, Ojimaka mojɔ bo natɔndɔi wε bo nani wε a cina elikɔkɔ? Odi bone ngando jia jinɔi jiji.

⁵¹Abala na nde koko bo, Soti mεnε, mbi natɔndɔkɔ no bo ônεni Diko bwase, na babwεnji-baDiko bakawee na bakatite a diko diMwana 'Moto.

Yoane 2

Embete eYesu Eboso

¹Yana anɔ masu mabae, lihango iidaka a Kana, ngando eGalile. Nange eYesu adaka ena.

²Bahea koko Yesu na bacingami bande a lihango.

³Vino ko eibwana, na nange 'Yesu abala na nde bo, Bapeliti koko vino.

⁴Yesu amosɔmbeja bo, Mwali, edi mojɔ mombi isa mowε? Ehole embi ebwanakini.

⁵Ngwa'nde abala na bakɔmeli bandako bo, Akabala na nu mokina mojɔ, toma kɔni mojɔ momina.

⁶Biomba bimatai bisamano bidaka ena na madiba bo BaYuda basasose o akɔkɔ bo bihole bisusu; tu eyomba ebwana na *litres* domi-libwa isa mokama na dea.

⁷Yesu ajɔ na bu bo, Lume jani biomba na madiba, na babilumeja botɔ mεnε.

⁸Abala na bu koko bo, Lokani edεye; tombani oho ai moswa 'lihango.

⁹Yana akɔ bo boa, moswa 'lihango alelε madiba maya makindoa vino, yo ko pε bojeba esika ehula vino emina. (Bakɔmeli ko baya baloka madiba bajeba.) Oko boa yo abea momi obolongana na abala na nde bo,

¹⁰Bato basusu bamejaka vino epele boso, na bakamwaka bopele, badi bomeja vino yena editi epele bou. Wε ko okini vino epele oko a suka.

¹¹Yesu akɔ embete ye ende eboso oko a Kana, ngando eGalile, na aneja ekumu ende; na bacingami bande bamojimea.

¹²Ngɔngɔ jimina, akε a Kapalanauma, yo mεnε na ngwa 'nde, na bananango, na bacingami bande pongono. Bayeyoa oho mweka, te nongo ekoka.

Yesu Asenoja Tempelo

¹³Yesu akε a Yelusalema cina bo edika mweka pε a Kola eBono eBaYuda.

¹⁴Iyo atana bato a tempelo baya bangεjekε ngɔmbɔ, na bata, na sungu, na basɔmbɔtɔni balikonja pongono.

¹⁵Akɔ pimbo na mikina mikpulu, na ababengana basusu a tempelo, na bata na ngɔmbɔ pongono. Asopa koko likonja libasɔmbɔtɔni, na adumba mesa mabu.

¹⁶Atɔndɔ bato baya bangεjekε sungu bo, Dongejani leka lomina ya. T'ohekojaeni oko ndako eSangwa'mbi bo edae ndako ebwasa.

¹⁷Na bacingami bande bale ekenge yena edi a Misɔnɔ bo, Posa embi a ndako eSangwa'mbi emajai mbi mokuku.

¹⁸BaYuda bamohɔjɔ bo, Akɔkɔ wε ngando jiji, embete enejaka wε so nda?

¹⁹Yesu abasɔmbeja bo, Bukani tempelo ye, na mbi naengɔjɔ koko na masu masato.

²⁰BaYuda babala na nde bo, Elomu eboyoa tempelo ye eyeyoa bianga domi-inéi na bisamano, na wé obwani boeyoa na masu masato?

²¹Iyo ko abala a mojɔ motempelo emokuku monde.

²²Bacingami bande bale ekenge emina yana angɔ yo a bogwa, na bajima mosɔnɔ momina na ekenge ema bala Yesu pongono.

²³Yana adaka Yesu a Yelusalema a mojɔ moKola-eBono, bato banené bajimea kombe ende, mojɔ bo baneké bimbete bikɔkɔ yo.

²⁴Yesu ko adaka na mokakwano a mojɔ mobu, cina bo ajebaka bato basusu;

²⁵ajebaka yo mené ngando jia jidaka a tei ebato, pɛpɛ nongo moto bomotɔndɔ.

Yoane 3

Yesu na Nikodemo

¹Okina moto adaka MoPalusi kombe ende Nikodemo, mosuku oBaYuda.

²Iyo adoa ai Yesu na bulu. Abala na nde bo, Mokoja, iso bojebaka bo wé odi mokoja yona odonga ai Njambe; mojɔ bo Njambe amiti da na moto, atahɔnɔ bokɔ bimbete bikɔkɔ wé.

³Yesu amosɔmbeja bo, Mbi natɔndɔkɔ wé na soti mené bo, Moto amiti botama koko, atané nongo Bokumu boNjambe.

⁴Nikodemo amohɔjɔ bo, Moto akamea mobange, adi bobotama koko na ye? Adi bokwea koko a sɔpɔ jingwa'nde bo amobote koko?

⁵Yesu amosɔmbeja bo, Soti mené, mbi natɔndɔkɔ wé bo, Moto amiti botama na madiba na Mwembo, atakwea nongo a Bokumu boNjambe.

⁶Mini mibotaka oko mini, na Mwembo mobotaka oko mwembo.

⁷T'okamoe oko mojɔ bo nabali na wé bo, Toma botama koko.

⁸Pwea ehweaka a esika epalaka yo. Okaka daka emina; otajehaka ko esika ehulaka pwea, na esika ekéké yo. Moto na moto yona obotama na Mwembo adi boa.

⁹Nikodemo abala na nde bo, Imu mojɔ môda bo?

¹⁰Yesu amosɔmbeja bo, Wé odi mokoja oYisalaele, na otacingeaka mijɔ mimina?

¹¹Mbi natɔndɔkɔ wé na soti mené bo, Iso bobalaka oko mijɔ mijebaka so, na botataka tati emijɔ minéké so; ino ko olonakani tati esu.

¹²Adi no pɛ bojima mijɔ mingondo mibalaka mbi, odini bojima na ye, nakatɔndɔ no mijɔ miDiko?

¹³Pepe nongo moto oke oho Diko. Mwana 'Moto ko yona odi na ngando ende oho Diko, yo ahula Diko.

¹⁴Na Mwana 'Moto âbakeama diko, o abakea Mose njɔ diko a lisobe,

¹⁵bo moto na moto yona omojimeaka ase bomɔ bua bodi na bosusu.

¹⁶Mojo bo Njambe apalaka ngondo na ngenjɔ yeye; apa Mwana'nde obotama omɔci pε, bo moto na moto yona omojimeaka ase bomɔ bua bodi na bosusu.

¹⁷Mojo bo, Njambe ailoma Mwana'nde a ngondo a bosambeja ngondo; amoloma bo ngondo ehele na nde.

¹⁸Moto akamojimea, atasamba nongo. Moto amiti mojimea, yo asamba eyou, cina bo aijima kombe eMwana 'Njambe obotama omɔci.

¹⁹Esambi edi oko yeye; bohu bodoa a ngondo, na bato bapalaka gbo oko modidi, mojo bo bikɔmeli bibu bidi bibe.

²⁰Mojo bo, isa moto adi na ekɔmeli ebe, abangaka bohu; t'amanaake nongo a bohu, bo mijɔ minde misaka boloa.

²¹Moto ko yona odi na ekɔmeli esoti amanaka a bohu, na anejaka bo bikɔmeli binde bihulaka ai Njambe.

Tati eYoane a Mojo moYesu

²²Yesu ake na bacingami bande ngɔngɔ a likota liYuda. Ayeyoa na bu oho, na abatisa bato.

²³Yoane adaka a Ainona, hulelu na Salima, a ehole emina, na yo abatisaka bato pongono, mojo bo madiba madaka manenɛ a esika emina; na bato banenɛ badoa bo babatisame.

²⁴Yoane aipaka kwea a blɔkɔ a ehole emina.

²⁵Bacingami baYoane babanga boboma kite na okina MoYuda a ehole emina, a mojo moekɔmeli ebosasenoja.

²⁶Badoa ai Yoane, babala na nde bo, Mokoja, moto yona odaka na wε a dɔngɔ ditongo diYoladene abatisaka bato edεye, na bato basusu bakεkε oko ai yo; wε mεnɛ omojima pongono na tati ewε.

²⁷Yoane asɔmbeja bo, Moto amiti sɔ epeeli eDiko, atasɔ nongo eka.

²⁸Ojebakani no bεnε bo tati embi edaka bo, Mbi naditi Masiya; nalomami oko boso bonde.

²⁹Edi oko momi obolongana yona osɔkɔ mwali. Mina'nde momi ko asepaka a boka ebaeli ende, na adi bo'ma mema bo amohokee. Sepi embi edi oko boa; edi enenɛ mεnɛ.

³⁰Iyo adi bohε monεnε, mbi ko nadi botita.

Mwana 'Njambe

³¹Iyona odonga oho Diko anɔi bato basusu. Moto ongondo acingi oko na ngondo, na abalaka mijɔ mingondo. Iyona odonga oho Diko anɔi bato basusu mεnε.

³²Iyo anejaka oko ngando jinε yo na jika yo; pεpε nongo moto ko ojimaka tati ende.

³³Iyona ojimaka tati ende angamejaka mojɔ mu, bo Njambe adi soti.

³⁴Mojɔ bo yona olomama na Njambe abalaka oko bikenge biNjambe, cina bo yo t'angeke mwεngi yana apaka yo Mwembo.

³⁵Sango adi na ngεnjɔ ai Mwana, na akina mijɔ misusu a mɔmɔ mande.

³⁶Iyona ojimeaka Mwana adi na bomɔ na bosusu. Iyona ko olonaka bojimea Mwana atanε nongo bomɔ, na kεnjɔ eNjambe edi oko ai yo.

Yoane 4

Mwali oSamalia

¹Yesu ajeba bo BaPalusi baka bo etango ebato baya bahekoaka ai yo a bobatisama, enɔi yena ebacingami baYoane.

²(Yesu aibatisaka yo mεnε, oko bacingami bande.)

³A mojɔ momina yo adonga a Yuda bo asɔmbe a Galile.

⁴Njea ende edaka a tei eSamalia.

⁵Oko boa, yo amea a Sikala, ekina ngando eSamalia, hulelu na mokpɔtɔ mopa Yakobo ai mwana'nde Yosepa.

⁶Moboka moYakobo modaka oko ena. Yesu ambε na mɔndɔ, na ada na mobondo a dɔngɔ dimoboka.

⁷Edaka ehole emidi, na mwali omɔci oSamalia adoa a boloka madiba. Yesu abala na nde bo, Pani namwake.

⁸Mojɔ bo bacingami bande bama ke a ngando a bosomba leka loboyaka.

⁹Mwali oSamalia abala na nde bo, Boni! Wε MoYuda ongaka mbi madiba, mbi mwali oSamalia? (Gina bo BaYuda na BaSamalia te bangεnεke.)

¹⁰Yesu amosɔmbeja bo, Akɔki wε jeba epeeli eNjambe na yona ongaka wε madiba, ka omongi yo, na yo api wε madiba mabomɔ.

¹¹Mwali abala na nde bo, Kumu, opeliti eka eboloka na madiba, na moboka modi na ndinda. Oko boa, madiba mawε mabomɔ māhula jɔ?

¹²Wε onɔi tata osu Yakobo, yona opa so moboka mu, na amwaka ya, yo mεnε, na bana bande, na mela mande?

¹³Yesu amosɔmbeja bo, Moto na moto yona omwakaka madiba mama âka koko ekangola.

¹⁴Moto ko akamwaka madiba mamopaka mbi, ata'ka koko ekangola na ikina; cina bo madiba māmopa mbi mada molo momadiba mabomɔ a tei ende, maya makεlεkε na bosusu.

¹⁵Mwali abala na nde bo, Kumu, pani madiba mamina bo nita'ka koko ekangola, na nitadoa koko ya a boloka.

¹⁶Yesu abala na nde bo, Kε abee muma'wε na hula na nde jɔno.

¹⁷Mwali asɔmbeja bo, Mbi napeliti momi. Yesu abala na nde bo, Abali wε bo opeliti momi, olongi;

¹⁸mojɔ bo odaka na bami batano, na yona odi na wε edεye aditi nongo muma'wε. Mojɔ mobali wε modi soti.

¹⁹Mwali abala na nde bo, Kumu, mbi nasipoaka edεye bo wε odi motɔndɔi.

²⁰Batata basu basakoa Njambe a mono mu; ino ko obalakani bo bato babwani bosakoa Njambe oko a esika yena edi a Yelusalema.

²¹Yesu abala na nde bo, Mwali, hokea mhi. Ôsakoani Sango a masu mangɔngɔ, te nongo a mono mu, isa a Yelusalema.

²²Ino otajebakani yona osakoaka no. Iso ko bojebaka yona osakoaka so, mojɔ bo boheleja bocingi na BaYuda.

²³Ehole ekεkε adoe, ee emei edεye, na basakoi basoti badi bosakoa Sango a mwembo na soti, mojɔ bo Sango apalaka bo basakoi bande bamosakoe boa.

²⁴Njambe adi mwembo, na baya bamosakoaka babwani bomosakoa a mwembo na soti.

²⁵Mwali abala na nde bo, Najebaka bo Masiya (yona odi na kombe Klisto) adi bodoa. Iyo akadoa, ajebuja so ngando jesusu.

²⁶Yesu abala na nde bo, Mbi nadi oko yo, mbi yona obalaka na wε.

²⁷Bacingami bande bahula a ehole emina. Ibo bakamo a mojɔ bo asolaka na mwali omina. Pεrε nongo okina obu ko obala bo, Opalaka nde? isa, Osolaka na nde mojɔ moye?

²⁸Oko boa mwali akina teni ende, asombɔ a ngando, na abala na bato bangando bo,

²⁹Doani onjeni moto yona otɔndɔini ngando jesusu jikɔ mbi. Isa yo adi Masiya?

³⁰Ibo badonga a ngando a bodoa ai Yesu.

³¹A ehole emina, bacingami bande bapala bo ayake. Babala na nde bo, Labi, yaka.

³²Iyo ko abala na bu bo, Mbi nadi na mia maboyaka madi no pε bojeba.

³³A mojɔ momina, bacingami babalana bo, Isa moto amolwεi eka a boyaka?

³⁴Yesu abala na bu bo, Mambi mia madi oko bo nakɔe bolulea boyona olomani, na bo nasiejae elomu ende.

³⁵Ino obalakani bo ndongo jidi bokpeta na songe banεi. Mbi ko natɔndɔkɔ no bo, Angɔjɔni miso! Anjani gbie! Jikpeti, na jibwani na bojua.

³⁶Moto yona ojuaka asɔkɔ ndese, na aboleaka jia jijuaka yo oko a bomɔ bua bodi na bosusu. Oko boa, yona onaka gbie, na yona ojuaka, badi bosepa pongono.

³⁷Mondε modi na soti bo, Okina anaka gbie, na otongo ajuaka.

³⁸Ino oiliani nongo a esika elomi mbi no a bojua. Batongo balia molio, ino ko osangoini bilomu bibu.

³⁹BaSamalia banεnε bamojimea a mojɔ mobikenge bitata mwali bo, Iyo atɔndɔini ngando jesusu jikɔ mbi.

⁴⁰Oko boa, yana adoa BaSamalia ai Yesu, bamongɔɔnɔ bo ayeyoe na bu, na ayeyoa masu mabae a esika emina.

⁴¹Bato batongo banεnε bajima a mojɔ moebaeli eYesu yo mεnε.

⁴²Ibo babala na mwali bo, Iso bojimaka edεye, te a mojɔ moekenge ebali wε; bomoki so bεnε, na bojebaka bo yo adi Moheleja ongondo na soti mεnε.

Yesu a cialile

⁴³Yana asia masu ma mabae, Yesu angɔ ena, na ake a Galile

⁴⁴Iyo mεnε abala bo motɔndɔi aditi na ekumu a likota linde mεnε.

⁴⁵Amea yo a Galile, bato baGalile bamosɔ bopele, mojɔ bo ibo bama kε a Kola pongono, na banε ngando jesusu jikɔ yo a Yelusalema a ehole eKola.

⁴⁶Oko boa adoa koko a Kana, ngando eGalile, esika ema hekoja madiha vino. Okina kapitεni okumu adaka a Kapalanauma; na mwana'nde momi adaka na yogo.

⁴⁷Yana aka yo bo Yesu adonga oho Yuda, na bo amea a Galile, akε ai yo, na amongɔɔnɔ bo adoe a boheleja mwana 'nde yona odika ndoko pε bo agwε.

⁴⁸Yesu abala na nde bo, Omiti nεni mindumba na bimbete, otajimani nongo.

⁴⁹Kapitεni okumu amosɔmbeja bo, Kumu, doa edεye bo mwana 'mbi asaka gwa.

⁵⁰Yesu abala na nde bo, Yana; mwana 'wε aheli. Moto omina ajima ekenge ebala Yesu na nde, na ayana.

⁵¹Adalaka yo a njea, bakɔmeli bande basongana na nde, na bamotɔndɔ bo mwana'nde ahela.

⁵²Iyo abahɔjɔ ehole ebanga yo bossɔ bopele, na bamosɔmbeja bo, Yogo ende esiabi mɔkɔ a ebole une *heure*.

⁵³Oko boa sange 'mwana ajeba bo ehole emina edaka ehole ema bala Yesu na nde bo, Mwana 'wε aheli. Na yo ajima, yo mεnε na bato bande basusu.

⁵⁴Iye edi embete ebibae ekɔ Yesu a Galile, yana adonga yo a Yuda.

Yoane 5

Yesu Aheleja Moto Mondɔke

¹Ngɔngɔ jimina, Yesu akε a Yelusalema, mojɔ bo ekina Kola eBaYuda edaka oho.

²Likina lilebo lidi a Yelusalema, libati na njea ebata. Lidi na biseba bitano, na kombe emina edi Beteseda a LiEbele.

³Bato babego banεnε mεnε badaka basambi a biseba bimina, bagwa-miso, bamitengu, na bandɔke. (Bambaka bohua bomadiba

⁴mojɔ bo obwεnji oDiko atita oko a lilebo bikina bihole, na madiba matɔkɔ. Na moto yona otitea a madiba boso yana atɔkɔ madiba, ahela a yogo ende.)

⁵Momi omɔci adaka ena yona oma sama na ekina yogo bianga domi-isato na bianga bomwambe.

⁶Yesu amonε asambi, na ajeba bo ama yeyoa ekoka boa. Abala na nde bo, Opalaka ohele?

⁷Moto yona odaka na yogo amosɔmbeja bo, Kumu, mbi napeliti moto a botiteja mbi ta madiba a ehole etɔkɔkɔ madiba. Yana atitaka mbi, okina otongo atitaka a boso bombi.

⁸Yesu abala na nde bo, Angɔ! Tomba litɔkɔ liwε! Dala!

⁹Moto omina ahela a yogo ende bokpa mεnε, atomba litɔkɔ linde na adala. Busa bomina bodaka busa boSabata.

¹⁰A mojɔ momina, BaYuda babala na moto yona ohela a yogo ende bo, Busa bu bodi Sabata; ebɔngiti bo otombe litɔkɔ liwε.

¹¹Iyo ko abasɔmbeja bo, Moto yona ohelejaini abali na mbi bo, Tomba litɔkɔ liwε na dala.

¹²Bamohɔjɔ bo, Moto omina nda, yona otɔndɔi wε bo otombe litɔkɔ liwε bo odale?

¹³Moto ko yona ohela a yogo aijeba moto omina, na Yesu yo mɛnɛ ama donga, mojɔ bo bato badaka banɛnɛ a esika emina.

¹⁴Yesu amotana ngɔnɔ a tempelo, na abala na nde bo, Ika! wε oheli a yogo ewε. Yε bokɔ koko bobe, bo osaka nε mokina monɔnɔ mua monɔi na bobe.

¹⁵Moto omina akε ajebɛjae BaYuda bo yona omoheleja adi oko Yesu.

¹⁶A mojɔ momina, BaYuda babanga bonɔngeja Yesu, ema bo akɔkɔ ngando jimina a busa boSabata.

¹⁷Yesu ko abasɔmbeja bo, Sangwa'mbi adi oko a elomu, na mbi koko nakɔkɔ elomu.

¹⁸Oko boa, BaYuda bahɛjɛ bingi bo bamowoe, mojɔ bo aisopa mobeko moSabata pε; abea koko Njambe Sangwa'nde, na asabwaneja na nde amεci.

Mojɔ Mɔbomɔ

¹⁹Yesu abasɔmbeja bo, Mbi natɔndɔkɔ no na soti bo, Mwana t'ahɔnɔke bokɔ mokina mojɔ yo mɛnɛ; akɔkɔ oko mua monekε yo bo Sango akɔkɔ. Ngando jisusu jikɔkɔ Sango,—Mwana akɔkɔ boa pongono.

²⁰Mojɔ bo Sango adi na Mwana ngenjɔ, na amonejaka ngando jisusu jikɔkɔ yo. Adi bomoneja koko ngando jitongo jia jinci jiji a bokamoja no.

²¹Sango angɔjɔkɔ bagwake, na abapaka bomɔ. Oko boa koko, Mwana apaka bomɔ ai baya bapalaka yo.

²²Sango t'asambejake nongo moto. Akina elomu esusu ebosambeja a mɔmɔ maMwana,

²³bo bato basusu badea na lisuma ai Mwana, o asumaka bo Sango. Yona odi pε bosuma Mwana, aditi na lisuma ai Sango yona omoloma.

²⁴Mbi natɔndɔkɔ no na soti bo, Yona ohokeaka ebaeli embi, na ojimaka yona olomani, adi na bomɔ bua bodi na bosusu. Iyo atada nongo na esambi, mojɔ bo aheli a hogwa, na akwei a bomɔ.

²⁵Mbi natondok̄o no na soti bo bagwake mēnē badi boka kōpi eMwana 'Njambe a ehole yena ekéké adoe. Ee, ehole emina emei edéye, na baya bahokeaka bâhela.

²⁶Sango adi na bom̄ a tei ende mēnē. Oko boa Mwana as̄o epeeli ebom̄ ai yo bo adae na bom̄ a tei ende mēnē pongono.

²⁷Amopa koko kpaci a bosambeja, cina bo adi Mwana 'Moto.

²⁸Yε bokamoani a moj̄ momina. Bokina busa, bato basusu baya badi a bisem̄ bakabi kōpi ende na bamanabi.

²⁹Baya bak̄ bopele bangobí a bom̄; baya bak̄ ko bobè bangobí a moj̄ mobosamba.

³⁰Mbi naditi na kpaci a bok̄ mokina moj̄ mbi mēnē. Nasambejaka o akaka mbi. Esambi embi edi bojo, moj̄ bo mbi napalaka oko bolulea boSango yona olomani, te nongo bolulea bombi mēnē.

³¹Nakatata tati ai mbi mēnē, tati embi embi etada tati esoti

³²Okina otongo ko atataka tati ai mbi, na mbi najebaka bo tati etataka yo ai mbi edi tati esoti.

³³Ino olomani ai Yoane, na yo atata tati esoti.

³⁴Tati ko es̄k̄o mbi, editi tati emoto. Mbi ko nabali ngando ji bo oheleni.

³⁵Yoane adaka paka yena eyoaka, na epaka bohu; na odakani na posaa bosepa a moj̄ mobohu bonde ekina ehole.

³⁶Na tati embi ko, na tati eYoane, tati embi en̄i. Moj̄ bo Sango apani bilomu bo nabisiejae. Bilomu bimina, oko bilomu bik̄k̄o mbi, binejaka bo Sango alomani.

³⁷Sango yo mēnē yona olomani, atata tati ai mbi. Ino ko oikani nongo kōpi ende; omēni nongo elimo ende.

³⁸Ebaeli ende editi atei enu, moj̄ bo otajimakani yona oloma yo.

³⁹Odukakani a Mis̄on̄ moj̄ bo olékeni bo obolojaeni bom̄ bua bodi na bosusu a tei eMis̄on̄. Mis̄on̄ ko mibalaka a moj̄ mombi a bohu.

⁴⁰Ino ko otapalakani bodoa ai mbi bo os̄eni bom̄.

⁴¹Mbi te nas̄oke ekumu ai bato.

⁴²Najebaka bo ino opelitini ngén̄j̄ eNjambe a tei enu.

⁴³Mbi nadoi a kombe eSangwa'mbi, na otas̄ok̄oni mbi. Okina otongo ko akadoa a kombe ende mēnē, ômoson̄.

⁴⁴Ino odini bojima na ye? moj bo osokoni oko ekumu enu ai bato batongo; otadukakani nongo ekumu yena ehulaka ai Njambe pε.

⁴⁵T'oləni oko bo mbi nadi bodumba no a boso boSango. Okina otongo adi bodumba no, oko Mose; njingo enu ko edi oko ai yo.

⁴⁶Akəki no jima Mose, ka ojimini mbi pongono, cina bo yo ason a moj mombi.

⁴⁷Isa otajimakani misonc minde, odini bojima bikenge bimbi na ye?

Yoane 6

Yesu Ayakeja Bato Koto Jitano

¹Ngɔngɔ jimina, Yesu aleka a dɔngɔ ditongo dilibale liGalile (libale liTibelia).

²Bato bamosusa oho banenε menε, moj bo bama ne bimbete bikɔkɔ yo ai bato baya badaka na bego.

³Yesu akε na bacingami bande a mokina mono monenεne bo adae ena.

⁴Edika oko mweka pε a Kola-eBonc eBaYuda a ehole emina.

⁵Yesu, yana anja yo, anε bato kanga banenε menε bakεke adoe ai yo. Abala na Pilipo bo, Åsomba so milembε jo bo bato bamina bayake?

⁶Abala boa a bomeka Pilipo, moj bo yo menε ajeba mua mokanaka yo bokɔ.

⁷Pilipo amosɔmbeja bo, Elanka koto emoci jitabwana a bosomba milembε a moj mobu, bo moto na moto ase oko mweka pε.

⁸Okina mocingami onde, oko Andalea, mwanange eSimona Petelo, abala na nde bo,

⁹Okina yengε adi ya yona odi na milembε mitano na swi babae. Leka lomina ko lôbwana a moj mobato ba banenε?

¹⁰Yesu abala bo, Dejani bato nase. Njienjie jidaka jinεnε a esika emina, na bami bada na mbondo. Badaka isa koto jitano na dea.

¹¹Yesu atomba milembε mimina, ajongoa, na amikaba na bato baya badaka na mbondo. Abapa swi koko boa, na abagoleja.

¹²Yana agola bo basusu, Yesu abala na bacingami bande bo, Andoani bikenge bia bidikai, bo pεpε nongo ekenge ename.

¹³Oko boa babindoa, na balumeja sanga domi-na-jibae, oko na biketa bimilembε mitano bikina baya bayaka.

¹⁴Yana anε bato mondumba mokɔ Yesu, babala bo, Iyo adi soti motɔndɔi yona odi na sako ebodoa a ngondo.

¹⁵Yesu ajeba bo bakanaka bo bamopee na ngulu bo bamobakee kumu. Oko boa adonga, na ake a mono oko yo buki pε.

¹⁶Yana adipa busa, bacingami bande bake a mbongu.

¹⁷Yesu aipaka mea, na batamba a bwato bo balekele a Kapalanauma na bulu.

¹⁸Mula modaka a libale, mojø bo pwea edaka epipo.

¹⁹Ama bo duka kai kilometra jitano, ba'mi nε oko Yesu akadale a diko dimadiba. Badaka na bɔ yana abatama yo na bwato.

²⁰Iyo ko abala na bu bo, Yεni bobanga! Mbi yoyo!

²¹Oko boa bajima na! sepi bo bamosε a tei ebwato, na basεmeja bwato bokpa a esika ekεkε bo.

Molεmbε Moθomɔ

²²Bato badika banεnε a mbongu a dɔŋɔ ditongo dilibale. Yana ahoa busa, bainε nongo bwato ena, mojø bo bacingami bama tamba a bwato bomɔci bua bodaka ena. Bajeba koko bo Yesu aitamba na bu, mojø bo bama kε oko ibo buki pε.

²³Makina mato ko maya madonga a Tibelia masεmε hulelu na esika eyaka bo milεmbε, yana ajongoa Kumu.

²⁴Oko boa, yana anε bato bamina bo Yesu yo mεnε aditi ena, isa bacingami bande, batamba a mato mamina bo bamoduke a Kapalanauma.

²⁵Bamoboloja a dɔŋɔ ditongo dilibale, na babala na nde bo, Labi, odoi jɔno a ehole eni?

²⁶Yesu ahəsɔmbeja bo, Mbi natɔndɔkɔ no na soti bo odukakani mbi mojø bo oyakabmi na ogolabini na milεmbε, te nongo a mojø mobimbete binεkε no.

²⁷T'okɔeni oko elomu a mojø modia dia dibehaka; kɔni ko a mojø modia dia diyeyoaka oko a bomɔ bua bodi na bosusu. Mwana 'Moto âpa no dia dimina, mojø bo Sango abakea embete ende ai yo.

²⁸Ibo babala na nde bo, Êkɔ so nde bo bokɔe elomu eNjambe?

²⁹Yesu abasɔmbeja bo, Elomu eNjambe edi oko yeye, bo ojimeni yona oloma yo.

³⁰Oko boa babala na nde bo, Embete ekɔkɔ wε nda, bo so bonee na bojime? Ekɔkɔ wε nde?

³¹Batata basu bayaka manna a lisobe, mojø bo mosɔnɔmɔ bo, Abapa molεmbε moDiko bo bayake.

³²Yesu abala na bu bo, Mbi natɔndɔkɔ no na soti bo, Yona opa no molεmbε mua moDiko, te Mose. Sangwa'mbi ko apaka no molεmbε moDiko mosoti.

³³Mojo bo, molembé moNjambe modi Oko molembé mua modongaka oho Diko, na mopaka bomč a ngondo.

³⁴Ibo babala na nde bo, Kumu, bopa so molembé momina bihole bisusu.

³⁵Yesu abasombéja bo, Mbi nadi molembé mobomč. Moto akadoa ai mbi ata'ka koko nja. Yona ojimeaka mbi atada koko na ekangola.

³⁶Ino ko onini mbi na otajimakani mbi, o abali mbi na nu.

³⁷Ibaya basusu bapakani Sango bâdoa ai mbi, na mbi nitalona nongo moto yona odoaka ai mbi.

³⁸Mojo bo, mbi nadonga oho Diko bo nakœ bolulea bonde yona olomani, naidonga oho Diko bo nakœ bolulea bombi mènε.

³⁹Iyona olomani adi oko na bolulea bu, bo nangœjœ basusu bapaka yo mbi a busa bosuka, pε bobungeja nongo omɔci obu.

⁴⁰Bolulea boSangwa'mbi bodi oko bo moto na moto yona onekε Mwana na omojimeaka, adae na bomč bua bodi na bosusu; na mbi namongœjœbí a busa bosuka.

⁴¹BaYuda badaka na manungunungu a mojo moekenge ebala yo bo, Mbi nadi molembé mua modonga oho Diko.

⁴²Babala bo, Iyo, te mwana oYosepa? Iso bojebaka sangwa'nde na ngwa'nde. Oko boa, yo abalaka bo, Mbi nadonga oho Diko, mojo moye?

⁴³Yesu abasombéja bo, Yeni bohima a tei enu.

⁴⁴Sango yona olomani amiti bilea moto, atadoa nongo ai mbi; na mbi namongœjœbí a busa bosuka.

⁴⁵Mosɔnɔmɔ a mikanda mibatɔndɔi bo, Njambe âbakoja basusu. Oko boa, moto na moto yona ohokeaka na okoaka na Sango adoaka ai mbi.

⁴⁶Pερε nongo moto one Sango. Iyona one Sango, oko yona odonga oho ai Njambe.

⁴⁷Mbi natɔndɔkɔ no na soti bo yona ojimaka adi na bomč bua bodi na bosusu.

⁴⁸Mbi nadi molembé mobomč.

⁴⁹Batata banu bayaka manna a lisobe na bagwa.

⁵⁰Molembé mu ko mohula oho Diko, na moto akayaka molembé momina atagwa nongo.

⁵¹Mbi nadi molembé mobom̄ mua mohula oho Diko. Moto akayaka molembé mu, âda na bom̄ oko na bosusu m̄en̄e. Na molembé môpa mbi modi oko munu mombi; namopa a moj̄ mobom̄ bongondo.

⁵²BaYuda babomana kit̄ a moj̄ momina. Babala bo, Iyo moto adi bopa so munu monde a boyaka o bo?

⁵³Yesu abas̄mbeja bo, Soti m̄en̄e, mbi nabalaka na nu bo, Omiti yakani munu moMwana 'Moto, na omiti mwakani makia mande, oditini na bom̄ a tei enu.

⁵⁴Iyona oyakaka munu mombi na omwakaka makia mambi, adi na bom̄ bua botasia, na mbi nâmonḡj̄obí a busa bosuka.

⁵⁵Moj̄ bo munu mombi modi mia masoti, na makia mambi madi emwakeli esoti.

⁵⁶Iyona oyakaka munu mombi na omwakaka makia mambi ayeyoaka a tei embi, na mbi nayeyoaka a tei ende.

⁵⁷Sango obom̄ aloma mbi, na bom̄ bombi bodi a tei ende. Oko boa yona oyakaka mbi âda na bom̄ oko a moj̄ mombi.

⁵⁸Molembé mua mohula oho Diko modi boa. Batata banu bayaka manna na bagwa. Moto ko akayaka molembé mumu, âda na bom̄ oko na bosusu.

⁵⁹Yesu abala mij̄ mimi, yana akojaka yo a smagoge eKapalanauma.

Bakina Bacingami Badonga. Mojimo moP̄etelo

⁶⁰Yana aka bo moj̄ momina, bacingami bande banen̄e babala bo, Ekenge emina edi epipo; odi bojima ekenge emina nda?

⁶¹Yesu ajeba bo bacingami bande bamohimaka a moj̄ momina; na ahala na bu bo, Ino odini bosaka libaku a moj̄ moekenge emina?

⁶²Môda bo, okaneni Mwana 'Moto akawee a esika edaka yo boso?

⁶³Mwembo p̄e mopaka bom̄; munu modi eka engasa. Bikenge bibali mbi na nu bidi mwembo, na bidi bom̄.

⁶⁴Bakina banu ko batajimaka. Moj̄ bo Yesu ajeba a bobanga m̄en̄e, baya baidaka na ejimeli, na ajeba koko yona odi bomokaba.

⁶⁵Abala koko na bu bo, Moj̄ mu mocingi na ekenge emi mbi bala na nu bo, P̄ep̄e nongo moto odi bodoa ai mbi, isa Sango atamopa njea.

⁶⁶Bacingami bande banen̄e badonga a ehole ernina, na baidala koko na nde.

⁶⁷A moj̄ momina, Yesu abala na bacingami domi-na-babae bo, Ino opalakani bodonga pongono?

⁶⁸Simona Petelo amosombaja bo, Kumu, iso bodi bokε ai nda? Odi na bikenge bibomɔ oko wε.

⁶⁹Iso bojimaka na bojebaka bo wε odi Yona Mosenɔke oNjambe.

⁷⁰Yesu amosombaja bo, Mbi naihɔ no domi-na-babae? Okina onu ko adi mwembo mobe.

⁷¹Iyo abala boa a mojɔ moYuda, mwana 'Simona Iskalio, yona odaka omɔci obu domi-na-babae; yo adaka mokabi onde.

Yoane 7

Kitε Ebato baYesu

¹Iyana asia mijɔ mimina, Yesu akεkε mengɔ minde oko a Galile pε. Aipala bokε mɔngɔ a Yuda, cina bo BaYuda badaka na mokano bo bamowoe.

²Yana ko abatama ehole eKola eBaYuda, oko Kola-eMaako,

³bananango babala na nde bo. Donga ya; kε oho Yuda bo bacingami bawε banεe bilomu bikɔkɔ wε.

⁴Mojɔ bo, isa moto apalaka bo bato bamojebe na soti, atakɔ nongo mojɔ a libombi. Akɔkɔ wε agando jiji, saneja a bohu a ngondo.

⁵Cina edi bo bananango mεnε baimojimea nongo.

⁶Yesu abala na bu bo, Ehole embi ebwanakini. Ehole enu ko ebwani masu masusu.

⁷Ngondo editi na nu soki; edi ko na mbi soki, mojɔ bo mbi namejaka mijɔ mibe mingondo a bohu.

⁸Kεni ko a Kola; mbi nitakε a Kola edεye, mojɔ bo ehole embi ebwanakini.

⁹Ama yo bala boa, ami dika oko a Galile.

¹⁰Bananango bake a Kola, na yo akε oko ngɔngɔ. Iyo ko aikε a bohu; akε oko a libombi.

¹¹BaYuda bamoduka a Kola. Babala bo, Adi yo jo?

¹²Bato babomana kitε bou mεnε a mojɔ monde. Bakina babala bo, Adi moto mopele. Batongo babala bo, Pεpε nongo mweka; alabojaka bato oko bolaboya.

¹³Pεpε nongo moto ko obala a mojɔ moYesu a boso bobato, cina bo babangaka BaYuda.

Yesu a Yelusalema

¹⁴Yana asia makina masu maKola, Yesu akwea a tempelo na abanga bokoja.

¹⁵BaYuda bakamoaa bou mene. Babala bo, Moto yo ajebaka Misongo na ye? Iyo aikoa nongo.

¹⁶Yesu abasombeja bo, Bokoja bombi boditi bombi mene; bodi oko bokoja boyona olomani.

¹⁷Isa moto apalaka bo akoe bolulea boyona olomani, adi bocingea bokoja bombi, isa bohulaka ai Njambe, isa nakojaka na kpaci embi mene.

¹⁸Yona okojaka na kpaci ende mene apalaka bo asakumejae. Yona ko opalaka bo akumejae yona omoloma, yo adi moto osoti, na bokosea boditi a tei ende.

¹⁹Opa no Mibeko nda? te Mose? Pape nongo okina onu ko osumaka Mibeko. Opalakani bowa mbi mojo moye?

²⁰Bato bamosombeja bo, Odi na mwembo mobe! Opalaka bowa we nda?

²¹Yesu abala na bu bo, Mbi nakoi mojo momoci, na okamoakani a mojo momina.

²²Ino benne olenakani moto ganda a busa boSabata, mojo bo Mose apa no mobeko momina. (Ekomele emina ko eihula ai Mose, ehula oko ai batata.)

²³Oko boa, isa otasopakani mobeko moMose yana alenaka no moto ganda a busa boSabata, okenjokoni na mbi mojo bo nahelejai moto a yogo a busa boSabata cina eye?

²⁴Sambejani na soti; t'osambejaeni oko esambasamba.

²⁵Bakina bato baYelusalema babala bo, Iyoyo, te moto odukaka bato bo bamowoe?

²⁶Anjani ko! Atondoko mwako a bohu, na batabalaka na nde nongo ekenge. Isa bakumu bajimi bo adi Masiya soti?

²⁷Bojebaka esika ehuli moto yoyo; Masiya ko akadoa, pape nongo moto odi bojeba esika ehulaka yo.

²⁸Oko boa, yana akojaka Yesu a tempelo, abekoa bo, Ojebakani mbi, na ojebakani esika ehuli mbi. Mbi nadoiti na kpaci embi mene. Iyona oSoti alomani; ino ko otamojebakani.

²⁹Mbi namojobaka, mojo bo nadonga ai yo, na yo alomani.

³⁰Badaka na posa bo bamopee a mojo momina. Pape nongo moto ko obakea ebai yo, mojo bo ehole ende eipaka mea.

³¹Bato bangando ko banene bamojimea. Ibo babala bo, Masiya akadoa, bimbete binde binjo bimbete bikoko moto yo?

³²BaPalusi baka bikenge bibalaka bato a moj̄ moYesu; na nganga na BaPalusi baloma bapolisi bo bamopee.

³³Yesu abala bo, Mbi nadi boyeyoa na nu mweka, na ngɔngɔ nadi boyana ai yona olomani.

³⁴Ino ôdukani mbi, pε ko boboloja mbi, na otahɔnɔkɔni bomea a esika edi mbi.

³⁵BaYuda babalana bo, Iyo akanaka bokε jɔ, bo so botamoboloja? Isa akanaka bokε ai BaYuda baya banangana a tei eBaEla, isa âkoja BaEla?

³⁶Gina eekenge ebali yo edi bo?—Ino ôdukani mbi pε ko boboloja mbi; na, Otahɔnɔkɔni bomea a esika edi mbi.

Madiha Mabomɔ

³⁷A busa bosuka, oko busa bonεnε boKola, Yesu angɔ na abekoa bo, Isa moto adi na ekangola, yε adoe ai mbi bo amwake.

³⁸Moto akajimea mbi, melo midua mimadiba mabomɔ mimana a molema monde, o abalaka Misɔnɔ.

³⁹Iyo abala boa a moj̄ moMwembo, cina bo baya bamojimea bawana bomosɔ ngɔngɔ. Moj̄ bo, Mwembo moipaka doa a ehole emina, cina bo Yesu aipaka kumama.

⁴⁰Yana aka bo bikenge bimina, bakina bato babala bo, Iyo adi Motɔndɔi yona, soti menε.

⁴¹Batongo babala bo, Iyo adi Masiya. Bakina ko babala bo, Masiya adi bomana a Galile?

⁴²Mokina mosɔnɔ motabalaka bo Masiya adi boda moto ombota eDawidi, moto oBɛtɛlɛmɛ, ngando edaka Dawidi?

⁴³Oko boa baidaka na monɔkɔ momɔci a moj̄ monde.

⁴⁴Bakina badaka na posa bo bamopee; endele ko, pεpε nongo moto obakea ebs ai yo.

⁴⁵Oko boa bapolisi basɔmbɔ ai nganga na ai BaPalusi. Ibo baba hɔjɔ bo, Ohulitini na nde moj̄ moye?

⁴⁶Bapolisi babasɔmbeja bo, Moto aipaka bala o abalaka moto omina, pεpε nongo omɔci.

⁴⁷BaPalusi babasɔmbeja bo, Ino opengoini pongono?

⁴⁸Bakina baku mu isa BaPalusi bamojimeaka?

⁴⁹Bato bangando ko, bato bandakeja, batajebaka Mibeko.

⁵⁰Nikodemo, (yona oma kε ai Yesu boso; yo adaka okina Obu;) abala na bu bo,

⁵¹Mibeko misu midumbaka moto, pε bopeta ka monɔkɔ monde, na pε bokokeleja mojɔ monde?

⁵²Ibo bamosɔmbeja bo, Adi wε koko moto oGalile? Okaduka odi bone bo motɔndɔi atamana nongo a Galile.

⁵³Na banangana, moto na moto a ndako ende.

Yoane 8

Mwali Obɔɔli

¹Yesu akε a Mono moOlive.

²Yana ko ahoa busa, akwea koko a tempelo ehume mεnε. Bato basusu bangando badoa ai yo, na yo ada na mobondo a bobakoja.

³Bakina basɔni na BaPalusi badoa ai yo na okina mwali. Bama kukoa mwali omina na bɔɔli, na bamomeja a boso bobato.

⁴Babala na Yesu bo, Mokoja, iso bokukoi mwali yoyo oko yana angεki yo bɔɔli

⁵Mose abekea so a Mibeko bo bowoe bato na matai baya bakɔkɔ boa. Wε ko obalaka bo?

⁶Ibo babala boa a bomeka Yesu, bo bamodumbe na mokina mojɔ. Yesu ko asumana, na asɔnɔ a kpɔtɔ na mosapi.

⁷Ibo ko bamohɔjɔ koko, pε bokina. Oko boa, Yesu asunoa, abala na bu bo, Isa okina onu aditi nongo na bobe, ye amomae Iitai liboso.

⁸Asumana koko, na asɔnɔ a kpɔtɔ na mosapi.

⁹Ama bo ka ekenge emina, basuku ba'mi banga oko boyana, na bato bayana omɔci-omɔci oko a moto osuka. Yesu adika yo buki pε, oko na mwali yona odaka ami a boso bonde.

¹⁰Yesu asunoa, abala na nde bo, Mwali, badi jɔ? Moto adumbiti wε nongo omɔci?

¹¹Iyo amosɔmbeja bo, Kumu, pεpε nongo moto. Yesu abala na nde bo, Mbi pongono, nitadumbaka wε. Yana; t'oyebí kɔ koko bobe.

Yesu Bohu Bongondo

¹²Yesu abala koko na bato bo, Mbi nadi bohu bongondo. Moto akacingama na mbi, atadala a modidi; âda oko na bohu bobomɔ.

¹³BaPalusi babala na nde bo, Wε otataka tati ewε mεnε; tati ewε editi tati esoti.

¹⁴Yesu abasombéja bo, Nongo nakatata tati embi méné, edi tati esoti, mojó bo mbi najebaka esika ehula mbi, na esika ekéké mbi. Ino ko otajebakani esika ehula mbi na esika ekéké mbi.

¹⁵Ino osambejakani oko bosambeja bobato. Mbi ko nitasambejaka nongo moto.

¹⁶Mbi ko nakasambeja, bosambeja bombi bodi bosambeja bosoti, mojó bo nitasambejaka moto mbi buki pε. Sango yona olomani adi na mbi.

¹⁷Mosɔnɔmɔ a Mibeko minu bo tati ebato babae edi tati esoti.

¹⁸Mbi yona otataka tati a mojó mombi méné nadi omɔci, na Sango yona olomani atataka tati a mojó mombi pongono.

¹⁹Ibo babala na nde bo, Sangwao adi jɔ? Yesu abasombéja bo, Ino otajebakani mbi, na otajebakani Sangwa'mbi. Akɔki no jeba mbi, ka ojebini Sangwa'mbi pongono.

²⁰Yesu abala bikenge bimina yana akojaka yo a tempelo, oko a esika edaka nguku ebipeeli. Pεpε nongo moto ko omopea, mojo bo ehole ende eipaka mea.

²¹Yesu abala koko na bu bo, Mbi nakeké nayane. Ino ôdukani mbi, na ôgwani a bobe bonu. Otahɔnɔkɔni hodoa a esika ekéké mbi.

²²Oko boa BaYuda babala bo, Isa âsa'wa yo méné? mojó bo abali bo, Otahɔnɔkɔni bodoa a esika ekéké mbi.

²³Iyo abala na bu bo, Ino odini bato banase. Mbi ko nahula oho Diko. Ino odini bato bangondo ye. Mbi ko naditi ongondo ye.

²⁴Mbi nabali na nu bo ôgwani a jibe jinu, mojó bo omiti jimani bo mbi nadi yo, ôgwani soti a jibe jinu.

²⁵Ibo babala na Yesu bo, Wε odi nda? Yesu abasombéja bo, Oko yona obala mbi na nu eyou.

²⁶Ino odini na mijɔ minéné; na mbi nabwani bobala na nu na bosambeja no a mojɔ momina. Iyona ko olomani adi yona oSoti; mbi natɔndɔkɔ ngondo oko ngando jiki mbi na nde.

²⁷Ibo ko baicingea bo abalaka na bu a mojɔ moSango.

²⁸Oko boa Yesu abala bo, Omaka ngɔjɔni Mwana 'Moto diko, osa ko ojebeni bo mbi nadi yo, na bo mtakɔkɔ nongo mojɔ na kpaci embi méné. Mbi nabalaka oko mijɔ mikojaka Sango mbi.

²⁹Iyona olomani adi na mbi. Iyo t'akmake mbi buki, mojɔ bo nakɔkɔ ngando jia jimosepejaka bihole bisusu.

³⁰Bato banéné bamojimea yana abalaka yo bikenge bimina.

Mojo Mosoti

³¹Yesu abala na BaYuda baya bamojimea bo, Okayeyoani a ebaeli embi, odini bacingami bambi na soti.

³²Ôjebani mua mosoti, na Soti êcingoa no.

³³Ibo bamosombeja bo, Iso bodi bana baAbalayama. Bodakini babuli bamoto. Oko boa, abali wε bo, Ôcingoamani; cina edi bo?

³⁴Yesu abala na bu bo, Mbi natɔndɔkɔ no na soti bo, Moto yona okɔkɔ bobe adi mobuli obobe.

³⁵Mobuli t'adake a ndako na bosusu; yona ko odi mwana ayeyoaka na bosusu.

³⁶Oko boa, Mwana akasikoa no, ôdani basɔmi na soti.

³⁷Mbi najebaka bo odini bana baAbalayama; endele ko, opalakani bowa mbi mojo bo oditini nongo na pokiso a tei enu a mojo moebaeli embi.

³⁸Mbi nabalaka oko ngando jineke mbi na Sangwa'mbi; ino pongono, okɔkɔni ngando jineke no na Sangwa'nu.

³⁹Ibo bamosombeja bo, Sangwa 'su oko Abalayama. Yesu abala na bu bo, Akɔki no da bana baAbalayama, ka odaeni na ekɔmeli eAbalayama.

⁴⁰Oko edεye, odukakani njea a bowa mbi, mbi yona otɔndɔkɔ no mijɔ misoti missɔ mbi ai Njambe. Abalayama aikɔ nongo boa.

⁴¹Ino odini oko na ekɔmeli esangwa'nu. Ibo babala na nde bo, Iso boditi bana babɔɔli; bodi na Sangwa'su omɔci, oko Njambe.

⁴²Yesu abala na bu bo, Njambe, akɔki yo da Sangwa'nu, ka opalini mbi, mojo bo mbi namana ai Njambe, nahula oko ai yo. Naidoa na kpaci embi mεnε; iyo alomani.

⁴³Otacingeakani ngando jibalaka mbi mojo moye? Mojo bo otahɔnɔkɔni bohokea ebaeli embi.

⁴⁴Ino odini oko bana basangwa'nu Satana, na opalakani bokɔ ngando jipalaka sangwa'nu. Iyo adaka mowoi oko a bobanga mεnε, na acingiti nongo na ngando jisoti, mojo bo Soti editi a tei ende. Yana abalaka yo na bokosea, abalaka oko kɔpi ende mεnε, mojo bo adi mokosei, na sange 'bokosea.

⁴⁵Mbi ko, nongo abalaka mbi ngando jiSoti, otajimakani mbi.

⁴⁶Okina onu adi bodumba mbi na mojo mobe? Abalaka mbi ngando jisoti, otajimakani mbi mojo moye?

⁴⁷Iyona odi moto oNjambe ahokeaka bikenge biNjambe; oko boa ino otahokeakani, mojo ho oditini bato baNjambe.

⁴⁸BaYuda bamosombaja bo, Abali so bo odi MoSamalia na bo odi na mwembo mobe, bolongiti?

⁴⁹Yesu asombaja bo, Mbi naditi na mwembo mobe. Mbi nadi na lisuma ai Sangwa'mbi; ino ko osambojakani mbi.

⁵⁰Mbi nitadukaka ekumu a mojɔ mombi mɛnɛ; okina adi yona oedukaka, na yo asambejaka.

⁵¹Soti mɛnɛ, mbi natɔndɔkɔ no bo, moto akasuma ebaeli embi atanɛ nongo bogwa.

⁵²BaYuda babala na nde bo, Bojebi edεye bo odi na mwembo mobe soti. Abalayama agwa, na batɔndɔi pongono, na wε obalaka bo moto akasuma ebaeli ewε atanɛ nongo bogwa.

⁵³Wε onɔi tata osu Abalayama yona ogwa? Na batɔndɔi bagwa pongono. Odingaka bo wε odi nda?

⁵⁴Yesu abasombaja bo, Nakasakumeja mbi mɛnɛ, ekumu embi edi boda eka engasa. Iyona okumejaka mbi, oko Sangwa 'mbi; na ino obalakani bo yo adi Njambe onu.

⁵⁵Otamojobakani nongo mweka. Mbi ko namojebaka. Nakabala bo nitamojobaka, nadi boda oko mokosei o adi no. Mbi ko namojebaka, na nasumaka ebaeli ende.

⁵⁶Tata onu Abalayama adaka na sepi enɛnɛ a bone busa bombi. Abonɛ, na adaka na enanga.

⁵⁷BaYuda babala na nde bo, Wε onɛ Abalayama? wε yona omeakini bianga domi-itano?

⁵⁸Yesu abasombaja bo, Soti mɛnɛ; mbi natɔndɔkɔ no bo, Mbi nadaka oko Abalayama apetakini da.

⁵⁹A mojɔ momina, bandoa matai bo bamole. Yesu ko asabomba na amana a tempelo.

Yoane 9

Moto Omiso Mago

¹Adalaka yo a njea, Yesu anɛ okina momi yona odaka na miso mago; abotama boa.

²Bacingami bande bamohɔjɔ bo, Labi, okɔ bobe nda? moto yo, isa baboti bande, yana abotama yo na miso mago?

³Yesu abasombéja bo, Te nongo yo isa baboti bande baya bako bobe; adi boa bo Njambe anejae bilomu binde a tei ende.

⁴Mbi nabwani bokø elomu eyona olomani a ehole emose. Bulu bokøkø adoe, na pøpø nongo moto obwani bokø elomu a ehole emina.

⁵Yana adi mbi a ngondo, nadi bohu bongondo.

⁶Abala yo boa, atwea lisçi a kpøtø, aliputoana na dømbi, na alisnoa a miso mamoto omina.

⁷Abala na nde bo, Kø asose a libale liSiloa. (Cina ekcombe emina edi Molomami.) Iyo ake, asasosa, na ahula na njønø ende.

⁸Mituteano minde, na baya bamonekø boso a yambo ende, babala bo, Iyo, te moto yona odaka na mobondo a bo'mba yambo?

⁹Bakina babala bo, Oko yo. Batongo babala bo, Pøpø; adi ko na yema ende. Iyo menø ko abala bo, Mbi nadi oko yo.

¹⁰Ibo babala na nde bo, Osi njønø ewø o bo?

¹¹Iyo abasombéja bo, Moto yona odi na kombe Yesu apøtøi dømbi, asuoi mbi miso, na atøndøi mbi bo, Kø asasose a Siloa. Oko boa, mbi nakei, nasasosi, na nasi njønø embi.

¹²Bamohøjø bo, Adi yo jø? Iyo asombéja bo, Nitajebakadea.

Kitø eBaPalusi

¹³Badoa ai BaPalusi na moto yona omaka da na miso mago.

¹⁴Mojø bo busa bopøtø Yesu dømbi, na bodipoa yo miso mamoto omina, bodaka busa boSabata.

¹⁵Oko boa, BaPalusi pongono bamohøjø a mojø mobo'sø bonjønø ende. Iyo abala na bu bo, Asuoi miso mambi dømbi, nasasosi, na edøye nanekødea.

¹⁶Bakina BaPalusi babala bo, Moto omina aditi moto oNjambe, mojø bo atasumaka mobeko moSabata. Batongo ko babala bo, Moto akada mobe adi bokø bimbete bimina na ye? Oko boa, banoana moano a mojø momina.

¹⁷Babala koko na moto omiso mago bo, We oløkø bo, a mojø momoto yona odipoi miso mawø? Iyo asombéja bo, Adi motøndøi.

¹⁸BaYuda ko baijima bo yo amaka da na miso mago, na bo asø njønø ende. Oko boa babea baboti bamoto yona osø njønø ende.

¹⁹Babahøjø bo, Moto yoyo adi mwana'nu? Obalakani bo yo abotama na miso mago? Oko boa asi njønø ende na ye?

²⁰Baboti bande basombéja bo, Iso bojebaka bo adi mwana'su, na bojebaka bo abotama na miso mago.

²¹A mojɔ monjɛnɛ ende ko, botacingeakadea; na botajebaka moto yona odipoi miso mande. Mohɔjɔni yo mɛnɛ. Aditi yɛngɛ. Abwani bobala mojɔ yo mɛnɛ.

²²Baboti bande babala boa mojɔ bo babangaka BaYuda; cina bo BaYuda bama jima bo moto akajima bo Yesu adi Masiya, badi bomomeja a sinagogue.

²³A mojɔ momina, baboti bande babala bo, Mohɔjɔni yo mɛnɛ. Aditi yɛngɛ.

²⁴Oko hoa, babea koko moto yona omaka da na miso mago. Babala na nde bo, Kumeja Njambe; iso bojebaka bo moto omina adi moto mobe.

²⁵Iyo abasombéja bo, Isa adi moto mobe, mbi nitajebakadea. Mojɔ momɔci mojebaka mbi modi oko bo mbi nadaka boso na miso mago, edɛye ko nanekɛdea.

²⁶Babala na nde bo, Mojɔ mokɔi yo ai wɛ nda? Adipoi miso mawɛ na ye?

²⁷Iyo abasombéja bo, Natombi bobala na nu, ino ko pɛ bohokea. Opalakani boka koko mojɔ cina eye? Ino pongono opalakani bo odaeni bacingami bande?

²⁸Ibo bamololea oko bololea. Babala na nde bo, Wɛ odi mocingami onde. Iso ko bodi bacingami baMose.

²⁹Bojebaka bo Njambe abala na Mose. Moto yo ko, botajebaka nongo esika ehula yo.

³⁰Momi abasombéja bo, Mojɔ mu modi mojɔ mobokamo soti! Iyo adipoi miso mambi, na otajebakani esika ehula yo.

³¹Bojebaka bo Njambe t'ahokeake bato babe. Njambe abokeaka oko moto yona omosakoaka, yona okɔkɔ bolulea bonde.

³²Bokakini bo okina adi bodipoa miso mamoto yona obotama na miso mago.

³³Isa moto yo ahuliti ai Njambe, ka abwaniti bokɔ mokina mojɔ boa.

³⁴Bamosombéja bo, Wɛ opalaka bokoja so, wɛ yona obotama kanga mobe mɛnɛ? Oko boa bamobengana oko bobengana.

³⁵Yesu aka bo bamobengana. Yana amotana yo, abala bo, Wɛ ojimeaka Mwana 'Njambe?

³⁶Iyo asombéja bo, Kumu, yo adi nda, bo namojimee?

³⁷Yesu abala na nde bo, Omoni; mbi yoyo, mbi yona obalaka na wɛ.

³⁸Iyo abala bo, Kumu, mbi najimakadea. Atita na magbunda bo amosakoe.

³⁹Yesu abala bo, Mbi nadoi a ngondo ye a bosambeja, bo baya badi na miso mago base njene, na bo baya badi na njene bagwe miso.

⁴⁰Bakina BaPalusi baya badaka a esika emina baka ekenge emina, na babala na nde bo, Iso bodi koko na miso mago?

⁴¹Yesu abasombeja bo, Akoki no da na miso mago ka oditini na lindo. Ino ko obalakani bo odini na njene; oko boa odini oko na lindo.

Yoane 10

Yesu Mobanei Mopele

¹Mbi natondok no na soti bo moto amiti kwea a modipe mohkutu libata, na akakwea a ekina njea etongo, adi oko mobi na mobengo.

²Yona okweaka a modipe adi oko mobanei obata.

³Monjeli olikutu adipoaka ai yo. Bata bakaka kopi ende. Iyo abeaka bata bande mené na kombe jibu, na amanaka a boso bobu.

⁴Akameja bata bande mené basusu, adalaka a boso bobu, na bata bamosusaka, moj bo bakaka monok monde.

⁵Batasusa nongo mokendeli; badi bomocia oko bocia, moj bo bata'kaka minok mibakendeli.

⁶Abala Yesu na bu monde momina, baicingea nongo cina emoj mobala yo na bu.

⁷Yesu abala na bu koko bo, Mbi natondok no na soti bo, Mbi nadi modipe mobata,

⁸Basusu baya badoa oko mbi napetakini doa badaka babi na mibengo; bata ko baibahokea.

⁹Mhi nadi modipe. Moto akakwea na mbi âbel. Adi bokwea, na bomana, na bone leka loboyaka.

¹⁰Mobi adoaka oko a boba, na bowa, na bobeja. Mbi nadoi bo badea na bomo, bomo oko boto.

¹¹Mbi nadi mobanei mopele. Mobanei mopele adi bogwa a moj mobata.

¹²Yona odi oko mosali p aditi nongo mobanei. Bata baditi bata bande mené. Iyo akane swa akadoe, akinaka bata na aciaka. Oko boa swa apeaka bata, na abananganejaka.

¹³Iyo aciaka moj bo adi oko mosali p; t'aleke bata na soti.

¹⁴Mbi nadi mobanei mopele. Najebaka bambi mènè, na bambi mènè bajebaka mbi

¹⁵o ajebaka mbi Sango na ajebaka Sango mbi. Mbi napaka mohelo mombi a moj̄ mobata.

¹⁶Nadi koko na bata batongo bay a bacingiti na likutu di. Nadi bodoa na bu pongono, na bâka monɔkɔ mombi. Oko boa bwela bôda oko omɔci, na mobanei omɔci.

¹⁷Sangwa'mbi adi na mbi ngenjɔ, moj̄ bo napaka mohelo mombi bo namose koko.

¹⁸Pεpe nongo moto okatoaka mohelo mombi; namopaka mbi mènè. Nadi na kpaci bo namorpε, na kpaci bo namotombe koko; mobeko mosɔ mbi ai Sangwa'mbi oko mu.

¹⁹BaYuda basoa mosoo a moj̄ mobikenge bimina.

²⁰Bakina babu babala bo, Iyo adi na mwembo mobe; adi na lilale; omohokeani moj̄ moye?

²¹Bakina batongo babala bo, Ibi biditi nongo bikenge bimoto yona odi na mwembo mobe. Mwembo mobe modi bodipoa miso mabato bay a bagwa miso?

Yesu a Yelusalema

²²Kola eBohengemε edaka a Yelusalema a edidi epio.

²³Yana adaka Yesu akadale a tempelo a dɔngɔ dieseba eSɔlɔmɔ,

²⁴BaYuda badoa na bamohika. Babala na nde bo, Okinaka so na mokakwano ekoka ye moj̄ moye? Tɔndɔ so a bohu isa wε odi Masiya.

²⁵Yesu abasɔmbeja bo, Mbi natɔndɔ no, na otajimakani. Bilomu bikɔkɔ mbi a kombe eSangwa'mbi binejaka moj̄ mombi a bohu.

²⁶Ino ko otajimakani, cina ho oditni bata bambi.

²⁷Bata bambi bakaka monɔkɔ mombi. Mbi nabajebaka, na basusaka mbi.

²⁸Mbi nabapaka bomɔ bua bodi na bosusu. Batagwa nongo, na pεpe nongo moto ôbacinoa a ebɔ embi.

²⁹Sangwa'mbi yona obapani anɔi basusu, na pεpe nongo moto obwani bobacinoa a mɔmɔ maSangwa'mbi.

³⁰Iso na Sangwa'mbi bodi oko omɔci.

³¹BaYuda bandoa koko matai bo bamole matai.

³²Yesu abala na bu bo, Mbi nanejakabi no bilomu bipele binene biSangwa'mbi Olakani mbi matai a mojɔ moekina ebilomu bitnina?

³³BaYuda bamosombaja bo, Iso bot'a'laka wε matai na cina eelomu epele, oko a mojɔ bo otangolaka Njambe. Mojɔ bo obalaka bo odi Njambe, wε yona odi oko moto pε.

³⁴Yesu abasombaja bo, Moisɔnɔmɔ a Mibeko minu bo? Mbi nabala bo odini banjambe.

³⁵Isa yo ababea banjambe, oko bay a basɔ Ebaeli eNjambe, (na Mosɔnɔ motakputoa)

³⁶obalakani na mbi bo natangolaka Njambe, mojɔ bo nabali bo nadi Mwana 'Njambe, mbi yona ohengeme na Sango, na alomini a ngondo?

³⁷Isa mbi nitakɔkɔ bilomu biNjambe, t'ojimeni oko mbi.

³⁸Isa ko nabikɔkɔ, jimani bilomu bimina isa ojimitini mbi mεnε, bo ojebeni na ojimeni bo Sango adi a tei embi, na mbi a tei ende.

³⁹Bakenga koko bo bamopee, yo ko apinoa a mɔmɔ mabu.

Yoane 11

Yesu Angɔjɔ Lazalo a Bogwa

¹Okina mom adaka na yogo, kombe ende Lazalo, moto oBetama, ngando eMalia na mwangwa'nde Malata.

²Lazalo yona odaka na yogo, adaka ngεnε eMalia yona osnoa Kumu malasi, na ohakoa bibota binde na swe jinde.

³Oko boa ngεnε jiLazalo baloma monɔkɔ ai Yesu bo, Kumu, yona odi wε na epaeli asambi na yogo.

⁴Aka Yesu mwako momina, abala bo, Yogo ye editi ebogwa. Edi oko a mojɔ mobokumeja Njambe, na bo Mwana 'Njambe ase ekumu a mojɔ momina.

⁵Yesu adaka na epaeli ai Malata, na mwangwa'nde, na Lazalo.

⁶Iyo ko, yana aka yo bo Lazalo apekaka, ayeyoa koko masu mabae a esika edaka yo.

⁷Anɔ masu mamina, abala na bacingami bande bo, Yεni bosombé koko a Yuda.

⁸Bacingami babala na nde bo, Kumu, BaYuda bapalakabi bo bale wε matai oko na masu ma, na opalaka bo osombé koko oho?

⁹Yesu asombaja bo, *Heures* jidi domi-na-jibae a mose. Moto akadala na mose, atasaka nongo libaku, mojɔ bo anɛkε bohu bongondo.

- ¹⁰Moto ko akadala na bulu, adi bosaka libaku, mojɔ bo bohu boditi a tei ende.
- ¹¹Asieja yo bobala mijɔ mi, ajɔ na bn bo, Mina'su Lazalo ahwɛi hiɔ. Mbi ko nakɛke bo namosisojae.
- ¹²Bacingami babala na nde bo, Kumu, isa ahwɛi hiɔ, adi bohela a yogo.
- ¹³Yesu ko abala a mojɔ mobogwa boLazalo, na bacingami bale bo abalaka a mojɔ mohiɔ pe.
- ¹⁴Oko boa Yesu abatɔndɔ a bohu ho, Lazalo agwi!
- ¹⁵Nadi na sepi bo naidakabi oho, oko a mojɔ monu, bo ojimeni. Yeni so bokɛe ai yo edeye.
- ¹⁶Toma, yona odaka koko na kombe Lipasa, abala na bacingami batongo bo, Suani bokɛ, bo bogwe na nde!
- ¹⁷Yana amea Yesu, atana bo Lazalo adaka a esɛmɔ masu manɛi.
- ¹⁸Betania edi na Yelusalema hulelu, mosiso oko kilometra jisato na dea.
- ¹⁹Oko boa BaYuda badoa banɛnɛ ai Malata na Malia bo babagɔmbejae a mojɔ mongɛnɛ ebu.
- ²⁰Malata ko, ama yo ka bo Yesu akɛke adoe, ami ke oko bo amolenoane. Malia ko adika oko a ndako.
- ²¹Malata abala na Yesu bo, Kumu, akɔki wε da jɔno ka ngɛnɛ embi agwiti.
- ²²Mbi ko najebaka bo oka'nga Njambe nongo edeye, Njambe adi bopa wε muu mongaka wε.
- ²³Yesu abala na nde bo, Ngɛnɛ ewε adi bongɔ koko.
- ²⁴Malata amosɔmbeja bo, Najebaka bo adi bongɔ koko a busa bosuka.
- ²⁵Yesu abala na nde bo, Mbi nadi Bongɔ, nadi koko Bomɔ. Iyona ojimeaka mbi âda koko na bomɔ, nongo akada mogwake.
- ²⁶Na yona odi mɔ na ojimeaka mbi atagwa nongo. Wε ojimaka mojɔ mu?
- ²⁷Iyo amosɔmbeja bo, Ee Kumu; mbi najimaka bo wε odi Masiya, Mwana 'Njambe, yona odaka na sako ebodoa a ngondo.
- ²⁸Ama yo bala boa, ami ke oko a bobea mwangwa'nde na bopɛtε bo, Mokoja adoi, na abɔjɔkɔ wε.
- ²⁹Aka yo ekenge emina, angɔ bokpa na akε ai Yesu.
- ³⁰Yesu ko aipaka mea a ngando. Adaka oko a esika esongana yo na Malata.

³¹BaYuda baya badaka na Malia a ndako a mojɔ moboyea na nde, yana anε bo Malia akangɔe pεlεpεlε a bomana, bamokimana, mojɔ bo balekε bo akεkε a esεmɔ a boyea oho.

³²Malia ko, yana amea yo a esika edaka Yesu, yana amonε yo, asadumba a bibota binde, na abala na nde bo, Kumu, akɔki wε da jɔno, ka ngεnε embi agwiti.

³³Yana anε Yesu bo yo ayeaka, na BaYuda pongono baya badaka na nde, abema mobemo a molema monde, na ada na monɔngɔ.

³⁴Iyo abala bo, Omopuseabini jɔ? Babala na nde bo, Kumu, doa okanje.

³⁵Yesu ayea bio.

³⁶A mojɔ momina, BaYuda babala bo, Anjani, adaka na nde epaeli soti.

³⁷Bakina babu ko babala bo, Moto yo, yona odipoa miso mamoto omiso mago, aibwanabi bokɔ mokina mojɔ, bo Lazalo aigwabi mojɔ moye?

³⁸Yesu abema koko mobemo, na amea a esεmɔ. Esεmɔ edaka oko engbungbulu a tei emonɔ, na edipama na litai linεnε.

³⁹Yesu abala bo, Dongejani litai. Malata, ngεnε emomi yona oma gwa, abala na nde bo, Kumu, apɔbi edεye, mojɔ bo adi ya masu manεi.

⁴⁰Yesu ko abala na nde bo, Mbi nabaliti na wε bo odi bone ekumu eNjambe okada na ejimeli?

⁴¹oko boa badongeja litai. Yesu akahoa miso diko, na ahala bo, Sesa, mbi nasakoaka wε mojɔ bo oki mbi.

⁴²Najebi bo okaka mbi bihole bisusu. Nabali boa ko a mojɔ mobato baya bahikaka mbi, bo bajime bo wε olomani.

⁴³Ama yo bala boa, ami bekoa oko bo, Lazalo! imana sokolu!

⁴⁴Mogwake amana sokolu; mɔmɔ mande na mako mande madaka makandamake na bisenja biesεmɔ, na boso bonde bohuama na litambala. Yesu abala na bu bo, Mocingoani; mokinani adale.

⁴⁵Bakina BaYuda banεnε baya badaka na Malia bajimea Yesu yana anε bo mojɔ mokɔ yo.

⁴⁶Bakina batongo ko bake ai BaPalusi na babatɔndɔ mojɔ mokɔ Yesu.

Ndungu a Bowa Yesu

⁴⁷Basuku banganga na BaPalusi babolea likita libajuji. Babala bo, Iso bôkɔ boni? Moto omina akɔkɔ mindumba minεnε.

⁴⁸Bokamokina boa, bato basusu mènè badi bomojimea, na BaLoma badi bodoa a bobeja ngondo esu na likota lisu.

⁴⁹Okina obu, kombe ende Kayapa, yona odaka mosuku onganga a yanga emina, abala na bu bo. Ino otacingekani nongo mojɔ.

⁵⁰Na bogwa bomoto omɔci a mojɔ mobato basusu, na bodimoa bolikota lisusu, otaje-bakani bo moto omɔci akagwea bato basusu bo likota lisusu litadimoa, enɔi na bopele ai no bo moto omɔci agwɛ, bo likota lisusu litadimoa?

⁵¹Iyo aibala boa na bolɛ bonde mènè. Adaka mosuku onganga a yanga emina, na apa eseko bo Yesu adi bogwa a mojɔ moliko talihbu;

⁵²te a mojɔ molikota limina pɛ, oko bo abolee bana basusu baNjambe baya banangana a esika emɔci.

⁵³Oko boa badumba ndungu a busa bomina bo bamowoe.

⁵⁴A mojɔ momina, Yesu aidala koko a tei eBaYuda a bohu. Adonga ena, na akɛ a ekina ngando kombe Epalaima. Esika emina edaka hulelu na lisobe, na ayeyoa oho na hacingami bande.

⁵⁵Edika mweka pɛ a ehole eKola-eBono eBaYuda. Bato banenɛ badonga a bisika bitongo, a bokɛ a Yelusalema, bo basasenojae a mojɔ moKola-eBono.

⁵⁶Ibo baduka Yesu, na babalana yana adaka bo a tei etempelo bo, Olɛkɛni bo? Isa atadoa a Kola?

⁵⁷Basuku banganga na BaPalusi bama dumba mobeko bo moto akajeba esika edi yo, adi bobajebeja, bo bamopee.

Yoane 12

Malia Asuoa Yesu Malasi

¹Kola-eBono edika oko masu masamano pɛ yana amea Yesu a Betania, esika edaka Lazalo oma ngɔjɔ Yesu a bogwa.

²Bakalea mia a mojɔ moYesu a esika emina, na Malata akɔ elomu emesa. Lazalo ko adaka okina obu baya badaka na Yesu a mesa.

³Malia atomba malasi mabobuno bonenɛ mènè, isa *litre* emɔci. Asuoa bibota biYesu malasi, na ahakoa bibota binde na swe jinde. Ndako esusu mènè eluma na soo epele emalasi.

⁴Okma mocingami onde omɔci, oko Yuda Iskalio yona odi bomokaba, abala bo,

⁵Iyo angɛjɛiti malasi mamina na pata mikama misato mojɔ moye, a bopa bato babokwali?

⁶Iyo abala boa moj̄ bo adaka mobi. Aidaka nongo na bole a moj̄ mobato babokwali.

⁷Yesu ko abala bo, Ye bomonɔngeja! Abanei eka emina a moj̄ mobusa bobopusea bombi.

⁸Odini na bato babokwali a tei enu masu masusu. Mbi ko naditi a tei enu na bosusu.

Yesu Akwea a Yelusalema

⁹Bato bangando banen̄e baBaYuda baka mwako bo Yesu adaka oho. Oko boa badoa, te a moj̄ moYesu pε; badoa a bone Lazalo pongono oma ngɔj̄ Yesu a bogwa.

¹⁰A moj̄ momina, basuku banganga badumba ndungu bo bawoe Lazalo pongono; moj̄ bo BaYuda banen̄e badonga, na bajima Yesu oko a moj̄ moLazalo.

¹²Iyana ahoa busa, bato banen̄e bay a bama doa a Kola, baka bo Yesu akεkε adoe a Yelusalema.

¹³Oko boa batomba malalo, na bake bo bamoleniane. Babekoa bo, Osana! Bojongoa ai yo yona odoaka a kombe eKumu! Kumu oYisalae!

¹⁴Yesu adaka abaki a mwana-punda oboloja yo, moj̄ bo, mosɔnɔmɔ bo,

¹⁵Mwamwali oSiona, ye bobanga! Anja, Kumu owe akεkε adoe. Adi abaki a mwana-punda.

¹⁶Bacingami bande baicingea cina ebikenge bimina a ehole emina. Yana ko akumama yo, basalejε bo bisɔnɔmɔ a moj̄ monde, na bo bingama koko na nde.

¹⁷Bato banen̄e bay a badaka na nde yana abea yo Lazalo bo amane a esem̄ yana amongɔj̄ yo a bogwa, batɔndɔ moj̄ momina pongono.

¹⁸Oko boa, bato banen̄e bay a baka mwako momondumba mok̄ yo, bake bo bamoleniane.

¹⁹A moj̄ momina, BaPalusi babalana bo, Onek̄eni bo otahɔnɔkɔni bok̄ mokina moj̄. Anjani, ngondo esusu ecingi na nde engbanga!

BaEla Baduka Yesu

²⁰Bakina BaEla badaka bacingi na bato bay a badoa a moj̄ mobosakoa a Kola.

²¹Ibo badoa ai Pilipo, moto oBetesaida, ngando eGalile. Bamo'nga bo, Kumu, iso bodi na posa bo bonε Yesu.

²²Pilipo ake atɔndɔe Andalea. Andalea ake na Pilipo, na batɔndɔ Yesu.

²³Yesu abasombéja bo, Ehole emei bo Mwana 'Moto akume.

²⁴Soti mènè, mbi nabalaka na nu bo, Ngua endongo emitì kwa a tei ekpòtò bo egwè, edi bodika oko ngasa. Ekagwa ko, edi bobota libota linènè.

²⁵Iyona opalaka mohelo monde mènè âmobungeja. Iyona ko olonaka mohelo monde mènè a ngondo ye, âmobanea a mojɔ mobomɔ bua bodi na bosusu.

²⁶Isa moto akɔmɛkɛ mbi, ye asuse mbi. Mokɔmeli ombi abwani boda oko a esika edi mbi. Sangwa'mbi âkumeja moto na moto yona okɔmɛkɛ mbi.

²⁷Edεye ko, molema mombi modi na monɔngɔ. Nadi bobala bo? Sesa, belejani a ehole ye? Pépé; mbi namei a ehole ye oko a mojɔ momina. Sesa, kumeja kombe ewε.

²⁸Kɔpi esi ko edongi oho Diko bo, Mbi naekumejai, na nâekumeja koko.

²⁹Emumu ebato bayá badaka ba'mi ena baka kɔpi emina, na babala bo, Bεi agami! Batongo babala bo, Obwεnji oDiko abali na nde.

³⁰Yesu abasombéja bo, Kɔpi emina edoi a mojɔ monu, te a mojɔ mombi.

³¹Ngondo edi bosamba edεye. Kumu ongondo ye âdumbama bokpa.

³²Mbi ko nakangɔjɔmɔ a diko dingondo, nâbilea bato basusu ai mbi.

³³Iyo abala boa a boneja tungu ebogwa bokɛkɛ yo agwε.

³⁴Bato bamosombéja bo, Iso bokaka a Mibeko bo Masiya adi boyeyoa na bosusu. Oko boa wε obalaka bo Mwana'Moto ângɔjɔmɔ diko mojɔ moye? Iyo Mwai na 'Moto adi nda?

³⁵Yesu abala na bu bo, Bohu bodi boyeyoa na nu oko ehole ekue pε. Dalani yana adi no na bohu, bo modidi motadipa no njea. Mojɔ bo, yona odalaka a modidi atajebaka nongo njea ekɛkɛ yo.

³⁶Adi no na bohu, jimani bohu bomina, bo odaeni bana babohu. Asieja yo bobala mijɔ mi, Yesu adonga na asabomba ai bo.

Bohu Bongondo

³⁷Nongo akɔkɔ yo bimbete binènè a boso bobu, baimojimea.

³⁸Oko boa ekenge ebala motɔndɔi Yisaya engama bo, Kumu, ojimi mwako mosu nda? Ebɔ eKumu eboloi ai nda?

³⁹A mojɔ momina, baihɔnɔ bojima; mojɔ bo Yisaya abala koko bo,

⁴⁰Iyo adimei miso mabu, na apingejai milema mibu, Bo batanε na miso, batacingea na milema, Basaka hekoa ai mbi bo nabahelæjae.

⁴¹Yisaya abala boa mojɔ bo yo anε ekumu ende, na abala mojɔ monde.

⁴²Endele ko, basuku bangando banené bamojimea. Ibo ko badaka na bo a moj̄ moBaPalusi, na baitond̄ moj̄ momina a bohu, bo batabameja a sinagoge.

⁴³Na esako ebato, na ekumu eNjambe, bapala gbo oko esako ebato.

⁴⁴Yesu abekoa bo, Moto yona ojimeaka mbi ajimeaka yona olomani, te mbi menē.

⁴⁵Iyona onéké mbi, anéké koko yona olomani.

⁴⁶Mbi nadoi o bohu a ngondo, bo yona ojimeaka mbi atayeyoa koko a modidi.

⁴⁷Moto aka'ka bikenge bimbi, pε ko bosuma bikenge bimina, mbi nitamosambejaka. Moj̄ bo, mbi nadoiti a bosambeja ngondo. Nadoi oko a boheleja ngondo.

⁴⁸Moto akalona mbi, pε bojima bikenge bimbi, adi na juji onde. Ekenge ebali mbi emosambejabí a busa bosuka.

⁴⁹Moj̄ bo mbi nabaliti na kpaci embi menē. Sango yona olomani abekeani bikenge bibobala na botond̄.

⁵⁰Mbi najebaka bo mobeko monde modi oko bom̄ bua bodi na bosusu. Oko boa, mbi nakabala, nabalaka oko mij̄ mipakani Sango.

Yoane 13

Yesu Asosa Bibota Bibacigami

¹Yana adaka Kola-eBon̄ pε bopeta mea, Yesu ajeba bo ehole ende emea, ehole ebodonga a ngondo ye, a bok̄ ai Sango. Amaka yo da na ngenj̄ ai bande menē baya badaka a ngondo, ami baneja oko ngenj̄ pε njengi.

²Satana ama sa bole a molema moYuda Iskalio, mwana oSimona, bo amokabe. Oko boa, yana ayakaka bo Kola,

³Yesu ajeba bo Sango ama kina ngando jesusu a mɔmɔ mande. Ajeba koko bo ama donga ai Njambe, na bo adi bosomb̄ ai Njambe.

⁴A moj̄ momina, yo anḡ a mesa, ahwa kasaka ende eya, atomba esume, na asadinga na esume emina.

⁵Ahangaja madiba a saani, abanga bososa bibota bibacingami, na abihakoa na esume ema dinga yo a hongo.

⁶Yana amea yo ai Simona Petelo, Petelo abala na nde bo, Kumu, wε odi bososa bibota bimbi?

⁷Yesu amosomb̄eja bo, Wε otacingeaka edεye moj̄ mok̄k̄ mbi; ôcingea oko ngɔnḡ.

⁸Petelo abala na nde bo, Pερε; otasosa nongo bibota bimbi! Yesu amosɔmbeja bo, Namiti sosa wε, oditi a libondo limbi.

⁹Simona Petelo abala na nde bo, Kumu, sosa mɔmɔ na molo mombi pongono, te bibota bimbi pε.

¹⁰Yesu abala na nde bo, Yona ososi mokuku monde mosusu abwani bososa oko bibota binde pε, bo adae mosusu oko na boseñɔ. Ino odini na boseñɔ, te basusu ko.

¹¹Mojɔ bo yo ajebaka yona odi bomokaba. Oko boa abala bo, Oditini na boseñɔ no basusu.

¹²Yana aseja Yesu bososa bibota bibu, alwa koko kasaka ende. Ada koko a mesa, na abala na bu bo, Osipoakani mojɔ mo'mi mbi kɔ ai no?

¹³Obeakani mbi Mokoja na Kumu onu, na olongini, mojɔ bo nadi boa.

¹⁴Oko boa, isa mbi nasosi bibota binu, mbi Kumu na Mokoja onu, toma sosanani bibota no bεnε.

¹⁵Mbi nanejai no ekoaneli bo okɔeni o ami mbi kɔ ai no.

¹⁶Soti mεnε, mbi natɔndɔkɔ no bo mobuli t'ankε moswa'nde; na obwεnji t'ankε yona omoloma.

¹⁷Isa ojebakani ngando jmina, ôdani na bojongoa okajikɔ.

¹⁸Nitabalaka a mojɔ monu basusu. Najebaka bato bahɔi mbi; mosɔnɔ mu ko modi bongama. Iyona oyakaka na mbi molembε angɔjɔi dilindi dinde a bodumba mbi.

¹⁹Natɔndɔkɔ no mojɔ momina edεye, oko mokwakini. Oko boa, mokakwa, odini bojima bo mbi nadi yo.

²⁰Mbi natɔndɔkɔ no na soti bo, yona osɔkɔ moto olomaka mbi, asɔkɔ mbi mεnε; na yona osɔkɔ mbi, asɔkɔ yona olomani.

Ngabi eYesu

²¹Aseja Yesu bobala boa, adaka na monɔngɔ a mwembo monde. Abala bo, Mbi natɔndɔkɔ no bo okina onu adi bokaba mbi.

²²Bacingami banjana oko bonja na mokakwano monεnε a mojɔ momoto obala yo.

²³Okina mocingami onde adaka akεmi a bupa bo Yesu,—Yesu adaka na nde ngεnɔjɔ.

²⁴Oko boa, Simona Petelo amojebeja na embete eebɔ bo ahɔ jɔe kombe emoto obala yo.

²⁵Yona odaka akemi a bupa boYesu amohojɔ ho, Kumu, moto omina nda?

²⁶Yesu amosɔmbeja bo, Nakadubea ekenge ye emolembɛ, na nakapa moto, edi oko yo. Oko boa adubea ekenge emolembɛ na aepa ai Yuda, mwana oSimona Iskalio.

²⁷Yana asɔ yo molembɛ, Satana akwea a tei ende. Yesu abala na nde bo, Kɔ bokpa Inojɔ mokɛkɛ wε akɔe.

²⁸Bayá badaka ko a mesa baicingea mojɔ mobala yo na nde.

²⁹Bakina babu balɛ bo Yesu amotɔndɔ bo asombe leka lua lotakaka na bu a mojɔ moKola, isa bo apɛ ekina eka ai bato babokwali; mojɔ bo Yuda abaneaka litɔngi lilikonja.

³⁰Oko boa, ama yo sɔ ekenge emolembɛ, ami mana oko bomana bokpa; na edaka bulu.

³¹Yana amana Yuda, Yesu abala bo, Mwana 'Moto akumejami edεye, na Njambe akumejami a tei ende.

³²Isa Njambe asi ekumu a tei ende, Njambe adi bomokumeja a tei ende mεnε, na âmokumeja bokpa.

³³Bana bambi bakɛkɛ, mbi nitada koko na nu ekoka. Ino ôdukani mbi. Mbi ko nabalaka na nu edεye, o abali mbi na BaYuda bo, Otahɔnɔkɔni bodoa a esika ekɛkɛ mbi.

³⁴Mbi napaka no mobeko moyene, bo opalaneni; toma palanani o apalaka mbi no.

³⁵Okadani na epaeli, moto ai mina'nde moto, bato basusu badi bojeba bo odini bacingami bambi oko na mojɔ momina.

³⁶Simona Pεtelo abala na nde bo, Kumu, akɛkɛ wε jɔ? Yesu amosɔmbeja bo, Wε otahɔnɔkɔ bosusa mbi edεye a esika ekɛkɛ mbi; ôsusa mbi oko ngɔngɔ.

³⁷Pεtelo abala na nde bo, Kumu, nitahɔnɔkɔ bosusa wε edεye mojɔ moye? Mbi nadi bogwa a mojɔ mowε.

³⁸Yesu amosɔmbeja bo, Odi bogwa a mojɔ mombi? Mbi natɔndɔkɔ wε na soti bo odi bongana mbi ngana jisato, oko kɔkɔ abelekoakini.

Yoane 14

Sako eMwembo Moɛnɔkɛ

¹Yεni bosanɔngeja a milema minu. Ojimeakani Njambe; jimani koko mbi.

²Ndako eSangwa'mbi edi na bikenge binεnε. Eipeta da boa ka mbi nabwani botɔndɔ no bo nakεkε a boselingoa esika a mojɔ monu?

³Nakakε a boselingoa esika a mojɔ monu, nâhula koko bo nase no ai mbi, bo odaeni oko a esika edi mbi mεnε.

⁴Ojebakani njea a esika ekεkε mbi.

⁵Toma abala na nde bo, Kumu, adi so pε bojeba esika ekεkε wε, bodi bojeba njea na ye?

⁶Yesu abala na nde bo, Mbi nadi Njea, na Soti, na Bomɔ. Pεpε nongo moto odi bodoa ai Sango; adi bodoa ai Sango oko na mbi.

⁷Akɔki no jeba mbi, ka ojebini Sangwa'mbi pongono. Edεye ko omojebakani, na omonini.

⁸Pilipo abala na nde bo, Kumu, aneja so Sango; mojɔ mopalaka so oko mu.

⁹Yesu abala na nde bo, Pilipo, mbi nayeyoi na nu ekoka ye, na ojebakini mbi? lyona oni mbi ani Sango pongono. Oko boa, obalaka bo, Aneja so Sango, mojɔ moye?

¹⁰Otajimaka bo mbi nadi a tei eSango, na Sango a tei embi? Nitabalaka bikenge bibalaka mbi na nu na kpaci embi mεnε. Edi oko Sango yona odi a tei embi yona okɔkɔ bilomu binde.

¹¹Jimani mbi, bo mbi nadi a tei eSango, na Sango a tei embi, isa jimani mbi oko a mojɔ mobilomu bimina.

¹²Mbi natɔndɔkɔ no na soti bo, yona ojimeaka mbi adi bokɔ bilomu bikɔkɔ mbi. Ee, adi bokɔ bilomu bia binɔi bilomu bi, mojɔ bo mbi nakayane ai Sango.

¹³Mbi nadi bokɔ mijɔ misusu mingaka no a kombe embi, bo Sango ase ekumu na Mwana.

¹⁴Oka'ngani mokina mojɔ a kombe embi, nâkɔ mojɔ momina.

Mokɔmeja

¹⁵Isa opalakani mbi, toma sumani mibeko mimbi.

¹⁶Mbi nadi bonga Sango, na yo âpa no Mokɔmeja otongo, oko Mwembo moSoti, bo ayeyoe na nu oko na bosusu.

¹⁷Ngondo t'ehɔnɔke bomossɔ, mojɔ bo batamonekε na batamojebaka. Ino ko omojebakani, mojɔ bo adi na nu, na âda a tei enu.

¹⁸Mbi nitakina no malike. Nâdoa ai no.

¹⁹Ngɔngɔ mweka, ngondo êtanε mbi koko. Ino ko ônεni mbi, mojɔ bo mbi nadi mɔ, na ino odani mɔ pongono.

²⁰Odini bojeba a busa bomina bo mbi nadi a tei eSango, ino a tei embi, na mbi a tei enu.

²¹Moto akada na mibeko mimbi, na akamisuma, moto omina adi na mbi ngεnɔ. Moto akada na mbi ngεnɔ, Sangwa'mbi âda na nde ngεnɔ pongono. Mbi mεnε nâda na nde ngεnɔ pongono, na nasaboloja ai yo.

²²Yuda (te Iskalio) abala na nde bo, Kumu, odi bosaboloja ai so, pε ko bosaboloja a ngondo mojɔ moye?

²³Yesu amosɔmbeja bo, Isa moto adi na mbi ngεnɔ, adi bosuma bikenge bimbi. Sangwa'mbi ada na moto omina ngεnɔ, na so bôdoa ai yo a boda a tei ende.

²⁴Isa moto aditi na mbi ngεnɔ, atasumaka bikenge bimbi. Na ekenge ekaka no editi ekenge embi mεnε; edi ekenge eSango yona olomani.

²⁵Nabali na nu ngando jimina, yana adi mbi ya na nu.

²⁶Sango ko âloma Mokɔmeja a kombe embi oko Mwembo Mosεnɔke. Iyo âkoja no ngando jesusu, na âleje no ngando jesusu jibala mbi na nu.

²⁷Mbi nakineaka no bowi. Napaka no bowi bombi mεnε, te nongo bowi bopaka ngondo.

²⁸O'kini mojɔ mobali mbi na nu, bo nadi bodonga, na nâhula koko ai no. Akɔki no pala mbi ka osepeni bo nakεkε ai Sangwa'mbi, mojɔ bo Sangwa'mbi anɔi mbi.

²⁹Natɔndɔi no mojɔ momina edεye, adi ehole emina pε bopeta mea; oko boa, ekamea, odini bojima.

³⁰Nitabala na nu koko bou, mojɔ bo kumu ongondo ye akεkε adoe; yo ko aditi na kpaci ai mbi.

³¹Mbi nakɔkɔ o abekeani Sangwa'mbi, bo ngondo ejebɛ bo napalaka Sangwa'mbi. Angɔni, so bokɛe!

Yoane 15

Bomwe Bosoti

¹Mbi nadi bomwe bosoti, na Sangwa'mbi adi mobanei ogbie.

²Iyo atεndɔkɔ bitape bimbi bisusu bia bidi pε bobota mbuma. Na alenaka suka jibitape bisusu bia bibotaka, bo libota lihεe.

³Ino odini na boseñɔ edεye a mojɔ moekenge ebali mbi na nu.

⁴Yeyoani a tei embi, na mbi nâyeyoa a tei enu. Etape, oko etape ngasa, editi nongo na libota. Emiti da a tei ebomwe, etabota nongo mbuma; ino koko boa, omiti yeyoani a tei embi, ôtabotani nongo mbuma.

⁵Mbi nadi bomwe, ino odini bitape. Yona oyeyoaka a tei embi, na mbi a tei ende, abotaka mbuma jinene. Moj bo okabotonni na mbi, otahonokoni bok nongo eka.

⁶Moto amiti yeyoa a tei embi, âdumbama o ekomeli eetape, na âhôlengon. Bandoaka bitape bimina, babidumbaka a mosa na bingoaka.

⁷Okayeyoani a tei embi, na bikenge bimbi bikayeyoa a tei enu, obwanini bonga moj mopalaka no, na ôsöni.

⁸Okabotani mbuma jinene a boneja bo odini bacingami bambi, Sangwa'mbi adi bosö ekumu na moj momina.

⁹Sango adi na mbi nganj. Mbi nadi na nu nganj koko boa. Yeyoani a tei engenj embi.

¹⁰Okasumani mibeko mimbi, ôyeyoani a tei engenj embi, o asumaka mbi mibeko miSangwa'mbi, na o ayeyoaka mbi a tei engenj ende.

¹¹Mbi nabali na nu mij mimi, bo sepi embi edae a tei enu, na bo olumeni na sepi bot.

¹²Mobeko mombi modi oko mu; Toma palanani o apalaka mbi no.

¹³Nganj yena eni edi oko ye, bo moto ape mohelo monde a moj mobina'nde.

¹⁴Ino odini bma'mbi okakoni ngando jibekeaka mbi no.

¹⁵Te nayake bala na nu o bakomeli, moj bo mokomeli t'ajebake mua mokök moswa'nde. Mbi ko nabali na nu o bma'mbi, moj bo najebejai no ngando jisusu jikaki mbi na Sangwa'mbi.

¹⁶Ino oihoni mbi. Mbi ko nah no, na nahengé no bo okéeni a bobota mbuma, mbuma jiboyeyoa, bo oka'ngani Sango eka a kombe embi, yo ape no.

¹⁷Moj mobekeaka mbi no modi oko bo opalaneni.

¹⁸Ngondo ekada na nu soki, ojebakani bo edaka na mbi soki boso.

¹⁹Akoki no da bato bangondo, ka ngondo epali no. Ngondo ko edi na nu soki, moj bo oditini bato bangondo, na moj bo mbi nah no a boboton na ngondo.

²⁰T'obosaeni oko ekenge ebali mbi na nu bo, Mokomeli t'anoke moswa'nde. Anongejai bo mbi, bânongeja no pongono. Akoki bo suma bokoja bombi, ka bâsuma bokoja bonu pongono.

²¹Ibo ko bâkɔ̄ ngando ji jesusu ai no a mojɔ̄ mokombe embi, ema bo batajebaka yona olomani.

²²Eipeta da bo mbi nadoi a bobala na bu, ka baditi na lindo. Edεye ko bapeliti nongo mokalo a mojɔ̄ mobobe bobu.

²³Iyona odi na mbi soki, adi na Sangwa'mbi soki pongono.

²⁴Pερε nongo okina otongo okɔ̄ bilomu bikɔ̄kɔ̄ mbi a tei ebu. Eipeta da boa, ka baditi na lindo. Edεye ko bani mbi, na badi na mbi soki, na badi na Sangwa'mbi soki pongono.

²⁵Oko boa ekenge yena esɔ̄nɔ̄mɔ̄ a Mibeko mibu engami bo, Badaka na mbi soki ngasa, pερε cina.

²⁶Mbi ko nâ lomea no Mokɔ̄meja, oko Mwembo mosoti mua momanaka ai Sango. Mokɔ̄meja omina adonga ai Sango, na akadoa, yo ada motati ombi.

²⁷Ino ôdani batati pongono, mojɔ̄ bo odakani na mbi oko a bobanga.

Yoane 16

Mwembo Mosεnɔ̄ke

¹Mbi natɔ̄ndɔ̄i no ngando ji jesusu bo otadani nongo na libunga.

²Babengana no a sinagogue; ee, ehole ekεkε adoe, na moto akawa no, adi bolε bo akɔ̄mεkε Njambe.

³Bakɔ̄ boa ai no cina bo batajebaka Sango, na batajebaka mbi.

⁴Mbi natɔ̄ndɔ̄i no ngando jimina, bo ehole emina ekamea, ôsalejεni bo mbi najitɔ̄ndɔ̄i no. Naitɔ̄ndɔ̄ no ngando jimina a bobanga, mojɔ̄ bo nadaka na nu mbi mεnε.

⁵Edεye ko nakεkε nayane ai yona olomani, na pερε nongo okina onu ohɔ̄jɔ̄kɔ̄ mbi bo, Okεkε jɔ?

⁶Milema minu milumi na wa botɔ̄ a mojɔ̄ mongando jibali mbi na nu.

⁷Mbi ko natɔ̄ndɔ̄kɔ̄ no oko ngando jisoti. Boyana bombi bodi bobɔ̄ngeja no. Mojɔ̄ bo, mbi namiti yana, Mokɔ̄meja atadoa ai no. Nakayana ko, nâmoloma ai no.

⁸Iyo akadoa, âjebeja ngondo bo edi na lindo a mojɔ̄ mobobe, a mojɔ̄ mobodongo, na a mojɔ̄ mobosambeja;

⁹a mojɔ̄ mobobe, cina bo batajimeaka mbi;

¹⁰a mojɔ̄ mobodongo, cina bo mbi nakεkε nayane ai Sangwa'mbi, na ôtanεni mbi koko;

¹¹a mojɔ mobosambeja, cina bo kumu ongondo ye asambi.

¹²Nadi koko na ngando jinεnε a botɔndɔ no; ino ko otahɔnɔkɔni muna momina edεye.

¹³Iyo akadoa, oko Mwembo mosoti, yo âboloja ngando jesusujisoti ai no. Mojɔ bo yo atabala na kpaci ende mεnε; âbala oko ngando jikaka yo, na âjebeja no ngando jia jidoakini.

¹⁴Iyo âkumeja mbi, mojɔ bo âtomba ngando jimbi, na âjiboloja ai no.

¹⁵Ngando jesusu jia jidi ai Sango jidi koko ai mbi. A mojɔ momina, nabali na nu bo yo âtomba ngando jimbi bo ajibolojae ai no.

¹⁶Ngɔngɔ mweka, otanjani mbi koko; na ngɔngɔ mweko koko ônεni mbi.

¹⁷Bakina bacingami bande babalana bo, Gina eekenge ebalaka yo edi bo? Ngɔngɔ mweka, otanjani mbi koko; na ngɔngɔ mweka koko, ônεni mbi, mojɔ bo nakεke nayane ai Sango.

¹⁸Oko boa babala bo, Abali yo bo, Ngɔngɔ mweka, cina edi bo? Iso botaci-ngeaka cina emina.

¹⁹Yesu ajeba bo bapalaka bamohɔjɔe, na abala na bu bo, lno ohɔjɔnɔkɔni cina eekenge ebali mbi bo, Ngɔngɔ mweka, otanjani mbi koko; na ngɔngɔ mweka koko, ônεni mbi?

²⁰Mbi natɔndɔkɔ no na soti bo ôyeani bio, na ôdani na kɔndɔ; ngondo ko êda na sepi. Ino ôdani na wa; wa enu ko cdi bokindoa sepi.

²¹Mwali adi na monɔngɔ yana apekaka yo na bipeko bilibota, mojɔ bo ehole ende emei. Akabota mwana ko, adi bobosa mwano bokpa, na ada oko na sepi a mojɔ momwana yona obotami a ngondo.

²²Ino odini koko na wa edεye. Mbi ko nânε no koko, na milema minu mîsepa. Pépe nongo moto odi bocinoa sepi enu.

²³Otahɔjɔni mbi nongo mahɔjɔ a busa bomina. Soti mεnε, mbi nabalaka na nu bo, Oka'ngani Sango ekina eka a kombe embi, âpa no eka emina.

²⁴Ino ongakinini eka a kombe embi. Ingani nongo osεni, bo mwεngi mosepi enu molume.

²⁵Mbi nabali mijɔ mi oko na mindε. Mbi ko nitabala koko na nu na mindε. Nadi botɔndɔ no a bohu a mojɔ moSango, na ehole emina edoakadea.

²⁶Ino ô'ngani a kombe embi a busa bomina. Nitabalaka na nu bo nadi bo'nga Sango a mojɔ monu.

²⁷Sango yo mene apalaka no, mojo bo opalakani mbi, na ojimakani bo nadonga ai Sango.

²⁸Mbi nadonga ai Sango, na nadoa a ngondo. Edeye ko nadongaka a ngondo, na nakake ai Sango.

²⁹Bacingami bande babala bo, Edeye, obalaka a bohu soti, te nongo na mindε.

³⁰Bojebaka edeye bo we ojebaka ngando jesusu; moto abwaniti bohojo we koko mahɔjɔ. Oko boa bojebaka bo omana ai Njambe.

³¹Yesu abasɔmbeja bo, Ojimakani edeye?

³²Hokeani! Ehole ekekε adoe, ee, emei edeye, na ônanganani moto na moto a ngando ende mene, na ôkinani mbi, oko mbi buki. Endele ko, naditi mbi buki pε, mojo bo Sango adi na mbi.

³³Mbi nabali na nu ngando ji, bo odaeni na bowi a tei embi. Odani na monɔngɔ a ngondo; pε mojo; dani oko na sepi, mojo bo mbi nagbokejai ngondo.

Yoane 17

Bonga bo Yesu

¹Yana aseja yo bobala bikenge bimina, Yesu akaho miso oho Diko, na abala bo, Sesa, ehole emei. Kumeja Mwana'we bo Mwana'we akumejae we.

²We omopa kpaci ai bato basusu, bo apε bomɔ bua bodi na bosusu ai bato basusu bamopa we.

³Bomɔ bua bodi na bosusu bodi oko bo bajebekere we, Njambe osoti omɔci, na yona oloma we, oko Yesu Masiya.

⁴Mbi nakumejai we a ngondo, mojo bo nasiejai elomu epani we a bokɔ.

⁵Sesa, kumeja mbi edeye a boso bowε mene, oko na ekumu yena edaka na mbi a boso bo we oko ngondo epetakini yoama.

⁶Mbi najebejai kombe ewε ai bato bapani we a ngondo. Badaka oko bato bawε; we obapani, na basumaka ebaeli ewε.

⁷Bajebaka edeye bo ngando jesusu jipani we jihula oko ai we.

⁸Mbi nabapi bikenge bipani we. Ba'si bikenge bimina; bajebaka na soti bo mbi nadonga ai we, na bajimaka bo we oloma mbi.

⁹Mbi nangaka a mojo mobu. Nita'ngaka a mojo mongondo; nangaka oko a mojo mobato bapani we, mojo bo badi bato bawε, na ekumu embi edi oko ai bo.

¹⁰Ngando jimbi jesusu jidi ai we, na ngando jiwe jesusu jidi ai mbi.

¹¹Mbi te nayake da a ngondo. Ibo ko badi a ngondo, na mbi nadoaka ai wε. Sesa mosenōke, banea bato bapani wε, a kombe ewε menε, bo badea omɔci o adi so omɔci.

¹²Ehole edaka mbi na bu, nababaneaka a kombe ewε epani wε. Mbi nabaka-kelaka, na pεpε nongo omɔci obu obungi,—oko mwana olibunga pε —bo Mosōnɔ mongame.

¹³Edεye ko nakεkε nadoe ai wε. Mbi nabalaka mijɔ mi yana adi mbi a ngondo, bo badea na sepi embi a tei ebu botɔ.

¹⁴Mbi nabapi ebæli ewε. Ngondo ko edi na bu soki, mojɔ bo baditi bato bangondo; o adi mbi menε, naditi moto ongondo,

¹⁵Mbi nita'ngaka wε bo obadongejae a ngondo. Nangaka oko bo obakakele ai yona Mobe.

¹⁶Mbi naditi moto ongondo; oko boa ibo baditi bato bangondo.

¹⁷Ekenge ewε edi Soti. Hεnge bo ai wε oko na Soti ewε.

¹⁸Wε olomani a ngondo; oko boa koko, mbi nalomi bo a ngondo.

¹⁹Mbi nasabεngεkε ai wε a mojɔ mobu, bo bahεngεme ai wε na soti.

²⁰Mbi mta'ngaka a mojɔ mobu pε. Nangaka a mojɔ mobato bay a badi bojimea mbi a mojɔ mobokoja bobu,

²¹bo ibo basusu badea oko omɔci, bo badea omɔci a tei esu, o adi wε Sesa a tei embi, na mbi a tei ewε, bo ngondo ejime bo wε oloma mbi.

²²Mbi nabapi ekumu epani wε, bo badea oko omɔci, o adi so omɔci,

²³—mbi a tei ebu, na wε a tei embi,—oko boa bokatana bobu bodi bobɔngɔ, na ngondo êjeba bo wε oloma mbi, na bo obapalaka o apalaka wε mbi.

²⁴Sesa, posa embi edi oko bo bay a bapani wε badea na mbi a esika edi mbi, bo banje ekumu embi, oko ekumu epani wε; mojɔ bo odaka na mbi ngεnjɔ oko ngondo epetakini yoama.

²⁵Sesa, Yona obodongo, ngondo etajebaka wε. Mbi ko najebaka wε; ibaba pongono bajebaka bo wε oloma mbi.

²⁶Mbi nabolojai kombe ewε ai bo, na nâeboloja koko, bo ngεnjɔ edi wε na mbi edae a tei ebu, na mbi a tei ebu.

Yoane 18

Bapea Yesu

¹Yana asieja yo mijɔ mimina bobala, Yesu amana na bacingami bande. Baleka ekina ediba, kombe Kedelona; bake a ekina esika edaka gbie, na akwea ena na bacingami bande.

²Yuda, mokabi onde, ajeba esika emina, mojɔ bo Yesu attitanaka na bacingami bande oho bihole bmɛnɛ.

³Oko boa Yuda asɔ pɔlɔtɔ ebasoda na bapolisi ai basuku banganga na BaPalusi. Ibo batomba paka na mitanda na mililo mibila, na bake a esika emina.

⁴Yesu ajebaka mijɔ misusu mia midi bokwa na nde. Oko boa, yo adoa a bosongana na bu, na abala na bu bo, Odukakani nda?

⁵Ibo bamosɔmbeja bo, Yesu oNasaleta. Yesu abala na bu bo, Mbi yoyo.

⁶Yana abala yo na bu bo, Mbi yoyo, bagasima oko bogasima, na bakwa a kpɔtɔ.

⁷Yesu abahɔjɔ koko ho, Odukakani nda? Iho basɔmbeja bo, Yesu oNasaleta.

⁸Yesu asɔmbeja bo, Mbi natɔndɔi no bo mbi nadi yo. Isa odukakani mbi, kinani bato ba bayane.

⁹Oko boa, ekenge engama yena ebala yo bo, Naibungeja nongo omɔci obato bapani wε.

¹⁰Simona Pɛtɛlo adaka na abɛnɛ. Oko boa amohwa, akwɛle mokɔmɛli omosuku onganga pola, na amolena litoi liebɔ ebami; kombe emokɔmɛli omina Maluko.

¹¹Yesu ko abala na Pɛtɛlo bo, Sɔmbeja abɛnɛ owε ta ligbogbo. Mbi nitamwa kɔpɔ epini Sango?

¹²Pɔlɔtɔ ebasoda, na kapiteni obu, na bapolisi baBaYuda, bapea Yesu na bamokanda mbɔci.

¹³Bake na nde boso ai Ana, mojɔ bo yo adaka bokio boKayapa, mosuku onganga a yanga emina.

¹⁴Kayapa adaka moto yona oleha BaYuda bo moto omɔci abwani bogwa a mojɔ mobato.

Pɛtɛlo Angana Yesu

¹⁵Simona Pɛtɛlo asusa Yesu, na okina mocingami otongo pongono. Mocingami omina ajebeanaka na mosuku onganga. Oko boa yo akwea na Yesu a lopango lomosuku onganga.

¹⁶Pɛtɛlo ko adika oko sokolu. Oko boa, mocingami yona otongo amana sokolu, abala na mwali yona onjaka modipe, na akweja Pɛtɛlo.

¹⁷Mwali yona onjaka modipe abala na Petelo bo, We, te mosingami omoto omina? Iyo asɔmbeja bo, Te mbi.

¹⁸Bakɔmeli na bapolisi batokana mosa na malo, na badaka ba'mi ena bo basahumejae a mojɔ mopio. Petelo adaka ami na bu pongono bo asahumejae a mosa.

¹⁹Mosuku onganga akokeleja Yesu a mojɔ mobacingami bande na bokoja bonde.

²⁰Yesu amosɔmbeja bo, Mbi nabali na ngondo a bohu mɛnɛ. Nakojaka a sinagoge na a tempelo, a bisika bititanaka BaYuda basusu. Naibala nongo a libombi.

²¹Ohɔjɔkɔ mbi mojɔ moye? Hɔjɔ bato bay a baki mijɔ mibali mbi na bu.

²²Abala yo boa, okina polisi yona odaka hulelu amohoma epapata, na abala bo, Osɔmbejaka mosuku onganga boa mojɔ moye?

²³Yesu amosɔmbeja bo, Isa nabali mojɔ mobe, aneja bobe bomina. Isa ko nabali bopele, obomi mbi mojɔ moye?

²⁴Ana ko amoloma oko a mbɔci boso Kayapa, mosuku onganga.

²⁵Simona Petelo adaka ami ena be asahumejae a mosa. Bakina babala na nde bo, We oditi okina obaemgami bande? Iyo angana oko bongana; abala bo, Te mbi.

²⁶Okina mokɔmeli omosuku onganga (Petelo alena litoi limwangwa'nde) ahɔjɔ Petelo bo, Mbi nataniti wɛ na nde a gbie?

²⁷Petelo angana koko, na kɔkɔ abelekoa bokpa.

Esambie Yesu

²⁸Bamana na Yesu a ndako eKayapa, na bakɛ na nde a ndako *egouverneur*. Edaka oko mwakeli. Ibo bɛnɛ baikwea a ndako *egouverneur* na cina ebikia bibu, mojɔ bo bapalaka bo bayake Kola-eBono.

²⁹A mojɔ momina, Pilato amana, na abala na bu bo, Odini na moto omina mojɔ? Modi bo?

³⁰Bamosɔmbeja bo, Akɔki yo da moto mopele, ka bodoiti na nde ai wɛ.

³¹Pilato abala na bu bo, Motombani no bɛnɛ; mosambejani na Mibeko minu bɛnɛ. BaYuda babala na nde bo, Iso boditi na kpaci a boweja moto.

³²Mojɔ mu mongameja ekenge ema bala Yesu a boneja tungu ebogwa bonde.

³³Pilato akwea koko a ndako tei. Abea Yesu na abala na nde bo, We odi Kumu oBaYuda?

³⁴Yesu amosɔmbeja bo, Obali boa wε mεnε, isa bato batongo babali na wε a mojɔ mombi?

³⁵Pilato asɔmbeja bo, Adi mbi MoYuda? Bato bawε mεnε, na basuku banganga badoi na wε ai mbi; mojɔ mokɔi wε nda?

³⁶Yesu abala bo, Bokumu bombi boditi bokumu bongondo ye. Akɔki mbi da na bokumu bongondo ye, ka bakɔmeli bambi bani bila, bo BaYuda batapea mbi. Bokumu bombi ko boditi bokumu bongondo.

³⁷Pilato abala na nde bo, Oko boa odi Kumu? Yesu amosɔmbeja bo, Wε mεnε obali bo nadi Kumu. Cina ebobotama bombi, cina ebodoa bombi a ngondo edi oko bo natate tati a mojɔ moSoti. Moto na moto yona odi moto oSoti akaka monɔkɔ mombi.

³⁸Pilato abala na nde bo, Soti, iye nde? Yana abala yo ekenge emina, amana sokolu ai BaYuda. Abala na bu bo, Mbi nabolojaiti nongo mojɔ na nde.

³⁹Ino ko odini na ekina ekɔmeli bo nacingoe moto omɔci ai no a ehole eKolaeBonɔ. Opalakani bo nacingoe Kumu oBaYuda ai no?

⁴⁰Ibo babekoa koko bo, Te moto yo, oko Balaba! Balaba ko adaka mobengo.

Yoane 19

¹Pilato atomba Yesu na amotueja.

²Basoda badinga mokɔli monjubε bo bakɔe na likongo. Babakea likongo a molo monde, na bamolwaja kasaka eyai ekpetu.

³Badoa a boso bonde na babala bo, Mbalea! Kumu oBaYuda! Bamola koko ndumo.

⁴Pilato amana koko na abala na bu bo, Anjani; mbi namomejaka a boso bonu, a bojebeja no bo mbi nabolojaiti nongo mojɔ mobe na nde.

⁵Oko boa Yesu amana. Alwaka kasaka eyai ekpetu, na adaka na likongo linjubε a molo. Pilato abala na bu bo, Anjani moto!

⁶Basuku banganga na bapolisi babu, yana anε bo Yesu, babekoa bo, A mole-mobokea! A mole-mobokea! Pilato abala na bu bo, Moto-mbani no bεnε na mobakeani a mole-mobokea, mojɔ bo mbi nabolojaiti nongo mojɔ mobe na nde.

⁷BaYuda bamosɔmbeja bo, Iso bodi na mobeko. A mojɔ momobeko momina, mokindo mua mobwani na nde modi oko bogwa. Mojɔ bo abali bo adi Mwana 'Njambe.

⁸Yana aka Pilato bikenge bimina, bɔ bonde bohε oko bohε.

⁹Akwea koko a ndako, na abala na Yesu bo, Wε ohuli jɔ? Yesu ko aimosɔmbeja.

¹⁰Pilato abala na nde koko bo, Otasɔmbe-jaka mbi? Otajebaka bo mbi nadi na kpaci a bocingoa wε, na kpaci a bobakea wε a mole-mobokea?

¹¹Yesu amosɔmbeja bo, Eipeta da bo osi kpaci emina eDiko, ka obwaniti bokɔ na mbi nongo mojɔ. Oko boa, yona okabini ai wε anɔi wε na lindo.

¹²A mojɔ momina, Pilato aduka njea bo amocingoe. BaYuda ko babekoa bo, Okacingoa moto omina oditi mina oKaisala. Moto yona obalaka bo adi Kumusetojaka Kaisala.

¹³Yana aka Pilato bikenge bimina, ameja Yesu sokolu, na ada a ngɛndɛ eesambi, a esika yena edi na kombe Moboku-moMatai. (Gabata a kɔpi eBaEbele.)

¹⁴Edaka ehole emidi, a busa boMosɛlingo a mojɔ moKola-eBonɔ. Pilato abala na bu bo, Anjani Kumusatu!

¹⁵Ibo babekoa bo, Modongeja! Modongeja! Mobakea a mole-mobokea! Pilato abala na bu bo, Nâbakea Kumusatu a mole-mobokea? Basuku banganga basɔmbeja bo, Iso boditi na okina kumu otongo, oko Kaisala pε.

¹⁶Oko boa Pilato amopa a mɔmɔ mabu bo bamobakee a mole-mobokea, na bapea Yesu bo bakεe na nde.

Mole-Mobokea

¹⁷Yesu atomba mole-mobokea monde mɛnɛ, na ake a ekina esika yena edaka na kombe Gɔlɔgɔta a kɔpi eBaEbele. Gina ekombe emina edi Esika-eEbebele.

¹⁸Bamobakea a mole-mobokea a esika emina, na bakina batongo babae pongono, okina a dɔngɔ dinde diebɔ ebami, yona otongo a dɔngɔ diebɔ ebali, Yesu yo mɛnɛ a ndanda.

¹⁹Pilato asɔnɔ mokina mosɔnɔ, na amobakea a mole-mobokea. Mosɔnɔ modaka bo, YESU ONASAETA, KUMU OBAYUDA.

²⁰BaYuda banɛnɛ balanga mosɔnɔ momina, mojɔ bo esika ebakea bo Yesu a mole-mobokea edaka na ngando hulelu. Mosɔnɔ momina modaka a kɔpi jiBaEbele, na BaEla, na BaLoma.

²¹Basuku banganga baBaYuda babala na Pilato bo, Obwaniti bosɔnɔ, Kumusatu oBaYuda. Sɔnɔ oko bo yo abali bo, Mbi nadi Kumusatu oBaYuda.

²²Pilato asɔmbeja bo, Mojɔ mosɔni mbi mosi.

²³Abakea bo Yesu a mole-mobokea, basoda batomba bisenja binde, na babikaba mabondo manɛi, tu soda linde libondo. Kasaka ende ko eyai eyoama boa, pɛpɛ mondondo, diko oko a nase.

²⁴A mojɔ momina, babalana bo, Ebɔngiti bo boe'la; bopele bo bobome jonga a bojeba moto yona odi boesɔ; mojɔ momina mongameja ekenge eMisɔnɔ bo, Bakabani bisenja bimbi libondo libondo. Babomi jonga a mojɔ mokasaka embi. Mojɔ mokɔ basoda modaka boa.

²⁵Ngwa'nde na nango-ngɔngɔ badaka ba'mi hulelu na mole-mobokea, na Malia mwali oKelopa, na Maha oMagadala.

²⁶Yana anε Yesu ngwa'nde na mocingami onde ongenjɔ a dɔngɔ dinde, abala na ngwa'nde bo, Mama, anja mwana'we!

²⁷Abala koko na mocingami omina bo, Anja ngwao! Oko boa, mocingami omina amosɔ o moto odenga dinde mɛnɛ a ehole emina.

Bogwa boYesu

²⁸Ngɔngɔ mweka, Yesu ajeha ho mojɔ mosia mosusu. Oko boa, abala bo, Ekangola ekɔkɔni, (a bongameja Misɔnɔ).

²⁹Ekina eyomba edaka ena yena eluma na *vinaigre*. Oko boa, bagbɔmeja limbusu na *vinaigre*, balihangea a mongongele, na balingɔjɔ a monɔkɔ monde.

³⁰Ama yo sɔ *vinaigre*, Yesu ami bala oko bo, Mojɔ mosi! Asunea molo monde na ameja mwembo monde.

³¹Busa bomina bodaka busa boMoselingo. A mojɔ momina, BaYuda baipala bo mikuku mibu miyeyoe a melemibokea oko a busa boSabata; (cina bo busa bomina bodaka mojɔ monɛnɛ mɛnɛ). Oko boa, ba'nga Pilato bo babuke mako mabu, na bo babadongejae.

³²Basoda badoa, babuka mako mayona oboso, na yona otongo koko, oko baya badaka na nde a mele-mibokea.

³³Yana ko amea bo ai Yesu, banε bo yo ama gwa, na baibuka mako mande.

³⁴Okina soda omɔci ko amondea litebu na likɔngɔ, na makia na madiba mamana bokpa.

³⁵Iyona onε mojɔ momina atɔndɔ mojɔ momina, na tati ende edi tati esoti. Iyo ajebaka bo abalaka na soti mɛnɛ, bo ino ojimeni pongono.

³⁶Mojɔ bo ngando jmina jidaka boa a bongameja Mosɔnɔ bo, Mokua monde motabukea nongo momɔci.

³⁷Mosɔnɔ motongo mobalaka koko bo, Badi bone yona ondea bo.

Bapusea Yesu

³⁸Yosepa oAlimate adaka mokingami oYesu; yo ko abomba mojɔ cina bo abangaka BaYuda. Yana asia ngando jimina, yo anga Pilato njea bo atombe mokuku moYesu, na Pilato ajima. Oko boa, yo adoa na atomba mokuku monde.

³⁹Nikodemo adoa pongono, oko yona oma doa ai Yesu na bulu. Iyo adoa na kasa jihtindi, isa kilo domi-inεi na dea.

⁴⁰Ibo batomba mokuku moYesu, na bamodinga na bisenja bipu na kasa jilitindi o akɔkɔ BaYuda a lipusi.

⁴¹Ekina gbie edaka a esika ebakeama Yesu a mole-mobokea, na esεmɔ eyene edaka a gbie emina; baipaka pusea moto ena.

⁴²Oko boa basambea Yesu ena, mojɔ bo esεmɔ edaka hulelu. Busa bomina hodaka busa boMoselingo moBaYuda.

Yoane 20

Yesu Angɔ a Bogwa

¹Malia oMagadala ake a esεmɔ a busa boboso, a ehole eehuma pu, oko na ehindahindi, na anε bo litai lima donga a esεmɔ.

²Oko boa apota ebango, ake ai Simona Pεtεlo na ai mokingami yona otongo opalaka Yesu. Abala na bu bo, Badongejai Kumu a esεmɔ, na botajebaka esika emosambei bo.

³Pεtεlo na mokingami yona otongo bamana bo bakεe a esεmɔ.

⁴Ibo basusu babae bapota mbango. Mokingami yona otongo ko anɔ Pεtεlo na ebango, na yo amea a esεmɔ boso.

⁵Asumana, anja a tei, na anε bisenja bipu bisambi; aikwea ko a tei.

⁶Simona Pεtεlo amea ngɔngɔ jinde; yo akwea a tei eesεmɔ, na anε bisenja bipu bisambi,

⁷na litambala pongono lia limaka da a molo moYesu. Litambala liidaka a esika ebisenja bipu; lima bulukama pundu, na lidaka a esika etongo.

⁸Mokingami otongo, yona omea boso a esεmɔ, akwea a tei pongono. Iyo anε, na ajima.

⁹Mojɔ bo baipaka cingea Mosɔnɔ bo adi bongɔ a bogwa.

¹⁰Oko boa bacingami bamina basɔmbɔ koko a ndako.

¹¹Malia ko adaka ami a sokolu eesεmɔ, na ayeaka bio. Ayeaka yo, asumana a bonja a tei eesεmɔ,

¹²na anε babwεnji baDiko babae. Ibo badaka na mbondo a esika emaka da mokuku moYesu, okina a molo, otongo a bibota, na bisenja bibu bidaka bipu.

¹³Babwεnji bahɔjɔ Malia bo, Mwali, oyeaka mojɔ moye? Iyo abasɔmbeja bo, Mojɔ bo badongejai Kumu ombi, na nitajebaka esika emosambei bo.

¹⁴Amaka yo bala boa, ami hekoa oko bohekao, na anε Yesu yona odaka ami ena; aijeba ko bo yo adi Yesu.

¹⁵Yesu abala na nde bo, Mwali oyeaka mojɔ moye? Odukaka nda? Malia alekε bo yo adi moswa ogbie, na abala na nde bo, Kumu, isa wε omodongejai, tɔndɔ mbi esika emosambei wε, bo mbi namotombe.

¹⁶Yesu abala na nde bo, Malia! Malia ahekao, na abala na nde a kɔpi eBaEbele bo, Laboni! (Cina emina edi Mokoja.)

¹⁷Yesu abala na nde bo, Yε bobandani na ebɔ, mojɔ bo naweakini ai Sango. Wε ko, kε ai baninga bambi; bala na bu bo mbi nakawee ai Sangwa'mbi na ai Sangwa'nu, ai Njambe ombi na ai Njambe onu.

¹⁸Malia oMagadala ake na bwεnji bomina ai bacingami bo, Mbi nani Kumu. Abatɔndɔ koko mijɔ mibala Kumu na nde.

Yesu Asaboloja ai Bacingami

¹⁹Yana adipa busa bomina, oko busa boboso, bacingami badaka baboli a ekina ndako, na bakanda midipe a mojɔ mobɔ boBaYuda. Yesu adoa, ama a ndanda ebu, na abala na bu bo, Bowi ai no!

²⁰Ama yo bala boa, ami baneja oko mɔmɔ mande na litebu linde. Bacingami badaka na sepi yana anε bo Kumu.

²¹Yesu abala na bu koko bo, Bowi ai no! Mbi nalomaka no o aloma Sango mbi.

²²Aseja yo bobala bikenge bimina, asopa mohuli a diko dibu, na abala bo, Asɔni Mwembo Mosenɔke.

²³Okacingoani bato a jibe jibu, bada bacingoamake. Okabakinani a mbɔci, bada oko a mbɔci.

²⁴Toma, kombe ende etongo Lipasa, okina obu Domi-na-babae, aidaka na bu yana adoa Yesu.

²⁵Oko boa bacingami batongo babala na nde bo, Iso boni Kumu. Iyo ko abala na bu bo, Mbi namiti nε na miso bihuli bikala a mɔmɔ mande, na namiti sa mosapi mombi a litebu linde, nitajima nongo.

²⁶Yana anɔ masu bomwambe, bacingami badaka baboli koko a ndako, na Toma adaka na bu. Bakanda midipe; Yesu ko akwea, ama a ndanda ebu, na abala bo, Bowi ai no!

²⁷Abala koko na Toma bo, Anja mɔmɔ mambi. Batea mosapi ya. Ninoja ebo. Isa ebo ewe a litebu limbi. Yε boda na kite; jima oko bojima.

²⁸Toma amosɔmbeja bo, Kumu ombi na Nja-mbe ombi!

²⁹Yesu abala na nde bo, Wε ojimi mojɔ bo oni mbi na miso. Bojongoa ai bato bay a bajimaka, nongo adi bo pε bone na miso.

³⁰Yesu akɔ bimbete bitongo binenε a boso bobacingami, bia bisɔnɔmiti a mokanda mu.

³¹Ibi ko bisɔnɔmi bo ojimeni bo Yesu adi Masiya, Mwana oNjambe, na bo odaeni na bomɔ a kombe ende, oko a mojɔ moejimeli.

Yoane 21

A Libale liTibelia

¹Yesu asaneja koko ngɔngɔ jimina ai bacingami a mbongu elibale liTibelia.

²Asaneja boa yana adaka bo baboli a esika emɔci,—oko Simona Pɛtelo na Toma, kombe ende etongo Lipasa; Natanaele, moto oKana, ngando eGalile, na bana-bami baSebede, na bacingami bande batongo babae.

³Simona Pɛtelo abala na bu bo, Mbi nakεkε a boduka swi. Ibo babala na nde bo, Iso bokεkε na wε pongono. Oko boa bakε, batamba a bwato, baiwa ko nongo eka a bulu bomina.

⁴Yana ahoa busa, Yesu adaka ami a mbongu. Bacingami ko baijeba bo yo adi Yesu.

⁵Yesu abala na bu bo, Bana, odini na eka eboyaka? Ibo bamosɔmbeja bo, Pεpε nongo eka.

⁶Iyo abala na bu bo, Dumbani eyoma a dɔŋɔ dibwato diebɔ ebami na ôwani. Akɔ bo boa, baihɔnɔ bogbula eyoma a mojɔ moeweeli eswi enεnε.

⁷Oko boa mocingami yona odaka Yesu na ngenjɔ abala na Pɛtelo bo, Edi oko Kumu! Yana aka Simona Pɛtelo bo edi Kumu, yo alwa kasaka ende, mojɔ bo adaka oko na elwali eelomu, na asadumba a madiba.

⁸Bacingami batongo badoa na bwato, badaka bakagbule eyoma na swi botɔ. (Mojɔ bo baidaka a boliko mεnε, oko bisimbo macinda matano pε.)

⁹Aduboa bo a mbongu, batana mosa momalo, na swi badaka batumbi ena, na milεmbε pongono.

¹⁰Yesu abala na bu bo, Doani na bakina baswi bawoi no.

¹¹Simona Pētēlo atamba koko a bwato a bogbula eyoma a mbongu. Edaka na swi oko botō, swi banenēne mokama momoci na domi-itano na swi basato. Nongo adaka bo na swi banenē boa, eyoma ebu eitweana.

¹²Yesu abala na bu bo, Doani a boyaka. Pēpē nongo mocingami omoci ko omohōjō bo, Wε nda?—oko a mojō mobō. Bajebaka bo yo adi Kumu.

¹³Yesu abatama, atomba molembē na abapa. Akō boa na swi pongono.

¹⁴Iye edi ehole ebisato esaneja Yesu ai bacingami bande yana angō yo a bogwa.

Yesu na Petelo

¹⁵Yana aseja bo boyaka, Yesu abala na Pētēlo bo, Simona mwana 'Yona, ngēnjo ewε ai mbi enōi yena ebu? Iyo amosōmbeja bo, Ee Kumu, ojebaka bo mbi napalaka wε. Yesu abala na nde bo, Bōkō bana-bata bambi.

¹⁶Abala na nde koko bala ejibae bo, Simona mwana 'Yona, odi na mbi ngēnjo? Iyo amosōmbeja bo, Ee Kumu, ojebaka bo mbi napalaka wε. Yesu abala na nde bo, Banea bata bambi.

¹⁷Abala na nde bala ejisato bo, Simona mwana 'Yona, opalaka mbi? Pētēlo aka monōngō a molema yana abala Yesu na nde bala ejisato bo, Opalaka mbi? Amosōmbeja bo, Kumu, wε ojebaka ngando jesusu. Ojebaka bo mbi napalaka wε. Yesu abala na nde bo, Bōkō bata bambi.

¹⁸Mbi natōndōkō wε na soti bo, Yana adaka wε mwenga, olwaka bisenja wε mēnē, na okēkē a bisika bipalaka wε. Okakōmō ko, ôninoja mōmō mawε, na okina otongo alwaja wε, na âtomba wε a esika edi wε pε bopala.

¹⁹Abala boa a bojebēja bo yo adi bokumeja Njambe na bogwa bomina. Aseja Yesu bobala boa, abala na Pētēlo bo, Susa mbi.

²⁰Mocingami oYesu ongēnjo adaka acingi ngōngō jibu,—oko yona oma kēmē a bupa bonde a Kola, na amohōjō ho, Kumu, odi bokaba wε nda?—Pētēlo ahekōa na amonē.

²¹Pētēlo, yana amonē yo, abala na Yesu bo, Kumu, mojō momoto yo môda bo?

²²Yesu amosōmbeja bo, Mbi nakajima bo yo ayeyoe oko a lihule limbi, moditi mojō mowε. Wε, susa mbi.

²³Oko boa, mojō monangana a tei ebaninga bo mocingami omina atagwa. Yesu ko aibala bo atagwa. Abala bo, Mbi nakajima bo yo ayeyoe oko a lihule limbi, moditi mojō mowε.

²⁴Mocingami omina adi oko yona odi monjēnēki ongando jimina. Iyo asōni ngando jimina. Na bojebaka bo tati ende edi tati esoti.

²⁵Yesu akɔ ngando jitongo jinene. Jikasɔnɔmɔ jisusu a mikanda, naleke bo esika edi botaka a ngondo a bodeja mikanda mimina.

Bikɔmeli

Bikɔmeli 1

Yesu Ayana oho Diko

¹Njεbe Teopilo; mokanda moboso mosɔnɔ mbi modaka a mojɔ mongando jisusu jibanga Yesu bokɔ na bokoja,

²oko a busa botombama yo oho Diko, yana apa yo mibeko ai bacingami bande bahɔmɔke oko na Mwembo Mosenɔke.

³Yana asia bodingoa bonde, asaneja ai bo oko mɔ, na bimbete binεnε. Anεnεkε na bu masu domi-inεi, na abatɔndɔkɔ mijɔ moBokumu boNjambe.

⁴Yana adaka yo na bu, ababeke a batapeta donga a Yelusalema, na bo bambe njikano eSango. Abala na bu bo, Mbi mεnε natɔndɔi no mojɔ momina.

⁵Mojɔ bo, Yoane abatisa a madiba; ino ko ôbatisamani a Mwembo Mosenɔke, oko masu manɔkini manεnε.

⁶Yana atitana bo a esika emɔci, bamohɔjɔ bo, Kumu, odi bosɔmbeja bokumu ai Yisalaele a ehole ye?

⁷Iyo abasɔmbeja bo, Mojɔ mobojeba bihole na bididi moditi nongo mojɔ monu; Njambe abikolea na kpaci ende mεnε.

⁸Ino ko ôsɔni ngulu yana âdoa Mwembo Mosenɔke ai no. Na ôdani batati bambi a Yelusalema, a likota lisusu liYuda, a Samalia, oko a suka engondo.

⁹Abala yo boa, angɔjɔmɔ oho Diko, oko yana anjaka bo. Eyembi emosɔ, na baimonε koko.

¹⁰Akεkε yo boa, oko yana akahoaka bo miso diko, bami babae baya balwaka bisenja bipu bama a dɔngɔ dibu.

¹¹Ibo babala bo, Ino bami baGalile, okahoakani miso diko boa mojɔ moye? Iyo Yesu yona odaki na nu, yona otombami oho Diko, ahulabi koko boa, o amoni no akεkε oho Diko.

Bacingami Basɔmbɔ a Yelusalema

¹²Ibo badonga a Mono moOlive, na basɔmbɔ a Yelusalema; mosiso momina moditi motutu, oko mwεngi momongɔ mobusa boSabata pε.

¹³Amea bo oho, bakwea a ndako, oko a ekenge esamaka bo a mboba ediko. Badaka ena oko Petelo na Yoane; Yakobo na Andalea; Pilipo na Toma; Balatelemi na Matayo; Yakobo mwana oAlape, Simona Selote, na Yuda mwana oYakobo.

¹⁴Ibo basusu, na bakina bali, na Malia nange eYesu, na bananango, bayeyoa a bonga na bingi na molema momoci.

Matia Asangoa Esika eYuda

¹⁵Petelo angɔ̄ bokina busa a likita libaninga, (badaka baboli isa bato mokama na domi-ibae na dea) na abala bo,

¹⁶Baninga, Mwembo Moṣenɔ̄ke mobala eyou na monɔ̄kɔ̄ moDawidi a mojɔ̄ moYuda yona odaka kɔ̄ngi ebato baya bapea Yesu, na moṣenɔ̄ momina moikputoa nongo.

¹⁷Mojɔ̄ bo adaka okina osu, na aci-ngamaka na su a elomu ye.

¹⁸(Moto omina asomba gbie na likonja lissɔ̄ yo a mojɔ̄mobobe bonde. Na yana akwa yo nase, mokuku monde mobatoa oko bobatoa, na sɔ̄pɔ̄ jinde jesusu jimana.

¹⁹Bato basusu baYelusalema bajeba mojɔ̄ momina, na babakea gbie emina kombe Akeladama; cina ekombe emina edi Gbie eMakia.)

²⁰Mosɔ̄nɔ̄mɔ̄ a mokanda moNjembo bo, Kina ndako ende edikae mopɔ̄tu, Bo moto atada nongo ena. na Kina moto otongo asangoe elomu ende.

²¹Bakina bami babanga bocingama na su a ehole ebatisimo eYoane, na bayeyoa na su ehole esusu edaka Yesu a bodala a tei esu,

²²oko a busa botombama yo oho Diko, yana adaka yo a ndanda esu. Oko boa okina momi obu, yona odi monjɛnɛki obongɔ̄ boYesu a bogwa, abwani bocingama na su.

²³Bameja bato babae, Yosepa, kombe ende etongo Balasaba, na ekina kombe etongo koko Yuseto; na Matia.

²⁴Na ba'nga bo, Kumu, wε yona ojebaka milema mibato basusu, apeja so moto ohɔ̄i wε a tei ebu babae

²⁵bo asangoe elomu eobwɛnji ekina Yuda yana akε yo a esika ende.

²⁶Babɔ̄ kombe emoto na bahɔ̄ oko Matia, na yo akwea hoa a libondo libabwɛnji domi-na-omɔ̄ci.

Bikɔ̄meli 2

Bodoa boMwembo Moṣenɔ̄ke

¹Ibo basusu badaka baboli a esika emɔ̄ci a busa boDomi-itano. (Busa boPentekɔ̄sta)

²Daka ehula oho Diko bundumo, o pwea epipo mènè, na elumeja ndako esusu edaka bo.

³Mojo monè bo modaka o biemi bimosa bia bikabama a tei, na bibakama a diko dimoto na moto.

⁴Ibo basusu baluma na Mwembo Mosènke, na babenga bobala na kopi jitongo mijò mibapa Mwembo bo babale.

⁵BaYuda baya badaka na lisuma ai Njambe badaka a Yelusalema a masu mamina, baya bama donga a makota masusu mangondo.

⁶Yana aka bo daka emina, bato batitana banènè mènè, na bayegebana bou, cina bo bakaka moto na moto, a kopi ende mènè.

⁷Ibo bakamoa na dilese mènè, na babalana bo, Ikani! Bato baya babalaka, bo basusu te bato baGalile?

⁸Oko boa, ekaka so moto na moto monòkò monde mènè cina nda?

⁹Iso te BaPalutia, BaMadai, BaElama, na bato baya badonga a Mesopotamia, Yuda, Kapadokia, Ponto, Asia,

¹⁰Pelugia, Pampuha, Ejipito, na makota maLibia oho a dòngò diKulene, na bato baya badonga oho Loma, na BaYuda na bapakano baya bahekao Bayuda;

¹¹BaKulete na BaAlabia; na bokaka bato bamina baya batòndòkò mijò miNjambe mibokamoa a kopi jisu bénè.

¹²Ibo basusu bakamoa na dilese, na badaka koko na mokakwano; babalana bo, Cina emina edi bo?

¹³Bakina batongo ko basèkè oko bosèkè, na babala bo, Balangoi na vino eyene.

Mwako Motòndò Petelo

¹⁴Petelo adaka na babwènji batongo domi-na-omòci, na yo angò, adipoa monòkò monde, na abala na bu bo, Ino bami baYuda, na no basusu baYelusalema, hokeani mojo mobalaka mbi, na eingeani mojo mu.

¹⁵Ibaba balangoiti nongo o alekè no. Boni. Edi oko *neuf heures* ehuma pe.

¹⁶Mojo mu modi oko mojo mobala motòndòi Yoele bo,

¹⁷Njambe abalaka bo, Mbi nasopabi Mwembo mombi Ai bato basusu a masu masuka. Banabami banu na banabali banu bapabí biseko; Menga manu banèbi mijò a njoti, Na basuku banu batòbí njoti.

¹⁸Mbi nasopabí Mwembo mombi ai bakòmèli bambi bami, na Bakòmèli bambi bali a masu mamina, na bapabi biseko.

¹⁹Nanejabí mijɔ mibokamoa ta busa, Na bimbete a ngondo ya nase, Oko makia, na mosa, na modidi momosa.

²⁰Modika-busa mohindabí, Na songe abongoabí makia, Oko busa bua boKumu bodoakini, Busa bonen̄e boekumu.

²¹Na modabí bo moto na moto yona obeaka a kombe eKumu ahelabí.

²²Ino bami baYisalaele, hokeani mijɔ mi. Ojehakani mojɔ moYesu oNasaleta. Njambe aneja no bo ahɔ moto omina a tei enu, oko na bimbete na mindumba mikɔ Njambe na nde a boso bonu.

²³Ino ko omotombani na omowejani a mole-mobokea na mɔmɔ mabato babe. Njambe ajeba a bobanga mɛnɛ bo badi bomokaba; mojɔ momina modaka oko a mokano monde.

²⁴Njambe ko amocingoa a mbɔci jibogwa, na amongɔjɔ, mojɔ bo bogwa boidaka na ngulu a bomopea na bosusu.

²⁵Mojɔ bo Dawidi abala mojɔ monde bo, Mbi nanekε Kumu ombi a boso bombi masu masusu; Mojɔ bo adi a dɔngɔ dimbi diebɔ ebami bo ambilimejae mbi.

²⁶Molema mombi mosepaka a mojɔ momina, na monɔkɔ mombi modi na enanga; Mojɔ motongo koko,—mokuku mombi mɔyeyoa a esika enjingó.

²⁷Cina bo otakina mwembo mombi a esika ebogwa, Na otajima bo Yona Mosenɔke owe apɔe.

²⁸Onejaini njea jibomɔ, Na molema mombi môda na sepi botɔ, mojɔ bo wε odi na mbi.

²⁹Baninga, kinani nabale na nu a bohu a mojɔ motata osu Dawidi.

³⁰Iyo agwa na bamopusea; esemɔ ende edi oko na su busa bu. Iyo adaka motɔndɔi, na ajebaka bo Njambe amosakea mosako bo abakee okina mwana'nde a mongbelengɔ mobokumu bonde.

³¹Iyo abala boa a mojɔ moMasiya. Anε na atɔndɔ mojɔ mobongɔ boMasiya a bogwa, yana abala yo bo atayeyoa a esika ebagwake, na bo mokuku monde motapo.

³²Oko boa Njambe amongɔjɔ, oko Yesu yo mɛnɛ. Iso basusu bodi banjenɛki bamojɔ momina.

³³Oko boa, adi yo na ekumu a dɔngɔ diebɔ ebami eNjambe, na asi yo Mwembo Mosenɔke ai Sango, o akina yo sako, amosopi ai so, o anekε no na akaka no.

³⁴Mojɔ bo Dawidi aikwea a Diko yo mɛnɛ. Iyo ko abala bo, Kumu abali na Kumu ombi bo, Da ya a ebɔ embi ebami,

³⁵Oko adi mbi pε bopeta dumba soki jiwe a cina jibibota biwe.

³⁶Oko boa, bato basusu badenga diYisalaele babwani bojeba bo Njambe abakea Yesu bo adae Kumu na Masiya, oko yona owa 'no a mole-mobokea.

³⁷Bikenge bimina bibandea oko a milema, na babala na Petelo na babwənji batongo bo, Banginga, êkɔ so ndeni?

³⁸Petelo abala na bubo, Hekojani milema minu, na batisamani ino basusu a kombe eYesu Masiya, a mojɔ moboye bojibe jinu, nongo oseni epeeli eMwembo Mosənɔke.

³⁹Sako ye edi ai no bəne, na bana banu, na bato basusu baya badi bohali pongono, oko bato basusu babeaka Kumu Njambe osu ai yo.

⁴⁰Petelo abatɔndɔ mijɔ mitongo minenɛ, na abaleha bo, Ciani elulu ye engulumake!

⁴¹Oko boa baya bajima mwako monde babatisama. Busa bomina, etango ebacingami ehe na bato kotojisato.

⁴²Ibo badaka na bingi enenɛ a mojɔ mobokoja bobabwənji, na bakatana na molema momɔci a bobuka moləmbɛ na a mojɔ mbo'nga.

⁴³Bato basusu badaka na bɔ a mojɔ mobimbete na mindumba mikɔkɔ babwənji.

⁴⁴Bato basusu baya bajimaka bakatana bopele, na bakabana leka pongono.

⁴⁵Bangęje ndako na leka lobu, na bakaba likonja na bato batongo o adaka moto na moto na taka.

⁴⁶Baikputoa bokwea a tempelo busa na busa na molema momɔci. Babukaka moləmbɛ a ndako-ndako, na bayakaka mia oko na sepi na bowi a milema.

⁴⁷Basakoaka Njambe, na badaka na gala epele a tei ebato bangando. Njambe anengęja Denga busa na busa oko na bato baya bahelaka.

Bikɔmeli 3

Mondɔke a Tempelo

¹Petelo na Yoane bakes a tempelo a ehole ebo'nga, oko *trois heures*.

²Okina momi adaka ena yona obotama mondɔke. Bamotombaka bo bamosambee masu masusu a modipe motempelo mua modaka na kombe Esengɔ; na angaka likonja ai bato baya bakweaka a tempelo.

³Yana ane yo bo Petelo na Yoane bakes akwee a tempelo, aba'nga likonja.

⁴Petelo na Yoane bamonja ngbe; na Petelo abala bo, Anja so!

⁵Iyo abanja boa, moj̄ bo adaka na njingo bo bamop̄e ekina eka.

⁶Pet̄elo ko abala bo, Mbi napeliti nongo likonja, p̄ep̄e flanka, p̄ep̄e pata; endele ko, mbi napaka w̄e oko lia lipeli mbi; a kombe eYesu Masiya oNasaleta, dala!

⁷Amopea na eb̄o ebami, amongoj̄, na yo ass̄ ngulu bokpa a mako na a gaga.

⁸Ama mema, apimboa, abanga bodala, na akwea na bu a tempelo oko na bosakoa ai Njambe.

⁹Bato basusu bangando bamone akadale na akasakoe Njambe.

¹⁰Bamombetea, na bajeba bo adi oko moto yona omaka da a modipe motempelo a moj̄ molinga; na bakamo na bayegebana cina emoj̄ mok̄om̄ na nde.

¹¹Iyo ko aipala bokina Pet̄elo na Yoane, na bato basusu bapota, na batitana a Eseba eS̄ol̄om̄.

Eleho ePet̄elo

¹²Yana an̄e Pet̄elo moj̄ momina, abala na bato bo, Ino bami baYisalaele, okamoakani a moj̄ momoto yo cina eye? onjakani so ngbe moj̄ moye? Olek̄eni bo so bodalejai moto yoyo na ejimeli na ngulu esu b̄en̄e?

¹³Njambe oAbalayama na oIsaka na oYakobo, Njambe obatata basu akumejai Mwana'nde Yesu. Ino omopani a m̄om̄ maPilato, na omolonani a boso bonde, yana ajima Pilato bo amocingoe.

¹⁴Olonani Yona Moseñ̄ke, Yona oBodongo, na oh̄ni bo bacingoe mobengo ai no.

¹⁵Owani Kumu oBom̄; Njambe ko amongoj̄ a bogwa, na so bodi banj̄en̄eki bamoj̄ momina.

¹⁶Edi oko kombe ende yena epi moto yoyo ngulu, cina eejimeli a kombe ende; omonek̄eni na omojebakani no b̄en̄e. Edi oko ejimeli ai Yesu yena epi moto yoyo mokuku monjilake a boso bonu basusu.

¹⁷Baninga, mbi najebaka bo ok̄ni moj̄ momina a libumi linu, no b̄en̄e na bakumu banu pongono.

¹⁸Njambe ko ajebeja moj̄ momina eyou na min̄k̄o mibat̄ond̄i basusu, bo Masiya onde adi bodingoa; na moj̄ momina mongami boa.

¹⁹Oko boa toma jasani dosa; toma hekojani milema, bo jibe jinu jihakoame, bo Kumu alomee no masu mabom̄ boyene,

²⁰na alome Masiya yona oh̄enḡem̄ a moj̄ monu, oko Yesu.

²¹Iyo ko adi boyeyoa oho Diko oko a ehole eboh̄ongeja ngando jesusu. Njambe at̄ond̄ moj̄ momina ehele m̄en̄e na min̄k̄o mibat̄ond̄i bande basen̄oke.

²²Mose yo mene abala bo, Kumu Njambe adi bongojɔ motɔndɔi ai no a tei ebaninga banu, o adi mbi. Toma hokeani mijɔ misusu mibalabi yo na nu.

²³Moto na moto yona olonabí bohokea motɔndɔi omina adi bogwa a tei ebato.

²⁴Samwele, na batɔndɔi basusu batongo bayo badoa ngɔngɔ jinde, na babwɛnji koko, bajebaja mojɔ momasu mama.

²⁵Ino odini bana babatɔndɔi, basangoli baMokongo mobakea Njambe na batata banu, yana abala yo na Abalayama bo, Makota masusu mangondo majongoamabí a mojɔ mobana bawε.

²⁶Njambe angɔjɔ Mwana'nde, na amolomea boso ai no a bojongoa no, na a bobuleja no basusu a jibe jinu.

Bikɔmeli 4

Bapea Babwɛnji

¹Nganga, na mosuku otempelo, na Basadoki, bamea oko yana abalaka Pɛtelo na Yoane na bato.

²Ibo badaka na kɛlɛ, cina bo babwɛnji bakojaka bato, na batɔndɔkɔ mojɔ mobongɔ boYesu a bogwa.

³Babapea na baba'sa ta blɔkɔ, bo bambe ehuma, mojɔ bo busa boma dipa.

⁴Bato banɛnɛ ko bayo baka mwako momina bajima. Etango ebami edaka isa koto jitano na dea.

⁵Yana ahoa busa, babolea likita libakumu, na basuku bangando, na basɔni, a Yelusalema.

⁶Ana, mosuku onganga adaka ena, na Kayapa, na Yoane, na Alesandele, na bato basusu badenga dimosuku onganga.

⁷Bameja Pɛtelo na Yoane a boso bobu, na babahɔjɔ bo, Ino okɔini mojɔ mu na nguliu enda, na a kombe enda?

⁸Pɛtelo alumia oko na Mwembo Mosenɔke, na abala na bu bo, Ino bakumu bangando na basuku,

⁹opalakani bokokeleja so busa bu a mojɔ moelomu epele eboheleja moto yo a yogo, oko moto mondɔke.

¹⁰Toma cingeani no basusu, na bato basusu baYisalaele pongono, bo moto yoyo adi a boso bonu edεye na mokuku mopele, oko a mojɔ mokombe eYesu Masiya oNasaleta, oko yona owa no a mole-mobokea; Njambe ko amongɔjɔ a bogwa.

¹¹Iyo adi litai lilona no bayoi, na lidi edεye litai limogbukusu.

¹²Pepe nongo okina otongo odi boheleja; mojo bo botahela nongo na ekina kombe etongo a tei ebato ya nase, oko kombe emina pe.

¹³Ibo bakamoa oko bokamoa yana ane bo bogale boPetelo na Yoane; mojo bo bajebaka bo badi oko bato baelomu pe, pepe nongo ejebeli enene emikanda. A mojo momina bacingea bo bama cingama oko na Yesu.

¹⁴Na anekse bo moto yona oma hela a yogo a boso bobu, baisombeja nongo ekenge.

¹⁵Oko boa babatondjo bo bamane a likita, bo babalane mojo momina.

¹⁶Babala bo, Ekso so na bato bamina ndeni? Bato basusu baYelusalema bajebaka bo bakoi mondumba monene, na so benue bobwaniti bongana mojo momina.

¹⁷Bopele bo bobakanee, na bobalembe bo batabala koko na moto a kombe emina, mojo mosaka he a tei ebato.

¹⁸Oko boa, bababea na baba-lemba na bopipo bo batabala, na batakoja koko a kombe eYesu.

¹⁹Petelo na Yoane ko babasombeja bo, A boso boNjambe, iso bobwani bohokea nda, isa Njambe, isa no? Sambejani no benue.

²⁰Mojo bo so botahonokc boda bogo a mojo mongando jine so na jika so.

²¹Babakanea koko na babacingoa; bato basusu basakoaka Njambe a mojo momondumba momina; oko boa baihono bokc na bu nongo mojo, oko a mojo mobato bangando.

²²Mojo bo momi omina yona ohela a yogo adaka na bianga domi-insei na dea.

²³Ama bo cingoama, ba'mi ke oko ai bina'bu, na babatondjo mijjo misusu mibala nganga na basuku.

²⁴Yana aka bo, basakoa Njambe na molema momoci bo, Kumu oDiko na oNase, we oyoa Diko na Nase, na madiba-mamukwa, na leka losusu lua lodi a bisika bimina.

²⁵Na obala na Mwembo Mosenoke oko na monokc motata osu Dawidi, mokomeli owe; obala bo, Makota madi na ejoki, Na bato bangando badumbaka ndungu jingasa mojo moye?

²⁶Bakumu bangondo badi na moselingo mobila, Na bakonji batitani, A bona na Kumu na Masiya onde.

²⁷Soti menue, batitana a ngando ye a bona na Yesu Mwana owe mosenoke yona ohenge we,—oko Elode, na Pontio Pilato, na bato bamakota matongo, na bato baYisalaele pongono.

- ²⁸Oko boa bangameja ngando jisusu jikana wε eyou na ngulu na bowεi bowε.
- ²⁹Edεye Kumu, ika rnijɔ mikaneaka bo. Pa bakɔmeli bawε bogale bonεnε bo botɔndɔe mwako mowε.
- ³⁰Ninoja ebɔ ewε a bosengoa, na a bokɔ bimbete na mindumba a kombe eYesu Mwana owε mosεnɔke.
- ³¹Aseja bo bo'nga, ndako edaka bo baboli ekumana oko bokumana. Ibo basusu baluma na Mwembo Mosεnɔke, na batɔndɔ Mwako moNjambe na bogale.
- ³²Bato basusu bay a bajima, kanga banεnε mεnε, badaka na molema momɔci na mwembo momɔci. Pεpε nongo moto obala bo leka londe lodaka ai yo mεnε; bakabana leka losusu.
- ³³Babwεnji batɔndɔ mwako mobongɔ boYesu a bogwa na kpaci enεnε, na monganji moNjambe monεnε modaka na bu.
- ³⁴Pεpε nongo moto obu odaka na taka, cina bo bay a badaka na gbie isa ndako, bagingejε, badoa na likonja lileka longejε bo,
- ³⁵na balisambea a bibota bibabwεnji. Oko boa moto na moto asɔ libondo lia libwana na taka ende.
- ³⁶Okina MoLewi pongono, kombe ende Yosepa, (Babwεnji bamobakea kombe etongo Balanaba. Cina ekombe emina edi Mwana oEleho,) moto oKupulio,
- ³⁷angejε gbie ende, adoa na likonja limina, na alisambea a bibota bibabwεnji.

Bikɔmeli 5

Anania na Sapila

- ¹Okina momi, kombe ende Anania, na mwali onde Sapila, bangεjε gbie.
- ²Iyo ko abomba ekenge elikonja, oko na mojimo momwali onde. Adoa na ekenge etongo, na alisambea a bibota bibabwεnji.
- ³Pεtelo ko abala bo, Anania, Satana alumεjai molema mowε bo okosee Mwembo Mosεnɔke, na bo obombe ekenge elikonja ligbie mojɔ moye?
- ⁴Adaka wε pε bopeta ngejε gbie, edaka oko ai wε; na yana angejεi wε gbie, likonja lidaki oko likonja liwε bo okɔe o apalaki wε. Oko boa, olei a molema mowε bo okɔe mojɔ momina cina eye? Wε okosei Njambe, te bato.
- ⁵Anania, ama yo ka bikenge bimina, ami kwa oko nase, ami gwa oko bogwa. Na bato basusu bay a baka mojɔ momina baluluma na bɔ.
- ⁶Menga ko badoa, bamodinga, bamotomba na bamopusea.

⁷Yana anç isa *heures* jisato na dea, mwali onde adoa, pε nongo bojeba mojɔ momina.

⁸Na Pɛtɛlo abala na nde bo, Tɔndɔ mbi isa ongejéini gbie na bobuno bu? Iyo asɔmbeja bo, Ee, oko bobuno bomina.

⁹Pɛtɛlo abala na nde bo, Ino odumbini ndungu bo omekeni Mwembo Moseñɔke mojɔ moye? Hokea! Bibota bibato baya bapusei muma'wε bidi ya a monɔkɔ mondako, na bâtomba wε pongono.

¹⁰Iyo akwa bokpa a bibota binde, na agwa oko bogwa. Yana akwea menga, bamotana oko mogo, bamotomba na bamopusea a dɔngɔ dimuma nde.

¹¹Bato basusu baDenga, na bato basusu batongo baya baka mojɔ momina, badaka na bɔ bonenε menε.

Elomu eBabwɛnji

¹²Babwɛnji bakɔkɔ bimbete na mindumba minenε a boso bobato. Batitanaka na molema momɔci a Eseba eSɔlɔmɔ.

¹³Bato batongo badaka na bɔ a bocingama na bu; bato bangando ko basepaka na bu bou menε.

¹⁴Na etango ebato baya bajimea Kumu ehε oko bohε, banenε menε, na bami na bali pongono.

¹⁵Bamejaka bato babego a macilinga, na babasambeaka a bisambe na matɔkɔ mabu, na njingo bo Pɛtɛlo akanɔ, esie ende ekunde bakina babu.

¹⁶Na bato banenε badonga a ngando jitongo jia jidaka mbuci, a bodoa a Yelusalema na babego, na bato baya badingoaka na miembo mibe; na bahela kanga basusu menε.

¹⁷Mosuku onganga, na bato basusu baya badaka bacingi na nde (oko bato baejimeli eBaSadoki) badaka na likaka linenε a mojɔ momina.

¹⁸Bato bamina bangɔ, bapea babwɛnji, na babasa ta blɔkɔ engando.

¹⁹Obwɛnji ko oKumu adipoa midipe miblɔkɔ na bulu, abameja sokolu, na abala bo,

²⁰Keni, imani mema oko oho a tempelo, tɔndɔni bato mwako mosusu moBomɔ.

²¹Ibo baka mojɔ momina, na bakwea a tempelo ehuma menε, na babanga bokoja. Yana atitana mosuku onganga na bato bande, babolea likita libajuji, na basuku baYisalaele, na baloma ndɔsɔ ebabwɛnji a blɔkɔ.

²²Bapolisi baya bakε baibatana a blɔkɔ; oko boa bahula oko na bwɛnji bomina.

²³Babala bo, Iso botani ndako eblōkō ebaki bopele mēnē, na basinjili badaki ba'mi ta midipe; adipoi so ko modipe, botaniti nongo moto a tei.

²⁴Yana aka mosuku otempelo, na basuku banganga moj̄ momina, badaka na bokamo bonēnē, pē bocingea nongo cina emina.

²⁵Okina moto adoa a ehole emina, na abala na bu bo, Ikani! Bami basabi no ta blōkō badi oko oho a tempelo, na bakojaka bato.

²⁶Oko boa, kapitēni akē na bapolisi na abapea, te na sanga ko, moj̄ bo badaka na bō, isa bato badi boba'la matai.

²⁷Bahula na bu, na babameja a boso bolikita. Mosuku onganga abanga bobakokeleja.

²⁸Abala bo, Iso boilemba no na mobeko mopipo mēnē bo otakojani koko a kombe emina? Anjani edēye ko; olumejaini Yelusalema na bokoja bonu, na opalakani bobakea lindo jimakia mamoto omina oko ai so.

²⁹Petelo na babwēnji batongo basombeja bo, Na Njambe, na bato, iso bodi bosuma gbo oko Njambe.

³⁰Njambe obasangwa'su angōj̄o Yesu yana amobakea no a mole na omowani.

³¹Njambe ko amokumeja a ebō ende ebami, Kumu na Moheleja, a moj̄ mobohekoja milema miYisalaele na boyē jibe jibu.

³²Iso bodi banjēnēki bangando Jimina, na Mwembo Moseñōke pongono, mua mopaka Njambe ai baya bamosumaka.

³³Yana aka bo bikenge bimina, bakēnjo kēnjo enēnē, na badaka na posa bo babawoe.

³⁴Okina MoPalusi ko angō a tei elikita, kombe ende Gamaliele. Iyo adaka mokoja oMibeko, na adaka na gala epele a tei ebato basusu, na apa monōkō bo bamanejae babwēnji mweka.

³⁵Abala na likita bo, Ino bami baYisalaele, toma nganjamani na moj̄ mokanaka no bokō na bato ba.

³⁶Moj̄ bo Teuda adoa, te nongo ehele, na ajimeja bato bo adi okina kumu. Na bato bacingama na nde isa mikama minēi na dea. Bamowa yo mēnē, na bato basusu baya bacingama na nde bacia na basamboa.

³⁷Okina otongo koko, Yuda oGalile, angō ngōngō jinde, oko a ehole elangaka bo etango ebato, na alēngē bakma bato ai yo. Iyo agwa pongono, na bato basusu baya bacingama na nde banangana oko bonangana.

³⁸A mojɔ momina, mbi nalehaka no bo otakɔni na bato ba nongo mojɔ; kinani badae. Cina bo, isa mojɔ mumu, isa elomu yeye edi oko mojɔ mobato pɛ, edi bodimoa.

³⁹Isa ko modi mojɔ moNjambe, ino otahɔnɔkɔni bomogbokeja; toma nganjamani bo osaka 'nani na Njambe yo mɛnɛ.

⁴⁰Bajima mojɔ mobala yo. Babea babwɛnji, babatueja, bababekea bo batabala koko a kombe eYesu, na babacingoa.

⁴¹Babwɛnji bamana a likita, na badaka na sepi mojɔ bo babwana bosɔ ekumu ebosamboa a mojɔ mokombe emina.

⁴²Bakoja busa na busa a tempelo na a ndako, na batɔndɔ Mwako Mopele moYesu Masiya, pɛ nongo bokina.

Bikɔmeli 6

Basuku baDenga Sanibo

¹Etango ebacingami ehɛkɛ oko bohɛ a masu mamina. BaYuda ko baya babalaka kɔpi eBaEla badaka na manungunungu a mojɔ moBaEbele, cina bo bali babu babogwa baisɔkɔ libondo libipeeli busa na busa.

²Babwɛnji domi-na-babae babolea likita libacingami; babala na bu bo, Iso bobwaniti bokina mwako moNjambe botɔndɔ a bokɔ elomu emesa.

³Baninga, dukani bami sambo a tei enu, bato bagala epele baya balumi na Mwembo Mosenɔke na bowei, bo bobapɛ elomu emina.

⁴Iso ko bodi bosahɛngɛ oko a mojɔ mobo'nga na elomu eMwako Mopele.

⁵Bato basusu bajima mojɔ momina; na bahɔ Sɛtɛpano, moto oejimeli yona oluma na Mwembo Mosenɔke. Bahɔ koko Pilipo na Pulokɔlɔ, Nikanola na Timona, Palamena na Nikola, mocingami oAntiokia.

⁶Babameja a boso bobabwɛnji, baya ba'nga Njambe, na babakea mɔmɔ ai bo.

Sɛtɛpano

⁷Mwako moNjambe monangana. Etango ebacingami ehɛ bou mɛnɛ a Yelusalema, na nganga banɛnɛ bahekhoa a ejimeli emina na lisuma.

⁸Sɛtɛpano alumna na ngulu na monganji, na akɔkɔ bimbete na mindumba a tei ebato.

⁹Bakina bato ko babanga boboma kite na Sɛtɛpano, oko bato basinagoge eBikomba, na BaKulene, na BaKilikia, na BaAsia.

¹⁰Ibo ko bagboka na bowei bonde, mojɔ bo yo abalaka oko na Mwembo.

¹¹A mojɔ momina, bajimeja bakina bato na poloso bo babale bo, Iso bomo'ki yana abali yo bikenge bibosambolu a mojɔ moMose na a mojɔ moNjambe.

¹²Oko boa bakeja bato kεlε, na basuku na basɔni pongono. Ibo badoa, bamopea, na bake na nde a esambi.

¹³Bameja batati babokosea baya babala bo, Moto yoyo t'akinake bobala mijɔ mibosambolu a mojɔ moesika ye esenɔke, na Mibeko pongono.

¹⁴Iso bomo'ki yana abali yo bo Yesu, yona oNasaleta, adi bobuka esika ye, na bobeja mijɔ misɔ so ai Mose.

¹⁵Bato basusu baya badaka a esambi banjaka Sεtεpano linjenje, na banε boso bonde o boso boobwεnji oDiko.

Bikɔmeli 7

¹Mosuku onganga abala bo, Mijɔ mi midi soti?

²Sεtεpano asɔmbeja bo, Baninga na basango, hokeani! Njambe oekumu asaboloja ai tata osu Abalayama yana adaka yo a Mesopotamia, oko apetakini kε a Alana.

³Abala na nde bo, Donga ya a esika yeye. Kina bato bawε mεnε a bokε a ngondo etongo. Mbi mεnε nadi boneja wε esika emina.

⁴Oko boa yo adonga a ngondo eKaladai, na ake adae a Alana. Yana agwa sangwa'nde, Njambe amodongeja a esika emina, bo adoe a ngondo ye edi no edεye.

⁵Endele ko, aimopa nongo mokpɔtɔ a ngondo ye esu, pεpε nongo esimbo emɔci. Yana adaka yo ngasa, pεpε mwana, Njambe amokinea sako bo ngondo ye edae oko ai yo na bana bande.

⁶Njambe abala koko na nde bo bana bande badi boyeyoa a ekina ngondo etongo, bo badi boda a libuli oho, na bo badi boda na minɔngɔ bianga mikama minεi.

⁷Njambe abala koko bo, Mbi nâsambeja bato baya bâbapika babuli. Ngɔngɔ Jimina ko, badi bomana a bohu, na bâkɔmε mbi a esika ye.

⁸Njambe abakea na Abalayama mokongo mobolena-ganda. Oko boa, yana abota yo Isaka, Abalayama amolena ganda a busa bobomwambe. Isaka abota Yakobo, na Yakobo abota batata domi-na-babae.

⁹Batata bamina bangεjε Yosepa a Ejipito, oko a mojɔ molikaka.

¹⁰Njambe ko adaka na nde, na amoheleja a minongo minde misusu. Amopa koko bowei, na amokɔ monganji a boso boPalo kumu oEjipito. Iyo abakea Yosepa *gouverneur* oEjipito, na amopa kpaci a ndako ende esusu.

¹¹Linjale lidoa linene a makota masusu maEjipito na Kanana, jɔɔlɔ enene mene. Batata basu baiboloja nongo leka loboyaka.

¹²Yakobo ko aka bo ndongo jidaka a Ejipito, na aloma batata basu oho,—ehole eboso yena.

¹³Yana asombɔ bo koko oho, Yosepa ajebaja bananango bo yo adi mwangwa'bu. Oko boa mojɔ mombota eYosepa moboloa ai Palo.

¹⁴Yosepa aloma ndɔsɔ esangwa'nde Yakobo na denga dinde disusu, bato macinda masato na domi na bato batano.

¹⁵Oko boa Yakobo ake a Ejipito na agwa oho, na batata basu pongono.

¹⁶Babatomba na babapusea a Sekeme, oko a esemɔ ema somba Abalayama na likonja ai bana baAmola.

¹⁷Yana abatama ehole ebongameja sako ekina Njambe na Abalayama, bato basu bahε bou mene a Ejipito.

¹⁸Okina otongo adaka kumu a ehole emina, yona oijeba mojɔ moYosepa.

¹⁹Kumu omina akɔ poloso na bato basu, anɔngeja batata basu, na adumba mobeko bo badumbe bana babu bakεkεlεkε bo batahela.

²⁰Mose ahotama a ehole emina, mwana obomwenga mene a boso boNjambe. Bamobanea songe basato a ndako esangwa'nde.

²¹Yana amomeja bo sokolu, mwamwali oPalo amoboloja, na amobɔkɔ o mwana'nde mene.

²²Bakoja Mose mijɔ misusu mibowei boEjipito, na adaka moto monene a mojɔ moebaeli ende na bilomu binde.

²³Yana adaka yo na bianga domi-inεi, akana bo akεe a bonja bato bande mene, bana baYisalaele.

²⁴Iyo anε okina obu na monongo na amokakela. Awa moto oEjipito, na aheleja yona odaka na monongo.

²⁵Iyo ale bo bato bande mene badi bocingea bo Njambe adi bobaheleja na ebɔ ende. Ibo ko baicingea.

²⁶Ahoa koko busa, atana bakina babu baya bawanaka, na akwea bosili. Abala bo, Ino bami, ino bananange jibato, okɔkɔni mojɔ mu mobe cina eye?

²⁷Moto ko yona oma bang a moj na motuteano monde, amolona na abala na nde bo, Obakei wε kumu na juji osu nda?

²⁸Opalaka bowa mbi o awabi wε MoEjipito mokɔ?

²⁹Mose acia oko bocia a moj moekenge emina. Ake adae a likota liMidiana, na abota bana-bami babae oho.

³⁰Yana asia bianga domi-inεi, obwεnji oDiko asaboloja ai yo a lipumba limole mua mongoa mosa, oho a lisobe liMono moSinai.

³¹Yana anε Mose moj momina, akamo a bou. Abatama yo ko a bokokeleja moj, Kumu abala na nde bo,

³²Mbi nadi Njambe obatata bawε; Njambe oAbalayama, oIsaka, na oYakobo. Mose alulum a bɔ, pε bohɔnɔ bonja.

³³Kumu abala na nde bo, Ihwa sapata a bibota biwε, moj bo esika edi wε edi mokpɔtɔ mosenɔke.

³⁴Mbi nanεkε soti monɔngɔ mobato bambi a Ejipito. Nakaka mibemo mibu, na natiti ya bo nabaheljea. Edεye, doa, nàloma wε a Ejipito.

³⁵Oko boa Njambe aloma Mose bo adae kumu, na juji, na moheleja, oko na ngulu eebɔ eobwεnji oDiko yona osaboloja ai yo a lipumba,—oko Mose oma bo lona boso yana abala 'bo bo, Obakei wε kumu na juji osu nda?

³⁶Iyo abamaneja a Ejipito. Akɔ mindumba na bimbete bianga domi-inεi a Ejipito, a Madiba Makpetu, na a lisobe.

³⁷Mose omina adi oko yona obala na BaYisalaele bo, Njambe adi bongɔjɔ motɔndɔi ai no a tei ebaninga banu, o adi mbi.

³⁸Iyo adaka koko a likita a lisobe, na adaka na obwεnji oDiko yana abala yo na batata basu a Mono moSinai. Iyo asɔ koko bikenge bibomɔ a bopa so.

³⁹Batata basu ko baipala bomosuma. Bamolona oko bolona, na milema mibu mihekao a Ejipito.

⁴⁰Babala na Alona bo, Lua banjambe a moj mosu, bo badale a boso bosu. Moj bo, yo Mose yona omaneja so a Ejipito—botajebaka nongo moj mua mokwi na nde.

⁴¹Balua mwana-ŋɔmbɔ a masu mamina, bawa masiko a bopeja elimo emina, na badaka na sepi a moj moeka ekɔ bo na mɔmɔ mabu bεnε.

⁴²Njambe ko ababule, na abakina bo basakoe njɔtɔ baDiko, o adi mosɔnɔ a mokanda mobatɔndɔi bo, lno bato baYisalaele, owani tito a bopeja mbi masiko, Bianga domi-inεi a lisobe?

⁴³Otombani oko Etondo ebosakoa eMɔlɔka, Na njɔtɔ onjambe onu Lepana, Na bilimo bilua no a mojɔ mobosakoa. A mojɔ momina, mbi nâdongeja no oho a suka eBabilo.

⁴⁴Batata basu badaka na Etondo etati a lisobe. Iyona obala na Mose amobekea bo ayoe Etondo oko na elimo ema yo ne.

⁴⁵Yana acieja Njambe makota a boso bobatata basu, batomba Etondo emina, bakwea na Yosua a esika ebapakano, na eyeyoa na bu oko a ehole eDawidi.

⁴⁶Njambe asepa na Dawidi. Iyo anga Njambe njea bo abolojae esika eboda a mojɔ moNjambe oYakobo.

⁴⁷Edaka Sɔlɔmɔ ko yona oyoa ndako ende.

⁴⁸Endele ko, Yona oBonɔ t'adake a ndako jiyoaka bato na mɔmɔ. Motɔndɔi abala bo,

⁴⁹Busa bodi ngende embi; Ngondo edi egboto a bobakea bibota bimbi. Kumu abalaka bo, Odini boyoa ndako embi na ye? Esika eliheme limbi edi jo?

⁵⁰Ebɔ embi mɛnɛ eikɔ leka lu losusu?

⁵¹Ino bato bamelo mipipo! Balena no ganda, bailena no ko a milema na a matoi. Ino oswianakani na Mwembo Mosenɔke bihole bisusu, o akɔ batata banu.

⁵²Batata banu baikputoa bodingoja batɔndɔi basusu. Bawa batɔndɔi bay a batɔndɔ eyou bo Yona Mosenɔke adi bodoa ngɔngɔ. Ino ko odini bakabi na bawoi bande,

⁵³oko no bay a basɔ Mibeko a mɔmɔ mababwɛnji baDiko, pɛ ko bomisuma.

⁵⁴Yana aka bo bikenge bimina, bakɛnɔ kɛnɔ enɛnɛ a milema mibu, na bamokɔ bikɛɛlɛ bimino.

⁵⁵Sɛtɛpano ko alumna na Mwembo Mosenɔke, akaho miso diko, anɛ ekumu eNjamhe, na anɛ Yesu yona odaka ami mema a ebɔ ebami eNjambe.

⁵⁶Na abala bo, Anjani! Mbi nanɛkɛ Diko bwase, na Mwana 'Moto adi ami a ebɔ ebami eNjambe.

⁵⁷Ibo baditea matoi mabu, babekoa na bopipo, na bapota ai yo na mokano momoci.

⁵⁸Bamogbula a sokolu engando, na bamola matai. Banjenɛki bakina bisenja bibu a bibota bimwenga omɔci, kombe ende Saula.

⁵⁹Yana alaka bo Sɛtɛpano matai, yo anga bo, Kumu Yesu, asɔ mwembo mombi.

⁶⁰Atita na magbunda, na abekoa na bopipo bo, Kumu, pε bobakea lindo emojɔ mu ai bo. Ama yo bala boa, ami hwε oko bohwε. Na Saula ajima mojɔ mobogwa bondo.

Bikɔmeli 8

Denga diYelusalema a tei eMinɔngɔ

¹Bato baDenga diYelusalema babanga bone monɔngɔ monenε a busa bomina, na banangana bo basusu a Yuda na Samalia. Badika a Yelusalema oko babwεnji pε.

²Bato baejimeli bapusea Sεtεpano, na bamoyea eyeeli enεnε.

³Saula ko anɔngeja Denga. Akweaka a ndako na ndako, na apeaka bami na bali bo abasε ta blɔkɔ.

Pilipo a Samalia

⁴Bato bay a banangana batɔndɔ mwako a bisika bisusu.

⁵Pilipo ake a ekina ngando eSamalia, na abatɔndɔ Mwako moMasiya.

⁶Yana aka bo, na yana anε bo bimbete bikɔkɔ Pilipo, bahokea mijɔ mibalaka yo na molema momɔci.

⁷Mojɔ bo bato banεnε bahela a miembo mibe; miembo mibe mimana na bobekoa na bogboma; bandɔke na bamitεngu bahela koko banεnε.

⁸Na sepi edaka enεnε a ngando emina.

⁹Okina momi adaka a ngando emina, kombe ende Simona. Iyo adaka nganga obole. Akamojaka bato baSamalia, na abajimeja bo adaka moto monεnε.

¹⁰Bato basusu bahokeaka moto omina, bato banεnεna bato bakεkεlεkε pongono. Babala bo, Moto yo adi Ngulu eNjambe yena edi na kombe Enεnε.

¹¹Bamojimea, mojɔ bo abakamojaka ehole eyai na mijɔ mibole bonde.

¹²Yana ko ajima bo Mwako Mopele moBokumu boNjambe mua motɔndɔkɔ Pilipo, na mojɔ mokombe eYesu Masiya, babatisama, na bami na bali pongono.

¹³Simona yo mεnε ajima pongono, na abatisama. Aikina nongo Pilipo, na akamoa bou a mojɔ mobimbete na mindumba mikɔkɔ yo.

¹⁴Yana aka babwεnji a Yelusalema bo bato baSamalia basɔ Ebæli eNjambe, babalomea Petelo na Yoane.

¹⁵Ibo bakε oho na ba'nga a mojɔ mobu, bo base Mwembo Mosεnɔke.

¹⁶Mojo bo Mwembo Mosenke moipaka sopea ai bo. Bama batisama oko a kombe eKumu Yesu pe.

¹⁷Babwenji bababakea mɔmɔ, na baso Mwembo Mosenke.

¹⁸Yana ane Simona bo basso Mwembo Mosenke oko na bobakea bomɔmɔ mababwenji, yo apala bo abape likonja.

¹⁹Abala na bu bo, Pani mbi kpaci emina pongono, bo nakabakea mɔmɔ ai moto, ase Mwembo Mosenke.

²⁰Petelo amosɔmbeja bo, Yε likonja liwε ligwε, na wε mεnε pongono,—wε yona odingaka bo odi bosomba epeeli eNjambe na likonja!

²¹Wε opeliti nongo libondo limojɔ mu, pεpε nongo mweka; mojo bo molema mowε moditi bojo a miso maNjambe.

²²Hekoja molema mowε a mojo mobobe bowε; ingɔɔnɔ Njambe, isa abwani bokina bobe bobolε bomolema mowε.

²³Mojo bo mbi nanεke bo odi a njɔngɔ na boyo, na a mbɔci jibobe.

²⁴Simona asɔmbeja bo, Ingɔɔnɔni Kumu a mojo mombi, bo nitane nongo mijɔ mibali no.

²⁵Ama bo tata tnojɔ moKumu, na ama bo tɔndɔ Mwako moKumu, ba'mi hula oko a Yelusalema, na bakatɔndɔe Mwako Mopele a ngando jinεnε jiSamalia.

Moto oEtiopia

²⁶Obwεnji oKtunu abala na Pilipo bo, Angɔ; kε oho a sudo, a njea eYelusalema na Gaza, oko njea elisohe.

²⁷Iyo angɔ, ake oho, na atana okina mosuku oEtiopia yona odaka na kpaci enεnε a bokumu boKandake, kumu-mwali oEtiopia, na adaka mobanei olikonja linde lisusu.

²⁸Iyo ama kε a Yelusalema a bosakoa Njambe, na adaka a njea elihule.

²⁹Mwembo mobala na Pilipo bo, Kε acingame na lijangi dia.

³⁰Pilipo apota ai moto omina, na amoka akalange mokanda momotɔndɔi Yisaya. Amohɔjɔ bo, Ocingeaka mojo molangaka we?

³¹Iyo amosɔmbeja bo, Moto amiti neja mbi njea nadi bocingea na ye? Abea Pilipo bo akonde a boda na nde.

³²Esika edaka yo akalange edaka oko ye, Bakε na nde o ekɔmeli ebata bo bamowoe. Mwana-bata adi emimi a boso bomoto yona omolenaka ngungi; Iyo koko boa; aidipoa nongo monɔkɔ monde.

³³Iyo asamboa, na bamolona esambi esoti Odi botondɔ mojɔ mombota ende nda? Mojɔ bo basukeja mohelo monde ya nase.

³⁴Moto omina abala na Pilipo bo, Mbi nahɔjɔkɔ wε lihɔjɔ. Motɔndɔi abalaka a mojɔ monda? isa a mojɔ monde mɛnɛ, isa moto otongo?

³⁵Pilipo adipoa monɔkɔ monde, atomba bosɔnɔ bomina, na abanga bomotondɔ Mwako Mopele moYesu.

³⁶Akɛkɛ bo a njea emina, bamea a ekina ediba. Mosuku omina abala bo, Anja madiba! Mbi nabwaniti bobatisama?

³⁷Pilipo abala bo, Isa ojimaka na molema mowε mosusu, obwani.

³⁸Iyo apa monɔkɔ bo bamejae lijangi. Batitea a madiba ibo basusu babae, Pilipo na mosuku pongono, na Pilipo amobatisa.

³⁹Aduboa bo a madiba, Mwembo moKumu motomba Pilipo, na mosuku omina aimone koko. Iyo akε oko a njea ende na sepi.

⁴⁰Pilipo ko adaka a Asoto; akanɔne a ngando na ngando a botondɔ Mwako Mopele, na amea boa a Kaisalia.

Bikɔmeli 9

Saula Ajima

¹Saula aikina bokanea bacingami baKumu bo abawoe. Iyo akε ai mosuku onganga

²na amonga mikanda a mojɔ mosinagoge jiDamaseke, bo akaboloja bato baNjea emina oho, adi bohula na bu a mbɔci a Yelusalema, isa bami isa bali.

³Abatama yo na Damaseke, oko yana adulaka yo a njea, bohu bonɛnɛ bodonga bundumo oho Diko, na bongɛngɛ a esika edaka yo.

⁴Iyo akwa ta kpɔtɔ, na aka kɔpi ekabale na nde bo, Saula, Saula, onɔngejaka mbi mojɔ moye?

⁵Iyo asɔmbeja bo, Wε nda, Kumu? Kumu abala bo, Mbi nadi Yesu, nâ wε onɔngejaka oko mbi.

⁶Angɔ ko. Kε oho a ngando, na odi boka oho mojɔ mobwani wε bokɔ.

⁷Bami baya bamopakaka a njea badaka o bimimi; baka kɔpi, pε ko bone nongo moto.

⁸Saula angɔ a kpɔtɔ; adipoa yo miso ko, ainɛ nongo eka. Oko boa bamopea ebɔ na bamolɔndɔ boa a Damaseke.

⁹Adaka masu masato pε bone na miso, pε boyaka, pε bomwaka.

¹⁰Okina mokingami adaka a Damaseke, kombe ende Anania. Kumu amobea a njɔti bo, Anania. Iyo 'ɛ bo, Kumu, mbi yona!

¹¹Na Kumu abala na nde bo, Angɔ, ke oho a licilinga lia lidi na kombe Litangboake, oko a ndako eYuda, na duka moto ena yona odi na kombe Saula, moto oTalusia.

¹²Iyo angaka edεye; na ani moto a njɔti, kombe ende Anania, akakwee na akabakee mɔmɔ ai yo bo ase koko njεnε ende.

¹³Anania asɔmbeja bo, Kumu, mbi nakaka bato banεnε bakabale a mojɔ momoto omina, na a mojɔ mobobe bokɔkɔ yo ai bato bawε oho Yelusalema.

¹⁴Na adoi ya na kpaci ebasuku banganga bo apee bato basusu baya bangaka a kombe ewε.

¹⁵Kumu ko abala na nde bo, Ke. Mbi nahɔi moto omina bo ajebejae kombe embi ai bapakano, ai bakumu, na ai bana baYisalaele.

¹⁶Na mbi nadi bomoneja bo adi bodingoa bou mεnε a mojɔ mokombe embi.

¹⁷Anania akε na akwea a ndako emina. Abakea mɔmɔ ai Saula, abala na nde bo, Mwangwa'mbi Saula, Kumu Yesu yona osanejabi ai wε yana adalakabi wε a njea, alomi mbi bo osε koko njεnε ewε, na bo olume na Mwembo Moṣenɔke.

¹⁸Oko a ehole emina, leka o poso jiswi, lokwa a miso mande, na asɔ koko njεnε ende. Angɔ na abatisama,

¹⁹na yana ayaka yo dia asɔ ngulu. Saula ayeyoa makina masu na bacingami baya badaka a Damaseke.

²⁰Na abanga botɔndɔ bokpa a smagogue bo Yesu adi Mwana 'Njambe.

²¹Bato basusu baya bamoka bakamo. Babala bo, Moto yo, te yona onɔngejaka bato oho Yelusalema, oko bato baya basembaka kombe emina? Na adoiti ya a bopea bato, bo akεe na bu a mbɔci ai basuku banganga?

²²Saula ko alumna na ngulu, na agegeaneja BaYuda baya badaka a Damaseke, na aneja na soti bo Yesu adi Masiya.

²³Yana anɔ masu manεnε, BaYuda badumba ndungu bo bamowoe.

²⁴Saula ko aka mwako mondungu ebu. Ibo bamoseaka na bulu na moi a midipe mimongba mongando bo bamowoe.

²⁵Bacingami ko babea Saula bokina busa na bulu, bamonɔjɔ a mongba, na bamosoloja a tei eekɔlo.

Saula a Yelusalema

²⁶Yana amea yo a Yelusalema, Saula akenga bocingama na bato baDenga. Ibo ko bamobanga oko bobanga. Baijima nongo bo adi mocingami.

²⁷Balanaba ko amosɔ, na akε na nde ai babwɛnji. Iyo abajebaja mojɔ moSaula, bo ama ne Kumu a njea, na bo Kumu ama bala na nde. Abajebaja koko bo Saula ama tɔndɔ Mwako Mopele na eci a kombe eYesu a Damaseke.

²⁸Oko boa Saula akwea a tei ebu, na akεkε adale na bu a Yelusalema.

²⁹Atondo koko Mwako Mopele na eci enɛnɛ a kombe eKumu. Abalaka koko na BaYuda baya badaka na kɔpi eBaEla, na abomaka na bu kite. Ibo ko badaka oko na posa bo bamowoe.

³⁰Yana aka bacingami mojɔ momina, bamoloma a Talusia, na bamosukeja a njea a Kaisalia.

Mɔngɔ moPɛtɛlo

³¹Denga didaka na bowi a ehole emina, a ngondo eYuda, na Galile, na Samalia, na limbilima. Denga didaka na lisuma ai Kumu, na dinengɛ a mojɔ mongulu eMwembo Mosenɔke.

³²Pɛtɛlo adala a bisika bisusu a bonja bato baDenga. Oko boa akε ai bato baDenga baya badaka a Luda.

³³Atana okina moto oho, kombe ende Enea. Iyo amaka sama na yogo bianga bomwambe, na adaka mondɔke.

³⁴Pɛtɛlo abala na nde bo, Enea; Yesu Masiya ahelejaka wε a yogo. Angɔ; kolea esambe ewε! Iyo angɔ bokpa mɛnɛ.

³⁵Bato basusu baLuda na Salona bamone, na bahekoa ai Kumu.

³⁶Okina mocingami adaka a Yopa, kombe ende Tabita. (Cina ekombe emina edi Dɔkasi.) Mwali omina adaka na bingi enɛnɛ a mojɔ mobilomu bipele, na akɔkɔ bato monganji bou mɛnɛ.

³⁷Iyo akɔnɔ yogo a masu mamina, na agwa. Bamososa, na bamosambea a ekenge endako a mboba ediko.

³⁸Yana aka bacingami bo Pɛtɛlo adi oho Luda (mojɔ bo Luda edi na Yopa hulelu) haloma bami babae a ndɔsɔ ende, na bamongɔɔnɔ bo adoe bokpa.

³⁹Oko boa Pɛtɛlo angɔ na akε na bu. Yana amea yo, bake na nde a ekenge endako a mboba ediko. Bali-babogwa basusu badaka ena na bamoyeaka. Ibo baneja Pɛtɛlo kasaka na lɔpu jima kɔ Dɔkasi, yana adaka yo a tei ebu.

⁴⁰Petelo ko abameja basusu sokolu. Atita na magbunda, na anga Njambe. Ahekoa a dɔ̃ngɔ̃ dinjemba na abala bo, Tabita, angɔ̃! Iyo adipoa miso, na yana ane yo Petelo, angɔ̃ na ada na mobondo.

⁴¹Petelo amopea ebo na amongɔ̃jɔ̃. Abea bato baDenga na balibabogwa, na abaneja bo adi mɔ̃.

⁴²Bato basusu baYopa baka mojɔ̃ momina, na bakina babu banenɛ bajimea Kumu.

⁴³Petelo ayeyoa mweka a Yopa, a ndako eSimona, moto yona obɔ̃ngejaka biobo bitito.

Bikɔ̃meli 10

Petelo na Kɔ̃lunelio

¹Okina momi adaka a Kaisalia, kombe ende Kɔ̃lunelio. Iyo adaka kapiteni obasoda baItalia.

²Adaka moto oejimeli na lisuma ai Njambe, yo mɛnɛ na bato basusu badenga dinde. Adaka na liikabo ai bato, na angaka Njambe bihole hisusu.

³Bokina busa, yo ane obwɛnji oNjambe a njɔ̃ti, bohu mɛnɛ. Obwɛnji akwea na abala na nde bo, Kɔ̃lunelio!

⁴Iyo amonja oko na bɔ̃ bonenɛ, na abala bo, Kumu, mojɔ̃ modi bo? Obwɛnji amosɔ̃mbeja bo, Njambe t'abosake nongo ma'nga mawɛ na likabo liwɛ.

⁵Edeye ko, toma loma ndɔ̃sɔ̃ emoto oho Yopa, kombe ende Simona.

⁶Adi a ndako eSimona, moto yona obɔ̃ngejaka biobo bitito. Ndako ende edi a mbongu.

⁷Yana amana obwɛnji yona obala na nde, Kɔ̃lunelio abea bakɔ̃meli bande babae, na soda omɔ̃ci oejimeli yona omopakaka bihole bisusu.

⁸Abajebaja mojɔ̃ mosusu, na abaloma a Yopa.

⁹Yana ahoa husa, badaka oko a njea. Petelo awea a mboba ediko endako a ehole emidi a mojɔ̃ mobo'nga, oko yana abengeaka bo ngando.

¹⁰Iyo adaka na nja, na adaka na posa bo ayake ekina eka. Yana ko akaleaka bo mia, yo atɔ̃ njɔ̃ti.

¹¹Ane Diko bwase, na likina libɔ̃kɛ likatite. Lidaka o esenja enenɛ yena epeama a matoka manei a mojɔ̃ mobosoloja.

¹²Na tito badaka a tei, tungu jisusu, na tito babolanda na mbulu badiko pongono.

¹³Aka kɔpi ekabale na nde bo, Pɛtelo, angɔ! Iwa na yaka.

¹⁴Pɛtelo ko abala bo, Kumu, pɛpɛ nongo mweka! Mbi nayakakini nongo eka ebe isa eka ebokia.

¹⁵Aka koko kɔpi emina bo, Isa Njambe asenojai eka, wε obwaniti boenyamoa.

¹⁶Moda boa bihole bisato, na libɔkε lisɔmbɔ koko oho Diko.

¹⁷Pɛtelo aduka cina enjɔti emina oko na mokakwano a molema monde; na bato baKɔlunelio bay a badukaka ndako eSimona, bamea a monɔkɔ mondako oko a ehole emina.

¹⁸Ibo babea a bohɔjɔ isa Simona yona odi na kombe Pɛtelo adi ena.

¹⁹Na yana alekε Pɛtelo a mojɔ monjɔti, Mwembo mobala na nde bo, Ika, bami basato badukaka wε.

²⁰Ima, tita oho nase na kε na bu; yε bokakwana, mojɔ bo mbi nabalomi.

²¹Pɛtelo atita, na abala na bato bamina bo, Mbi yona; odukakani oko mbi. Odoini mojɔ moye?

²²Ibo basɔmbeja bo, Okina kapitεni obasoda, kombe ende Kɔlunelio, asɔbi bwɛnji ai obwɛnji oDiko bo alome ndɔsɔ ewε a bossɔ eleho ewε; yo adi moto oyongi epele, asumaka Njambe, na adi na gala epele a tei eBaYuda basusu.

²³Oko boa Pɛtelo abasɔ a ndako bo babwε ena. Ahoa busa, angɔ na ake na bu, na bakma bato baDenga diYopa babapaka a njea.

²⁴Ahoa koko busa, bamea a Kaisalia. Kɔlunelio abanjaka, na abolea bina'nde na denga dinde disusu.

²⁵Yana akwea Pɛtelo, Kɔlunelio amosɔ, akwa a bibota binde na amosakoa.

²⁶Pɛtelo ko amongɔjɔ, abala bo, Ima mema. Mbi nadi oko moto pε.

²⁷Abalaka yo boa, akwea a tei na atana bato banɛnε baboli.

²⁸Abala na bu bo, Ino ojebakani bo MoYuda adi na mobeko bo atakatana na moto ombota etongo, na atakwea nongo a ndako ende. Njambe ko anejai mbi bo nabwaniti bonyamoa nongo moto, pε bolona moto o eka ebokia.

²⁹Oko boa alomejabi no mbi, mbi nadoi, pε boboma nongo kite. Edεye ko nahɔjɔkɔ no cina elomabi no ndɔsɔ embi.

³⁰Kɔlunelio abala bo, Masu manɔbi manεi, oko a ehole yeye, mbi nadakabi a bonga a ndako embi a ehole *trois heures*. Bundumo, moto yona odaka na bisenja bibolailiai amabi a boso bombi.

³¹Iyo abalabi bo, Kəlunelio, Njambe atabosaka monganji mowε, na aki bonga bowε.

³²Lomeja Simona Pətəlo yona odi oho Yopa, a ndako eSimona nganga obiobo a dəngə dimbongu.

³³Oko boa mbi nalomejabi wε bokpa, na adoi wε, okɔi mojɔ mopele. Edεye so basusu bodi ya a boso boNjambe, a boka ngando jisusu jisi wε ai Njambe, bo obale na su.

³⁴Pətəlo adipoa monɔkɔ na abala bo, Soti mεnε, mbi nacingeaka bo bato basusu badi amεci a boso boNjambe.

³⁵Iyo asepaka na moto na moto yona omosumaka na odi na ekɔmeli ebodongo, a makota masusu.

³⁶Njambe aloma bwεnji bonde ai bana baYisalaele, oko Mwako Mopele mobowi, na Yesu Masiya yona odi Kumu obato basusu.

³⁷Ojebakani no bεnε mojɔ mua mobanga a Galile na bokoja boYoane a mojɔ mobatisimo, na monangana a Yuda esusu.

³⁸Njambe asuoa Yesu oNasaleta Mwembo Mosεnɔke na ngulu pongono. Na yo akε akadale a ngando na ngando a bokɔ bilomu bipele, na a boheleja bato basusu bay a badingoaka na Satana, mojɔ bo Njambe adaka na nde.

³⁹Iso bodi banjεnεki bangando jisusu jikɔ yo a Iikota li BaYuda na a Yelusalema. Ibo bamobakea a mole na bamowa.

⁴⁰Njambe ko amongɔjɔ a bogwa a busa bomasato, na ajima bo aboloe ai bato na bohu mεnε;

⁴¹te bato basusu ko, oko banjεnεki bama yo hɔ boso, oko so bεnε. Mojɔ bo yana angɔ yo a bogwa, iso boyaka na bomwaka na nde.

⁴²Na abekea so bo botɔndɔe bato Mwako Mopele, na bo bojebejae bato bo Njambe ahɔ oko yo pε a boda juji obato, babomɔ na bagwake pongono.

⁴³Batɔndɔi basusu badi batati bande, na batɔndɔkɔ bo moto na moto yona omojimeaka asɔkɔ boyε bojibe a kombe ende.

⁴⁴Amaka bala Pətəlo bikenge bimina, Mwembo Mosεnɔke mo'mi kwa oko ai bato basusu bay a bahokeaka mwako.

⁴⁵Oko boa epeeli eMwembo Mosεnɔke esopea ai bapakano pongono; na bato baejimeli bay a badoa na Pətəlo bakamoa bou mεnε a mojɔ momina, mojɔ bo 'bo bεnε badaka BaYuda.

⁴⁶Baka koko bato bamina bakabale na kɔpi jitongotongo na bakakumejae Njambe.

⁴⁷Na Petelo abala bo, Bato ba ba'si Mwembo Mosenke o asɔ so bɛnɛ; odi bolemba bo batabatisama a Inadiba nda?

⁴⁸Iyo ababekea bo babatisame a kombe eYesu Masiya. Na bamongoɔɔnɔ bo ayeyoe na bu makina masu.

Bikɔmeli 11

Petelo Asɔmbɔ a Yelusalema

¹Babwɛnji na bacingami a likota liYuda baka bo bapakano bassɔ Ebaeli eNjambe.

²Oko boa, yana asɔmbɔ Petelo a Yelusalema, bato balibondo libolena-ganda basoa na nde.

³Babala na nde bo, Wε okwea a ndako jibapakano na oyaka na bu mojɔ moye?

⁴Petelo abala na bu, na abacingea mojɔ mosusu.

⁵Abala bo, Adaka mbi a bonga a ngando kombe Yopa, natɔ njɔti na nane mojɔ mu. Ekina eka ehula Diko, o ekɔmeli eesenja enɛnɛ yena epeama a matoka masusu manɛi, na emea oko ai mbi.

⁶Nalongotoana eka emina bo naesisoe, na nane tito bangondo, tito baesika, tito babolanda, na mbulu badiko.

⁷Naka koko kɔpi ekabale na mbi bo, Petelo, angɔ! iwa na yaka.

⁸Mbi ko nabala bo, Kumu, pεpε nongo mweka, mojɔ bo mbi nayakakini eka ebe isa eka ebokia.

⁹Kɔpi ko ehula koko Diko bo, Isa Njambe asenɔjai eka, wε obwaniti boenyamoa.

¹⁰Modaka boa bihole bisato, na leka losusu losɔmbɔ oho Diko.

¹¹Oko a ehole emina, bami basato bay a bama donga a Kaisalia na bwɛnji ai mbi, ba'mi mea oko a ndako edaka mbi.

¹²Mwembo motɔndɔ mbi bo nakɛe na bu, pε bokakwana nongo. Baninga ba basamano bapaka mbi a njea pongono, na bomea a ndako emoto omina.

¹³Iyo atɔndɔ mbi bo anε obwɛnji oDiko a ndako ende yona obala na nde bo, Loma ndɔssɔ eSimona, kombe ende etongo Petelo; adi a Yopa.

¹⁴Iyo adi botɔndɔ wε mwako mobobeleja, wε mɛnɛ na bato bawε basusu.

¹⁵Na abenga mbi bobala na bu, Mwembo Mosenke mokwa ai bo, o ama mo kwa ai so a bobanga.

¹⁶A ehole emina, mbi nale ekenge ema bala Kumu bo, Yoane abatisa a madiba; ino ko ôbatisamani a Mwembo Mosenoke.

¹⁷Oko boa, isa Njambe abapi epeeli epa yo so, yana ajimea so Kumu Yesu Masiya, mbi nabwani bomolemba?

¹⁸Yana aka bo moj̄ momina, bayeȳ oko boyeȳ. Bakumeja Njambe na babala bo, Njambe ajimi bo bapakano pongono bahekoae milema bo base bom̄.

Denga diAntioquia

¹⁹Bato baya banangana a moj̄ momonongo mua mobanga na S̄etepano, bakē a Poinike na Kupulio na Antioquia, na batōndō Mwako Mopele oko ai BaYuda p̄e.

²⁰Bakina babu ko, bami baKupulio na Kulene, yana amea bo a Antioquia, babala na BaEla pongono, na babatōndō Mwako Mopele moKumu Yesu.

²¹Eb̄ eKumu edaka na bu; bato banen̄e bajima na bahekoai Kumu.

²²Bato baDenga diYelusalema baka moj̄ momina, na baloma Balanaba a Antioquia.

²³Amea yo oho, na ane yo monganji moNjambe, asepa a moj̄ momina. Iyo aleha bo basusu bo basabekee, na bo bacingame na Yesu na lingbangba.

²⁴Balanaba adaka moto mopele; alumā na Mwembo Mosenoke, na ejimeli; na bato banen̄e men̄e bacingama na Kumu.

²⁵A moj̄ momina, Balanaba akē ndōss̄ eSaula oho Talusia.

²⁶Yana amoboloja yo, ahula na nde a Antioquia. Batitana na Denga, na bakoja bato banen̄e yanga esusu. Bato babanga bobakea bacingami kombe BaKlisto oko a Antioquia.

²⁷Bakina batōndōi badonga a Yelusalema, na bamea a Antioquia a masu mamina.

²⁸Okina obu anḡ, kombe ende Agabo; na yo apa eseko oko na Mwembo bo linjæle linen̄e likeke adoe a ngondo esusu. Moj̄ momina mokwa ngōnḡ, a masu makumu Kulaudio.

²⁹A moj̄ momina, bacingami bajima bo balome toma a bokōmeja baninga baya badaka a Yuda, moto na moto o abwana yo bok̄.

³⁰Bak̄ boa, na baeloma ai basuku baDenga oko na Balanaba na Saula.

Bikomeli 12

Bogwa boYakobo

¹Kumu Elode abanga bonongeja bakina bato baDenga a ehole emina.

²Awa Yakobo, mwanange 'Yoane na mopamba.

³Na yana ane yo bo BaYuda basepaka na mojɔ momina, apea koko Petelo, oko a masu maMilembɛ mia mipeliti lipetu.

⁴Apea yo Petelo, amo'sa ta blɔkɔ na ahɛngɛ basoda domi-na-basamano bo bamosenjɛle, bato banɛi banɛi. Mokano monde modaka bo amomejae a boso bobato ngɔngɔ jiKola-eBonɔ.

⁵Oko boa babanea Petelo a blɔkɔ. Bato baDenga ko bangɔɔnɔ Njambe na bingi a mojɔ monde.

⁶Yana akanaka Elode bo amejae Petelo a boso bobato ehuma, Petelo adaka ahwɛli na bniu bomina a tei ebasoda babae. Bama kanda yo na minyɔlɔ mibae, na basinjili badaka a boso bomodipe a bosenjɛle blɔkɔ.

⁷Obwɛnji oKumu ko adoa, na bohu bohoja kasho ende; aboma Petelo a panje bo amosisojae, na abala bo, Angɔ bokpa! Na minyɔlɔ mia midaka a makalo mande midonga.

⁸Obwɛnji abala na nde bo, Kanda kamba ewɛ, lwa sapata jiwɛ. Akɔ yo boa, obwɛnji abala na nde bo, Lwa kasaka ewɛ na susa mbi.

⁹Iyo amana na amosusa, pɛ ko bojeba isa mojɔ mokɔkɔ obwɛnji modi soti; alekɛ oko bo ati njɔti.

¹⁰Banɔ sinjili oboso na yona obabae, na bamea a modipe monɛnɛ moebende mua moyeyekɛ ngando. Modipe momina modipoama oko bodipoama boa. Bamana sokolu, badala a licilinga na obwɛnji amokina bokpa.

¹¹Yana abanga Petelo bocingea mojɔ, abala bo, Najebaka na soti edɛye bo Kumu alomi obwɛnji onde bo ahelejae mbi a ebɔ eElode, na a mijɔ misusu mikanaka BaYuda.

¹²Ama yo lɛ mojɔ momina, ami ko kɛ oko a ndako eMalia nange 'Yoane, yona odaka na kombe etongo Malako. Bato banɛnɛ badaka baboli ena, na bangaka.

¹³Petelo aboma monɔkɔ mondako, na okina moseka, kombe ende Loda, adoa a bodipoa.

¹⁴Iyo ko, yana ambetea yo monɔkɔ moPetelo, aidipoa nongo modipe; apota na sepi enɛnɛ a tei endako, na atɔndɔ bato bo Petelo adaka ami a monɔkɔ mondako.

¹⁵Ibo babala na nde bo, Odi na lilale! Iyo ko abala na bopipo mɛnɛ bo mojɔ modi soti. Ibo babala bo, Edi obwɛnji onde.

¹⁶Petelo ko aikina boboma, na yana adipoa bo, bamone na bakamo a bou mɛnɛ.

¹⁷Petelo ahεhe ebo bo badee bogo, na abatondɔ mojɔ mosusu, bo Kumu amomaneja a blɔkɔ. Abala koko bo, Jebejani Yakobo na baninga mojɔ mu. Oko boa adonga ena, na ake a esika etongo.

¹⁸Ahoa busa, basoda badaka na mokakwano monεnε a mojɔ moPεtεlo.

¹⁹Elode amoduka, pε ko bomoboloja. Akokeleja basinjili, na abekea bo babawoe. Ngɔngɔ jimina, adonga a Yuda, na ake a Kaisalia a boyeyoa oho.

²⁰Elode adaka na bato baTula na Sidona mojɔ monεnε. Ibo ko bambεjε molema moBalasito mosuku ondako ekumu, na badoa ai Elode na molema momɔci a bobakea mokongo na nde, mojɔ bo mia mangando jibu mahulaka a makota makumu.

²¹Oko boa Elode alwa molilo monde mokumu bokina busa, ada a ngεndε, na abapa eleho.

²²Na bato babekoa bo, Monɔkɔ moNjambe, te nongo monɔkɔ momoto!

²³Obwεnji oKumu ko amoboma bokpa, mojɔ bo yo aikumeja Njambe; mboa bamoyaka na agwa.

²⁴Ebaeli eNjambe ko enangana, na ehε oko bohε.

²⁵Balanaba na Saula, asieja bo elomu ebu, bahula a Yelusalema; na Yoane, yona odaka na kombe etongo Malako, abapaka a njea.

Bikɔmeli 13

Mɔngɔ moBalanaba na Saula

¹Bakina batɔndɔi na bakoja badaka a Denga diAntiokia; Balanaba na Simeona Nigela; Lukio, moto oKulene, na Manae (bamobɔkɔ na kumu Elode a bwεnge bobu) na Saula.

²Yana akɔmεkε bo Kumu na bosakoa na bokia bodia, Mwembo Moseñɔke mobala bo, Hεngεni ai mbi Balanaba na Saula a mojɔ moelomu ebahɔi mbi.

³Oko boa yana akia bo koko, na yana anga bo, bababakea mɔmɔ na babaloma.

Kupulio

⁴Mwembo Moseñɔke mobaloma boa na bake a Selukia. Batamba a masua a esika emina, na bake a Kupulio.

⁵Asεmε bo a Salami, batɔndɔ Mwako moNjambe a sinagoge jiBaYuda. Yoane abakɔmeja koko.

⁶Badala a mosanga mosusu, bamea a Papo, na batana okina nganga obole a ngando emina. Iyo adaka MoYuda, motɔndɔ obokosea, kombe ende Balayesu.

⁷Adaka a esika *egouverneur*, Selugio Paulo, moto obowei. Iyo Selugio Paulo alomeja Balanaba na Saula, mojɔ bo adaka na posa bo ake Mwako moNjambe.

⁸Iyo Elimko, nganga obole, (cina ekombe ende oko yena) abalona na bopipo, na ameka bopangoa *gouverneur* bo atajima.

⁹Saula (kombe ende etongo Paulo) alumna na Mwembo Mosenɔke, amonja linjenje lipipo,

¹⁰abala na nde bo, We moto oepulu na bokosea; we mwana 'Satana yona odi na mijɔ misusu mibodongo oko soki, otakina bongulumeja njea jitangboake jiKumu?

¹¹Ika, ebɔ eKumu edi a diko diwε edεye; miso mawε madi bogwa, na ôtanε nongo modika-busa ekina ehole. A ehole emina, lidudu lihindu limohua, na yo acimacima a boduka moto bo amolɔndɔe na ebɔ.

¹²Iyo *gouverneur*, yana anε yo mojɔ momina, ajima oko bojima; adaka oko na bokamoa a mojɔ mobokoja boKumu.

Antiokia ePisidia

¹³Paulo na bina'nde batamba a masua a Papo, na bake a Pelege a likota liPampulia. Yoane abakina a esika emina, na asɔmbɔ a Yelusalema.

¹⁴Badonga a Pelege, na bamea a Antiokia a likota liPisidia. Bakwea a sinagogue a busa boSabata na bada.

¹⁵Asieja bo bolanga Mibeko na mokanda mobatɔndɔi, basuku basinagoge baba-lomea monɔkɔ bo, Banninga, isa odini na ekina eleho a mojɔ mobato, balani.

¹⁶Oko boa Paulo angɔ, ahεhε ebɔ ende na abala bo, Ino bami baYisalaele, na no baya basumaka Njambe, hokeani.

¹⁷Njambe oBaYisalaele ahɔ batata basu; akɔ bo bato basu bade bato banεnε yana adaka bo a Ejipito, na abameja a ngondo emina na ebɔ epipo.

¹⁸Ababanea a lisobe bianga domi-inεi.

¹⁹Agbokeja makota sambo a Kanana, na abapa ngondo ebu o lisango.

²⁰Yana anɔ bianga mikama minεi na domi-itano, abapa sambi, oko a ehole emotɔndɔi Samwele.

²¹Ibo ko bapala bo bade na kumu, na Njambe abapa Saula, mwana 'Kisi, moto ombota eBenyamina. Iyo adaka kumu bianga domi-inεi.

²²Njambe amodongeja, na abakea Dawidi bo adae kumu obu. Njambe abala a mojɔ moDawidi bo, Mbi nabolojai Dawidi mwana 'Yisai; molema mombi mosepaka na nde; yo âkɔ ngando jesusu jipalaka mbi.

²³Njambe angɔjɔ Moheleja a mojɔ moYisalaele, oko Yesu ombota eDawidi, o ama yo kina sako.

²⁴Adaka yo pε bopeta doa ko, Yoane atɔndɔ Bato baYisalaele mwako mobobatisa cina ebohekoja bomilema.

²⁵Yoane yo mεnε, yana ameaka yo a suka eelomu ende, abajebeja bo, Mbi naditi yona olεkε no. Ikani ko, yo akεkε adoe ngɔngɔ jimbi, na mbi nitabɔngɔ bo nacingoe sapata jinde.

²⁶Baninga, bana baAbalayama, na no basusu baya basumaka Njambe, mwako mu mobohela molomami oko ai no.

²⁷Mojɔ bo, bato baYelusalema na bakumu babu baimombetea, na baicingea mijɔ mibala batɔndɔi mia milangaka bo masu masusu maSabata; na yana amodumba bo, bangameja mijɔ mimina.

²⁸Nongo adaka bo pε bone mojɔ na nde mua mobwana na mokindo mobogwa, ba ngɔɔnɔ Pilato bo amowejae.

²⁹Oko boa, yana angameja bo mijɔ misusu mia misɔnɔmɔ a mojɔ monde, bamotiteja a mole na bamosa ta esɛmɔ.

³⁰Njambe ko amongɔjɔ a bogwa.

³¹Na asaneja masu manεnε ai bato baya badonga na nde a Galile, na badoa na nde a Yelusalema; ibo badi edεye batati bande ai bato.

³²Oko boa so bodoi ai no na Mwako Mopele bo, sako esɔ batata basu ai Njambe,

³³yo angameja sako emina ai so bana babu yana angɔjɔ yo Yesu. Mojɔ momina mosɔnɔmɔ koko a yembo ebibae bo, Wε odi Mwana 'mbi; naboti wε busa bu.

³⁴Na abala koko a mojɔ mobongɔ bonde a bogwa, bo atasɔmbɔ koko a bɔpɔ; abala bo, Mbi nâpa wε majongoa masenɔke masoti maDawidi.

³⁵A mojɔ momina, abalaka a yembo etongo bo, Ôtakina yona owε mosenɔke bo apɔe.

³⁶Dawidi apɔ; mojɔ bo ama yo kɔmε mbota ende o akana Njambe, ami hwε oko bohwε, na bamopusea a dɔngɔ dibasangwa'nde.

³⁷Iyona ongɔjɔ Njambe ko aipɔ nongo.

³⁸Oko boa baninga, toma jebani bo bwεnji boboyε bojibe bodi ai no oko a mojɔ moto omina.

³⁹A tei ende, moto na moto yona ojimaka acingoami a ngando jesusu, mojɔ bo Mibeko miMose miditi na ngulu a bocingoa no a ngando jimina.

⁴⁰A mojɔ momina, toma nganjamani bo mojɔ mobala batɔndɔi mosaka ngama na nu, bo;

⁴¹Ikani, no bato babosetɔ; kamoani na dimoani; Mojɔ bo mbi nadi bokɔ mokina mojɔ a masu manu; Moto akajebaja no mojɔ momina, otajimani.

⁴²Yana amana bo, bato babangɔɔnɔ bo batɔndɔe koko mwako momina a busa boSabata botongo.

⁴³Na yana anangana likita, bakina BaYuda banɛnɛ, na bato banɛnɛ bay a bama hekoa a ejimeli eBaYuda, bacingama na Paulo na Balanaba. Ibo babala na bu, na babaleha bo bayeyoe a monganji moNjambe.

⁴⁴Edika mweka pε bo bato basusu bangando batitana a busa boSabata bongɔngɔ a boka mwako moNjambe.

⁴⁵BaYuda ko, yana anε bo emumu enɛnɛ ebato, badaka na likaka linɛnɛ. Bakpɛngɔlɔ bibaeli biPaulo bo biditi soti, na bamololea.

⁴⁶Paulo na Balanaba ko babala na bu na eci bo, Ebɔngi bo so bopete tɔndɔ no mwako moNjambe soti; edεye ko, olonini mwako momina, na ojimakani no bɛnɛ bo obɔngitini bossɔ bomɔ bua bodi na bosusu; oko boa so bodi bohekao ai bapakano.

⁴⁷Mojɔ bo mobeko moKumu ai so modi bo, Mbi nahɛnge wε bo odae bohu bomakota, Bo suka engondo mɛnɛ ese boheleja oko na wε.

⁴⁸Bapakano basepa yana aka bo mojɔ momina, na bakumeja Ebaeli eKumu. Na basusu bajima bay a bama hɔmɔ a mojɔ mobomɔ bua bodi oko na bosusu.

⁴⁹Na Ebaeli eKumu enangana a likota dia lisusu.

⁵⁰BaYuda ko bapangoa bali baejimeli, bali baesako epele, na basuku bangando pongono, na bakeja bato kεlε, bo banɔngejae Paulo na Balanaba, na bababengana a ngando ebu.

⁵¹Ibo bahakoa dutu dibibota bibu a boso bobu, na bake a Ikonia.

⁵²Na bacingami baluma na sepi na Mwembo Moseñɔke.

Bikɔmeli 14

A Ikonia

¹Adaka bo a Ikoma, bakwea bo babae a sinagoge eBaYuda, na bato banɛnɛ mɛnɛ bajima a mojɔ momwako mobu, na BaYuda na BaEla pongono.

²BaYuda ko bay a balona bojima, bakeja bapakano kεlε na balumeja milema mibu na bokosea a mojɔ mobaninga.

³Bayeyoa ko a Ikonia, na batōndō mwako moKumu na eci. Kumu angameja Ebaeli emonganji monde na bimbete na mindumba na mɔmɔ mabu.

⁴Bato bangando ko badaka na bobɔtɔ. Likina libondo lidaka a dɔngɔ diBaYuda, na libondo litongo a dɔngɔ dibabwɛnji.

⁵Oko boa, bakina bapakano, na BaYuda, na basuku babu, bakana bo babanɔngejae, na bo babamae matai.

⁶Paulo na Balanaba ko baka mojɔ momina, na bacia a Lusetulia na Delube, ngando jiLukaonia, na a bisika bitongo oho,

⁷na batōndō Mwako Mopele oho.

A Lusetulia

⁸Okina momi adaka a Lusetulia yona obotama na mako mago, pε bongɔ, pε bodala.

⁹Momi omina ahokeaka Paulo yana atɔndɔkɔ yo mwako. Paulo acingea bo adaka na ejimeli a bohela a yogo ende.

¹⁰Oko boa yo amonja linjenje, na abala na nde bo, Ima mema na mako mawɛ mɛnɛ. Iyo angɔ oko bongɔ, na abanga bodala.

¹¹Yana anε emumu ebato mojɔ mokɔ Paulo, babala na kɔpi ebu elkonia bo, Banjambe batiti ya ai so na elimo ebato.

¹²Babakea Balanaba kombe Zeu, na babakea Paulo kombe Elɛmɛ, cina bo yo adaka na bɛtɛ ebobala.

¹³A mojɔ momina, nganga otempelo eZeus yena edaka a sokolu engando, adoa na ngɔmbɔ bay a balwaka makongo mafulɛlɛ, a modipe momongba mongando. Iyo na bato bangando Pongono, bapala bo babawejae tito o masiko.

¹⁴Yana ko aka babwɛnji Balanaba na Paulo mojɔ momina, ba'la bisenja bibu, bakwea a ndanda ebato, na babekoa bo,

¹⁵Ino bami, okɔkɔni mojɔ mu cina eye? Iso bodi oko bato pε, o adi no bɛnɛ. Milema misu na nu midi oko amɛci. Iso bodoi ai no na Mwako Mopele bo okineni ngando ji jingasangasa, a bohekua ai Njambe obomɔ, yona oyoa Diko na nase, na madiba-mamukwa, na leka losusu lua lodi ena.

¹⁶Bosoboso yo akina makota masusu bo badale a njea jipalaka bo.

¹⁷Iyo ko aitaka nongo motati. Mojɔ bo yo adaka mobɔkɔli onu. Akɔkɔ bopele, alomaka no mbua badiko, na bididi bibikpeteli bileka, na alumejaka milema minu na sepi.

¹⁸Nongo abala bo boa, edika mweka pε bo bato bangando babawejae tito o masiko.

¹⁹Bakina BaYuda ko baAntiokia na Ikonia badoa. Ibo bapangoa bato, ba'la Paulo matai, na bamokpakula a sokolu engando, mojɔ bo balɛkɛ bo adi mogo.

²⁰Bacingami ko bamohika, angɔ koko, na ahula a ngando. Yana ahoa busa, akε na Balanaba a Delube.

²¹Batɔndɔ Mwako Mopele a ngando emina, na bakina bato banεnε bajima. Ngɔngɔ jmina, bahula koko a Lusetulia, a Ikoma, na a Antiokia.

²²Bambilimeja milema mibacigami, na babaleha bo bayeyoe a ejimeli. Babatɔndɔ koko bo bodi bokwea a Bokumu boNjambe oko na minɔngɔ minεnε.

²³Bahɔ basuku a Menga masusu; ba'nga oko na ekia edia, na babakina a mɔmɔ maKumu ojimeaka bo.

²⁴Banɔ a tei elikota liPisidia, na bamea a Pampulia.

²⁵Aseja bo mwako botɔndɔ a Pelugia, bakε a Atalia.

²⁶Batamba a masua a ngando emina a bohula a Antiokia. Mojɔ bo bama hengεmε a monganji moNjambe a ngando emina, a mojɔ moelomu enεnε emaka bo kɔ.

²⁷Yana amea bo, babolea likita liDenga, na babatɔndɔ ngando jesusu jima kɔ Njambe na bu, na bo ama dipoa njea eejimeli ai bapakano.

Bikɔmeli 15

Kitε a Denga diAntiokia a Mojɔ moMibeko

¹Bakina bato badonga a Yelusalema, na bakoja bato baDenga bo, Bamiti lena no ganda o adumbea Mose mobeko, otahelani.

²Paulo na Balanaba baboma na bu kitε enεnε, na basoana na bu. Oko boa, bato baDenga bajima bo Paulo na Balanaba na bakina babu bεnε bakεe a Yelusalema, a bolena mojɔ momina na babwεnji na basuku baDenga.

³Bato baDenga babasukeja a njea. Badalaa njea ePoinike na Samalia, na batɔndɔ baninga basusu bo bapakano bahekao ai Njambe. Ibo basepa bou mεnε na mojɔ momina.

A Yelusalema

⁴Amea bo a Yelusalema, bato baDenga, na babwεnji, na basuku baDenga babasɔ bopele. Batɔndɔ ngando jesusu jima kɔ Njambe na bu.

⁵Bakina bacingami ko bay a badaka a libondo liBaPalusi, bangɔ na babala bo, Bato bamina babwani bossɔ embete ebolenaganda, na badi bossɔ eleho bo basume Mibeko miMose.

⁶Babwɛnji na basuku baDenga batitana a bole mojɔ momina.

⁷Babomana kitε enεnε. Pɛtelo ko angɔ ngɔngɔ, na abala na bu bo, Baninga, ojebakani bo Njambe ahɔ okina onu eyou, bo bapakano badi boka Mwako Mopele oko a monɔkɔ mombi mɛnɛ, bo bajime.

⁸Njambe yona ojebaka milema mibato anejai bapakano monganji monde, na abapi Mwembo Mosenɔke o akɔ yo ai so bɛnɛ.

⁹Isona bo bodi oko amεci a boso bonde, na yo aseñojai milema mibu a mojɔ moejimeli.

¹⁰Oko boa, odingeakani Njambe mojɔ moye? Opalakani bobakea muna a mabɛkɛ mabacingami, na so bɛnɛ na basangwa'su boihɔnɔ muna momina?

¹¹Iso bojimaka bo bodi bohela oko a mojɔ momonganji moKumu, iso na ho oko njea emɔci.

¹²Bato basusu balikita bayεyɔ bogo. Bahokea Paulo na Balanaba yana abalaka bo a mojɔ mobimbete na mindumba mikɔ Njambe na bu a tei ebapakano.

¹³Asieja bo bobala, Yakobo asɔmbeja bo, Banninga, hokeani mbi.

¹⁴Simona acingea so bo Njambe addi ai bapakano ehole eboso, bo ahɔe bato a tei ebu a mojɔ mokombe ende.

¹⁵Bikenge bibatɔndɔi bidi koko na cina emina, mojɔ bo mosɔnɔmɔ bo,

¹⁶Mbi nâhula ngɔngɔ jimina. A bongɔjɔ koko etondo eDawidi yena ekwi. Ebehi esusu; mbi ko naengɔjɔ koko,

¹⁷Bo bato batongo baya badi a ngondo baduke Kumu, Na bapakano basusu pongono, mojɔ bo kombe embi edi ai bo.

¹⁸Kumu abali boa. Iyo akɔi ngando jimina, Na ajeba ngando jimina eyou.

¹⁹A mojɔ momina, mbi najimaka bo ebɔngiti bo bopukejae bapakano baya bahekoi ai Njambe.

²⁰Bopele bo bobasɔnee mokanda bo bakie ngando jesusu jia jicingi na bosakoa bobanjambe babokosea, na bɔɔli, na tito baya bagwa na mocibano, na makia.

²¹Mojɔ bo bato balangaka mikanda miMose a sinagogue masu masusu maSabata. Mose adi na bato a ngando jesusu baya batɔndɔkɔ mijɔ minde, na edaka koko boa a bilulu biehele mɛnɛ.

Mojimo moDenga diYelusalema a Mojɔ moMibeko

²²Oko boa, babwənji, na basuku baDenga, na bato basusu baDenga, bajima bo bahœ bakina babu, a boloma oho Antiokia na Paulo na Balanaba. Bahœ Yuda (kombe ende etongo Balasaba) na Sila, bato baesako epele a tei ebaninga.

²³Basɔnɔ mokanda mu na babapa: Njεbε esu babwənji, na basuku baDenga, na baninga, ai no baninga bamakota baya badi a Antiokia, a Silia, na Kilikia.

²⁴Iso boka bo bakina bato basu bake oho ai no, na banɔngeja no, na bakeja no mokakwano a milema. Baikε nongo na kpaci esu.

²⁵A mojɔ momina, iso botitani, na bojimi so basusu bo bohœ hakina bato basu, na bobalome oho na bina'su Paulo na Balanaba,

²⁶baya bapi njupi a mojɔ mokombe eKumu osu Yesu Masiya.

²⁷Oko boa, bolomi Yuda na Sila baya badi botɔndɔ no ngando ji na minɔkɔ mibu bɛnɛ.

²⁸Mojɔ bo Mwembo Mosεnɔke mojimi, na so koko, bo botabakea muna motongo ai no, oko mijɔ mia mibwani na nu na soti.

²⁹Toma kiani tito bamasiko ai banjambe babokosea, na makia, na tito baya bagwaka na mocibano, na bɔɔli. Okasangbindeani a mojɔ mongando jimina, ôkɔni bopele. Dikani bopele.

³⁰Oko boa baloma bato bamina, na bo bake a Antiokia. Babolea likita liDenga, na babapa mokanda momina.

³¹Ama bo langa mokanda, ba'mi ko sepa oko na eleho emina.

³²Yuda na Sila badaka batɔndɔi. Ibo baleha baninga na bikenge binɛnɛ, na babapingeja.

³³Bayeyoa mweka, na bato baDenga babasɔmbeja na bowi ai baya babaloma.

³⁴Sila ko ajima bo adikae.

³⁵Paulo na Balanaba na bakina batongo pongono, bayeyoa a Antiokia a bokoja na botɔndɔ mwako moKumu.

Mɔngɔ Momibae moPaulo

³⁶Yana anɔ makina masu, Paulo abala na Balanaba bo, Kɔ so bosɔmbe koko a ngando jesusu jike so boso a botɔndɔ mwako moKumu, bo bonje ekɔmeli ebu.

³⁷Balanaba apala bo Yoane (kombe ende etongo Malako) abapakae.

³⁸Paulo ko alε bo babwaniti bo tomba moto yona oma sika a njea a Pampulia, na aike na bu a elomu.

³⁹Oko boa badaka na mosoo, na babotōnɔ a mojɔ momina. Balanaba atomba Malako, atamba na nde a masua bo bake a Kupilio.

⁴⁰Paulo ko ahɔ Sila, na akε na nde; na bato baDenga babajongoa bo monganji moKumu modae na bu.

⁴¹Akε a makota maSilia na Kilikia, na apingeja Menga.

Bikɔmeli 16

¹Paulo amea a Delube na Lusetulia. Okina mocingami adaka ena, kombe ende Timoteo, ngwa'nde MoYuda, sangwa'nde MoEla.

²Iyo adaka na gala epele a tei ebaninga baLusetulia na balkonia.

³Paulo apala bo Timoteo amopakae a mɔŋɔ monde; oko boa amotomba na amoleneja ganda a mojɔ moBaYuda bay a badaka a bisika bimina; mojɔ bo bajeba bo basusu bo sangwa'nde adaka MoEla.

⁴Akε bo a ngando na ngando a njea ebu, bajebaja bacingami ngando jijima babwɛnji na basuku baDenga a Yelusalema, bo basume ngando jimina.

⁵Oko boa Menga mambilima a ejimeli, na etango ebacingami ehε husa na husa.

Paulo Abeama a Makedonia

⁶Mwembo Mosenɔke mobalembo bo batatōnɔ Mwako Mopele a Asia; oko boa bake a makota maPelugia na Galatia.

⁷Yana amea bo a Musia, bakenga bokε a Bitunia; Mwembo moyesu ko mobalembo bo batake.

⁸Oko boa, banɔ Musia na bakes a Toloa.

⁹Na Paulo atɔ njɔti na bulu na anε momi oMakedonia. Iyo adaka ami, na amongɔɔnɔko bo, Leka jɔnɔ a Makedonia a bokɔmeja so.

¹⁰Anε yo mojɔ momina, iso bomeka bokε bokpa a Makedonia, mojɔ bo bojima bo Njambe abeaka so a botōnɔ Mwako Mopele oho.

A Pilipoi

¹¹Botamba a masua a Toloa na bokε bojo a Samotulake. Yana ahoa busa bokε a Neapoli.

¹²Angɔ so ena, bokε a Pilipoi, ngando eboso edɔngɔ dimina diMakedoma, na kingili eBaLoma. Boyeyoa makina masu a ngando emina.

¹³A busa boSabata, bomana a modipe momongba mongando na bokε a ekina ediba, mojɔ bo bodaka na njingo bo esika ebonga edaka oho. Boda na mbondo oko ena, na bobala na bakina bali bay a batitana a esika emina.

¹⁴Okina obu adaka mwali ongando kombe Twatila, kombe ende mene Ludia. Iyo akoko bwasa na bisenja bikpetu bibobuno bonene. Adaka mosakoi oNjambe, na ahokea so. Kumu adipoa molema monde ho alee mijɔ mibalaka Paulo.

¹⁵Yana abatisama yo na denga dinde pongono, angɔɔnɔ so bo, Okajimani na soti bo mbi nadi na ejimeli ai Kumu, doani a ndako embi a boda ena. Ahejɛ bingi na so bojima.

¹⁶Yana akɛke so a esika ebonga, bosongana na moseka omɔci, mobuli, yona odaka nganga oketa. Baswa bande badihaka likonja linene a mojɔ mobiseko binde.

¹⁷Iyo adoa ngɔngɔ jisu na Paulo, na abekoa bo, Bato baba badi bakɔmeli baNjambe oBonɔ, na banejaka no njea emohelo.

¹⁸Iyo akɔ hoa masu manene. Paulo apukaka a mojɔ momina, na ahekua, ahala na mwembo bo, Mbi nabekeaka wε a kombe eYesu Masiya bo omane ai yo; na mwembo momana oko bomana a ehole emina.

Paulo na Sila a Blɔkɔ

¹⁹Yana ane haswa bande bo njingo ebu elikonja esia, bapea Paulo na Sila, na babagbula ai basuku bangando a jando.

²⁰Ibo bake na bu ai bajuji, na babala bo, Bato ba badi BaYuda baya babejaka ngando esu.

²¹Bakojaka bikina bikɔmeli bitongo bia bibɔngiti na su BaLoma a bojima na bokɔ.

²²Bato bangando koko bahɛjɛ daka enene a mojɔ mobu. Oko boa bajuji babahweja hisenja na babatueja pimbo.

²³Asieja bo bobatua, baba'sa ta blɔkɔ, na baleha kɔmisɛlɛ ohlɔkɔ bo ahabanee bopele.

²⁴Asɔ yo eleho emina, aba'sa ta kasho, na asa bibota bibu ta misɔngɔ.

²⁵Paulo na Sila ba'ngaka na bambaka njembo na bulu tei, na bato bablɔkɔ babahokeaka.

²⁶Bojonga bongondo bodoa bundumo, bonene mene, na ndako eblɔkɔ ekumana oko a eyoeli ecina. Midipe misusu midipoama bokpa, na minyɔlɔ mibato basusu bablɔkɔ mitwea oko botwea.

²⁷Kɔmisɛlɛ oblɔkɔ asisoa, na yana ane yo midipe miblɔkɔ bwase, ahwa abene onde na akɔ bo asawoe, mojɔ bo alekɛ bo bato bablɔkɔ bacia.

²⁸Paulo ko abekoa na bopipo bo, Yε bosakɔ mojɔ mobe boa, cina bo bodi ya so basusu.

²⁹Iyo abea bo badoe na paka. Akwea a tei bokpa, na asadumba a boso bo Paulo na Sila, oko na bɔ na mongongoma.

³⁰Abameja sokolu, na abala na bn bo, Baswa bambi, êkɔ mbi ndeni bo nahele?

³¹Ibo babala bo, Jimea Kumu Yesu na ôhela, wε mεnε na bato bandako ewε.

³²Bamotɔndɔ Mwako Mopele moKumu, na bato basusu bay a badaka a ndako ende.

³³Iyo abatomba a ehole emina na hulu, asosa mapipi mabu, na abatisama bokpa, yo mεnε na bato bande basusu.

³⁴Abakweja koko a ndako ende na abapa mia. Adaka na sepi enεnε, na bato bande pongono, mojɔ bo ajima Njambe.

³⁵Yana ahoa busa, bajuji baloma basoda na monɔkɔ bo, Cingoa bato bamina.

³⁶Kɔmisεlε oblɔkɔ akε na bwεnji bomina ai Paulo. Abala bo, Bajuji balomi monɔkɔ bo bocingoe no. Oko boa, imanani na yanani na bowi.

³⁷Paulo ko abala na bu bo, Batui so a boso bobato, pε nongo bopeta sambeja so, oko so bay a badi BaLoma, na basi so ta blɔkɔ. Edεye ko bapalaka bo bamejae so a libombi? Pεpε nongo mweka. Bopele bo badoe bo bεnε a bocingoa so.

³⁸Basoda bajebuja bajuji mojɔ momina. Iyana aka bajuji bo badi BaLoma, badaka na bɔ.

³⁹Oko boa badoa bo babagɔmbejae. Babameja ta blɔkɔ, na babangɔɔnɔ bo badonge a ngando emina.

⁴⁰Ibo bamana a blɔkɔ, na bake a ndako eLudia. Iyana anεnε bo na baninga, babaleha na bayana.

Bikɔmeli 17

A Tεsalɔnike

¹Banɔ a tei emakota maAmpipoli na Apolonia, na bamea a Tεsalɔnike. Sinagoge eBaYuda edaka a esika emina.

²Paulo akwea a smagogue o akɔkɔ yo bihole bisusu. Aboma na bu kitε a mojɔ mongando jiMisɔnɔ.

³Abaneja cina eMisɔnɔ, na angameja bo Masiya abwana bodingoa bo angɔe a bogwa. Abala koko bo, Iyo Yesu, oko yona otɔndɔkɔ mbi no, adi Masiya.

⁴Bakina babu bajima, na bacingama na Paulo na Sila. Bato banené baBaEla baya bajimaka Njambe, na bakina bali, basuku bangando, bacingama na bu pongono.

⁵BaYuda ko badaka na likaka. Ibo babea bakina bami babe bangando. Batitaneja koko bato kanga banené mené, na bahéje wokowoko enené a ngando. Bahika ndako eYasona, na baduka njea a bomeja Paulo na Sila a boso bobato.

⁶Baibaboloja ko; oko boa bapea Yasona na bakina bato baDenga, na bakes na bu ai bakumu bangando. Babekoa bo, Bato ba babejai ngondo esusu, na bamei oko ya.

⁷Yasona aba'si a ndako ende; batasumaka nongo mibeko miKaisala, na babalaka bo okina Kumu otongo adi, kombe ende Yesu.

⁸Bato bangando na bakumu badaka na mokakwano yana aka bo bikenge bimina;

⁹na bajima bo bacingoe Yasona na bo batongo, oko yana apa bo mikando.

A Belea

¹⁰Bacingami baloma Paulo na Sila bokpa a Belea na bulu. Yana amea bo oho, bakwea a sinagogue e BaYuda.

¹¹BaYuda bamina badaka na ekomeli epele mené, te nongo na yena eBaYuda baTsalonike. Babokea Mwako Mopele na posa enené, na balanga Mokanda moNjambe busa na busa a bojeba isa ngando jimina jidi boa soti.

¹²Oko boa, bakina babu banené bajima; bakina BaEla bajima pongono, na bali banené baBaEla baesako epele.

¹³Yana aka BaYuda baTsalonike bo Paulo atondoko Mwako moNjambe a Belea pongono, bakes oho a bopangoa bato, na a bokeja bato kélé.

¹⁴A mojo momina, bacingami bayaneja Paulo a njea emadiba-mamukwa; Sila na Timoteo ko badika oko ena.

¹⁵Bato baya basukeja Paulo bamopaka oko a Atena; baso bwensi ai Sila na Timoteo bo badoe ai Paulo bokpa, na basombó.

A Atena

¹⁶Yana ambaka Paulo bo a Atena, molema monde mopukaka yana aneké yo ngando na bilimo botó.

¹⁷Abala na BaYuda a sinagogue, na bato batongo baya bajimaka Njambe. Na abala busa na busa na bato batana yo a jando.

¹⁸Bakina bato babowei, BaEpikulo na BaSotoiko, basoola na nde. Bakina babu babala bo, Moto yo obibalabala apalaka bobala bo? Bakina batongo babala bo,

Adi o motɔndɔi obanjambe batongotongo; mojɔ bo abatɔndɔ Mwako moyesu, na mojɔ mobongɔ a bogwa.

¹⁹Oko boa bamobea, na bakε na nde a Mono moAleo, na babala bo, Iso bopalaka bojebe mojɔ mu moyene mokojaka wε.

²⁰Mojɔ bo bopakiti ka mijɔ mibokamoa mibalaka wε, na bopalaka bocinge miɔ mimina.

²¹(Bato basusu baAtena, na bakendeli bangando emina, badaka oko na posa emɔci pε,—oko bobala na boka mokina mojɔ moyene.)

²²Oko boa, Paulo ama a ndanda elibanda liAleo, na abala bo, Ino bami baAtena, mbi nanekε bo odini na ejimeli ai banjambe bou mεnε.

²³Mojɔ bo, akεki mbi adale, na anjaki mbi leka losakoaka no, nabolojai litumbu limɔci lia lidi na mosɔnɔ mu; AI NJAMBE YONA ODI SO PE BOJEBA. Omosakoakani pε nongo bomojeba. Oko boa mbi natɔndɔkɔ no mojɔ monde.

²⁴Njambe adi Kumu oDiko na nase. Iyo akɔ ngondo na leka losusu lua lodi ena. Iyo t'adake a tempelo jipikaka bato na mɔmɔ.

²⁵Editi nongo elomu emɔmɔ mabato yena edi bomokɔmε. Iyo t'atakake nongo eka, mojɔ bo yo mεnε apaka bato basusu bomɔ, na mohuli, na leka losusu.

²⁶Iyo akɔ makota masusu na botina bomɔci bo badea a bisika bisusu bingondo. Akolea mojɔ mobianga, na mwε jibisika bibu.

²⁷Iyo akɔ boa bo baduke Njambe, na njingo bo bamoduke na bocimacima bo bamobolojae, mojɔ bo adi na su mbuci mεnε.

²⁸Mojɔ bo bomɔ bosu bodi a tei ende. Bodalaka, na bodi a tei ende. Bakina basɔni banu bεnε babala bo, Iso bodi bana bande.

²⁹Oko boa, isa bodi bana baNjambe, ebɔngiti bo bolε bo Njambe adi na elimo ewɔlɔ, isa palata, isa litai,—leka loluaka bato na bowεi na bεtε ebu.

³⁰Njambe adipa miso mande a mojɔ mongando jiehole elibumi limina. Edεye ko abekeaka bato basusu a ngondo esusu bo bahekojae milema mihu.

³¹Mojɔ bo, yo ahεngε bokina busa a bosambeja ngondo, esambi ebojo, oko na moto oma yo hɔ. Na angɔjɔ moto omina a bogwa, a boneja So bo mojɔ momina modi soti.

³²Yana aka bo mojɔ mobongɔ bobagwake, bakina basεkε oko bosekε. Batongo ko babala bo, Bodi boka wε koko a mojɔ momina.

³³Oko boa Paulo abakina.

³⁴Bakina bami ko bacingama na nde na bajima. Okina obu adaka Dionusio, moto olikita liBaAleo, na mwali omoci kombe ende Damali, na bakina batongo pongono.

Bikomeli 18

Paulo a Kolinto

¹Ngɔngɔ jimina, Paulo adonga a Atena, na ake a Kolinto.

²Atana okina MoYuda oho, kombe ende Akwila, moto oPonto. Iyo na mwali onde Pilisila bama donga a Italia, cina emobeko modumba Kulaudio bo BaYuda basusu badonge a Loma. Apanda na bu limbaci,

³na ada a ndako ebu, mojɔ bo elomu ende na elomu ebu edaka amεci; bakɔkɔ bisenja bipipo bihemba, na bakɔ elomu ebu oko ena.

⁴Paulo apa bileho a smagoge a masu maSabata masusu, a bojimeja BaYuda na BaEla pongono.

⁵Yana ahula Sila na Timoteo a Makedonia, Paulo atɔndɔ Mwako Mopele na hingi enεnε, na ajebeja BaYuda bo Yesu adi Masiya.

⁶Ibo ko badaka na nde soki, na bamotangola oko botangola. Oko boa yo ahεhε hisenja binde, abala na bu bo, Ye makia manu madae a melo minu bεnε; mbi naditi na lindo jimina. Edεye, mbi nadi boke oko ai bapakano.

⁷Abakina boa, na ake a ndako emoto, kombe ende Tito Yuseto; moto omina adaka na lisuma ai Njambe, na ndako ende etutea smagoge.

⁸Kulusipo, mosuku osinagogue, na bato bandako ende basusu, bajimea Kumu. BaKolinto koko banεnε bay a baka Paulo bajima na babatisama.

⁹Kumu abala na Paulo a njɔti na bulu bo, Ye bobanga; bala oko bobala, pε boda bogo.

¹⁰Mbi nadi na wε; pεpε nongo moto odi bobakea ebɔ ai wε a bobeneja wε, mojɔ bo mbi nadi na bato banεnε a ngando ye.

¹¹Oko boa ayeyoa ena yanga emoci na songe basamano, a bokoja bato Ebæli eNjambe.

¹²Yana adaka Galio *gouverneur* eAkaya, BaYuda basusu bangɔ na bapea Paulo, na bækε na nde a esambi.

¹³Babala bo, Moto yoyo alabojaka bato bo basakoe Njambe na njea yena ebɔngiti na Mibeko.

¹⁴Paulo adipoa monɔkɔ monde a bobala; Galio ko abala na BaYuda a ehole emina bo, Ino BaYuda, akɔki no doa na mokina mojɔ soti, mokina mojɔ mobe, ka nabwani bohokea no.

¹⁵Edi ko oko kite a mojɔ mobikenge, na kombe, na Mibeko minu; anjani mojɔ momina no bɛnɛ; mbi naloni bosambeja ngando Jimina.

¹⁶Na ababengana a esambi.

¹⁷Ibo basusu bapea Sosotene, mowei osinagoge, na bamotua a boso bondako eesambi. Galio ko aile nongo mojɔ momina.

Suka eMɔngɔ moPaulo Momibae

¹⁸Paulo ayeyoa koko masu manɛnɛ a Kolinto. Yana aseana yo na bacingami ngɔngɔ, atamba a masua na Pilisila na Akwila, na ake a Silia. Adaka yo a Kenkulea, alena swe jinde a mojɔ moekina bɛli.

¹⁹Yana asemɛ bo a Epesɔ, yo abakina oko ena. Iyo ko akwea yo mɛnɛ a sinagoge na aboma kite na BaYuda.

²⁰Ibo bamonga bo ayeyoe na bu; yo ko aijima.

²¹Abala na bu bo, Njambe akajima, nadi bohula koko ai no. Aseana na bu boa na atamba a masua a Epesɔ.

²²Asemɛ yo a Kaisalia, aduboa, abɛjɛ bato baDenga na anɔ oko a Antiokia.

Mɔngɔ moPaulo Momisato

²³Ayeyoa Paulo mweka a Antiokia, angɔ koko, na ake a ngando na ngando a makota maGalatia na Pelugia, na ambilimeja bacingami basusu.

Apolo

²⁴Okina MoYuda adoa a Epesɔ, kombe ende Apolo, moto oAlesandaha. Iyo adaka na bɛtɛ ebobala, na ajeba mokanda moNjambe na bopele mɛnɛ.

²⁵Iyo ama koa njea eKumu; atɔndɔ na akoja mijɔ miYesu na bingi enɛnɛ a molema monde. Iyo ko ajeba oko batismo eYoane pɛ.

²⁶Abanga botɔndɔ mwako na eci a sinagoge. Pilisila na Akwila ko, yana amoka bo, bamotomba na bamocingea yo njea eNjambe na soti.

²⁷Yana akana yo bo akɛe a Akaya, bato baDenga bamokɔmeja, na basɔnea bacingami oho mokanda bo bamose bopele. Amea yo oho, akɔmeja bou mɛnɛ bato baya bama jima oko na monganji moNjambe,

²⁸mojɔ bo agbokeja BaYuda na bibaeli binde a boso bobato basusu, na abaneja a Mokanda moNjambe bo Yesu adi Masiya.

Bikɔmeli 19

Paulo a Epeso

¹Yana adaka Apolo a Kolinto, Paulo asieja mɔngɔ monde a molaba moAsia na amea a Epeso.

²Atana bakina bacingami a ngando emina, na abahɔjɔ bo, Yana ajima no, osɔni Mwembo Mosenɔke? Bamosɔmbeja bo, Ngasa, iso boipaka ka bo Mwembo Mosenɔke modi.

³Iyo abala na bu bo, Obatisamani na batisimo enda? Bamosɔmbeja bo, Oko batisimo eYoane.

⁴Paulo abala bo, Yoane abatisa na batisimo a mojɔ mobohekoja bomolema, na atɔndɔ bato bo bajimee yona odi bodoa ngɔngɔ jinde, oko Yesu.

⁵Aka bo mojɔ momina, babatisama a kombe eKumu Yesu.

⁶Na yana abakea Paulo mɔmɔ mande ai bo, Mwembo Mosenɔke motita ai bo, babanga bobala na kɔpi jitongo, na bapa biseko.

⁷Badaka bato domi-na-babae.

⁸Paulo akwea a sinagoge na abala na eci. Atɔndɔ mwako moBokumu boNjambe songe basato, na ameka bojimeja baya bamohokeaka.

⁹Bakina babu badaka na kitε enεnε, na melo mipipo, na bapɔmbeja Njea eKumu a boso bobato. Oko boa yo abakina, abea bacingami, na akoja busa na busa a ndako ekalasi eTulano.

¹⁰Akɔ boa bianga bisusu bibae, na bato basusu baAsia baka mwako moKumu, na BaYuda na BaEla pongono.

¹¹Njambe akɔ mindumba mibokamoa na mɔmɔ maPaulo.

¹²A mojɔ momina, bato babenjɛ mokuku monde na matambala na bisenja, na yana abakea bo leka lomina ai bato babego, bahela a bego bibu, na miembro mibe mimana ai bo pongono.

¹³Bakina BaYuda ko, bakendeli, badaka nganga jiketa. Ibo bameka bomeja miembro mibe ai bato a kombe eKumu Yesu. Babala bo, Mbi nabekeaka wε a kombe eYesu yona otɔndɔkɔ Paulo.

¹⁴Badaka boa bami sambo, bana baMoyuda kombe ende Sekewa, mosuku onganga.

¹⁵Mwembo mobe ko mobasɔmbeja bo, Najebaka Yesu, nambeteaka Paulo, ino ko banda?

¹⁶Na momi yona odaka na mwembo mobe abapea, abadumba, abatua; babena pola, na bacia a ndako emina oko mbundu.

¹⁷BaYuda basusu, na BaEla basusu, baya badaka a Ερεσο**ς** baka mojɔ momina, na badaka na bɔ. Na gala ekombe eYesu ehε oko bohε.

¹⁸Bato banenε baya bajima badoa, na batondɔ ngando jibe jima bo kɔ.

¹⁹Na bato banenε baya bakɔkɔ elomu edemba badoa na mikanda mibu, na bamitumba a boso bobato. Bobuno bomikanda mimina bodaka pata koto domitan.

²⁰Oko boa Ebaeli eKumu enangana na ngulu na ndangasa.

Wokowoko a Ερεσος****

²¹Yana asia ngando Jimina, Paulo akana a molema bo akεe a Yelusalema a njea eMakedonia na Akaya. Abala bo, Nâpeta kε oho na ngɔngɔ nadi boke a Loma pongono.

²²Aloma bakɔmeja bande babae a Makedonia, oko Timoteo na Elaseto, na ayeyoa koko mweka a Asia.

²³A ehole emina ko, mokina mojɔ monenε mokwa a cina eejimeli ai Kumu.

²⁴Okina nganga oliboma, kombe ende Demetulio, aluaka bilimo bitempelo eDiana na palata. Basali bande badihaka likonja linenε a mojɔ moelomu emina.

²⁵Iyo abolea bato bamina, na basali batongo pongono baya bakɔkɔ elomu emina. Abala na bu bo, Ino bami, ojebakani bo likonja lisu licingi na elomu ye.

²⁶Edεye ko onεkεni na okakani bo yo Paulo alεngi na alabojai bato banenε, iya a Ερεσο**ς**, na a bisika bitongo biAsia pongono. Iyo akojaka bo banjambe baluaka bato na mɔmɔ baditi banjambe basoti.

²⁷A mojɔ momina, elomu esu edi bobeha; te elomu esu pε; tempelo enjambe monenε Diana edi bodika ngasa. Bato bamosakoaka a Asia esusu, na a ngondo esusu, na ekumu ende edi bosamboa oko bosamboa.

²⁸Bikenge bimina bibakeja kεlε enenε, na babekoa bo, Diana oBaΕρεσο**ς** adi monenε!

²⁹Ngando esusu ejoka na wokowoko. Bapea Gayo na Alisitaluko, pakali jiPaulo, bato baMakedonia, na bato basusu bake mbango a libanda limakou.

³⁰Paulo apala bo amane a boso bobato, bacingami ko baijima.

³¹Bakina bina'nde batongo, basuku baAsia, bamolomea monɔkɔ, na bamongɔɔnɔ bo atake a libanda limakou.

³²Bakina bato babekoa mojɔ momɔci, bakma oko mojɔ motongo. Emumu esusu edaka oko na wokowoko pε, na bato banεnε baijeba nongo cina etitana bo.

³³BaYuda balinda Alesandele, na bakina bamomeja a boso bobato. Alesandele ahεhε ebɔ ende na akenga bobala.

³⁴Yana anε bato bo adi MoYuda, bahεjε daka enεnε mεnε, na babekoa na monɔkɔ momɔci *heures* jibae bo, Diana oBaEpesɔ adi monεnε!

³⁵Mosɔni ongando ko agɔmbeja emumu, na abala bo, lno bami baEpesɔ, bato basusu bajebaka bo ngando eEpesɔ edi mobanei otimpelo eDiana na elimo ende yena ehula diko.

³⁶Mojɔ momina modi soti, pε kite. Oko boa toma dani bogo; t'okɔeni oko mojɔ na kεnɔ.

³⁷Odoini na bato bamina jɔnɔ, na babejaiti nongo tempelo, na batasεkεkε nongo njambe osu.

³⁸Oko boa, isa Demetulio na basali bande badi na moto mojɔ, esambi edi ya na bajuji pongono, na babwani bosambeja mojɔ moto na moto.

³⁹Isa odini na mokina mojɔ motongo, babwani bolena mojɔ momina a likita lingando.

⁴⁰Soti mεnε, iso bobwani bone mojɔ cina ewokowoko ye busa bu. Mojɔ bo emumu ye etitani ya ngasa, pεpε nongo cina esoti.

⁴¹Abala yo boa, ayaneja bato oko boyaneja.

Bikɔmeli 20

A Makedonia

¹Iyana asia wokowoko emina, Paulo abolea bato baDenga. Abaleha, aseana na hu, na adonga ena bo akεe a Makedonia.

²Adala a makota maMakedonia, na apa bacingami bileho binεnε. Ngɔngɔ jimina, akε a ngondo eEla.

³Ayeyoa oho songe basato, na akana bo atambe a masua a bokε a Silia. BaYuda ko badumba ndungu a mojɔ monde. A mojɔ momina, ajima bo asɔmbe a njea eMakedonia.

⁴Bato ba bamopaka a njea oko a Asia; Sopatulo, moto oBelea, mwana 'Pulo; Alisitaluko na Sekundo, bato baTεsalɔnike; Gayo, moto oDelube, na Timoteo; Tukiko na Tulopino, bato baAsia.

⁵Ibo basua boso na ba'mba so a Toloa.

⁶Yana asia masu maMilembé mia mipeliti lipetu, botamba a masua a Pilipoi. Bohwe a njea masu matano, na bobatana yana asemé so a Toloa. Bohwe masu sambo a esika emina.

A Toloa

⁷Botitana a busa boNjambe a bobuka molembé. Paulo abaleha, mojō bo adaka na mokano a bongō ena ehuma. Abala ekoka mènè, oko a tei ebulu.

⁸Paka jidaka jinènè a ekenge endako etitana so a mboba ediko.

⁹Okina mwenga, kombe ende Eutuko, adaka na mobondo a likina lininisa, na yo ahwe hi. Adaka diko a mboba ejisato, na yana ayeyoa Paulo a bobala, adinda a hi, akwa nase, na bamondoa oko mogo.

¹⁰Paulo atita nase, asasunea a diko dinde, amodinga na mɔmɔ mande, na abala bo, Yeni bobanga! Adi oko mɔ.

¹¹Asɔmbɔ koko diko, abuka molembé, ayaka, na abala koko ekoka, oko a ehole ehoa busa, na ayana.

¹²A mojō momwenga ko, bakes na nde oko mɔ, na milema mibù migɔmbɔ.

¹³Iso bosua boso a masua, na botamba a bokes a Aso. Mokano mosu modaka bo Paulo atambe na su a esika emina, mojō bo yo ajima bo akèe oho na njea engondo.

¹⁴Oko boa, yana atana so Paulo a Aso, atamba na su, na bokes a Mitulene.

¹⁵Angō so ena, na yana ahoa busa, boyeli Kio. Ahoa koko busa, bosemé a Samo. Ahoa koko busa bosemé a Mileto.

¹⁶Paulo adaka na mokano bo anɔe Epessɔ oko bonç, mojō bo aipalaka boyeyoa koko a Asia. Apalaka bo akèe pεlεpεlε, bo adae a Yelusalema a busa boDomitanu isa adi bohɔnɔ.

Eleho ePaulo ai Basuku baDenga diEpessɔ

¹⁷Amea yo a Mileto, aloma ndɔsɔ ebasuku baDenga diEpessɔ.

¹⁸Yana amea bo, Paulo abala na bu bo, lno ojebakani ekɔmeli embi a tei enu bihole bisusu, donga a busa boduboa mbi a Asia.

¹⁹Nakɔmèkɛ Kumu na lisuma lmènè na mbisolì pongono, cina eminɔngɔ minɛ mbi na ndungu jiBaYuda.

²⁰Ojebakani bo naidimboa botɔndɔ no ngando jia jibwana na nu. Nakojaka no a matitana, na a ndako na ndako pongono.

²¹Nalehaka BaYuda na BaEla pongono bo bahekoe ai Njambe na ejimeli ai Kumu osu Yesu Masiya.

²²Anjani edεye; mbi nakekε a Yelusalema oko a mbɔci jiMwembo, pε bojeba mijɔ mia mimbaka mbi oho.

²³Mwembo Mosenke ko mojebejaka mbi a ngando na ngando bo minyɔlɔ na minɔngɔ mimbakani oho.

²⁴Mhi ko nalekε bo mohelo mombi modi eka engasa mεnε; moditi nongo na yumu a miso mambι. Posa embi edi oko bo namee a suka enjea embi, bo nasiejae elomu esɔ mbi ai Kumu Yesu, elomu ebotɔndɔ Mwako Mopele momonganji moNjambe.

²⁵Mbi nadala a bisika na bisika a tei enu, a botɔndɔ Mwako Mopele moBokumu boNjambe, na edεye najebaka bo pεpε nongo okina onu odi bone boso bombi na ikina.

²⁶A mojɔ momina, mbi natɔndɔkɔ no a bohu busa bu, bo iindo jimakia manu jicingiti na mbi.

²⁷Mojɔ bo natɔndɔ no mokano moNjambe mosusu mεnε, pε bobomba mokina mojɔ.

²⁸Mwembo Mosenke mohɔ no habanei babwela a bobɔkɔ Denga diNjambe dia disikoa yo na makia mande mεnε. A mojɔ momina toma sabaneani no bεnε, na baneani bwela bosusu pongono.

²⁹Najebaka bo mbi nakayana, swa babilia badi bokwea a tei enu a bobeja bwela.

³⁰Na bato badi bongɔ a tei enu bεnε a bokoja mijɔ mibokosea, na bâlaboja bacingami.

³¹Oko boa toma nganjamani. Pe bobosani bo mbi naingwa boleha no basusu na mbisoli, mabulu na mei, bianga bisusu bisato.

³²Edεye nakmaka no a mɔmɔ maNjambe na ebaeli emonganji monde. Iyo adi na ngulu a bombilimeja no, na adi bopa no lisango linu a tei ebato basusu baya bahεngεmε ai yo.

³³Mbi naimboaka likonja linu, isa wɔlɔ, isa palata, isa bisenia.

³⁴Ojebakani no bεnε bo nakɔkɔ elomu na mɔmɔ mambι mεnε, bo nadihe leka lua lobwanaka na mbi na baya badaka na mbi.

³⁵Mbi naneja no na ngando ji jesusu bo bobwani bokɔ elomu boa, a bokɔmeja bayεmbu, na pε bobosa nongo bikenge bibala Kumu Yesu bo, Na bopa na bɔɔ, enɔi na bopele oko bopa.

³⁶Asieja yo bobala mijɔ mimina, atita na magbunda, na anga Njambe a tei ebu basusu.

³⁷Ibo basusu bayea bio, badinga Paulo malobɔ na bamobia.

³⁸Na wa ebu egbasoa cina eekenge ema yo bala, bo batanε koko boso bonde na ikina. Ngɔngɔ jimina bamopaka a njea oko a masua.

Bikɔmeli 21

Suka Emɔngɔ moPaulo

¹Aseana so na bu, botamba a masua, na bokε bojo oko a Kosa. Yana ahoa busa, bosemε a Lodo; angɔ so ena, bomea a Patala.

²Botana masua ena maya makanaka boleka oho Piinike. Oko boa botamba a masua mamina na bokε.

³Anε so mosanga kombe Kupulio, bomokina a dɔngɔ diebɔ ebali, na bonɔ oko a Silia. Bosemε a Tula, mojɔ bo masua madaka na leka a mojɔ mongando emina.

⁴Botana bacingami ena, na boyeyoa na bu masu sambo. Ibo babala na Paulo oko na Mwembo bo atakε a Yelusalema.

⁵Yana asia masu masu a esika emina, bongɔ koko a bokε a njea esu. Ibo basusu badoa a bosukeja so a njea. Bodonga a ngando, na yana amea so a mbongu, botita na magbunda, na bonga Njambe.

⁶Aseana so na bu, botamba koko a masua, na bo basɔmbɔ a ngando.

⁷Angɔ so a Tula, bosemε a Potolemai, na mɔngɔ mosu a madiba-mamukwa mosia boa.

⁸Ahoa busa, bongɔ ena na bomea a Kaisalia. Bokwea a ndako ePilipo, motɔndɔi oMwako Mopele, na boda na nde. Iyo adaka okina obasuku baDenga sambo.

⁹Adaka na bana-bali banεi; baipaka jeba nongo momi, na bapaka biseko.

¹⁰Ayeyoa so ena makina masu, okina motɔndɔi, kombe ende Agabo, ahula a Yuda na atana so ena.

¹¹Iyo atomba kamba ePaulo, na amokanda mɔmɔ na mako. Abala bo, Mwembo Moṣenɔke mobalaka bo BaYuda badi bokanda moswa okamba ye mbɔci boa a Yelusalema, na bâmopa a mɔmɔ mabapakano.

¹²Aka so mojɔ momina, iso na bacingami bangando emina bongɔɔnɔ Paulo bo atakε a Yelusalema.

¹³Paulo ko assɔmbeja bo, Oyeakani na ombejekeni molema mombi mojɔ moye? Mbi nadi na moselingo, te a mojɔ mombɔci pε; nadi koko na moselingo a mojɔ mobogwa pongono a Yelusalema, a mojɔ mokombe eKumu Yesu.

¹⁴Aipala bohokea so. Oko boa bokina bobala na ekenge ye, Yε modae o apalaka Kumu.

Paulo a Yelusalema

¹⁵Yana asia masu mamina, bokanda leka losu na bokε a Yelusalema.

¹⁶Bakina baemgami baKaisalia bapaka so a njea, a boneja so ndako eMenasona, bo bohwεe a esika ende. Iyo adaka mocingami moyou, moto oKupulio.

¹⁷Amea so a Yelusalema, bato baDenga basɔ so na sepi.

¹⁸Yana ahoa busa, Paulo ake na su ai Yakobo, na basuku baDenga basusu badaka ena.

¹⁹Paulo ababεje njεbε, na abatɔndɔ ngando jisusu jima kɔ Njambe a tei ebapakano a mojɔ moelomu ende.

²⁰Ibo basakoa Njambe yana aka bo mojɔ momina, na babala na Paulo bo, Moninga, onekε bo BaYuda bajimaka pongono, koto na koto, na ibo basusu badi na bingi a mojɔ moMibeko.

²¹Ibo ko bakaka bo wε okojaka BaYuda baya badi a makota mabapakano bo bakine ngando jiMose. Bakaka bo obalaka bo babwaniti bolena bana babu ganda, na bo bakme bikɔmeli bibatata.

²²A mojɔ momina, iso bôkɔ bo? Badi boka soti bo omei ya. Bopele bo okɔe oko mojɔ mobalaka so na wε.

²³Bodi na bato banεi ya baya babεli bεli.

²⁴Cingama na bu bo osasεnojae na bu, na ôbapa likonja a bonwε swε jibu. Oko boa badi bojeba bo ngando jikaka bo a mojɔ mowε jidi oko bokosea. Badi bojima koko bo ekɔmeli ewε edi na lisuma a Mibeko.

²⁵A mojɔ mobapakano baya bajimaka, iso bolena mojɔ momina eyou, na bosɔnɔ mokanda bo bakie tito bamasiko bakabaka bato ai banjambe babokosea, na makia, na tito baya bagwaka na mocibano, na bɔɔli.

²⁶Oko boa, yana ahoa busa, Paulo ake na bato bamina, asasεnoja, na akwea na bu a tempelo bo ajebejae ehole ebosukeja masu mabosenoja, na a bopa epeeli a mojɔ mobu basusu.

BaYuda Bapea Paulo

²⁷A suka emasu mamina sambo, BaYuda baAsia batana Paulo a tempelo. Bakeja bato basusu kεlε a mojɔ momina, na bapea Paulo.

²⁸Babekoa bo, Bami baYisalaele, kɔmejani so! Anjani moto yoyo; akojaka bato a bisika bisusu bo balone bato basu, na Mibeko, na esika ye ye pongono. Mojɔ motongo koko, akwejai BaEla a tempelo, na asambojai esika ye esenɔke.

²⁹(Cina bo bama nε Tulopmo, moto oΕpεssɔ, yona opakaka Paulo, na badingaka bo Paulo amokweja a tempelo.)

³⁰Ejoki edaka a ngando esusu, na bato basusu badoa mobonda, na bapea Paulo. Bamogbula sokolu na badipa midipe mitempelo.

³¹Yana adukaka bo njea bo bamowoe, kapitεni obasoda aka bo ngando esusu eYelusalema edi na wokowoko.

³²Oko boa yo abea basaloja na basoda bokpa, na apota na bu oho adaka bato. Yana anε bo kapitεni na basoda, bakina botua Paulo.

³³Kapitεni adoa, amotembea, na apa monɔkɔ bo bamokande na minyɔlɔ mibae. Ahɔjɔ koko kombe ende na mojɔ moma yo kɔ.

³⁴Bato baemumu ko babekoa, bakina mojɔ momɔci, batongo mojɔ motongo. Oko boa yo aihɔnɔ bokokeleja mojɔ na soti cina edaka, na apa monɔkɔ bo bakεe na nde a esika ebasoda.

³⁵Amea yo a ebutelo, basoda bamolwa oko bolwa cina ekεnjɔ ebato;

³⁶mojɔ bo engbondo ebato edaka ngɔngɔ jinde na babekoaka bo, Mowani!

³⁷Yana abenga bo bokwea na Paulo a tei endako ebasoda, yo abala na kapitεni bo, Napalaka nabale na wε mokina mojɔ. Kapitεni asɔmbeja bo, Wε okaka kɔpi eBaEla?

³⁸Wε, te MoEjipito yona ongɔjɔ bato bila oko na masu ma, na akε a lisobe na bilombe koto jinei?

³⁹Paulo abala bo, Mbi nadi MoYuda, moto oTalusia oho Kilikia. Mbi nadi sɔmi ongando enεnε. Kinani nabale na bato.

⁴⁰Ajima yo bo Paulo abale, yo ama a ebutelo, ahεhε ehɔ ende ai bato. Ibo bayεyɔ bowi, na abanga bobala na bu a kɔpi eBaEbele bo.

Bikɔmeli 22

¹Baninga na basangwa 'mbi, hokeani bikenge bimbi bo nasalongjae a boso bonu.

²Yana aka bato bo abalaka na bu na monɔkɔ moBaEbele, badaka kanga bogo mεnε. Iyo abala bo,

³Mbi nadi MoYuda; nabolama a Talusia oho Kikhia. Babokoni ko a ngando yeye; nakoa Mibeko mibatata na bopipo mené a bibota biGamliele. Nadaka na bingi enené ai Njambe o adi no basusu busa bu.

⁴Mbi nanongeja bato baNjea ye; napea bami na bali, na naba'sa ta blökə bo bagwε.

⁵Mosuku onganga, na basuku basusu bangando, babwani botondə bo mojɔ momina modi soti. Ibo bapani mikanda ai bato baDamaseke, bo nakée oho a bopea bato, a bohula na bu a mboci a Yelusalema a mojɔ mobosamba.

⁶Adalaka mbi a njea, nabenga Damaseke, na bokina bohu bonené bohojani bundumo boa, bua bodonga oho Diko.

⁷Mbi nakwa oko a kpɔtɔ, na naka kɔpi ekabale na mbi bo, Saula, Saula, onongejaka mbi mojɔ moye?

⁸Mbi nasɔmbeja bo, Kumu, wε nda? Na yo abala na mbi bo, Mbi nadi Yesu oNasaleta na wε onongejaka oko mbi.

⁹Bato baya bapakaka mbi banε bohu bomina soti; baika ko kɔpi ende yona obalaka na mbi.

¹⁰Oko boa mbi nabala bo, Kumu, êkɔ mbi ndeni? Na Kumu abala na mbi bo, Angɔ, ke oho a Damaseke, na odi boka oho mojɔ moelomu esusu yena ehengemε ai wε bo okɔe.

¹¹Miso mambi ko magwa a mojɔ mobolailai bobohu bomina; baya bapakaka mbi bapeani ebo, na namea a Damaseke boa.

¹²Okina momi, kombe ende Anania, adoa ai mbi. Iyo adaka na lisuma linené a Mibeko, na adaka na gala epele a tei eBaYuda bangando emina.

¹³Iyo ama a dɔngɔ dimbi, abala na mbi bo, Moninga Saula, asɔ koko njené ewε. Bokpa mené, mbi nassɔ njené embi, na namone na miso.

¹⁴Iyo abala na mbi bo, Njambe obasangwa'su ahɔi wε bo ojebe mokano monde, bo onεe Yona oBodongo, na bo oke ekenge emonɔkɔ monde.

¹⁵Mojɔ bo, wε odi boda motati onde ai bato basusu, a botondə ngando jesusu jini wε na jiki wε.

¹⁶Embaka wε edεye ndeni? Angɔ, batisama, na senoa a jibe jiwe, na ingɔɔnɔ a kombe eKumu.

¹⁷Ahula mbi a Yelusalema, natɔ njɔti yana angaka mbi a tempelo.

¹⁸Nanε Kumu; na yo abala na mbi bo, Donga ya a Yelusalema bokpa, mojɔ bo batajima mwako motɔndɔkɔ wε a mojɔ mombi.

¹⁹Mbi nasombaja bo, Kumu, bajebaka bo bене bo mbi natureja bato, na nasa bato a blокo baya bajimea wε a sinagoge jesusu.

²⁰Yana asopa bo makia mamotati owε Setepano, mbi nadaka ena pongono; mbi mεnε najima mojɔ momina, na nabanea bisenja bibato baya bamowa.

²¹Na Kumu abala na mbi bo, Kε; mbi nadi boloma wε bohalai ai bapakano.

²²Bato bahokea Paulo. Yana abala yo ko ekenge emina, babekoa bo, Dongeja moto omina a ngondo! Abɔngiti bohela!

²³Abekoa bo boa, bahwa bisenja bibu na bamεsε mopunji a diko.

²⁴Kapitεni apa monɔkɔ bo bakwejae Paulo a ndako ebasoda, na bamotue a bojeba cina emojɔ mobalaka bato a mojɔ monde.

²⁵Bakanda Paulo na kamba, na yo abala *nasalajon* yona odaka ena bo, Odini na kpaci a botua MoLoma pimbo, pε bopeta mosambeja?

²⁶Aka yo ekenge emina, *salajon* ake ajebejae kapitεni bo, Okanaka bokɔ bo? Moto omina adi MoLoma.

²⁷Kapitεni adoa, abala na Paulo bo, Tɔndɔ mbi; wε odi MoLoma?

²⁸Paulo ajima, Ee. Kapitεni abala bo, Mbi nasomba bosɔmi bombi na likonja linεnε. Paulo amosombaja bo, Mbi ko nabolama oko sɔmi.

²⁹A mojɔ momina, baya badaka na moselingo bo batue Paulo bamokina bokpa. Kapitεni pongono, yana acingea yo bo Paulo adi MoLoma, adaka na bɔ, mojɔ bo ama mokanda yo mbɔci.

³⁰Yana ahoa busa, yo apala bo ajebe cina emojɔ mobalaka BaYuda a mojɔ moPaulo, na acingoa Paulo. Abolea likita libasuku na nganga, ake na Paulo, na amomeja a boso bobu.

Bikɔmeli 23

Paulo a Esambi eBaYuda

¹Paulo anja likita linjenje; abala na bu bo, Baninga, molema mombi motadumbaka mbi a mojɔ moekɔmeli embi masu masusu a miso maNjambe.

²Anania, mosuku Onganga, abala na bato baya badaka na nde hulelu bo bamobome a monɔkɔ.

³Na Paulo abala na nde bo, Njambe âboma wε; wε etutu epu! Odi ya a bosambeja mbi cina eMibeko, na osopaka Mibeko wε mεnε yana apaka wε monɔkɔ bo babome mbi.

⁴Bayá badaka na nde hulelu babala bo, Ololeaka nganga monené oNjambe boa mojó moye?

⁵Paulo asombeja bo, Baninga, mbi najebiti bo yo adi nganga monené; mojó bo mosonembo bo, T'obale oko mojó mobe na mosuku obato bawé.

⁶Paulo ko acingea bo likina libondo lilikita lidi na BaSadoki, na libondo litongo oko na BaPalusi. Oko boa yo abekoa bo, Baniga, mbi nadi MoPalusi, mwana oMoPalusi. Nadi a esambi a mojó monjingó ebongó bobagwake.

⁷Abala yo boa, BaPalusi na BaSadoki babomana kité enené, na likita lidaka na bobotó.

⁸Mojó bo BaSadoki babalaka bo bagwake batangó, bo babwénji baDiko baditi, na bo miembo miditi. BaPalusi ko bajimaka ngando ji jesusu.

⁹Oko boa daka edaka enené. Bakina basóni balibondo liBaPalusi bangó na babala bo, Iso botanéké nongo mojó na moto yoyo; isa mokina mwembo kako obwénji oDiko abali na nde?

¹⁰Wokowoko ehé enené, na kapiténi adaka na bɔ̄ isa badi bolakaka Paulo oko bolakaka. A mojó momina, abea basoda bo bamomanejae sokolu, na bake na nde a ndako ebasoda.

¹¹Kumu adoa ai Paulo na bulu bomina, ama a dengó dinde na abala na nde bo, Da na eci. Otendéi mwako mombi a Yelusalema; odi botendé koko boa a Loma.

Ndungu eBaYuda a Bowa Paulo

¹²Yana ahoabusa, BaYuda badumba ndungu, nababelé bélí bo batayaka na batamwaka eka oko bapetakini wa Paulo.

¹³Bayá badumba ndungu emina badaka bato macinda mabae na cika.

¹⁴Ibo bake ai basuku banganga na ai basuku bangando, na babala na bu bo, Iso bobélí bélí epipo bo botayaka nongo eka oko bowakini Paulo.

¹⁵Oko boa, no na bajuji toma jebejani kapiténi bo adoe na Paulo ya adi no, oko na mokalo bo opalakani bo okokelejaeni mojó monde na bopele mené. Iso ko boselingoi bo bomowoe a njea.

¹⁶Mwana ongéné ePaulo ko aka mojó mondungu emina, na yo aké a ndako ebasoda bo ajebetjae Paulo.

¹⁷Paulo abea *salajon*, abala na nde bo, Ké na mwamomi yo ai kapiténi; apalaka amotendé mokina mojó.

¹⁸Oko boa *salajon* atomba mwamomi omina na aké na nde ai kapiténi. Abala na nde bo, Paulo, moto opeabi so, abei mbi na angí mbi bo nadoe na mwamomi yo ai wé. Adi na mokina mojó a botendé wé.

¹⁹Kapitēni amopea ebo, asua na nde mweka na amohɔjɔ bo, Mojɔ mopalaka wε bojebaja mbi modi bo?

²⁰Iyo asɔmbeja bo, BaYuda badumbi ndungu bo ba'nge wε a bodoa na Paulo puma a likita libasuku, oko na mokalo bo bapalaka bokokejejae mojɔ monde bopele.

²¹T'ojime oko mojɔ momina, cina bo bakina babu, isa macinda mabae na dea, bamoseaka a njea, na babeli bεli bo batayaka na bata-mwaka oko bamowakini; moselingo mobu mobwani, na bambaka oko mojimo mowε.

²²Kapitēni abekea mwamomi bo atabala nongo na moto mojɔ moma yo bala na nde, na amoyaneja.

²³Abea *basalajon* bande babae, abala na bu bo, Selingoani basoda mikama mibae, basoda bapunda domi-sambo, na basoda bamakɔngɔ mikama mibae bo bakεe a Kaisalia a *neuf heures* na bulu.

²⁴Selingoani koko punda a mojɔ moPaulo bo amee ai *gouverneur* na bopele mεnε.

²⁵Asɔnɔ koko mokanda mu.—

²⁶Kulaudio Lusia ai Pelike, *gouverneur* oekumu enεnε, njεbε!

²⁷BaYuda bapeabi moto yo na bapakabi mowa. Mbi ko nameabi na basoda bo namohelejae, mojɔ bo nakabi bo adi MoLoma.

²⁸Mbi napalakabi bojeba cina emojɔ modakabi bo na nde; oko boa nakεbi na nde a likita libasuku babu.

²⁹Nanεbi bo badi na nde mokina mojɔ moMibeko mibu bεnε; aikɔ nongo mojɔ mua mobwani na mokindo mobogwa isa na blokɔ.

³⁰Aki mbi ko bo BaYuda badumbi ndungu a mojɔ momoto omina, namolomi ai wε bokpa. Nabali koko na bato baya badi na nde mojɔ, bo bamejae mojɔ momina ai wε mεnε.

Paulo a Kaisalia

³¹Basoda batomba Paulo o ama bo sɔ monɔkɔ; bakes na nde na bulu na bamea a Antipatulo.

³²Ahoa busa, basoda-bapunda badala koko na nde, na bo batongo basɔmbɔ a ndako ebasoda.

³³Amea bo a Kaisalia, bapa *gouverneur* mokanda, na bamoneja Paulo.

³⁴Iyo alanga mokanda na ahɔjɔ Paulo kombe elikota linde.

³⁵Yana aka yo bo adi moto oKilikia, abala bo, Bato bakamea baya badi na wε mojɔ, nadi boka mojɔ mowε. Na apa monɔkɔ bo bamobanee a lopango loElode.

Bikɔmeli 24

Pelike Asambeja Paulo

¹Iyana anɔ masu matano, Anania, mosuku onganga, amea na bakina basuku bangando, na okina nganga oMibeko pongono, kombe ende Teletulo. Ibo batɔndɔ *gouverneur* mojɔ moPaulo.

²Yana abea bo Paulo, Teletulo abanga bobala mojɔ monde bo, Pelike, wε kumu yona onɔi na bopele, iso bosepaka cina ebowi bonεnε bua bodi a tei esu a mojɔ mowε. Wε obaneaka likota lisu, na libɔngi oko a mojɔ mowε;

³na so bodi na sepi enεnε a mojɔ momina.

⁴Nitapalaka bo nanɔngejae wε; endele ko, nangɔɔnkɔ wε bɔ oke bikina bikenge bisu oko na monganji monεnε.

⁵Iso bonekε bo moto yoyo apukejaka bato bou mεnε. Alindaka BaYuda a ngondo esusu oko a bona pε. Adi koko mosuku obu baya badi na kombe BaNasaleta.

⁶Iyo ameka bobeja tempelo pongono na so bomopea. Mokano mosu modaka bo bomosambejae cina eMibeko misu;

⁷Lusia ko, kapitεni obasoda, adoa na amohwa ta mɔmɔ masu na hopipo mεnε.

⁸Na apa monɔkɔ bo baya badi na nde mojɔ badoe ai wε mεnε. Okamokokeleja odi boka wε mεnε mijɔ minεnε mimoto omina mia mibalaka so.

⁹Bayuda batongo badaka na monɔkɔ momina momɔci, na bajima bo modi boa.

¹⁰*Gouverneur* angɔjɔ ebɔ bo Paulo abale. Paulo asɔmbeja bo, Ajebaka mbi bo wε odi juji olıkota di bianga bmεnε, nadi na sepi a bobala bo nasalongejae.

¹¹Okakokeleja, odi bojeba bo mbi nadoa a Yelusalema a bosakoa, masu monɔi oko domi-na-mabae pε.

¹²Baitana bo nasoa na moto mosoo, isa bo nalindaka bato a bona, nongo a tempelo, isa a sinagogue, isa a ngando.

¹³Na babwaniti bongameja nongo ngando jibalaka bo a mojɔ mombi.

¹⁴Mbi najimaka a boso bowε bo nasakoaka Njambe obasangwa'su oko na njea ebeaka bo Bobɔtɔ. Najimaka mijɔ misusu mia misɔnɔmɔ a Mibeko, na a mikanda mibatɔndɔi.

¹⁵Njingō embi ai Njambe edi oko njingō ebu, bo bapele na babe badi bongō a bogwa.

¹⁶A mojō momina, mbi nakōkō na bingi bihole bisusu bo molema mombi motada na mojō, isa a boso boNjambe, isa a boso bobato.

¹⁷Ama mbi yeyoa bohalibiangabinē, nami doa oko a bokō bato balikota limbi monganji, na a bopa bipeeli.

¹⁸Bakina BaYuda ko baAsia batana mbi a tempelo, pεpε nongo ekina ekia, pεpε koko embamba ebato isa mogbomegbome.

¹⁹Isa bato bamina badi na mbi mokina mojō, babwani boma ya a boso bowε a bobala mojō momina.

²⁰Pε mojō, kina bato baya badi jōno bajebéjae wε isa badumba mbi na mokina mojō mobe yana asamba mbi a likita libasuku.

²¹Isa modi oko mu, bo mbi nama, na nabekoa a tei ebu bo, Mbi nasambaka busa bu a mojō mobongō bobagwake.

²²Pelike ajebaka na bopele mēnē mojō moejimeli emina. Oko boa yo assombeja Paulo; abala bo, Kapitēni Lusia akadoa, nadi bolena mojō mowε.

²³Apa *salajon* monōkō bo abanee Paulo bopele, na amokō mokina monganji, na ajima bo bato bande bamokomejae.

²⁴Yana anō makina masu, Pelike adoa na mwali onde Dulusila yona odaka MoYuda, na alomeja Paulo. Aka mwako motōndō yo a mojō moejimeli ai Masiya Yesu.

²⁵Yana alehaka yo a mojō mobodongo na bosangbindea na esambi ebodoa, Pelike adaka na bō. Abala na Paulo bo, Peta kε edεye; ekina ndōndō, nakaboloja njea, nadi bobea wε.

²⁶Adaka koko na njingō bo Paulo amopε likonja. Oko boa amolomejaka mandēli-mandēli bo babalane.

²⁷Biangabibae bisia boa, na Pelukio Peseto asangoa na Pelike. Na Pelike akina Paulo oko a blōkō, cina bo apalaka bo adae na gala epele a tei eBaYuda.

Bikōmeli 25

Peseto Asambeja Paulo

¹Peseto, abanga yo elomu ende, ayeyoa a Kaisalia oko masu masato pε, na ake a Yelusalema.

²Basuku banganga na basuku baBaYuda bamojebeja mojō moPaulo.

³Bamoleha na bamongcōnc bo abakoe monganji mu—oko bo alome ndōss ePaulo bo adoe a Yelusalema, mojɔ bo baselingoa bo bamosee a njea bo bamowoe.

⁴Peseto ko asɔmbeja bo Paulo adi bodika a blɔkɔ a Kaisalia, na bo yo mɛnɛ adi bosɔmbɔ oho bokpa.

⁵Abala koko bo, Bopele bo bakina basuku banu bakɛe na mbi oho, bo bamejae mojɔ momoto omina, isa adi na mojɔ soti.

⁶Ayeyoa na bu masu bomwambe isa domi a tei ebu, na asɔmbɔ koko a Kaisalia. Aboa busa, ada a mongbelengɔ moesambi, na aloma ndɔsɔ ePaulo.

⁷Yana adoa yo, BaYuda baya badonga a Yelusalema bamohika na balanga mijɔ minde mibe minɛnɛ. Endele ko, baibwana bongameja mijɔ mimina.

⁸Paulo abala bo asalongejae; abala bo, Mbi naisopa nongo mobeko moBaYuda, isa motempelo, isa moKaisala.

⁹Peseto ko apala bo asepejae BaYuda, na ahɔjɔ Paulo bo, Opalaka bokε a Yelusalema a bosamba na mbi a mojɔ mongando jimina?

¹⁰Paulo asɔmbeja bo, Mbi nami a boso bomongbelengɔ moesambi eKaisala; nabwani bosamba oko ya. Ojebaka na bopele mɛnɛ bo mbi naikɔ nongo bobe ai BaYuda.

¹¹Isa nadi moto mobe, isa nakɔ mokina mojɔ mua mobwani na mokindo mobogwa, nitalona bogwa. Na isa ngando jibalaka bo a mojɔ mombi jidi oko bokosea pε, pεpε nongo moto odi na kpaci a bopa mbi a mɔmɔ mabu. Mbi napalaka nasambe na Kaisala mɛnɛ.

¹²Peseto abala mojɔ momina na likita libajuji, na asɔmbeja Paulo bo, Opalaka bosamba na Kaisala; odi bokε oko ai Kaisala.

Agulipa a Kaisalia

¹³Anɔ makina masu, kumu Agulipa na Belenike bamea a Kaisalia a bobɛjɛ Peseto njɛbɛ.

¹⁴Bayeyoa ena makina masu, na Peseto atɔndɔ kumu mojɔ moPaulo. Abala bo, Pelike akina momi omɔci ya a blɔkɔ.

¹⁵Yana adaka mbi a Yelusalema, basuku banganga na basuku baBaYuda bameja mojɔ monde, na bapala bo namodumbe.

¹⁶Mbi nabasɔmbeja bo BaLoma te badumbake moto oko yo apeta kini yεye bato baya bamokambaka, bo abwani bosalongeja a mijɔ mibalaka bo.

¹⁷Oko boa bahula na mbi ya, na mbi naimba nongo ekoka. Yana ahoa busa, nada a mongbelengɔ moesambi, na naloma ndɔsɔ emoto omina.

¹⁸Bakambi bande bama, na baimeja nongo mijɔ mibe milɛkɛ mbi.

¹⁹Baboma na nde oko kite a mojɔ moejimeli ebu, na a mojɔ mookina moto kombe ende Yesu yona ogwa; Paulo ko abala bo adi oko mɔ.

²⁰Adaka mbi na mokakwano a bokokeleja ngando jmina, namohɔjɔ isa apalaka akɛe a bosamba a mojɔ mongando jmina oho.

²¹Paulo ko angɔɔnɔ bo mojɔ monde mokɛe a esambi eKaisala. Oko boa mbi napa monɔkɔ bo bamobanee ya, bo namolome ai Kaisala.

²²Agulipa abala na Peseto bo, Mbi nadi na posa bo nake moto omina mbi mɛnɛ. Peseto asɔmbeja bo, Odi bomoka puma.

²³Yana ahoa busa, Agulipa na Bɛlenike badoa na ekumu enɛnɛ, na bakwea a ndako eesambi na bakapitɛni, na basuku bangando pongono. Peseto apa monɔkɔ bo badoe na Paulo.

²⁴Peseto abala bo, Kumu Agulipa, na no bami basusu bay a batitani na su ya, anjani moto yo. BaYuda banɛnɛ bangɔɔnɔ mbi a mojɔ monde, oho Yelusalema na ya pongono, na bahekua bo ebɔngiti bo ahele.

²⁵Mbi ko nane bo aikɔ nongo mojɔ mua mobwani na mokindo mobogwa. Iyo mɛnɛ ko apala bo akɛe ai Kaisala, na mbi najima bo namolome.

²⁶Endele ko, naditi na mojɔ mosoti a bosɔne kumu ombi. Oko boa namobei ya a boso bonu, na boso bowɛ kumu Agulipa, na njingo bo bokamokokeleja, bodaɛ na mokina mojɔ a bosɔnɔ.

²⁷Mojɔ bo, nalɛkɛ bo bokaloma moto oblɔkɔ ngasa, pɛ botɔndɔ mojɔ monde, etabɔngɔ nongo mweka.

Bikɔmeli 26

Paulo na Agulipa

¹Agulipa abala na Paulo bo, Obwani botata tati ewɛ edɛye. Paulo animoja ebo, na atata na bikenge bi.

²Kumu Agulipa, mbi nadi na sepi busa bu, bo nasalongejae a boso bowɛ a ngando jesusu jibalaka BaYuda a mojɔ mombi.

³Wɛ olandoa na bikɔmeli na mijɔ miBaYuda. Oko boa nangɔɔnɔkɔ wɛ bo otangwa bohokea mbi.

⁴BaYuda basusu bajebaka moda mombi, donga oko a bwɛngɛ bombi, a likota limbi mɛnɛ, na a Yelusalema.

⁵Bakajima bo babale, bajeba eyou bo mbi nadaka moto oBaPalusi, baya banɔi na bingi a mojɔ moMibeko misu.

⁶Mbi nadi ya edεye a esambi a mojɔ monjingo esako ekinea Njambe batata basu.

⁷Mbota jisu domi-na-jibae bakɔmɛkɛ Njambe na bulu na moi, oko na njingo bo basangoe sako emina. Ee kumu, BaYuda badi na mbi mojɔ oko na cina enjingο emina.

⁸Okina onu abwaniti bojima bo Njambe angɔjɔkɔ bagwake mojɔ moye?

⁹Mbi mɛnɛ najima ehele bo nakɔe mijɔ minɛnɛ oko na lisoki a kombe eYesu oNasaleta.

¹⁰Nakɔ boa a Yelusalema. Nasa bato baMasiya banɛnɛ a blɔkɔ, oko na kpaci ebasuku banganga. Na yana abawa bo, mbi najima mojɔ momina pongono.

¹¹Nabadingoja bihole binɛnɛ a sinagoge jesusu; nakenga koko na bopipo bo basambojae Njambe na bibaeli bibu. Nabanɔngeja oko a ngando jitongo bohali, cina ekɛlɛ embi enɛnɛ ai bo.

¹²Oko boa nake a Damaseke na kpaci ebasuku banganga, oko a mojɔ momina.

¹³Ee kumu ombi, yana adaka mbi a njea a ehole emidi, nanɛ bohu bonɛnɛ boDiko bua bonɔ modika-busa na bolailai. Bongɛngɛ a mɔngɔ mambi masusu, na bato baya badalaka na mbi a njea.

¹⁴Iso basusu bokwa a kpɔtɔ, na mbi naka monɔkɔ mokabale na mbi a LiEbele bo, Saula, Saula, onɔngejaka mbi mojɔ moye? Okalakimea na mosongo ôbena.

¹⁵Mbi nasɔmbeja bo, Kumu, wε nda? Kumu abala bo, Mbi nadi Yesu, na wε onɔngejaka oko mbi.

¹⁶Angɔ ko; ima mema. Mbi nadoi ai wε, bo nahɔe wε mokɔmeli na motati ongando jini wε na jîneja mbi wε ngɔngɔ.

¹⁷Mbi nâheleja wε ai bato bawε na ai bapakano, na nalomaka wε oko ai ho

¹⁸a bodipoa miso mabu, bo badonge a modidi, a bomana a bohu, bo bakine ngulu eSatana a bodoa ai Njambe, a bossɔ boyε bojibe jibu cina eejimeli ai mbi, na a bossɔ lisango a tei ebasenɔke.

¹⁹Oko boa, kumu Agulipa, mbi nailona bosuma mojɔ moDiko mone mbi.

²⁰Natɔndɔ bato baDamaseke, na a Yelusalema, na a makota masusu maYuda, na natɔndɔ koko bapakano bo bajase dosa na bahekoe ai Njambe, na bo bangamejae bohekoe hobu oko na bikɔmeli bipele.

²¹BaYuda bapea mbi a tempelo, na bameka boweja mbi oko a mojɔ momina.

²²Njambe ko akɔmeja mbi masu masusu oko a busa bu; na nami ya a botondɔ bato bakɛkɛ na bato banɛnɛnɛ ngando jibala Mose na batɔndɔi bo jidi bokwa ngɔngɔ, pεpε mojɔ motongo;

²³oko bo Masiya abwani bodingoa, bo angœ boso a tei ebagwake, na bo atɔndœ mwako mobohu ai bato basu na a makota matongo.

²⁴Abalaka yo boa bo asalongejae, Peseto abekoa bo, Paulo, odi na lilale! Mijo minene mikoa wε milabojaka wε oko bolaboja.

²⁵Paulo asɔmbeja bo, Peseto oekumu enenε; mbi naditi nongo na lilale. Mijo mibalaka mbi midi soti mεnε, te nongo ebalabala.

²⁶Kumu Agulipa ajebaka ngando jimina, na mbi nabalaka na nde a bohu. Ngando jimina jiikɔmɔ a libombi na mbi nalekε bo ajebaka jesusu.

²⁷Kumu Agulipa, ojimaka batɔndɔi? Mbi najebaka bo ojimaka.

²⁸Agulipa abala na Paulo bo, Edikai mweka pε bo ohekojae mbi moto oMasiya!

²⁹Paulo asɔmbeja bo, Mbi nangaka Njambe bo, isa edεye isa ngɔngɔ, bato basusu baya bakaka mbi busa bu bade o adi mbi, na wε mεnε pongono,—te na minyɔlɔ mi ko!

³⁰Kumu Agulipa angɔ, na *gouverneur* na Belénike pongono, na baya badaka na bu a esika emina, na bamana

³¹Ibo babalana bo, Moto omina aikɔ nongo mojɔ mua mobwani na mokindo mobogwa isa na blokɔ.

³²Na Agulipa abala na Peseto bo, Eipeta da bo apalaka asambe na Kaisala, ka moto omina abwani bocingoama.

Bikɔmeli 27

Paulo Ake a Loma

¹Yana ajima 'bo bo botambe a masua a bokε a Italia, bakina Paulo na bato batongo bablɔkɔ a mɔmɔ maJulio, kapitεni okompani eAuguseto.

²Atamba so a masua maAdalamite, bokε oko na njingo ebosemε a ngando jia jidaka a dɔngɔ diAsia. Alisataluko, moto oTεsalɔnike, ngando eMakedonia, apaka so.

³Ahoa busa, bosemε a Sidonia. Julio akɔ Paulo monganji, na ajima bo boduboe ai bina'nde bo bamokɔmejae.

⁴Angɔ so ena, bonɔ a dɔngɔ ditongo dimosanga kombe Kupulio, mojɔ bo pwea edongaka a dɔngɔ dikεkε so.

⁵Aleka so madiba-mamukwa a dɔngɔ diKilikia na Pampulia, bomea a ngando kombe Mula, a ngunda eLukio.

⁶Kapitēni obasoda atana masua maAlesandalia a ngando emina maya makēke a Italia, na atambeja so a masua mamina.

⁷Bodala bopētē-bopētē makina masu, na bomea a Kinido oko na kpōkōsō. Pwea esōmbeja so oko bosōmbeja a esika emina, na bonō sangōngō jiKulete a dōngō diSalamona.

⁸Bonō njea emina oko na kpōkōsō, na bosemē a ekina esika yena edi na kombe Mbongu Jipele, hulelu na ngando kombe Lasea.

⁹Masō manō boa manēnē. Ehole ebikia esia, na mōngō momadiba-mamukwa modaka na njupi. A mojō momina, Paulo aleha bato bo,

¹⁰Ino bami, mbi nanēkē bo mōngō mu modi bodaloa. Iso bodi bopa njupi enēnē, te nongo a mojō momasua na leka pē, oko a mojō mosu bēnē koko.

¹¹Kapitēni obasoda ko apala bohokea oko kapitēni omasua, na moswa 'masua, pē bohokea mojō mobala Paulo.

¹²Mbongu emina eidaka epele a boyeyoa ena a edidi epio. Oko boa bato banēnē bajima bo bongōe ena, na njingo ebomea a Poinike, ngando eKulete, a boyeyoa ena a edidi epio; mojō bo mbongu emina eyεyε *nord-est* na *sud-est*.

Mopomba a Madiba-Mamukwa

¹³Ekina pwea eyembu edonga a dōngō disudo. Oko boa bale bo mōngō mobu modi bobōngō. Bangōjō longo, na banō a dōngō diKulete, hulelu mēnē na mosanga.

¹⁴Ngōngō mweka ko, mopomba monēnē modoa; kombe emopomba momina Yulukulu.

¹⁵Boihōnō bonō a njea esu, mojō bo masna mabasoa na pwea oko bobasoa. A mojō momina, boihōnō bokō eka, na bolindama boa.

¹⁶Bonō a dōngō dimokina mosanga mokēke, kombe Kauda. Bokō elomu epipo mēnē a boheleja ebei emasua.

¹⁷Boengōjō na boekweja a tei emasua. Ngōngō jimina, banōjō singa cina emasua a bodinga masua. Badaka na bō bo basaka bakama a jēlō jiSaluti. A mojō momina, basoloja bisenja bimasua, na bolindama oko bolindama.

¹⁸Yana ahoa busa, bojengajengaka na mopomba, na babanga bodumba leka lotombaka masua a madiba.

¹⁹Anō koko masu mabae, batomba leka lomasua na mōmō mabu bēnē, na balodumba a madiba.

²⁰Bodaka masu manēnē, pē bone nongo modika-busa isa njōtō. Mopomba modaka mopipo mēnē, na boidaka na njingo ebohela.

²¹Badaka masu manene pε boyaka eka. A mojɔ momina, Paulo angɔ a tei ebu, na abala na bu bo, lno bami; akɔki no hokea mhi, na akɔki no yeyoa a Kulete, ka bopiti nongo njupi, na leka lonamiti boa.

²²Edεye ko mbi nalehaka no ho otitejaeni milema minu, mojɔ bo ôhelani no basusu. Masua ko madi bogwa.

²³Mbi nadi moto oNjambe. Namokɔmɛkε, na obwɛnji onde amai hulelu na mbi na bulu bu.

²⁴Abali na mbi bo, Paulo, ye bobanga! Wε odi bo'ma a boso boKaisala. Na hokea; Njambe api wε bato basusu baya badi na wε a masua.

²⁵Ino bami, titejani milema minu, mojɔ bo mbi nadi na ejimeli ai Njambe bo mojɔ mobali yo na mbi modi boda oko boa.

²⁶Endele ko, bodi bobakama a mokina mosanga.

²⁷Iso bojengajengaka boa a madiba-mamukwa maAdalia. A busa bodomi-na-inεi ko, oko na bulu tei, bato bamasua badaka na bolε bo bobatei na ekina esika.

²⁸Adumba bo pɔndɔ, banε bo madiba madaka na ndinda, mabɔkɔ domi-na-matano.

²⁹Badaka na bɔ isa bodi bobakama a matai. Oko boa badumba longo jinεi a madiba a mbolo engɔngɔ, oko na posa bo busa bohoe.

³⁰Basali bamasua ko bameka bocia masua. Basoloja ebei a madiba na mokalo bo bapalaka batitejae longo a mbolo eboso.

³¹Paulo ko abala na kapitεni obasoda, na basoda pongono bo, Bato bamina bamiti da a masua, ino otahelani nongo.

³²Oko boa basoda balena mikpulu bo ebei ekwε nase.

³³Yana abenga busa bohoa, Paulo angɔnɔ bato basusu bo bayake dia. Abala bo, Ombakani edεye na mokakwano masu domi-na-manεi, pεpε dia, pε boyaka nongo eka.

³⁴Mbi nangɔnɔkɔ no bo oyakeni dikina dia edεye a bopa no ngulu; mojɔ bo pεpε nongo moswe momɔci momelo minu modi bogwa.

³⁵Ama yo bala boa, ami tomba oko molembε, asakoa Njambe a boso bobu basusu, abuka molembε na abanga boyaka.

³⁶Oko boa milema mibu basusu mitita, na bayaka koko dia.

³⁷Bodaka a masua bato mikama mibae na domi-sambo na bato basamano.

³⁸Yana aseja bo boyaka bopele, badumba ndongo a madiba-mamukwa a bohahaneja masua.

³⁹Yana ahoa husa haimbetea nongo ngondo. Banε ko likina libɔngu na eboma epele, na bajima bo bameke bosemeja masua a esika emina.

⁴⁰Bacingoa singa jilongo, na bajikina a madiba-mamukwa. Bakanda koko minyɔlɔ miyenda, bangɔjɔ esenja enεnε emasua a mojɔ mopwea, na babenga mbongu.

⁴¹Bamea ko a ekina esika yena eidaka na mbɛngɛ, na masua mabakama oko bobakama. Mbolo eboso ebakama, na mbolo engɔngɔ ebanga bobukea a mojɔ momula mopipo.

⁴²Basoda badaka na mokano bo bawoe bato bablɔkɔ, bo batasadumba a madiba a bocia.

⁴³Kapitεni obasoda ko adaka na posa bo abanee Paulo bopele, na aijima mojɔ momina. Apa monɔkɔ bo baya bajebaka madiba basadumbe a madiba boso, bo babenge ngondo,

⁴⁴na bo bato batongo bapee mabaya isa leka lotongo lomasua. Bakɔ boa, bato basusu bahela, na bamea a ngondo.

Bikɔmeli 28

A Melita

¹Apa so njupi boa, boka bo mosanga momina modi na kombe Melita.

²Bato bangando babonjea so na bopele mεnε. Batokana mosa monεnε, na basɔ so bopele, mojɔ bo mbua abanga bokwa, na pio edaka enεnε.

³Paulo andoa kata enjεlε, na ajibakea a mosa. Njɔ ko amana a mojɔ mopeye emosa, na akoma ebɔ ende.

⁴Yana anε bato bangando njɔ acingi a ebɔ ePaulo, babalana a tei ebu bo, Moto yoyo adi mowoi soti. Aheli a madiba; Iyo ko yona osambejaka ajimiti bo ahele.

⁵Paulo ko ahεhε ebɔ ende, na njɔ akwa ta mosa; yo mεnε aika nongo epeko.

⁶Ibo ko bamonja, mojɔ bo badingaka bo mokuku monde modi boBaala, isa bo adi bokwa gbu, oko mogo. Ba'mba ekoka, na banε bo aditi nongo na epeko. A mojɔ momina bale mokina mojɔ motongo, na babala bo adi okina njambe.

⁷Kumu omosanga, kombe ende Pubulio, asɔ so bopele, na akɔ so monganji masu masato. Gbie jinde jidaka hulelu na esika emina.

⁸Sange 'Pubulio adaka asambi na yogo emipulo, na Paulo ake bo amonje; anga Njambe, amobakea mɔmɔ, na amoheleja a yogo ende.

⁹Ama yo kɔ̄ boa, bato batongo bamosanga bay a badaka na bego, ba'mi doa oko ai yo, na bahela a bego bibu.

¹⁰Basepa na su bou mɛnɛ, na yana atamba so a masua, bapa so leka lua lotakaka na su.

¹¹Boyeyoa ena songe basato. Ngɔ̄ngɔ̄ jimina, botamba a masua maAlesandalia maya mamayeyoa a mosanga edidi esusu epio. Kombe emasua edaka Mapasa Bami.

¹²Bosemɛ a Sulakusa, na bohwɛ ena masu masato.

¹³Bongɔ̄ ena na bolekela a Legio. Ahoa koko busa, pwea edonga a sudo. Bodala koko, na bomea a Puteoli na masu mabae.

¹⁴Botana bato baDenga a ngando emina bay a bangɔ̄nc so bo boyeyoe na bu masu sambo. Bongɔ̄ ena na bobenga Loma.

¹⁵Bato baDenga oho, yana aka ho mwako mosu, badoa bo balenoane so a Jando eApio, na a Ndako Jisato jiBakendeli.

¹⁶Paulo, yana abanɛ yo, asakoa Njambe, na apingeja molema monde. Amea so a Loma, bajima bo Paulo adae a ekina ndako na soda omɔci a bomobanea.

Paulo a Loma

¹⁷Yana anɔ̄ masu masato, Paulo abolea basuku baBaYuda. Yana atitana bo, Paulo abala na bu bo, Banninga, mbi naisopa nongo mobeko mobato isa mobasangwa'su. Bapeani ko a Yelusalema, na bapani a mɔ̄mɔ̄ maBaLoma.

¹⁸Bakokeleja mojɔ̄ mombi, na bapala bo bacingoe mbi, cina bo bainɛ nongo mojɔ̄ na mbi mua mobwana na mokindo mobogwa.

¹⁹BaYuda ko baijima. A mojɔ̄ momina mbi nainɛ ekina njea etongo, oko bo nadoe a esambi eKaisala. Mbi ko nitadumbaka bato bahkota limbi mɛnɛ a mojɔ̄ momina.

²⁰Oko boa napalaki bonɛnɛ na nu, bo nabale na nu mojɔ̄ momina; cina bo nadi a monyɔ̄lɔ̄ mu oko a mojɔ̄ monjingoe eYisalaele.

²¹Ibo bamo-sɔ̄mbeja bo, Iso bositi mikanda miYuda a mojɔ̄ mowɛ, na pɛrɛ nongo moto osu odoi ya a botɔ̄ndɔ̄ so, isa a bobala mokina mojɔ̄ mobe mokɔ̄ wɛ.

²²Iso ko bopalaka bo otɔ̄ndɔ̄ so mijɔ̄ milɛkɛ wɛ. Bojebaka bo bato balonaka njea eejimeli ye a bisika bisusu.

²³Bahɔ̄ bokina busa, na bato badoa banɛnɛ a ndako ePaulo. Iyo abanga bobakoja ehuma, na ahakoja oko a ehole emɔ̄kɔ̄. Abatɔ̄ndɔ̄ mwako moBokumu boNjambe. Abaleha na Mibeko miMose na mikanda mibatɔ̄ndɔ̄i, na akenga bohekoja milema mihi ai Yesu.

²⁴Bakina babu bajima mijɔ mibala yo; batongo ko baijima.

²⁵Oko boa baidaka na molema momɔci, na bayana boa. Paulo ko abala na bu ekenge ye; Mwembo Moṣenɔke mobala na basangwa'su na soti na monɔkɔ momotɔndɔi Yisaya bo,

²⁶Kε ai bata ba; bala bo, Ô'kani na matoi soti, otacingeani ko; Ônjani na miso soti, otanəni ko.

²⁷Mojo bo milema mibato ba midi mipipo; Matoi mabu madi na bohoka, Na hadipi miso mabu, Bo batane na miso, na bata'ka na matoi, Bo batacingea a milema mibu, Basaka hekoa ai mbi bo nababelejae.

²⁸Jebani oko bo, boheleja bu boNjambe bolomami ai bapakano; ibo badi bohokea.

²⁹Ama yo bala boa, BaYuda ba'mi nangana bonangana na kitε enεnε.

³⁰Paulo ahwε a ndako emina hianga bisusu bibae, na asɔkɔ bato basusu baya badoaka ai yo.

³¹Atɔndɔkɔ mwako moBokumu boNjambe, akojaka ngando jiKumu Yesu Masiya na eci enεnε, pεpε nongo moto omosia.

Baloma

Baloma 1

¹Mbi Paulo nadi mobuli oYesu Masiya. Nabeama bo nadae obwənji; nahəngəmə a mojɔ moMwako Mopele moNjambe

²mua modikaneja yo eyou na hatɔndɔi bande a Misɔnɔ Misənɔke,

³oko mwako moMwana'nde yona odaka mwana 'Dawidi a njeamokuku.

⁴Iyo ko akuma o Mwana 'Njambe na ndangasa a njea eMwembo mobosənɔ, yana angɔ yo a tei ebagwake.

⁵Iso boso monganji na elomu ebabwənji oko ai yo, bo bohekojae makota masusu a lisuma hejimeli a mojɔ mokombe ende.

⁶Ino koko obeamani bo odaeni bato baYesu Masiya.

⁷Njεbε ai no basusu oho Loma baya basɔ epaeli eNjambe, na babeama bo bade basənɔke. Yε monganji na bowi boNjambe Sangwa'su na Kumu Yesu Masiya bode ai no.

Njingō ePaulo

⁸Mojɔ moboso; nasakoaka Njambe ombi na Yesu Masiya a mojɔ monu basusu, cina bo gala eejimeli enu etundaka a ngondo esusu.

⁹Mbi nakɔmɛkε Njambe na mwembo mombi a elomu eMwako Mopele moMwana'nde, na yo adi motati ombi bo nalangaka kombe jinu a ma'nga mambi bihole bisusu.

¹⁰Nangɔɔnɔkɔ Njambe bo nabolojae njea ekina ehole epele a bodoa ai no, isa bolulea bonde bodi boa.

¹¹Mojɔ bo nadi na posa a bo'nene na nu, bo napε no ekina epeeli emwembo a bombilimeja no.

¹²Nakada a tei enu bodi bopingejana, mbi a mojɔ moejimeli enu, ino a mojɔ moejimeli embi.

¹³Baninga, napalaka najebejae no bo nadaka na mokano mobodoa oho ai no bihole binene, bo nadae na likina lituna a tei enu o adi mbi na lituna a makota matongo; nanekini ko njea.

¹⁴Nadi na nongo ai BaEla na ai bapakano pongono, ai bato babowei na ai bato balibumi pongono.

¹⁵A mojɔ momina, nadi na posa bo natɔndɔe Mwako Mopele ai no pongono baya badi a Loma.

¹⁶Mbi naditi nongo na sɔni a mojɔ moMwako Mopele, mojɔ bo modi ngulu eNjambe a boheleja moto na moto yona ojimaka, MoYuda boso, na MoEla pongono.

¹⁷Bodongo boNjambe boboloi a tei eMwako Mopele, banga oko na ejimeli, suka oko na ejimeli, o adi mosɔnɔ bo, Moto obodongo ahela oko a mojɔ moejimeli.

Kele eNjambe a Mojɔ moBobe boNgondo

¹⁸Njambe aneja kɛlɛ ende, na edonga oho Diko a mojɔ mobosetɔ na bobe bobato, mojɔ bo bobe bobu bobindanejaka Soti.

¹⁹Mojɔ bo ejebeli eNjambe edi bohu a miso mabu; Njambe yo mɛnɛ abaneja.

²⁰Leka lokɔ yo oko a bobanga bongondo lobolojaka ai so mijɔ minde mibombamake, na ngulu ende yena etasia, na bonjambe bonde. Oko boa bapeliti nongo mokalo.

²¹Ibo ko, yana ajeba bo Njambe, baimokumeja o Njambe, na baimosakoa. Bahekao a ngando jingasangasa, na milema mibu miyebɛ mihindɛ oko bohinda.

²²Basakumeja na bowɛi bobu, na bakindoa oko bigegele.

²³Basɔmbɔtɔnɔ ekumu eNjambe yona oditi nongo na bogwa, na bilimo bimoto obogwa, na mbulu, na tito, na mboa babolanda.

²⁴A mojɔ momina, Njambe abakinea a bosetɔ bomilema mibu bɛnɛ, bo basambojae mikuku mibu a tei ebu bɛnɛ.

²⁵Mojɔ bo, balona Soti eNjambe a bojima mojɔ mobokosea; basakoa na bakɔmɛ leka lokɔ Moyoeli, te nongo yo mɛnɛ, yona odi na bojongoa oko na bosusu. *Amen.*

²⁶A mojɔ momina Njambe abakinea a posa jibosambolu. Bali babu bakina elomu yena ewana na mikuku mibu a mojɔ mongando jia jibɔngiti na mokuku.

²⁷Bami koko boa—bakina mojɔ momomi na mwali, na bangoa na posa oko ai bami; na bakɔ mijɔ mibosambolu, bami na bami, na basɔ mokindo mua mobwana na bobe bobu a mikuku mibu bɛnɛ.

²⁸Balɛ bo babwani bosetoja Njambe; oko boa Njambe abakina o babuli bamilema mibu mibokosea, bo badea na bikɔmeli bia bibɔngiti.

²⁹Baluma na bobe tungu jisusu, na bosetɔ, na mbengea, na libwano; likaka oko botɔ, na bowa, na miano, na epulu, na lisoki, na malɔngi.

³⁰Bato baminɔkɔ mibe, baloni baNjambe, bato babiloli, bato bajala na egbo; balɛkɛ oko mijɔ mibe pɛ, na bapeliti lisuma ai baboti babu,

³¹pɛpɛ bocingea, pɛpɛ lisuma a mibeko, pɛ epaeli, pɛ nongo wa.

³²Bajebaka mobeko moNjambe bo baya badi na bikomeli bimina babwani oko na bogwa; endele ko, bakokɔ ngando jmina bo bɛnɛ, na basepanaka na bato baya badi na bikomeli bimina.

Baloma 2

Bosamba boNjambe

¹Oko boa opeliti mokalo, wε moto yona osambejaka otongo. Mojɔ bo okasambeja moto otongo, osadumbaka wε mɛnɛ, cina bo, wε yona osambejaka okɔkɔ ngando jmina wε mɛnɛ.

²Iso bojebaka bo bato bakakɔ ngando jmina, Njambe abasambejaka na soti mɛnɛ.

³Wε moto yona osambejaka bato baya bakokɔ ngando jmina, na okɔkɔ boa wε mɛnɛ, odingaka bo odi bocia esambi eNjambe?

⁴Isa osətojaka monganji monde monenɛ, na lingbangba linde, na yongi ende? Otajebaka bo monganji moNjambe mobeaka wε a bohekoja molema?

⁵Esambi eNjambe esoti êboloa a busa bokɛnɔ, na wε ohɛjɛkɛ na ohɛngɛkɛ kɛnɔ ai wε mɛnɛ a busa bomina, cina ebaso ewε, na molema mowε mua mopoliti nongo dosa.

⁶Mojɔ bo yo adi bokaba ai moto na moto libondo lia libwani na bikomeli bindé;

⁷adi bopa bomɔ bua bodi na bosusu ai bato baya badi na lingbangba a bikomeli bipele, baya badukaka ekumu, na lisuma, na bomɔ bua bodi na bosusu.

⁸Bato ko baya badi na miano, baya balonaka Sotì na basumaka oko bobe, badi bone kɛnɔ na likundu.

⁹Moto na moto yona okɔkɔ bobɛ adi bone jɔɔlɔ na molɔbɔ, MoYuda boso na MoEla pongono.

¹⁰Ekumu ko, na sepi, na bowi jihɛngɛmɛ ai moto na moto yona okɔkɔ bopele, MoYuda boso na MoEla pongono.

¹¹Mojɔ bo bato basusu badi amɛci a boso boNjambe.

¹²Bato basusu baya bapeliti Mibeko na bakokɔ bobe, bâgwa koko boa, pɛpɛ Mibeko. Bato ko baya badi na Mibeko, na bakokɔ bobe, bâsamba oko na Mibeko.

¹³Mojɔ bo balongaka a miso maNjambe, te nongo baya bakaka Mibeko, oko baya basumaka Mibeko.

¹⁴Bapakano bapeliti Mibeko; endele ko bakokɔ ngando jibekeaka Mibeko na bolɛ bobu bɛnɛ; oko boa, nongo adi bo pɛ Mibeko, badi na Mibeko a tei ebu.

¹⁵Mojo momina monejaka so bo ngando jibekeaka Mibeko iiſon̄om̄ a milema mibu. Bole bobu bodi koko motati; na male mabu mabadumbaka isa mabalongejaka.

¹⁶Mojo mu modabi bohu a busa bosambejabí Njambe mijø mibombamake mibato, oko na Masiya Yesu; mwako mombi modi oko boa.

Mijo miBaYuda

¹⁷Wε yona obalaka bo odi MoYuda, ejimeli ewε edi oko a Mibeko, na osakumejaka a mojo moNjambe.

¹⁸Ojebaka bolulea bonde, na obøkø ngando jipele, mojo bo ohokea hokoja boMibeko.

¹⁹Ojimaka na soti bo obwani boneja njea ai bato baya bagwa miso, na bo odi bohu ai baya badi a modidi,

²⁰molehi ai balaboake, na mokoja obana, mojo bo obolojai mokuku moejetbeli na Soti a tei eMibeko.

²¹Oko boa, wε yona okojaka batongo, otasakoja wε mεnε? Okatøndø mwako, olembaka bato bo bata'ba; wε mεnε ko oditi na liba?

²²Wε yona olembaka bato bo bata'ngε bøøli, ongækø bøøli wε mεnε? Wε yona olonaka bilimo, opunjaka tempelo?

²³Wε yona osakumejaka a mojo moMibeko, asopaka wε Mibeko, otasambojaka Njambe?

²⁴Mojo bo moson̄om̄ bo, Kombe eNjambe esamboi a tei ebapakano a mojo monu.

²⁵Isa osumaka Mibeko, bolena boganda bodi na cina soti. Isa ko osopaka Mibeko, bolena bowε boganda bodi oko ngasa mεnε.

²⁶Oko boa isa Mwea asumaka bokoja boMibeko, yo atabwana na wε molenake, nongo adi yo oko Mwea?

²⁷Oko boa baya bapeliti embete ebolena ganda a mikuku, na basumaka Mibeko, badi bodumba no baya badi na mokanda moMibeko, na bolena boganda, na basopaka Mibeko.

²⁸Odi MoYuda, te yona odi na embete eMoYuda a mokuku; bolena boganda bosoti bocingiti na mokuku, na boditi mojo mosokolu.

²⁹Moto adi MoYuda, isa adi MoYuda a tei; bolena boganda bosoti bodi mojo momolema na momwembo, te nongo momokuku; bodi a mojo moesako eNjambe te a mojo momoto.

Baloma 3

Bato Basusu Badi Babe

¹Oko boa MoYuda adi boso bobato batongo? Bolena boganda bodi na cina? Ee, bou mene.

²Mojo moboso modi oko mu; Njambe abapa Misono a mojo mobobanea.

³Isa bakina babu baijima, sako eNjambe edi bokputoa a mojo mokit ebu?

⁴Pere nongo mweka! Nongo adi bato basusu bakosei, Njambe atakputoa ebaeli ende; mojo bo mosonono bo, Bo olonge na bibaeli biwe, Na ogbokejae yana asambaka we.

⁵Bobe bosu bonejaka bodongo boNjambe a bohu. Oko boa, Njambe akakenjo na su, bodi bobala bo alongiti? (Nabalaka na monko momoto.)

⁶Pere nongo mweka! Ekada boa, Njambe adi bosambeja ngondo o bo?

⁷Na isa Soti eNjambe eboloaka a bohu a mojo mobokosea bombi, na ekumu ende ehake boa, nadi bosamba o moto mobe mojo moye?

⁸Ekada boa, bobwaniti bok bobe bo bopele boboloe? Mojo bo bakina bato badko so, na batondko na bokosea bo so bobalaka boa. Bato bamina babwani bodumbama soti.

⁹Oko boa nde? Iso BaYuda bodi na Iikina lilonga? Pere nongo mweka! Mojo bo bonejai boso bo bato basusu boyabadi a libuli libobe, BaYuda na BaEla pongono.

¹⁰Mosonono koko bo, Moto obodongo aditi, pere nongo omoci.

¹¹Pere nongo moto ocingeaka; Pere nongo moto odukaka Njambe.

¹²Bato basusu bapengoi; balaboi kanga basusu mene na molema momoci. Pere nongo moto okoko bopele, pere nongo omoci.

¹³Bikoolo bibu bidi oko esemo yena edi bwase; Biemi bibu bidi oko na bokosea. Ngenge elibate edi cina jibiposo biminoko mibu.

¹⁴Minoko mibu milutni na masingi na biloli.

¹⁵Bapotaka mbango a bosopa makia.

¹⁶Mole mabu madi oko bowa na bobeja.

¹⁷Batajebaka nongo njea ebowi.

¹⁸Miso mabu matabangaka nongo Njambe.

¹⁹Bojebaka bo bikenge bibalaka Mibeko bidi oko a mojɔ mobato baya badi cina jiMibeko. Oko boa pεpε nongo monɔkɔ modi bosalongeja, na ngondo esusu edi bojima kpaci eNjambe a bosambeja.

²⁰Mojɔ bo pεpε nongo moto odi bolonga a miso mande cina ebilomu biMibeko; Mibeko mipaka oko ejebeli ebobe.

Lilonga a Mojɔ moEjimeli ai Yesu Masiya

²¹Edεye ko bodongo boNjambe boboloi na njea etongo, te nongo na Mibeko. Endele ko, Mibeko na batɔndɔi badi batati babodongo boNjambe,

²²oko bodongo boNjambe ai bato basusu baya baji-maka, na cina eejimeli ai Yesu Masiya. Bato basusu badi amεci,

²³mojɔ bo bato basusu mεnε bakɔ bobe; pεpε nongo moto omɔci omea a mwεngi moekumu eNjambe.

²⁴Balongaka ko na monganji moNjambe o epeeli, a mojɔ molisiko lia lidi a tei eYesu Masiya.

²⁵Njambe amoloma bo adae lisiko a mojɔ momakia mande, ai baya bajimaka. Oko boa Njambe aneja bodongo bonde, mojɔ bo akina jibe jia jikɔɔmɔ ehele, pε bosambeja.

²⁶Akɔ boa a boneja so a ehole ye, bo adi na bodongo yo mεnε, na bo alongejaka moto yona odi na ejimeli ai Yesu.

²⁷Oko boa moto adi bosakumeja na ye? Abwaniti bosakumeja; mojɔ moye? A mojɔ mobilomu? Ngasa, oko a mojɔ moejimeli pε.

²⁸Mojɔ bo, iso bojebaka bo moto adi bolonga oko a mojɔ moejimeli, te nongo a mojɔ mobilomu biMibeko.

²⁹Njambe adi Njambe oBaYuda pε? Aditi Njambe obapakano pongono? Ee, adi Njambe obu pongono.

³⁰Njambe adi oko omɔci. Adi bolongeja babolena-ganda a mojɔ moejimeli ebu, na baya bapeliti embete ebolena-ganda a mojɔ moejimeli ebu.

³¹Oko boa, bodi bodumba Mibeko a mojɔ moejimeli? Pεpε nongo mweka; bopingejaka Mibeko oko bopingeja.

Baloma 4

Ejimeli eAbalayama

¹Oko boa bodi bobala bo, a mojɔ moAbalayama yona odi tata osu a njea emokuku?

²Isa Abalayama alonga a mojɔ mobilomu, abwana bosakumeja na mojɔ momina, te a boso boNjambe ko.

³Misɔnɔ ibalaka bo? Mibalaka bo Abalayama ajima Njambe, na ejimeli emina elangama ai yo o bodongo.

⁴Moto akakɔ elomu, likonja lisɔkɔ yo liditi epeeli; abwani bɔsɔ likonja limina.

⁵Endele ko, moto akada na ejimeli ai Njambe yona longejaka bato babe, alongaka a mojɔ moejimeli ende, te a mojɔ moelomu ekɔkɔ yo.

⁶Dawidi pongono ajongoaka moto olongejaka Njambe, te nongo cina ebilomu.

⁷Abala bo, Bojongoa ai bato baya basɔ boyε bojibe jibu, na mabunga mabu makundama.

⁸Bojongoa ai moto,—Kumu akada pε bolanga koko bobè bonde o nongo.

⁹Bojongoa bomina ko bodi oko ai bato babolena ganda pε, isa ai bato bamwea pongono? Mojɔ bo bobalaka bo ejimeli eAbalayama elangama ai yo o bodongo.

¹⁰Edaka boa mojɔ moye? Edaka boa yana adaka yo pε bopeta lenama ganda isa ngɔngɔ? Te nongo ngɔngɔ, oko yana adaka yo pε bopeta lenama ganda.

¹¹Iyo asɔ mojɔ mobolena ganda o embete, a boneja bo amaka da na bodongo yana adaka yo pε bopeta lenama ganda. A mojɔ momina yo adi tata obato basusu baya bajimaka, na badi na bodongo a miso maNjambe a njea emina, nongo adi bo pε bolenama ganda.

¹²Oko boa pongono, adi tata obato babolena ganda baya baditi na bolena boganda pε, mojɔ bo badalaka a njea eejimeli eAbalayama tata osu, yena esɔ yo yana adaka yo pε bopeta lenama ganda.

¹³Abalayama aisɔ sako elisango lingondo ai yo mɛnɛ na bana bande a mojɔ moMibeko, oko a mojɔ mobodongo boejimeli.

¹⁴Mojɔ bo isa basangoli badi oko baya bajimaka Mibeko, ejimeli edi eka engasa, na sako ebɔngiti.

¹⁵Suka eMibeko edi kɛnɔ; endele ko, isa Mibeko miditi, bosopa boMibeko boditi.

¹⁶Mojɔ mosusu mocingi oko na ejimeli pε. Oko boa koko, sako emina edi mojɔ momonganji moNjambe, na edi ai bana basusu baAbalayama—te nongo ai baya bajimaka Mibeko pε, oko ai baya badi na ejimeli eAbalayama; mojɔ bo, yo adi tata osu basusu.

¹⁷Mosconom̄ koko bo, Mbi nakɔi wε tata omakota manεnε. Adi tata osu a miso maNjambe yona ojimea yo, oko Njambe yona opaka bom̄ ai bagwake, na abeaka leka lua loditi, bo loda.

¹⁸Abalayama, yana adaka yo pε njingo, ajima ko oko na njingo bo adi boda tata omakota manεnε, o ama yo sɔ̄ sako bo, Bana bawε badi boda boa.

¹⁹Yana ale yo bo mokuku monde modi o mogo, (mojɔ̄ bo adaka na bianga mokama na dea) na yana ale yo bo Sala adi motete, ejimeli ende eimbε nongo.

²⁰Aidaka nongo na mokakwano a mojɔ̄ mosako eNjambe; ejimeli ende emopa ngulu, na akumeja Njambe

²¹mojɔ̄ bo ajima na soti mεnε bo Njambe adi bokɔ̄ mojɔ̄ mobala yo.

²²A mojɔ̄ momina, ejimeli ende elangama ai yo o bodongo.

²³Bikenge bimina ko,—Elangama ai yo—biisconom̄ a mojɔ̄ moAbalayama pε.

²⁴Bisconom̄ a mojɔ̄ mosu pongono. Bodongo bolangama koko ai so baya bajimeaka yona ongɔjɔ̄ Yesu Kumu osu a bogwa,

²⁵oko Yesu yona ogwa a mojɔ̄ mojibe jisu, na angɔ̄ a bogwa a bolongeja so.

Baloma 5

Lilonga a Mojɔ̄ moEjimeli

¹Oko boa, adi so na lilonga a mojɔ̄ moejimeli, bodi na bowi a tei esu na Njambe, a mojɔ̄ moKumu osu Yesu Masiya.

²Iso bodi bambilimake a monganji mu moNjambe; bone njea ebokwea a monganji momina oko a mojɔ̄ monde; na bodi na sepi a mojɔ̄ monjingi esu ebossɔ̄ ekumu eNjambe.

³Mojɔ̄ motongo koko, bosepaka a tei eminɔngɔ̄ misu. Bojobaka bo monɔngɔ̄ mobotaka lingbangba;

⁴lingbangba libotaka ekɔ̄mεli esoti; ekɔ̄mεli esoti ebotaka njingo.

⁵Njingo etakputoa nongo, mojɔ̄ bo ngεnɔ̄ eNjambe esopei a tei emilema misu, oko na Mwembo Mosenɔ̄ke mosɔ̄ so.

⁶Mojɔ̄ bo, Masiya agwea baya baijeba Njambe a ehole yena ewana, oko yana adaka so pεpε ngulu.

⁷Odi bogwea moto otongo nda, nongo akada moto obodongo? Isa okina adi bojima bo agwε a mojɔ̄ momoto mopele.

⁸Njambe ko anejaka ngεnɔ̄ ende ai so oko na mojɔ̄ mu;—Masiya agwea so yana adaka so oko bato babe.

⁹Oko boa, bolongi edeye a mojɔ momakia mande, na yo mene adi boheleja so na soti a kεlε eNjambe.

¹⁰Isa bogwa boMwana 'Njambe bodaka mokongo mobosiili bosu na Njambe, yana adaka so na Njambe soki; esingaiti bomɔ bonde! Adi so na bosiili bomina, bomɔ bonde bodi boheleja so.

¹¹Mojɔ motongo koko; sepi esu edi oko ai Njambe, a mojɔ moKumu osu Yesu Masiya yona okwea bosiili a mojɔ mosu.

¹²Oko boa, bobe bokwea a ngondo na moto omɔci, na bogwa bokwea a mojɔ mobobe. A mojɔ momina, bogwa bonangana ai bato basusu, mojɔ bo bato basusu bakɔ bobe.

¹³Bobe bodaka a ngondo oko Mibeko mipetakini da. Isa Mibeko ko miditi, lindo jiditi koko.

¹⁴Bogwa bodaka na kpaci a ngondo, donga oko a ehole eAdama oko a ehole eMose, kpaci ai bato baya baikɔ bobe o ama kɔ Adama, yona odaka elimo eyona odaka na sako ebodoa.

¹⁵Bobe bodi tungu emɔci; epeeli emonganji ko edi tungu etongo. Mojɔ bo, isa bato banenε bagwa cina ebobe bomoto omɔci, monganji moNjambe, na epeeli emonganji emoto omɔci, oko Yesu Masiya, ehε a mojɔ mobato banenε.

¹⁶Epeeli emonganji edi tungu emɔci; suka ebobe bomoto omɔci ko edi mojɔ motongo. Mojɔ bo bosambeja bobobe bomoto omɔci bosia na bodumba; epeeli emonganji ko yena elongejaka so, edi a mojɔ mojibe jinεnε.

¹⁷Isa bogwa bosɔ bokumu ai moto omɔci a mojɔ mobobe bonde, baya basɔkɔ monganji moNjambe oko na bonεtɔ, na epeeli ebodongo, badi bosɔ bokumu bobomɔ a mojɔ momoto omɔci koko, oko Yesu Masiya.

¹⁸Oko boa koko, suka ebobe bomoto omɔci edaka bodumba a mojɔ mobato basusu, na suka eelomu emɔci ebodongo emoto omɔci edi lilonga na bomɔ a mojɔ mobato basusu.

¹⁹Mojɔ bo isa bato banenε badi na lindo a mojɔ molipanga limoto omɔci, iboa koko bato banenε badi bolonga a mojɔ molisuma limoto omɔci.

²⁰Yana adoa Mibeko, lindo jihe oko bohε. Bohe bodaka bonenε soti; monganji moNjambe ko monɔ.

²¹A mojɔ momina, o adaka bobe na bokumu bobogwa, monganji moNjambe modi boda na bokumu bobomɔ oko na bosusu, a mojɔ moyesu Masiya Kumu osu.

Baloma 6

Bato baNjambe Baditi Babuli baBobe

¹Oko boa bodi bobala bo? Bodi boyeyoa a bobe bo monganji moNjambe mohεe ai so?

²Pερε nongo mweka. Iso bogwi a bobe; oko boa bobwaniti boda koko a tei ebobe.

³Otajebakani bo so basusu baya babatisama a tei eMasiya Yesu, bobatisama a tei ebogwa bonde.

⁴Yana abatisama so, bopuseama na nde a tei ebogwa, bo boda na ekɔmeli ebomɔ boyene o angɔjɔmɔ Masiya a bogwa na ekumu eSango.

⁵Mojɔ bo, isa bokatani na nde a tei ebogwa bonde, bodi bokatana koko na nde a njea ebongɔ bonde a bogwa.

⁶Bojebaka bo moto osu moyou abakeama na nde a mole-mo-bokea, bo mokuku mobobe mogwε, na a bocingoa so a libuli libobe.

⁷Mojɔ bo, isa moto agwi, bobe boditi koko na kpaci ai yo.

⁸Na isa bogwi na Masiya, bojimaka bo bodi bohela na nde.

⁹Mojɔ bo bojebaka bo, angɔ Masiya a bogwa, ataya gwa. Bogwa boditi koko na kpaci ai yo.

¹⁰Iyo agwa, na bogwa bonde bodaka oko ehole emɔci pε a mojɔ mobobe. Edεye ko, adi mɔ; na bomɔ bonde bodi oko ai Njambe.

¹¹Oko boa, toma jimani bo ino odini bagwake a bobe, na bo odini na bomɔ boNjambe a tei eMasiya Yesu.

¹²T'ojimeni oko bo bobe boda na bokumu a mikuku minu mia midi bogwa. T'osumeni oko posa jimokuku.

¹³T'opejaeni oko binama binu a bokɔ bobe. Odini bato baya badaka bagwake, na ohelani koko. Oko boa, sapejani ai Njambe; hεngεni binama binu ai Njambe a bokɔ ngando jipele.

¹⁴Bobe botada koko moswa'nu, mojɔ bo oditini cina ciMibeko; odini oko cina emonganji moNjambe.

¹⁵Oko boa, isa monganji moNjambe modi na kpaci ai so, na Mibeko pεrε nongo kpaci, bobwani bokɔ bobe? Pεrε nongo mweka!

¹⁶Okasumani moto, okasapejani ai moto, otajebakani bo odini babuli bamoswa omina? Isa odini babuli babobe, suka edi oko bogwa; isa odini babuli balisuma, suka edi oko bodongo.

¹⁷Mbi nasakoaka Njambe mojɔ bo osumakani edεye bokoja boso no boso na milema minu boyo, oko no baya badaka boso babuli babobe.

¹⁸Asikoama no a bobo, odini edεye babuli babodongo.

¹⁹Mbi nabalaka na monɔkɔ momoto, mojɔ bo odini na bwεmbu a munu. Toma pejani binama binu o babuli babodongo na boseñɔ, o apeja no boso binama binu bo bidae babuli babosɔtɔ na bobo bua bonɔi.

²⁰Yana adaka no babuli babobe, oidakani a libuli libodongo.

²¹Edεye ko, odini na sɔni a mojɔ mongando jmina. Ndese enu edaka bo? Mojɔ bo suka engando jmina edi bogwa.

²²Edεye ko osikoamini a bobo, na odini babuli baNjambe. Mbuma jibotaka no jidi oko boseñɔ, na suka emina edi oko bomɔ bua bodi na bosusu.

²³Mojɔ bo ndese ebobe edi bogwa. Epeeli ko epaka Njambe bopa edi bomɔ bua bodi na bosusu a tei eMasiya Yesu Kumu osu.

Baloma 7

Mibeko miMose na Bobe baBata

¹Baninga, otajebakani bo Mibeko midi na kpaci ai moto oko yana adi yo mo. (Nabalaka na bato baya bajebaka Mibeko.)

²Oko boa, mwali akalongana na momi, akatani na muma'nde a mojɔ moMibeko, oko a bogwa bomuma'nde. Muma'nde ko akagwa, mobeko mobolongana na muma'nde moditi koko na kpaci ai yo.

³Mwali omina ko akake ai momi otongo oko muma'nde mεnε agwakini, adi mwali obɔɔli. Muma'nde ko akagwa, mobeko mobolongana bomina moditi koko na kpaci ai yo; na akalongana na momi otongo aditi nongo moto obɔɔli.

⁴Banninga, mojɔ monu modi koko boa; Mibeko miditi na kpaci ai no, mojɔ bo ogwani na mokuku moMasiya, bo okataneni na okina otongo, oko na yona ongɔjɔmɔ a bogwa, bo so bobote mbuma a mojɔ moNjambe.

⁵Adaka so cina jikpací jimunu, Mibeko misisoja posa jisu jibe jia jidaka na ngulu a tei ebinama bisu; na mbuma jibota so jidaka a mojɔ mobogwa.

⁶Edεye ko, Mibeko miditi koko na kpaci ai so; bodaka a mbɔci jiMibeko, na bogwa bo bokɔe elomu esu na bomɔ boyene boMwembo, te a njea eMibeko miyou mimokanda.

⁷Cina emina edi bo? Mibeko midi mibe? Pεpε nongo mweka. Endelete ko, mbi najeba bobe oko a mojɔ moMibeko. Eipeta da bo Mibeko mibala bo, T'odae oko na mbengea, ka najeba nongo bo mbengea edi.

⁸Oko boa bobe boboloja njea a mojɔ moMibeko, na bosisoja posa jesusu jibe a tei embi. Bobe oko ngasa, pεpε Mibeko, bodi oko bogwake.

⁹Yana adaka mbi, pεpε nongo Mibeko, nadaka mɔ; yana ko adoa Mibeko, bobe bossɔ ngulu, na mbi nagwa.

¹⁰Mibeko mia midaka na sako ebomɔ miwa mbi oko bowa.

¹¹Mojɔ bo bobe boboloja njea a mojɔ moMibeko, bokosea mbi na mowa mbi oko na Mibeko.

¹²Oko boa Mibeko midi misɛnɔke; na eleho edi esɛnɔke na bojo na epele.

¹³Mojɔ mua mopele modaka ai mbi oko bogwa? Pεpε nongo mweka. Bobe ko botomba mojɔ mopele a boweja mbi. Oko boa ekɔmeli ebobe eboloa na soti, na bobe bogbasoa a mojɔ moMibeko.

¹⁴Bojebaka bo Mibeko micingi na Mwembo; mbi ko nadi moto omunu a mbɔci jibobe.

¹⁵Te nacingeake ekɔmeli embi mɛnɛ. Nakapala bokɔ mokina mojɔ, nitakɔkɔ mojɔ momina; na nakalona mokina mojɔ, nakɔkɔ mojɔ momina.

¹⁶Oko boa, nakalona mokina mojɔ, na nakakɔ mojɔ momina, najimaka bo Mobeko modi mopele.

¹⁷A mojɔ momina, ekɔmeli embi ecingiti na mbi mɛnɛ; ecingi oko na bobe bua bodi a tei embi.

¹⁸Mojɔ bo, najebaka bo pεpε nongo mojɔ mopele modi a tei embi, oko a tei emunu mombi. Nadi na bolulea bo nakɔe bopele, pε ko bohɔnɔ bokɔ boa.

¹⁹Te nakɔke bopele bopalaka mbi bokɔ, na nakɔkɔ bobe bolonaka mbi.

²⁰Nakakɔ mua molonaka mbi, editi mbi mɛnɛ yona okɔkɔ boa, oko bobe bua bodi a tei embi.

²¹Oko boa, mojɔ monɛkɛ mbi moMobeko modi oko mu;—nakapala bokɔ bopele, bobe bodi na mbi.

²²Mbi nasepaka na Mibeko miNjambe a tei emolema mombi;

²³endele ko, nanɛkɛ bo mobeko motongo modi a tei ebinama bimbi, mua monaka na bole bomolema mombi, na mopeaka mbi njango a libuli limobeko mobobe bua bodi a tei ebinama bimbi.

²⁴Mbi moto ojɔɔlɔ soti! Odi boheleja mbi a mokuku mu mobogwa nda?

²⁵Oko Njambe; a mojɔ moYesu Masiya Kumu osu; bosakoa ai yo! Oko boa mbi mene nasumaka Mibeko miNjambe na molema mombi; nasumaka ko mobeko mobobe na munu mombi.

Baloma 8

Lilonga liBato baMasiya

¹Bodumba boditi koko edεye a mojɔ mobato bay a badi a tei eMasiya Yesu.

²Mojɔ bo mobeko moMwembo mosikoa mbi a mobeko mobobe na mobogwa.

³Mojɔ bo Njambe aloma Mwana'nde mene a mojɔ mobobe, o ekua emunu mobobe, a bodumba bobe a munu. Mibeko miibwana bokɔ̄ boa a mojɔ moboyεmbu bomunu.

⁴Akɔ̄ boa bo bocingoame a Mibeko, oko so bay a badalaka a njea eMwembo, te nongo njea emunu.

⁵Mojɔ bo bay a badalaka a njea emunu balekε oko ngando jimunu; ibo ko bay a badalaka a njea eMwembo balekε oko ngando jiMwembo.

⁶Molema momoto mokasusa njea emunu, suka edi oko bogwa; molema ko mokasusa njea eMwembo, njea emina edi njea ebomɔ̄ na bowi.

⁷Mojɔ bo molema mua mosusaka njea emunu modi na Njambe soki; motasumaka Mibeko miNjambe mojɔ bo moditi na ngulu a bokɔ̄ boa.

⁸Na bay a basusaka njea emunu batahɔnɔkɔ̄ bosepeja Njambe.

⁹Ino ko oditini bato bamunu; odini oko bato baMwembo, isa Mwembo moNjambe modi a tei enu soti. Moto amiti da na Mwembo moMasiya a tei ende, aditi moto onde.

¹⁰Masiya ko akada a tei enu, miembo minu midi mo a mojɔ mobodongo, nongo adi mokuku eka ego a mojɔ mobobe.

¹¹Isa Mwembo monde yona ongɔjɔ̄ Yesu a bogwa modi a tei enu, yona ongɔjɔ̄ Masiya Yesu a bogwa adi bopa no bomɔ̄ a mikuku minu mibogwa, oko na Mwembo monde mua modi a tei enu.

¹²Oko boa baninga, boditi na nongo a munu bo bosuse njea emunu.

¹³Mojɔ bo okasusani njea emunu odini bogwa. Okawejani ko bikɔmeli bimokuku na ngulu eMwembo, ôdani na bomɔ̄.

¹⁴Mojɔ bo bana baNjambe badi oko bay a basusaka njea eMwembo moNjambe.

¹⁵Ino ositini mwembo molibuli bo osumeni a mojɔ mobɔ̄; osini oko mwembo molisango; na bosembaka, Aba! Sesa! oko na mwembo momina.

¹⁶Na Mwembo mene motataka na miembo misu bo bodi bana baNjambe.

¹⁷Isa bodi bana, bodi koko sangoli, sangoli jiNjambe, na bosangoanaka na Masiya. Bokadingoa na nde, bodi bokuma na nde pongono.

¹⁸Mbi najimaka bo minongo miehole ye, na ekumu yena êboloa ai so ngongo, misangiti nongo mweka.

¹⁹Mojo bo ngondo esusu embaka na tende bo bana baNjambe baboloe.

²⁰Ngondo edaka a libuli lingando jingasangasa, te na bolulea bonde mene, oko na bolulea bonde yona oekina boa,

²¹na njingo bo leka losusu lok Njambe locingoame a libuli libopo, a bosangoa ekumu ebosomi bobana baNjambe.

²²Bojebaka bo ngondo esusu ebemaka na bipeko bilibota oko edeye.

²³Te leka lok Njambe pe, oko so bene baya bajui mbuma jiboso jiMwembo, bobemaka a tei esu yana ambaka so lisiko limikuku misu, oko bosomi bosu.

²⁴Iso bobela oko na njingo emina. Bokada na njingo eeka, na bokane eka etnina, njingo editi koko. Moto ambaka na njingo eka epeli yo?

²⁵Bokada na njingo ko a mojo moeka edi so pe bone, bombaka eka emina na lingbangba.

Njingo eBato baEjimeli

²⁶Oko boa pongono, Mwembo mokomejaka so yana adi so na bwembu; te bojebake bo'nga bua bobwani na su; Mwembo ko mongconko a mojo mosu na mibemo mia miditi a kopi emoto.

²⁷Iyona osisoaka milema mibato ajebaka mokano moMwembo, mojo bo Mwembo mongconko a mojo mobasenke oko na bolulea boNjambe.

²⁸Bato bakapala Njambe, bakabeama na mokano monde, ngando jisusu jikokyo jidi a mojo mobopele bobu.

²⁹Mojo bo ajeba bosoboso baya badi boda bato bande. Akolea eyou bo badea na elimo eMwana'nde, bo yo adae Mwana-somi a tei ebananango banene.

³⁰Abahengue oko a mojo momina, na ahabea. Ababea na abaloneja. Abaloneja na abakumeja.

³¹Cina emina edi bo? Edi oko bo, Isa Njambe adi na su, odi bolona so nda?

³²Iyo aijuma Mwana'nde mene; amopa a mojo mosu basusu. Oko boa, atabakea a epeeli ende, epeeli eleka losusu? Njambe akah bato, odi bolanga bobe bobu nda? Njambe alongejaka.

³⁴Odi bodumba nda? Oko Masiya yona ogwa, yona ongo a bogwa, na adi edεye a ebo ebami eNjambe, na angɔɔnɔkɔ amojɔ mosu.

³⁵Odi boboteja so na ngɛnɔ̄ eMasiya nda? Isa bodingoa, isa jɔɔlɔ̄, isa monɔ̄ngɔ̄, isa nja, isa mbundu, isa njupi, isa likɔ̄ngɔ̄?

³⁶Mojɔ bo mosɔ̄nɔmɔ̄ bo, Bodi a bogwa busa bosusu a mojɔ mowε; Banjaka so o bata baya bahɛngɛmε a bogwa.

³⁷Pεpε. Iso bogbokejaka a tei engando ji jisusu na bopipo mεnε, oko na yo yona opalaka so.

³⁸Mbi najebaka na soti bo pεpε nongo eka emɔ̄ci ekɔ Njambe edi na ngulu a boboteja so na ngɛnɔ̄ eNjambe yena edi a tei eMasiya Yesu Kumu osu,

³⁹isa bogwa, isa bomɔ̄, isa babwεnji baDiko, isa makumu, isa ngando jia jidi edεye, isa ngando jia jikεkε adoe, isa ngulu oho Diko isa ya nase, isa ekina eka etongo.

Baloma 9

BaYuda na Sako eNjambe

¹Mbi nabalaka mojɔ mosoti a tei eMasiya. Nitakoseaka. Molema mombi mojimaka na mbi a tei eMwembo Moṣenɔke

²bo nadi na jɔɔlɔ̄ enεnε a molema mobi.

³Mojɔ bo posa embi edi bo nalakejamembī mεnε, na bo nabɔtɔne na Masiya, a mojɔ mobaninga bambi baya badi na mbi mbota emɔ̄ci.

⁴Ibo badi BaYisalaele. Lisango libu lidi oko bosɔ̄mi, na ekumu, na mikongo, na mibeko, na bosakoa, na sako.

⁵Batata badi oko batata babu, na Masiya amana a mbota ebu. Bojongoa ai Njambe yona onɔ̄i basusu, oko na bosusa. *Amen.*

⁶Ebaeli eNjambe ko etakputoa. Mojɔ bo bato basusu baya babotama a Yisalaele baditi bana baYisalaele.

⁷Na bato basusu baya badi bambota eAbalayama baditi bana bande. Mojɔ bo sako edi bo, Bana bawε bada bambota eIsaka.

⁸Cina emina edi bo bana baNjambe baditi nongo baya babotama na bato; badi bana bande na soti oko sangoli jindikeja.

⁹Bikenge bisako bidi oko bi, Mbi nâhula a edidi ye, na Sala âbota mwana momi.

¹⁰Te yo pε; Lebeka alwa demi koko boa na tata osu Isaka.

¹¹Na yana adaka bana pε bopeta botama, yana adaka bo pε bopeta kɔ bopele isa bobe, yo asɔ sako bo, Mosuku âda mokɔmeli ombakeli onde,

¹²bo ekɔmeli eNjambe ebohɔ bato edi boyeyoa, te a mojɔ mobilomu bibu, oko a mojɔ mobobea bonde.

¹³Mosɔnɔmɔ boa pongono bo, Napalaki Yakobo; nalonaki Esau.

¹⁴Ekada boa, bodi bobala bo Njambe aditi bojo? Pεpε nongo mweka.

¹⁵Mojɔ bo Njambe abala na Mose bo, Nakajima bo nakee bato wa, nadi boba'kea wa. Nakajima bo nadae na molema moyɛmbu ai bato, nadi boda na molema moyɛmbu ai bo.

¹⁶Oko boa mojɔ mosusu mocingi na monganji moNjambe, te nongo na bolulea bomoto, isa na bingi emoto.

¹⁷Ekenge yena ebalama na Palo esɔnɔmɔ bo, Mbi nangɔjɔi wε bo nanejae ndangasa embi oko na wε, bo gala ekombe embi etunde a ngondo esusu.

¹⁸Oko boa Njambe akeaka moto wa oko akajima bo amokee wa, na akapala bopingeja molema momoto akɔkɔ boa.

¹⁹A mojɔ momina, odi bobala na mbi bo, Isa modi boa, abakeaka lindo ai so mojɔ moye? Odi bogbojeja bolulea bonde nda?

²⁰Wε ko, wε moto, odi nda? Wε obwani boboma kite na Njambe? Teni edi bobala na mobomi oteni bo, Okɔi mbi boa mojɔ moye?

²¹Mobomi aditi moswa 'libali? Akapala, adi botomba ekenge elibali bo abome na ekina teni a mojɔ moelomu eekumu, na teni etongo a mojɔ moelomu engasa.

²²Bodi bobala bo, isa Njambe, nongo apalaka yo boneja kεlε ende na bojebeja so bo adi na ndangasa, adi oko na lingbangba lmεnε ai baya bamokejaka kεlε, baya babwani oko na likundu linde?

²³Isa apalaka boneja ekumu ende yena enɔi, ai baya bamokejaka wa? mojɔ bo abahɔ ehele a mojɔ moekumu, oko so;

²⁴mojɔ bo abobei, te a tei eBaYuda pε, oko a tei ebapakano pongono.

²⁵Abala boa a mokanda moOsea bo, Baidaka bato bambi; mbi ko nâbabea bato bambi. Nâda na epaeli ai yona osɔkini epaeli.

²⁶Na bâsɔ kombe ebana baNjambe obomɔ, oko a esika eka bo ekenge bo, Ino oditini bato bambi.

²⁷Yisaya pongono abala a mojɔ moYisalaele bo, Nongo etango ebana baYisalaele ekada o mbume jimadiba-mamukwa, Badi bohela oko eketa pε.

²⁸Mojo bo Kumu ângameja ebaeli ende a ngondo Oko na bopipo na pélépéle.

²⁹Na Yisaya abala koko bo, Eipeta da bo Kumu omandundu madiko akinea so bakina bana, Ka so na Sôdômô bodi amèci, Na bobwani oko na Gomola.

³⁰Cina emina edi bo? Edi oko bo, bapakano baisusa njea ebodongo; ba'si ko bodongo, oko bodongo bua bocingi na ejimeli.

³¹BaYisalaele ko bay a baduka bodongo a njea eMibeko mibodongo, bakputoi, pè bobwana na Mibeko mimina.

³²Mojo moye? Mojo bo baduka bodongo a njea ebilomu bibu bénè, te nongo a njea eejimeli. Basaka libaku oko a litai lia lisakejaka bato.

³³Mojo momina mossonmô bo, Anjani; mbi nasambeaka iitai a Siona a bosakeja bato, Litai linénènè a bobadumba. Ende ko, yona omojimeaka atasamboa nongo.

Baloma 10

BaYuda Balona Ejimeli

¹Baninga, posa emolema mombi, na bonga bombi ai Njambe bodi oko a mojo mobu, bo bahele.

²Najimaka bo badi na bingi ai Njambe; bingi emina ko editi na bocingea.

³Baduka njea ebu bénè ebodongo, mojo bo baimbetea njea ebodongo boNjambe, na bajima bodongo bonde.

⁴Mojo bo Masiya adi suka eMibeko, bo moto na moto yona ojimaka adae na bodongo.

⁵Mose asonô bo moto yona okokô bilomu bibodongo bua bocingi na Mibeko, adi bohela a mojo momina.

⁶Cina ebodongo bua bocingi na ejimeli edi bo, T'obale oko a molema mowé bo, Odi bowea oho Diko nda? (a botiteja Masiya nase);

⁷isa, Odi botita a ebubondo nda? (a bohuleja Masiya a bogwa).

⁸Pèpè; bodongo boejimeli bobalaka bo, Ebæli ebatî na wé; edi oko a monokô mowé, na a tei emolema mowé. Ebæli emina edi oko mwako moejimeli motondokô so.

⁹Okatata na monokô mowé bo Yesu adi Kumu, na okajima a molema mowé bo Njambe amongojâ a bogwa, ôhela.

¹⁰Mojo bo moto ajimaka na molema, na alongaka boa; atataka na monokô na ahelaka boa.

¹¹Misɔnɔ mibalaka bo, Pερε nongo moto yona omojineaka odi bosamboa.

¹²Mojɔ bo BaYuda na BaEla badi amεci. Kumu omɔci adi Kumu obu basusu, na likabo linde iibwani na bato basusu baya bamongɔɔnɔkɔ.

¹³Mojɔ bo moto na moto yona ongɔɔnɔkɔ a kombe eKumu âhela.

¹⁴Isa bamojimeakini ko, badi bomongɔɔnɔ na ye? Isa bakakini mwako monde, badi bomojimea na ye? Isa motɔndɔi aditi, badi boka na ye?

¹⁵Na bato bamiti lomama, badi botɔndɔ mwako na ye? Mosɔnɔmɔ bo, Baya batɔndɔkɔ Mwako Mopele—bibota bibu esɛngɔ!

¹⁶Bato basusu ko baibokea Mwako Mopele. Mojɔ bo Yisaya abalaka bo, Kumu, ojimi mwako mosu nda?

¹⁷Oko boa bato bamiti ka, batada na ejimeli, na badi boka oko na Mwako Mopele moMasiya.

¹⁸Mbi ko nahɔjɔkɔ bo, Baika? Ee, baka soti. Ngondo esusu eka kɔpi ebu; Mwako mobu momea oko a suka engondo.

¹⁹Nahɔjɔkɔ koko bo, BaYisalaele baicingea? Ehele mεnε Mose abala bo, Mbi nadi bokeja no likaka a mojɔ molikota lia lidi ngasa; Nadi bokeja no kεlε a mojɔ molikota lia lipeliti bocingea.

²⁰Ngɔngɔ jinde, Yisaya abala na eci bo, Ibaya baiduka mbi babolojai mbi; Nasabolojai ai baya baihɔjɔkɔ mbi.

²¹A mojɔ moYisalaele ko, abala bo, Mbi naninojai mɔmɔ mambi busa bosusu Ai bato balipanga baya bapeliti lisuma.

Baloma 11

BaYuda Bâhela Ngɔngɔ

¹A mojɔ momina, mbi nahɔjɔkɔ isa Njambe aloni bato bande? Pερε nongo mweka! Mbi nadi MoYisalaele mbi mεnε; nadi mwana oAbalayama, moto ohkota liBenyamina.

²Njambe alomti nongo bato bande, mojɔ bo ajeba eyou bo badi bato bande. Otaje-bakani mojɔ moElia mua modi a Misɔnɔ? Iyo anga Njambe a bodumba Yisalaele bo,

³Kumu, bawoi batɔndɔi bawε. Babuki matumbu mawε. Mbi nadikai oko mbi buki pε, na badukakani bo bawoe mbi.

⁴Njambe ko amosɔmbeja bo? Abala bo, Mbi nadikai na bato bami koto sambo baya baisumana nongo a boso boBaala.

⁵Eketa edikai koko edεye, bahɔmɔke bamonganji moNjambe.

⁶Bohɔ bomina bodi a mojɔ momonganji moNjambe, te nongo a mojɔ mobilomu. Eipeta da boa, ka monganji moNjambe moditi monganji mosoti.

⁷Cina emina edi bo? Edi bo BaYisalaele baduka mokina mojɔ, pε ko bomoboloja. Bahɔmɔke ko bamoholoja, na milema mibu batongo mipinga oko bopinga.

⁸Mosɔnɔmɔ bo, Njambe abapi mwembo mongbunguma, Miso maya mapeliti njεnε, Na matoi maya mapehti njoki, Oko a busa bu.

⁹Dawidi pongono abala bo, Kina kola ebu edae likimba na elambo ai bo, Libaku a mojɔ mobosaka, bo base ndese ebu.

¹⁰Kina miso mabu mambimbine bo bata'nε, Na ngundubaneja mikɔngɔ mibu na bosusu.

¹¹Oko boa mbi nahɔjɔkɔ isa basaka libaku bo bakwε? Pεpε nongo mweka. Njea ebohela ko ehoa ai bapakano oko a mojɔ mobokwa bobu, a bokeja bo likaka.

¹²Oko boa, isa ngondo ebɔngi a mojɔ mobokwa bobu, na isa bapakano bass lisango a mojɔ molibunga libu, esingaiti na bohula bobu!

¹³Mbi yona odi obwεnji ai bapakano, natɔndɔkɔ no bapakano bo nakumejaka elomu embi

¹⁴oko na njingo bo nakejae bato bambi BaYuda likaka, a boheleja bakina babu.

¹⁵Mojɔ bo, isa bosili bongondo bocingi na bɔbɔtɔ bobu, bohula bobu bodi boda bomɔ a tei ebagwake.

¹⁶Isa mbuma eboso edi esεnɔke, mbuma jesusu jidi jisεnɔke. Isa monjeli modi mosεnɔke, bitape bimole bidi koko bisεnɔke.

¹⁷Bikina bitape ko bikatɛndɔmɔ, na wε olive oesika okakatana na mole a esika edaka bitape bimina, odi bokatana na cina emole, na odi boss ngulu emole moolive.

¹⁸Pε bosakumeja ko na bitape bimina. Okada na jala, pε bobosa bo wε otapeaka mole; modi oko mole mua mopeaka wε.

¹⁹Odi bosɔmbeja bo, Bitape bitongo bitɛndɔmɔ bo mbi nakatane na mole.

²⁰Soti; bitape ko bitɛndɔmɔ cina epɛndɔ, na wε odi a esika ewε a mojɔ moejimeli. Pε boda na egbo a mojɔ momina; da oko na bɔ.

²¹Mojɔ bo, isa Njambe adaka na bopipo na bitape bimole mεnε, âda koko na bopipo a mojɔ mowε.

²²Toma lε bo Njambe adi na monganji, na adi na bopipo pongono. Bopipo bonde bodi ai bakwake; monganji monde ko modi ai wε, okayeyoa a monganji monde. Omiti kɔ boa, wε ôtendɔmɔ pongono.

²³Ibo pongono bakakina pɛndɔ ebu, bâkatana koko; mojɔ bo Njambe adi na ngulu bo abakatanejae koko.

²⁴Isa wε otendɔmɔ a mole moolive moesika, na okatana na mole moolive mogbie, esingaiti bitape bimole na soti! Bidi bokatana koko na mole mobitape bimina.

²⁵Baninga, mbi napalaka bo ocingeeni mojɔ mu mobombamake, osaka dani na egbo. Modi oko bo likma libondo liYisalaele lidi na miso mago, na bâda boa oko a ehole êbwana etango ebapakano.

²⁶Oko boa BaYisalaele basusu bâhela. Mossɔnɔmɔ koko boa bo, Moheleja âhula Siona A boheleja Yakobo a bobe bonde.

²⁷Imu modi mokongo môbakea mbi na bu Yana âdungeja mbi jibe jibu.

²⁸Badi na Njambe soki a njea eMwako Mopele, na mojɔ momina mobongejai no. A njea ebohɔ boNjambe ko, yo abapalaka a mojɔ mobatata babu.

²⁹Mojɔ bo Njambe akapa bipeeli, isa akabea bato, aditina dosa a mojɔ momina.

³⁰Bosoboso ino odakani na lipanga ai Njambe; edεye ko osɔkɔni monganji moNjambe mojɔ bo 'bo badi na lipanga.

³¹Ibo koko boa; badi na lipanga edεye, bo base monganji ngɔngɔ o asɔkɔ no monganji.

³²Mojɔ bo Njambe akinea bato basusu a lipanga libu, bo anejae basusu monganji monde.

³³Ee soti! Ndinda ebowei boNjambe enɔi mwɔngi momoto, na ejebeli ende pongono. Moto atahɔnɔ bokokeleja bisambi binde, na bocingea njea jinde.

³⁴Mojɔ bo, Ocingeaka mokano moNjambe nda? Molehi onde nda?

³⁵Omopa ekina epeeli nda, Bo Njambe adae na nongo ai yo?

³⁶Leka kanga losusu mènè lodi ai yo, lohelaka a mojɔ monde na losukeaka oko na nde. Ekumu ai yo na bosusu. *Amen.*

Balomia 12

Ekɔmeli eBato baMasiya

¹Baninga, mbi nangɔɔnɔkɔ̄ no oko na monganji moNjambe bo opejaeni mikuku minu ai Njambe, epeeli yena edi mɔ̄ na esɛnɔke a bosepeja Njambe. Bosakoa bua bobwani na nu oko bu.

²T'odaeni oko na ekɔmeli ebato bangondo ye. Toma dani na milema miyene bo okindoeni elimo etongo; oko boa odini bojeba bolulea boNjambe na soti, bolulea bonde bopele, bobɔngɔke na bobwanake.

³Mbi nalehaka no basusu na monganji mosɔ̄ mbi, bo moto atasakumeja yo mɛnɛ. Adi bosa'ngɛ na bolɛ, na mwɛngi moejimeli mokabaka Njambe ai moto na moto.

⁴Mokuku momoto modi na binama binɛnɛ. Ibi bisusu ko bidi na bilomu tongotongo.

⁵Iso bodi koko boa. Nongo adi so banɛnɛ, bodi mokuku momɔci a tei eMasiya, na bokatani so basusu, moto na moto.

⁶Bipeeli bisu biditi amɛci; bicingi oko na monganji moNjambe ai moto na moto. Yona odi na epeeli ebotɔndɔ mwako, abwani botɔndɔ mwako na mwɛngi monde moejimeli.

⁷Isa edi epeeli ebokɔmeja, moto adi bokɔmeja; na mokoja adi bokɔ elomu ebokoja.

⁸Molehi adi na elomu eboleha. Yona opaka bipeeli adi bopa na likabo limonganji. Yona odi na elomu a boso bobato, adi boda na bingi; na yona okɔmejaka bato na wa adi boda na sepi.

⁹Yε epaeli enu edae epaeli esoti. Dani na maneene a mojɔ mobobe; dani ko na posa engando jipele.

¹⁰Toma palanani na epaeli emoto ai mwangwa'nde; moto adi boduka ekumu emoto otongo, te ekumu ende mɛnɛ.

¹¹T'okineni oko bo bingi enu embɛ; kɔmɛni Kumu na peye eMwembo.

¹²Kinani njingo enu esepejae no. Dani na lingbangba a tei emonɔngɔ. T'ongwaeni oko bo'nga.

¹³Dani na likabo ai bato baDenga baya badi na taka; asɔni bakɛndeli bopele.

¹⁴Jongoani bato baya badingojaka no; bajongoani, pε bobasingani.

¹⁵Sepani na bato baya badi na sepi; yeani na bato baya bayeaka.

¹⁶Dani na molema momɔci. T'odaeni oko na jala a milema minu; katanani na bato baya badi na milema mititake. Pε bosakumejani na bowɛi bonu.

¹⁷Moto akakɔ no bobe, t'osɔmbejaeni oko bobe ai yo. Ləni oko mijɔ mipele pε a boso bobato basusu.

¹⁸Isa njea edi, kɔni na milema minu misusu bo otadani na mijɔ na bato batongo.

¹⁹Baninga, T'okundeni oko likundu. Kinani mijɔ misusu a kənɔ eNjambe; mojɔ bo, mosɔnɔmɔ bo, Njamhe abala bo, Likundu lidi oko ai mbi. Mbi nadi bosea ndese.

²⁰Soki ewε akada na nja, mopa dia. Akada na ekangola, monusa madiba. Okakɔ boa, odi bomokeja sɔni enεnε mεnε.

²¹T'ogbokeni oko na bobe; Gbokejani bobe ko na bopele.

Baloma 13

Lisuma ai Bakumu

¹Moto na moto abwani bosuma bakumu bakpaci, mojɔ bo edi Njambe yona opaka kpaci esusu. Makumu maya madi, masɔ kpaci ai yo.

²Oko boa, moto akakotoa kpaci emina, adi soki emokano moNjambe, na soki jimina jisamboa.

³Moto akakɔ bopele, atabanga nongo bajuji; moto ko akakɔ bohe, adi bohangā bajuji. Oko boa isa opalaka boda pε nongo bɔ a mojɔ mokumu, toma da na ekɔmeli epele, na yo adi bosepa na wε.

⁴Mojɔ bo yo adi mokɔmeli oNjambe a bokɔmeja wε. Okakɔ bobe ko, obwani bobanga, mojɔ bo juji aditi na kpaci ebowa boangasa; adi mokɔmeli oNjambe, a bodumba moto yona okɔkɔ bobe.

⁵Oko boa, moto abwani boda na lisuma, te cina ebo bomokindo, oko a mojɔ momojimo momolema monde.

⁶Oputakani koko tako a mojɔ momina. Bakumu badi bakɔmeli baNjambe, na ehole ehu esusu edi oko a elomu ebu.

⁷A mojɔ momina, kabani ai bato basusu leka lua lobwani na bu; tako ai yona osɔkɔ tako, nongo ai yona osɔkɔ nongo; lisuma ai yona obwani bɔsɔ lisuma, na ekumu ai yona obwani bɔsɔ ekumu.

Epaeli na Bosεnɔ

⁸Pε bodani na nongo ai moto, oko nongo eepaeli pε, bo opalaneni, moto na mina'nde moto. Mojɔ bo yona opalaka moto otongo asumaka Mibeko.

⁹T'ongε oko bɔɔli. T'owoe oko. T'obe oko. T'omboe oko. Mibeko mk na mibeko mitongo isa midi, midi a tei eekenge ye, Toma pala motuteano mowε o asapalaka wε mεnε.

¹⁰Epaeli t'ekoke bobe ai motuteano. Oko boa epaeli ebɔ̃ngejaka Mibeko.

¹¹Mojo motongo; ojebakani bo ehole emei, ehole ebosisoa ta hiɔ. Mojo bo, bokangɛ ehole ebanga so bojima na ehole ye, bohela bosu bobatami edɛye.

¹²Bulu bobengi bosia, na busa bobengi bohoa. Yeni so bobulɛe ngando jimodidi bo bolwae molilo mobohu.

¹³Yeni bodaе na ekɔmɛli epele ebato bay a badalaka a bohu, te na ebueli na bolangoa, isa na ndukeli na lisɔngi, isa na miano na likaka.

¹⁴Lwani oko Yesu Masiya o elwaeli enu; t'okineni oko pokiso a mojo momunu, a bogoleja posa jimunu.

Baloma 14

Bileho a Mojo moWa na Epaeli

¹Isa moto aditi mombilimake a ejimeli ende, mosɔni bopele; pε bomodumbani a mojo mongando jijimaka yo.

²Okina moto ajimaka bo abwani boyaka leka losusu; moto ko yona odi na bwɛmbu ayakaka oko njua pε.

³Moto yona oyakaka eka, abwaniti bosetoja moto yona odi na bikia. Na yona odi na bikia abwaniti bodumba moto yona oyakaka, mojo bo Njambe amojimaka.

⁴Wε nda? Wε obwani bosambeja mokɔmeli omoto otongo? Moswa'nde mɛnɛ ajebaka isa amai mema isa akwi. Adi bo'ma mema ko, mojo bo Kumu adi na ngulu bo amombilimejae.

⁵Moto omɔci alekɛ bo busa bomɔci na busa botongo masangiti; moto otongo ko alekɛ bo masu masusumadi amɛci. Moto na moto abwani bojima na sotia molema monde.

⁶Moto yona olɛkɛ bo bokina busa bodi bonɛnɛ, akɔkɔ boa na lisuma ai Kumu; yona opeliti bikia, ayakaka koko na lisuma ai Kumu, na asakoaka Njambe; yona odi na bikia, akiaka koko na lisuma ai Kumu, na asakoaka Njambe pongono.

⁷Mojo bo moto t'ahelake a mojo monde mɛnɛ pε, na moto t'agwake a mojo monde mɛnɛ pε.

⁸Adi so mɔ, hodi oko ai Kumu; na bokagwa, bodi oko ai Kumu. Oko boa, isa bodi mɔ, isa bokagwa, bodi oko ai Kumu.

⁹Yesu agwa na ahela koko oko a mojo momina, bo adae Kumu obagwake, na Kumu obato bay a badi mɔ.

¹⁰Wε ko, osambejaka mwangwao mojo moye? Osɛtojaka mwangwao mojo moye? Iso basusu bodi bo'ma a boso bomongbelɛngɔ moesambi eNjambe.

¹¹Mojo bo mosoncɔmɔ bo, Kumu abalaka bo, Mbi nadi mɔ; Bato kanga basusu mɛnɛ badi botita na magbunda a boso bombi. Bato kanga basusu mɛnɛ badi bosakoa Njambe na minɔkɔ mibu.

¹²Oko boa so basusu bodi bosɔmbeja Njambe, moto na moto a mojo monde mɛnɛ.

¹³Oko boa bobwaniti bosambejana koko; jimani oko bo obwanitini hokɔ mokina mojo mua mobwani boda libaku isa elambo anjea emwangwao.

¹⁴Mbi najebaka; najebaka na soti, oko na Kumu Yesu, bo ekia eeka ecingiti na eka mɛnɛ, oko na moto yona okiaka eka emina. Akajima bo eka emina edi na ekia, edi boa oko ai yo.

¹⁵Wε ko okayaka ekina eka, na mwangwao akada na wa a mojo momina, otasusaka koko njea eepaeli. Yesu agwea moto omina, na wε obwaniti bomobeja a mojo moeyakeli ewε.

¹⁶Isa mokina mojo mua modi mopele a miso mawε, modi mobe a miso mabato batongo, pε bokɔ mojo momina.

¹⁷Mojo bo, Bokumu BoNjambe bocingiti na boyaka na bomwaka; bodi mojo mobodongo, na bowi, na sepi, a tei eMwembo Mosenɔke.

¹⁸Moto yona okɔmɛkε Masiya a njea jmina, adi na esako epele a tei ebato, na Njambe amojimaka pongono.

¹⁹Oko boa, kinani milema misu midae oko na posa a ngando jibowi, ho bokɔmejane moto na moto.

²⁰T'obejae oko elomu eNjambe a mojo moeka eboyaka. Leka losusu lobwani na boyaka soti; endele ko, moto akasakeja bato batongo na leka loyakaka yo, akɔkɔ bobe.

²¹Okakia tito, isa okalona bomwaka vino, isa okalona mokina mojo motongo mua mobwani bosakeja mwangwao, okɔkɔ bopele.

²²Odi na ejimeli; banea ejimeli emina a tei enu na Njambe. Isa moto aditi na mokakwano a mojo mongando jijimaka yo, moto omina adi na sepi.

²³Isa moto ko adi na mokakwano a mojo moekina eka, na akayaka eka emina, asadumbaka yo mɛnɛ; mojo bo atajimaka na soti mua mokɔkɔ yo. Mojo bo, isa mokina mojo mocingiti na ejimeli, modi oko mobe.

Baloma 15

¹Iso bayo badi na ngulu bobwani bolwa mina mibato bayεmbu. Bobwaniti bokɔ oko ngando jipalaka so bɛnɛ pε.

²Moto na moto adi bokɔ̄ mua mosepejaka motuteano monde, isa modi mopele, bo amombilimejae a ejimeli ende.

³Mojɔ̄ bo Masiya aipala bo mijɔ̄ midae o apalaka yo mɛnɛ; mosɔ̄nɔmɔ̄ bo, Biloli bibu baya balolea wε bihekoi ai mhi.

⁴Bikenge bi bisusu bisɔ̄nɔmɔ̄ eyou a bokoja so, bo bodaе na njingo, mojɔ̄ bo Misɔ̄nɔ mipaka so lingbangba na eci.

⁵Yε Njambe yona opaka lingbangba na eci, akɔ̄e bo odaeni na molema momɔ̄ci, o apalaka Masiya Yesu,

⁶bo okataneni na molema momɔ̄ci, na monɔ̄kɔ̄ momɔ̄ci, a bokumeja Njambe Sange 'Kumu osu Yesu Masiya.

⁷Asɔ̄nɔni bopele a bokumeja Njambe, mojɔ̄ bo Yesu Masiya asɔ̄ no bopele.

⁸Mbi natɔ̄ndɔ̄kɔ̄ no bo Masiya adaka mokɔ̄meli oBaYisalaele bo angamejae sako jikinea Njambe batata bo jidi soti,

⁹na bo bapakano bakumejae Njambe a mojɔ̄ momonganji monde. Mosɔ̄nɔmɔ̄ boa bo, A mojɔ̄ momina, mbi nâsakoa wε a tei emakota; Nâkumeja kombe ewε na njembo.

¹⁰Abala koko bo, Ino makota, sepani na bato bande.

¹¹Na koko bo, Sakoani Kumu, mo bamakota masusu; Yε makota masusu mamosakoe.

¹²Yisaya abala koko bo, Monjeli moYisai motɔ̄bi; Iyo adi bongɔ̄ bo adae kumu omakota; Njingo emakota edabí oko ai yo.

¹³Yε Njambe onjingo alumejae no na sepi na bowi a ejimeli enu, bo njingo enu enɛnge a mojɔ̄ mongulu eMwembo Mosenɔ̄ke.

Elomu ePaulo na Mikano Minde

¹⁴Baninga, mbi najimaka na soti bo olumini na ngando jipele; odini na ejebeli engando jisusu, na obwanini bopana bilebo.

¹⁵Endele ko, mbi nasɔ̄nei no mikina mijɔ̄ na ebaeli epipo a bolɛjɛ no, mojɔ̄ bo Njambe akɔ̄ni monganji

¹⁶bo nadae mokɔ̄meli oMasiya Yesu a tei ebapakano, a elomu eMwako Mopele moNjambe. Oko boa bapakano bâda epeeli ebwanake, epeeli esenɔ̄ke, a mojɔ̄ moMwembo Mosenɔ̄ke.

¹⁷A mojɔ̄ momina, nabwani bosepa a tei eMasiya Yesu, a mojɔ̄ moelomu embi ai Njambe.

¹⁸Ebɔngiti bo nabale a mojɔ mongando jitongo, oko ngando jikɔ Njambe na mbi a bogbokeja bapakano na ebaeli, na elomu,

¹⁹na ngulu ebimbete na mindumba, na ngulu eMwembo Mosenɔke. Oko boa, abanga mbi a Yelusalema, nananganejai Mwako Mopele a makota matongo, suka oko Ililikɔ.

²⁰Mojɔ bo posa embi edaka bo natɔndœ Mwako Mopele a makota maya maipaka ka kombe eMasiya, bo nasaka yoa a diko dieyoeli-ecina emoto otongo.

²¹Mosənɔmɔ koko boa; Ibaya basɔkini mwako monde badi bone; Ibaya bakakmi mojɔ monde badi bocingea.

²²Cina edaka mbi pε bone njea a bokε oho ai no oko yena.

²³Edε-ye ko napeliti koko pokiso a makota mamina a mojɔ moelomu. Na adi mbi na posa bianga bi binεnε ebomea oho ai no,

²⁴nadi na njingo bo nanεnε na nu a njea, yana akeke mbi mɔŋɔ oho Sepania. Nâda na sepi eboyeyoa na nu mweka, na nadi na njingo bo osukejaeni mbi a njea ngɔngɔ.

²⁵Edεye ko, nakεke oho Yelusalema na bipeeli ai bato baDenga.

²⁶Mojɔ bo bato baMakedonia na baAkaya bajimi bo balɔkɔe likonja a mojɔ mobato babokwali baDenga diYelusalema.

²⁷Bakɔi mojɔ momina na sepi, mojɔ bo badi oko na nongo ai bo; isa bapakano basangoi iikabo libipeeli biMwembo a mojɔ mobu, babwani bobakɔmeja na bipeeli bileka.

²⁸Oko boa, namaka sieja mojɔ momina, na namaka bapeja bipeeli bi, nasa ko nakεe mɔŋɔ a Sepania, na nânɔ njea enu.

²⁹Najebaka bo nakadoa ai no, nadi bodoa na bojongoa boMasiya bua bonɔi.

³⁰Baninga, mbi nangɔɔnɔkɔ no a kombe eKumu osu Yesu Masiya, na epaeli eMwembo, bo okataneni na mbi a bokɔmeja mbi na ma'nga manu ai Njambe,

³¹bo nahele a mɔmɔ mabato oho Yuda bay a bapeliti nongo ejimeli, na bo bato baDenga basepe na bipeeli bitombaka mbi oho Yelusalema.

³²Na Njambe akajima nadi bodoa oho ai no na sepi, na nâhema mweka a tei enu.

³³Yε Njambe obowi adae na nu basusu. *Amen.*

Baloma 16

Njεbε na Bileho

¹Napalaka bo oseni ngene esu Poibe bopele. Iyo adi mokomeli oDenga diKenkele.

²Mo'soni yo a kombe eKumu osu, o akokô bato baDenga. Akapala bo omokomejaeni na ngando jinde, mokomejani; mojo bo yo menê adi mokomeja obato banene, na mbi menê pongono.

³Abejeni Pilisila na Akwila, bma'mbi a elomu eMasiya Yesu.

⁴Ibo bapa njupi a boheleja mbi. Mbi nasepaka na bu, na te mbi pe, oko Menga masusu mamakota matongo.

⁵Abejeni Denga dia didi a ndako ebu. Abejeni Epainetô, mina'mbi oepaeli. Iyo adi tomi eMasiya oho Asia.

⁶Abejeni Malia; yo akci elomu enene a tei enu.

⁷Abejeni Anduloniko na Yunia, baninga bambi baya badi a njango o adi mbi menê. Badi na gala epele a tei ebabwensi, na bajima Masiya oko mbi napetakinji jima.

⁸Abejeni Ampuliato, mina'mbi oepaeli a tei eKumu.

⁹Abejeni Ulubano yona okomejaka so a elomu eMasiya, na Setakusa mina'mbi oepaeli.

¹⁰Abejeni Apele yona olonga a elomu eMasiya. Abejeni bato baKumu baya badi a ndako eAlisitôbulo.

¹¹Abejeni Elodiona, moto ombi menê. Abejeni bato baKumu baya badi a denga diNalukiso.

¹²Abejeni Tulupaina na Tuluposa; badi bakomeli baKumu. Abejeni Pelesida, mwali oepaeli yona okokô elomu enene a mojo moKumu.

¹³Abejeni Lupu, mokomeli obonc oKumu; abejeni koko ngwa'nde yona odaka o ngwa'mbi menê.

¹⁴Abejeni Asunkulito, na Pelegonta, na Elume, na Patuloba, na Eluma, na baninga baya badi na bu.

¹⁵Abejeni Pilologa na Yulia, na Nele na ngene ende, na Olumpa, na bato basusu baDenga baya badi na bu.

¹⁶Abejeneni njebé na bohia boséonké. Menga masusu maMasiya malomaka no njebé.

¹⁷Baninga, mbi nangconkô no bo onganjamani a mojo mobato baya bapangoaka na basakejaka bato libaku, baya balonaka bokoja boso no; pe bopanganani na bu.

¹⁸Bato bamina batakoméke Masiya Kumu osu; badi oko babuli basopɔ jibu bɛnɛ; bakoseaka milema mibato bayembu na bibaeli bibu bipele, na poloso ebu.

¹⁹Bato basusu bajebaka mojɔ molisuma linu, na mbi nasepaka a mojɔ monu. Endele ko, napalaka bo ejebeli enu edae oko a ngando jipele; a mojɔ mobobe, dani o bana.

²⁰Njambe obowi atayeyoa a bodehε Satana na bibota binu. Yε monganji moKumu osu Yesu Masiya modae na nu.

²¹Timoteo, yona ocungi na mbi a elomu, abejɛkε no njɛbε. Lukio na Yasona na Sosipatalo yona odi bwela bombi, babejɛkε no.

²²Mbi Teleti, yona osonokɔ mokanda mu, nabejɛkε no na njɛbε eKumu.

²³Gayo yona osɔ mbi a ndako ende, na asɔ koko Denga disusu a ndako ende, yo abejɛkε no. Elasuto, mobanei olikonja lingando abejɛkε no, na Kwaluto mwangwa'su pongono.

²⁴Yε monganji moKumu osu Yesu Masiya modae na nu basusu. *Amen.*

²⁵Okina adi yona obwani bombilimeja no a Mwako Mopele moMasiya motɔndɔkɔ mbi. Mwako momina mobolojaka mojɔ mua modaka mobombamake a bobanga mɛnɛ.

²⁶Moboloi ko edεye a mojɔ momikanda misɔnɔ batɔndɔi, cina emobeko moNjambe yona odi na bosusu. Na moboloi ai bato bamakota masusu bo badea na lisuma na ejimeli.

²⁷Ekumu ai Njambe—odi na bowei oko yo pe—na bosusu, a mojɔ moyesu Masiya. *Amen.*

1 Bakolinto

1 Bakolinto 1

¹Njεbe esu Paulo yona obeama na bolulea boNjambe bo adae obwεnji oYesu Masiya, na mwangwa'su Sosotene,

²a Denga diNjambe dia didi oho Kolinto, oko bahεngεmεkε baMasiya Yesu, baya babeama bo bade basεnεke, na bato basusu baya bangaka a kombe eKumu Yesu Masiya a bisika na bisika. Adi Kumu obu na Kumu osu pongono.

³Ye monganji na bowi boNjambe Sangwa 'su na Kumu Yesu Masiya bodaе na nu.

Eleho a Mojɔ moBokatana

⁴Mbi nasepaka na Njambe bihole bisusu a mojɔ momonganji mosɔ no a tei eMasiya Yesu.

⁵Osoni bojongoa bonεnε mεnε a tei ende, na bεtε ebotoñdɔ, na ejebeli esusu pongono;

⁶mojɔ bo Mwako moMasiya modaka mopipo a tei enu.

⁷A mojɔ momina, pεpε nongo ekina epeeli eMwembo ebwani botaka na nu. Ombakani oko bodoa boKumu osu Yesu Masiya.

⁸Iyo adi bombihmeja no oko a suka mεnε, bo otadani na mojɔ nongo momɔci, a busa boKumu osu Yesu Masiya.

⁹Njambe atakputoja nongo sako ende. Edi oko yo, yona obea no a bokatana na Mwana'nde Yesu Masiya Kumu osu.

¹⁰Baninga, mbi nangɔnɔkɔ no basusu a kombe eKumu osu Yesu Masiya bo odaeni na monɔkɔ momɔci. T'odaeni oko na miano a tei enu. Katanani ko na molema momɔci na mokano momɔci.

¹¹Baninga, bato baKuloe bajebajai mbi bo odini na miano.

¹²Cina emina edi bo, ebaeli emoto na moto a tei enu edi bo, Mbi moto oPaulo, isa, Mbi moto oApolo, isa, Mbi moto oPεtεlo, isa, Mbi moto oMasiya.

¹³Masiya adi na bobɔtɔ? Paulo agwea no a mole-mobokea? Obati-samani a kombe ePaulo?

¹⁴Mbi nadi na sepi mojɔ bo nabatisa oko Kulusipo na Gayo pε, te nongo bato batongo a tei enu.

¹⁵Oko boa moto abwaniti bobala bo abatisama a kombe embi

¹⁶Nabatisa bato bandako eSetepana pongono; nitajeba isa nabatisa okina otongo.

¹⁷Mojo bo Masiya ailoma mbi a bobatisa; aloma mbi a botondō Mwako Mopele, te na bête ebobala, bo mole-mobokea moMasiya mosaka da eka engasa, pεpε ngulu.

Bowei boNjambe na Bowei boBato

¹⁸Mojo bo mwako momole-mobokea modi oko ebalabala ai bato bay a badi a njea ebogwa; modi ngulu eNjambe ko ai so bay a bahelaka.

¹⁹Mosonmō bo, Mbi nâgegeaneja bowei bobato babowei; Nâgbogboaneja gatea ebato bagatea.

²⁰Moto obowei adi jo? Mosoni omikanda adi jo? Moto okite ongondo ye adi jo? Njambe aigegeaneja bowei bongondo?

²¹Mojo bo Njambe akolea na bowei bonde, bo ngondo etamojeba na bowei bongondo; na ajima bo ahelejae bato bay a bajimaka, a mojo moyebe eetondōli eMwako Mopele.

²²BaYuda bapalaka bo banee bimbete, na BaEla badukaka bowei.

²³Iso ko botondōko Mwako moMasiya yona ogwa a mole-mobokea. Mojo momina modi oko libaku ai BaYuda, na yebe ai BaEla.

²⁴Endele ko, Masiya adi ngulu eNjambe, na bowei boNjambe, ai bato bay a babeama, isa BaYuda isa BaEla.

²⁵Mojo bo, na bogegele boNjambe na bowei bobato, bogegele boNjambe bonci na bowei; na boyembu boNjambe, na ngulu ebato, boyembu boNjambe bonci na ngulu.

²⁶Baninga, leni mbea enu benn; bato babowei bongondo ye baditi banene a tei enu, isa bato bakpaci, isa bakumu.

²⁷Njambe ahokō bato bayebe bangondo, a bosamboja bato babowei. Njambe ahokō bato bayembu bangondo, a bosamboja bato bapipo.

²⁸Njambe ahokō bato bangasangasa bay a bapeliti nongo ekumu a miso mabato, ee oko bato bangasa men, a bodumba ngando jia jidi edeye.

²⁹Oko boa, pεpε nongo moto obwani bosakumeja a boso boNjambe.

³⁰Bom̄ bonu a tei eMasiya Yesu bohulaka oko ai yo. Njambe ak̄ bo Masiya Yesu adae bowei, na bodongo, na boseno, na lisiko, a mojo mosu.

³¹Mosonmō boa bo, Moto yona osakumejaka, ye asakumejae oko a mojo moKumu.

1 Bakolinto 2

Bowei boMwako Mopele

- ¹Baninga, yana akε mbi ai no a botəndə Mwako Mopele moNjambe, naikε nongo na bεtε ekɔpi, isa na bowei.
- ²Mbi najima na molema mombi mosusu bo mtajeba mokina mojɔ motongo a tei enu, oko Yesu Masiya pε yona ogwa a mole-mobokea.
- ³Adaka mbi na nu, nadaka na bwəmbu, na bɔ, na mongongoma.
- ⁴Mwako mombi na etəndəli embi, biidaka na bikenge bibowei; bidaka oko na bimbete na ngulu eNjambe,
- ⁵bo ejimeli enu etada a bowei bobwato, oko a ngulu eNjambe.
- ⁶Iso botəndəkɔ ngando jibowei oko ai bato bapingamake. Bowei bomina ko boditi bowei bongondo ye, isa bowei bobakumu bangondo ye, baya badi bodimoa.
- ⁷Botəndəkɔ oko bowei boNjambe bobo-mbamake, bowei boselingoa yo a mojɔ moekumu esu oko a bobanga mεnε.
- ⁸Bakumu bangondo ye batacingeaka bowei bomina. Akɔkɔ bo cingea, ka baiwa Kumu oEkumu a mole-mobokea.
- ⁹Mojɔ bo mossənɔmɔ bo, Miso mainε, matoi maika, Na molema momoto moipaka lε Ngando jiselingoa Njambe a mojɔ mobato baya bamopalaka.
- ¹⁰Njambe ko ajibolojai ai so oko na Mwembo. Mojɔ bo Mwembo modukaka ngando jisu, ee ngando jiNjambe jindinda pongono.
- ¹¹Ocigeaka biləli bimoto nda? te mwembo momoto mua modi a tei ende? Oko boa koko, pεpε nongo moto ocingeaka biləli biNjambe; Mwembo moNjambe pε mobicingeaka.
- ¹²Iso bositi mwembo mongondo ye. Bosi oko Mwembo moNjambe, bo bocingee bipeeli bipa Njambe so na monganji monde.
- ¹³Iso botəndəkɔ ngando ji, oko na bibaeli bikojaka Mwembo so, te nongo na bibaeli bibowei bobato. Bokojaka ngando jiMwembo oko na kɔpi eMwembo.
- ¹⁴Moto ko, o abotama yo, t'asəke ngando jiMwembo moNjambe; jidi oko yebe pε a miso mande. Abwaniti bojicingea, mojɔ bo adi bojicingea oko na Mwembo.
- ¹⁵Moto oMwembo ko akokelejaka ngando jisu; pεpε nongo moto ko odi bomokokeleja yo.
- ¹⁶Ojebaka bolε boKumu nda bo amokojae? Iso ko bodi na bolε boMasiya.

1 Bakolinto 3

¹Baninga, yana atɔndɔ mbi mwako, naihɔnɔ bobala na nu o bato baMwembo. Mojɔ bo odakani bato bamunu; oipaka botamani a tei eMasiya.

²Mbi nanungeja no mabei pε. Naibɔkɔ no na dia mεnε, mojɔ bo oibwanani boyaka dia, na obwanakinini nongo edεye, mojɔ bo odini oko bato bamunu.

Misoo a Denga diKolinto

³Odini na likaka na misoo a tei enu; oko boa oditini bato bamunu? ekɔmeli enu, te ekɔmeli ebato bangondo?

⁴Okina onu abalaka bo, Mbi moto oPaulo; na otongo abalaka bo, Mbi moto oApolo; oko boa oditini bato bangondo?

⁵Apolo adi nda? Paulo adi nda? Badi oko bakɔmeli baNjambe a bojimeja no, mojɔ bo Kumu apaka moto na moto elomu ende.

⁶Mbi na'na ngua; Apolo amεsε madiba; edi Njambe ko yona otɔjɔ ngua.

⁷Oko boa, yona onaka ngua na yona omesekε madiba, badi oko ngasa mεnε; yona otɔjɔkɔ ngua—oko Njambe pε.

⁸Yona onaka ngua na yona omesekε madiba badi amεci; na moto na moto adi bosc ndese yena ebwani na elomu ende.

⁹Iso bodi bakɔmeli baNjambe, na bokɔkɔ elomu na nde. Ino odini gbie eNjambe; odini eyoeli endako eNjambe.

¹⁰Njambe akɔni monganji bo nadae moyoeli obowei. Natanda matai macina, na moto otongo ayoaka diko. Moto na moto yona oyoaka abwani bonganjama na eyoeli ende.

¹¹Eyoeli-ecina edi oko Yesu Masiya; pεpε nongo moto odi boyoa eyoeli-ecina etongo.

¹²Moto akayoa a diko dieyoeli emina na likonja, isa wɔlɔ, isa palata, isa na matai mayumu, isa na mele, isa na njienjie, isa na sobe, elomu emoto na moto edi boboloa a bohu,

¹³mojɔ bo Busa bomina bobo-lojabí elomu emina a bohu. Eboloabí oko na mosa. Mosa momina modi bomeka elomu emoto na moto.

¹⁴Moto akayoa diko dieyoeli ecina, na elomu ende ekayeyoa, moto omina adi bosc ndese.

¹⁵Elomu emoto ko eka'ngoa, yo adi bodika ngasa; endele ko, yo mεnε adi bohela, o moto yona ohelaka a mosa.

¹⁶Ino otajebakani bo odini tempelo eNjambe, na bo Mwembo moNjambe modi a tei enu?

¹⁷Moto akabeja tempelo eNjambe, Njambe adi bomobeja yo pongono. Moj̄ bo tempelo eNjambe edi esen̄ke, na mo odini tempelo emina.

¹⁸Moto abwaniti bosakosea. Okina onu akal̄e bo adi na bowei bongondo ye, yε apete da oko egegele, bo adae moto obowei soti.

¹⁹Moj̄ bo bowei bongondo ye bodi oko yebe a miso maNjambe. Moson̄om̄ bo, Iyo ataejaka bato babowei a poloso ebu bεnε.

²⁰Na moson̄om̄ koko bo. Kumu ajebaka bo bilεli bibato babowei bidi oko bilεli bingasa.

²¹A moj̄ momina, moto abwaniti bosakumeja na bato; moj̄ bo ngando jesusu jidi ai no,

²²isa Paulo, isa Apolo, isa Kepa, isa ngondo, isa bom̄, isa bogwa, isa ehole ye, isa ehole yena ekεkε adoe; jesusu jidi oko ai no;

²³na 'no bεnε odini ai Masiya, na Masiya ai Njambe.

1 Bakolinto 4

¹Iso bodi oko bakom̄eli baMasiya, na babanei bangando jibo-mbamake jiNjambe; na moto akal̄e so, abwani bolε so oko boa.

²Moj̄ moboso mua mobwani na babanei, modi oko bo badae bato basoti mεnε.

³Mbi nakasamba na nu, isa na esambi ebato, pε moj̄; na nitasambejaka mij̄ mimbi mεnε.

⁴Nongo nakal̄e bo naditi na moj̄, nitalonga a moj̄ momina, cina bo Kumu yo mεnε asambejaka mbi.

⁵Oko boa, pε bosambejani oko ehole ebwanakini. Kumu akadoa, yo adi bomeja ngando jibombamake jimodidi a bohu, na adi boboloja ndungu jimilema mibato. A ehole emina, moto na moto adi boss̄ ndese ende ai Njambe.

⁶Baninga, mbi nabali na nu ngando Jimina o monde, a moj̄ mosu na Apolo, bo okoeni na ekoaneli esu, na bo odaeni na lisuma a Mis̄on̄. Obwanitini bokumeja okina osu na bolona yona otongo.

⁷Wε mεnε oditi na bato batongo amεci? Opeli ekina eka yena edi wε pε boss̄? Oko boa, isa oes̄ oko boss̄, osakumejaka moj̄ moye o moto yona ois̄ epeeli emina?

⁸Ino ko ogolini. Okonjini makonja. Okweini a bokumu bonu no bənə, te nongo na sn. Posa embi edi oko bo odaeni bakumu soti, bo so bokumee na nu.

⁹Mbi nalekə bo Njambe adejai so babwənji ngəngə jibato basusu, o bato baya bahəngəmə a bogwa; mojɔ bo bodi o makou pε a mojɔ mongondo, na babwənji badiko, na bato pongono.

¹⁰Iso bodi oko bigegele a mojɔ moMasiya. Ino ko odini na bowεi a tei eMasiya! Iso bodi bayεmbu; mo ko odini bapipo! Ino odini na ekumu; iso ko bosamboi.

¹¹Iso bogwaka nja, na bodi na ekangola oko edεye. Bodı mbundu, bodingoaka, bodi oko bakendeli pε, pεpε ngando.

¹²Bokɔkɔ elomu epipo na mɔmɔ masu bənə. Bato bakasinga so, iso bobajongoaka. Bakadingoja so, bodi oko bogo. Bakatangola so, iso bodi oko na ebaeli eepaeli.

¹³Bodi oko bɔnɔ engondo; bodi edεye oko leka lobodumba pε.

¹⁴Nasɔneaka no ngando jiji, te a bokeja no sɔni, oko a boleha no o bana bambi baepaeli.

¹⁵Nongo okadani na bakoja koto domi a tei eMasiya, sangwa'nu adi oko omɔci pε. Mojɔ bo mbi nabota no na Mwako Mopele a tei eMasiya.

¹⁶Oko boa nangɔnɔkɔ no bo okoaneni na mbi.

¹⁷A mojɔ momina, nalomei no Timoteo, mwana 'mbi oepaeli na lisuma a tei eKumu. Iyo adi bolεjε no ekɔmeli embi a tei eMasiya, yena ekojaka mbi a Menga masusu a bisika bisusu.

¹⁸Bakina banu ko basakumejaka; balekə bo nitadoa ai no.

¹⁹Kumu ko akajima, nitayeyoa a bodoa ai no; nasa ko najebe isa bato bamina baegbo badi na ngulu, isa badi oko na bibaeli pε.

²⁰Mojɔ bo Bokumu boNjambe bodi mojɔ mongulu, te bibaeli.

²¹Opalakani bo? Opalakani bo nadoe ai no na pimbo, isa na epaeli, na molema moyεmbu?

1 Bakolinto 5

Mijɔ Mibe a Denga diKolinto

¹Bato babalaka bo bɔɔli bodi a tei enu. Nongo bapakano bataje-baka bɔɔli bomina, bo moto adae na mwali osangwa'nde.

²Ino odini na egbo, na obwanini boyea bio a mojɔ momina. Enɔi na bopele bo odongejaeni ai no moto yona okɔkɔ mojɔ momina.

³Mokuku mombi moditi oho adi no; mwembo mombi ko modi na nu. Na mbi, o moto yona odi a tei enu, nasambejai moto yona okɔ mojɔ momina, a kombe eKumu Yesu.

⁴Okaboleani likita, mwembo mombi modi boda na nu, na ngulu eKumu osu Yesu,

⁵hɛngɛni moto omina ai Satana a mojɔ mohogwa bomunu, bo mwembo monde mohele a Busa boKumu.

⁶Ino obwanitini bosakumeja. Otajebakani bo eketa ekɛke elipetu edi bohekoja mitɛkɛ misusu oko lipetu?

⁷Dumbani lipetu liyou, bo odaeni molembɛ moyene, pɛpɛ nongo lipetu a tei enu. Mojɔ bo, Mwana-Bata osu oKola-eBonɔ agwa, oko Masiya yo mɛnɛ.

⁸A mojɔ momina, kinani so boyake Kola na molembɛ mua mopoliti lipetu, molembɛ mobosənɔ na mosoti, te nongo na lipetu liyou, lipetu lilisoki na libobe.

⁹Nasɔnea no a mokanda mombi bo otapanganani na bato balisɔngi.

¹⁰Cina emina editi bo obambaeni bato balisɔngi bangondo ye, na bato bambengea, na bato baliba, na bato babole. Ekada boa, ka odini bodonga a ngondo oko bodonga.

¹¹Mbi nasɔnea no bo otapanganani na moto oDenga yona odi na lisɔngi, isa mbengea, isa moto obole, isa moto oebaeli ebe, isa moto obolangoa, isa mobi. Obwanitini boyaka dia na moto yona odi na bikɔmeli bimina.

¹²A mojɔ mobato batongo baya badi sokolu, moditi mojɔ mombi a bosambeja bato bamina. Endele ko, obwanini bosambeja baya badi a tei eDenga.

¹³Njambe asambejaka baya badi a sokolu. Dongejani moto mobe yona odi a tei enu.

1 Bakolinto 6

Bisambi a tei eBato baDenga

¹Okina onu akada na mwangwa 'nde mojɔ, abwani boleneja mojɔ oko na bato baDenga, te nongo na bapakano.

²Otajebakani bo bato baDenga badi bosambeja ngondo? Oko boa, isa ngondo edi bosamba na nu, ino obwanitini bolena mijɔ mikɛkɛlɛkɛ?

³Otaje-bakani bo so bodi bosambeja babwɛnji-baDiko? esingaiti mijɔ mingondo ye!

⁴Oko boa, isa odini na mijɔ mimina, omisambejakani na bato baya badi ngasa mɛnɛ a miso maDenga mojɔ moye?

⁵Mbi nabalaka boa a bokeja no sɔni. Moto omɔci obowei ataboloa a tei enu yona obwani bolena mijɔ mibato baDenga?

⁶Moto na moto ko akɛke na mwangwa'nde a esambi, ee, esambi ebato bayo badi pɛ bojima Njambe.

⁷Moto akakɛ a esambi na mwangwa 'nde, mojɔ momina modi mobe. Enɔi na bopele bo moto adingoe, na bo abungejae likonja linde.

⁸Ino bɛnɛ ko okɔkɔni bobe, na okoseakani baninga banu bɛnɛ.

⁹Otajebakani bo bato babe batasangoa Bokumu boNjambe? T'opanganeni; bato balisɔngi bato babole, bato babɔɔli, bimwalimwali, bibamibami,

¹⁰babi, bato bambengea, bato babolangoa, babosambolu, na mibɛngɔ, batasangoa nongo Bokumu boNjambe.

¹¹Bakina banu badaka boa; osənoani ko, ohɛngemɛni ai Njambe, na odini na lilonga, a kombe eKumu Yesu Masiya na a Mwembo moNjambe osu.

¹²Mbi nabwani bokɔ ngando jesusu. Ngando jesusu ko jibɔngiti na mbi. Nabwani bokɔ ngando jesusu; endele ko, nitajimaka bo nagboke na ekina ngando.

¹³Dia didi a mojɔ mosɔpɔ, na sɔpɔ edi a mojɔ modia. Njambe ko adi bosieja sɔpɔ na dia pongono. Mokuku moditi a mojɔ molisɔngi. Modi oko a mojɔ moKumu, na Kumu adi Kumu omokuku.

¹⁴Njambe angɔjɔ Kumu a bogwa, na adi bongɔjɔ so pongono na ngulu ende.

¹⁵Otajebakani bo mikuku minu midi binama biMasiya? Natombe binama biMasiya bo nabicingee na mwali obɔɔli? Pepe nongo mweka!

¹⁶Otajebakani bo yona okatani na mwali obɔɔli adi na nde mokuku momɔci? Mojɔ bo, mosɔnɔmɔ bo, Ibo babae bâda munu momɔci.

¹⁷Moto ko akakatana na Kumu, ibo babae badi mwembo momɔci.

¹⁸Toma gbeseani bɔɔli. Bobe botongo bokɔkɔ moto bocingiti na mokuku; moto ko yona ongɛke bɔɔli akɔkɔ bobo a mokuku monde mɛnɛ.

¹⁹Otajebakani bo mikuku minu midi tempelo eMwembo Mosenɔke; mojɔ bo Mwembo Mosenɔke modi a tei enu? Omosɔni ai Njambe.

²⁰Oditni baswa banu bɛnɛ, mojɔ bo osikoamani na bobuno bonɛnɛ. A mojɔ momina, toma bakeani Njambe kumu omikuku minu.

1 Bakolinto 7

Mahɔjɔ maBaKolinto

¹A mojɔ mongando jisɔnea no mbi—bopele bo moto atabɛnjee nongo mwali.

²Endele ko, momi abwani boda na mwali onde mene, na mwali abwani boda na muma'nde mene, a bogbesea boɔli.

³Momi abwani bobakea mwali onde mene bokonde, na mwali abwani bokɔ̄ boa na muma'nde.

⁴Mojɔ̄ bo, mwali aditi moswa omokuku monde mene; muma'nde adi moswa omokuku momwali. Muma'nde koko boa; aditi moswa omokuku monde mene; moswa omokuku monde, oko mwali onde.

⁵Momi abwaniti bobule mwali onde, na mwali abwaniti bobule muma'nde. Okakɔ̄ni boa bo osahengéeni a mojɔ̄ moho'nga ekina ehole, kɔ̄ni oko na mojimo mobasusu babae. Mojɔ̄ momina mokasia ko, siejani ekia emina, bo Satana asaka meka no, na otahɔ̄nɔkɔ̄ni bogbokeja posa jinu.

⁶Mojɔ̄ mobali mbi modi oko eleho, te mobeko.

⁷Posa embi edi bo bato basusu bade o adi mbi mene. Moto na moto ko asɔ̄kɔ̄ libondo linde ai Njambe; okina ekɔ̄meli emɔ̄ci, otongo ekɔ̄meli etongo.

⁸Eleho embi ai bandengi, na ai bali babogwa, edi bo bayeyoe o adi mbi mene.

⁹Bamiti hɔ̄nɔ̄ bosabekoa ko, babwani bolongana. Na bolongana, na posa a tei enu o mosa, enɔ̄i na bopele oko bolo ngana.

¹⁰A mojɔ̄ mobato baya balongani, mobeko modumbaka mbi moditi mombi mene, modi oko mobeko moKumu; modi bo mwali atadonga ai muma'nde.

¹¹Isa adongi ko, adi boyeyoa oko mondengi, isa adi bosɔ̄mbɔ̄ ai muma'nde. Na momi koko boa; abwaniti bodonga ai mwali onde.

¹²Eleho embi ai bato batongo, te eleho eKumu, edi oko ye; isa moto oDenga adi na mwali yona odi pε bojima Njambe, na apalaka bo adae na muma'nde, momi omina abwaniti bomodongeja.

¹³Isa mwali adi na momi yona odi pε bojima Njambe, na momi omina apalaka bo adae muma'nde, mwali omina abwamti bomolona.

¹⁴Mojɔ̄ bo momi yona odi pε bojima Njambe akatani na bojongoa bomwali onde; na mwali yona odi pε bojima Njambe akatani na bojongoa bomuma'nde. Emiti da boa, o bana banu bade bana basɔ̄ni, te nongo bana baya bahengemε ai Njambe.

¹⁵Isa momi, isa mwali, yona odi pε bojima Njambe apalaka adonge, yε adonge. Ekada boa, moto oDenga, isa momi isa mwali, aditi na mbɔ̄ci. Mojɔ̄ bo Njambe abea so bo bodea na bowi.

¹⁶Wε mwali otajebaka bo obwani boheleja muma'we? Na wε momi, otajebaka bo obwani boheleja mwali owε?

¹⁷Moto na moto adi bosusa njea emonejaka Kumu. Isa Njambe abea moto a ekina ekɔmeli, ye adae oko na ekɔmeli emina. Mobeko mombi a Menga masusu modi boa.

¹⁸Isa balenea moto ganda oko Njambe aipaka mobea, abwaniti bodongeja bimbete bibolena. Na moto akabeama yana adi yo oko na mwea, abwaniti bolenama ganda.

¹⁹Mojo bo, bolena boganda bodi eka engasa, na mwea modi koko eka engasa. Mojo mosoti modi oko lisuma a mibeko miNjambe.

²⁰Moto na moto adi boyeyoa o adi yo a ehole embea ende.

²¹Isa odaka mobuli yana abeama wε, pε mojo. Okanε njea ebosɔmi ko, t'okputoe oko.

²²Kumu akabea moto yona odi mobuli, moto omina adi na bosɔmi boKumu. Na Kumu akabea moto yona odi sɔmi, moto omina adi mobuli oMasiya.

²³Ino osikoamani na lisiko linεnε. T'odaeni oko babuli babato.

²⁴Baninga, Njambe akabea moto, ye ayeyoe o adaka yo yana abeama yo.

²⁵Naditi na mobeko moKumu a mojo mobandengi. Mbi ko nadi na bolε bombi mεnε, na obwanini bojima mbi, mojo bo Kumu akɔni monganji.

²⁶Mbi nalekε bo moto abwani boyeyoa o adi yo edεye, mojo bo masu ma madi na minɔngɔ.

²⁷Okatani na mwali? Pε boduka njea ebobɔtɔ. Odi mondengi? Pε boduka mwali.

²⁸Momi ko akalongana, atakɔkɔ nongo bobe. Na moseka akalongana, atakɔkɔ nongo bobe. Bato bamina ko badi bone jɔɔlɔ a ngondo ye, na mbi napalaka bo nahelejae no a jɔɔlɔ emina.

²⁹Banninga, cina emojɔ mobalaka mbi edi bo masu masu maditi manεnε. A mojɔ momina, baya badi na bali babwani boda na ekɔmeli ebato baya bapeliti bali.

³⁰Bato baya bayeaka bio babwani boda o bato baya baditi na bio. Bato baya badi na sepi babwani boda o bato baya baditi na sepi. Baya basombaka leka babwani boda o bato baya bapeliti eka.

³¹Bayá badi na bilomu bingondo babwani boda o bato baya babɔtɔnɔ na ngondo, mojo bo ngando jingondo ye jisiaka oko bosia.

³²Mbi nitapalaka bo odaeni na mokakwano. Mondengi adi na bolε oko a ngando jiKumu, bo asepejae Kumu.

³³Momi ko, yona odi na mwali, adi na bolε a ngando jingondo ye, bo asepejae mwali onde.

³⁴Mojo momwali obolongana, na mwali yona odi mondengi, modi koko boa; baditi ameci. Mwali yona opeliti momi, adi na bole a ngando jiKumu, bo mokuku monde na mwembo monde midae mihengemekai Kumu. Mwali ko yona odi na momi, adi na bole a ngando jingondo ye, bo asepejae muma'nde.

³⁵Nabalaka boa a bokomeja no, te a bobindaneja no, bo ekomeli enu ebonge, na bo okataneni na Kumu na milema minu misusu.

³⁶Okina momi ko yona opandi mwali, akale bo ekomeli ende ai mwali omina ebongiti, mojo bo posa jinde jigbasoi, babwani bolongana. Mojo mokada boa, yes akoe o apalaka yo, atakokongo nongo bobe.

³⁷Moto ko akada na ngulu a molema monde, na abwani bosabekeaboga bo atagboka na posa jinde jimokuku, na andi ngapa bo atalongana na mwali omina, akokongo bopele.

³⁸Oko boa, yona olonganaka na mwali opanda yo akokongo bopele, na yona odi pε bolongana akokongo bopele menε.

³⁹Mwali omoto akatani na muma'nde oko a bogwa bomuma'nde. Muma'nde ko akagwa âcingoama ai yo; na akapala bo alongane na okina momi otongo, pε mojo—a tei eKumu ko.

⁴⁰Bole bombi menε bodi bo enɔi na bopele akayeyoa o adi yo. Na naleke bo nadi na Mwembo moNjambe.

1 Bakolinto 8

Masiko ai Banjambe baBokosea

¹A mojo momasiko mapejaka bato a bilimo, bojebaka so basusu cina emina. Ejebeli ko ehuulejaka moto na egho; epaeli ko embilimejaka.

²Moto akale bo adi na ekina ejebeli, ajebakini na soti.

³Moto ko akapala Njambe, Njambe ajebaka moto omina.

⁴Oko boa, a mojo moboyaka tito bamasiko mabilimo, bojebaka bo elimo edi eka engasa menε a ngondo ye. Njambe adi oko omɔci pε, pεpε okina otongo.

⁵Nongo bakabakea kombe banjambe ai bakina, isa oho Diko isa ya nase—na banjambe badi banenε, na bakumu koko banenε—

⁶ai so ko, Njambe adi oko omɔci pε, oko Njambe Sango. Leka losusu lohulaka ai yo, na so bodi oko ai yo. Na Kumu adi oko omɔci pε, oko Yesu Masiya. Leka losusu lodi a mojo monde, na so bodi a mojo monde.

⁷Bato basusu ko bapeliti ejebeli emina. Bakina bato baya balandoa na bilimo, bayakaka leka lomina na bole a masiko mabilimo, na milema mibu miyembu mikokɔ mabai.

⁸Lilonga lisu a boso boNjambe liditi mojɔ modia. Botalonga a mojɔ moboyaka, na bota-beha na ekia.

⁹Ino ko haya bayakaka dia dimina, toma nganja mani bo ekɔmeli enu etasakeja bayembu libaku.

¹⁰Wε moto yona odi na ejebeli emijɔ,—moto otongo yona odi moyembu akanε wε yana adi wε a boyaka a tei etempelo ebilimo, otalindaka moto omina yona odi na molema moyembu a boyaka masiko mabilimo pongono?

¹¹Oko boa, moto yona moyembu, oko mwangwao mεnε, adi bobeha a mojɔ moejebeli ewε; na Masiya agwea moto omina.

¹²Okabejani baninga boa na okababenejani a milema mibu miyembu, okɔkɔni bobe ai Masiya yo mεnε.

¹³A mojɔ momina, mbi nakasakeja mwangwa'mbi na boyaka, nadi bokia tito na bosusu, bo nitasakeja mwangwa'mbi libaku.

1 Bakolinto 9

Paulo Asalongejaka a Mojɔ moElomu Ende

¹Mbi naditi sɔmi? Mbi naditi obwεnji? Nane Yesu Kumu osu? Elomu embi a tei eKumu, te no bεnε?

²Isa batongo bataji-maka bo nadi obwεnji, nadi obwεnji ai no, mojɔ bo odini embete bo Kumu apani elomu eobwεnji.

³Bosɔmbeja bombi ai baya basambejaka mbi bodi oko bu.

⁴Iso bobwaniti boyaka na bomwaka?

⁵Iso bokapala, bobwamti bɔsɔ mwali oejeimeli bo bodale na nde o akɔkɔ babwεnji batongo, na bananango baKumu, na Kepa pongono?

⁶Adi so babae pε, so na Balanaba, pεpε kpaci a boko boa?

⁷Soda adi boke a bila, na pε moto bomobɔkɔ? Moto aka'na mole, atayaka mbuma jimole momina? Mobanei obata atamwaka mabεi mabata?

⁸Nabalaka mojɔ momina na kpaci emoto pε? Pεpε. Mojɔ momina moditi a Mibeko?

⁹Mojɔ bo, mosɔnɔmɔ a Mibeko miMose bo, T'okande oko ebombo engɔmbɔ yona ondaka ndongo. Adi Njambe na bole oko ai ngɔmbɔ pε?

¹⁰Atabalaka boa a mojɔ mosu pongono? Ee, mosɔnɔmɔ a mojɔ mosu; mojɔ bo moto yona oliaka gbie, adi boha na njingo, na yona ondaka ndongo, adi bonda na njingo ebɔɔ libondo.

¹¹Boka'na dona dingando jiMwembo a tei enu, bobwamti bɔɔ libondo lileka lonu?

¹²Isa ojimakani bo bakina batongo bakɔe na nu boa, esingaiti so! Iso ko boikɔkɔ boa, pεrε nongo mweka. Bodingoaka oko bodingoa bo botabindaneja Mwako Mopele moMasiya.

¹³Otajebakani bo bato baya bakɔkɔ elomu etempelo bayakaka leka lotempelo, na baya bakɔkɔ elomu elitumbu limasiko basɔkɔ libondo limasiko.

¹⁴Oko boa, Kumu abekea bo baya batɔndɔkɔ Mwako Mopele badi bɔɔ libondo libu lileka a mojɔ moMwako Mopele.

¹⁵Mbi ko, nongo adaka mbi na kpaci ebokɔ boa, naidaka nongo na ekɔmeli emina; na nitasɔnɔkɔ ngando jmina na njingo bo nadæ na kpaci emina. Mbi nasakumejaka na ekɔmeli emina, na najimi bo nadi bopeta gwa, bo moto asaka katoa ekumu emina ai mbi.

¹⁶Atɔndɔkɔ mbi Mwako Mopele, nitasaku-mejaka na mojɔ momina, mojɔ bo nalindamaka a botɔndɔ Mwako Mopele. Namiti tɔndɔ Mwako Mopele nadi boda na monɔngɔ monɛnɛ a molema mombi.

¹⁷Nakakɔ mojɔ momina na bolulea bombi mɛnɛ, nasɔkɔ ndese. Nakakɔ boa ko a mojɔ mobolulea bua boditi bolulea bombi mɛnɛ, cina edi bo nasi elomu emina bo naekɔe.

¹⁸Na ndese embi edi bo? Edi oko bo, nongo adi mbi na kpaci a bɔɔ likonja a mojɔ moetɔndeli embi, natɔndɔkɔ Mwako Mopele boangasa, pe bɔɔ nongo likonja.

¹⁹Mbi naditi mobuli omoto. Endelete ko, nasapika mobuli obato basusu bo nadihe bato banɛnɛ.

²⁰Nadi MoYuda ai Bayuda, bo nalɛnge BaYuda. Nadi moto yona osumaka Mibeko ai bato baya basumaka Mibeko, bo nalɛnge bato baya basumaka Mibeko. (Mbi mɛnɛ ko naditi cina jiMibeko.)

²¹A mojɔ mobato baya bapeliti Mibeko, nadi o moto yona opeliti Mibeko, (te nongo bo naditi cina jiMibeko miNjambe; nadi cina jiMibeko miMasiya) bo nalɛnge bato baya bapeliti Mibeko.

²²Nadi moyɛmbu ai bayɛmbu, bo nalɛnge bayɛmbu. Nadi tungu jisusu ai bato basusu bo nameke njea jisusu a boheleja bakina bato.

²³Nakəkə boa a mojə moMwako Mopele, bo nadae na libondo limbi a elomu emina.

²⁴Otajebakani bo bato bakapota mbambano, bapotaka bo basusu? yona osoko ndese ko, oko omoci pe. Oko boa toma potani a bosso ndese.

²⁵Moto na moto yona oselingoaka a mojɔ mombambano asumaka bikia. Ibo bakɔkɔ boa bo base likongo lingasa lia lidi bogwa; iso ko bokɔkɔ a mojɔ molikongo lia lidi boyeyoa oko an bosusu.

²⁶A mojɔ momina, mbi napotaka bojo, te epotapota. Na'naka boma na soti te na busubusu.

²⁷Nadingojaka na nagbokejaka mokuku mombi, bo nasaka samboe, mbi yona otendo Mwako Mopele ai bato, batongo.

1 Bakolinto 10

¹Baningga, mbi napalaka bo ojebeni bo batata basu basusu badaka a cina eevembi, na bo basusu bang a niea emadiba-mamukwa.

²Ibo basusu babatisama a tei eevembi, na a tei emadiba-mamukwa, ai Mose.

³Ibo basusu bayaka dia dimɔci dimwembo.

⁴na bamwaka 'bo basusu emwakeli emoci emwembo. Mojo bo bamwaka a litai limwembo lia libasusaka, na litai limina lidaka oko Masiya.

⁵Njambe ko aisepa na hanene habuu, na bagwa a lisoibe.

⁶Ngando jimina jidi bileho ai so, ho hotada na posa jibe o adaka ho.

⁷T'odaeni oko basakoi babilimo o adaka bakina babu; mosɔnɔmɔ̄ boa bo, Bato bada na mbondo a boyaka na homwaka. Na bangɔ a bobua ngɔmɔ̄.

⁸Bobwaniti boda na lisɔŋgi o adaka bakina babu, na bagwa Busa bomɔci bato koto licinda-na-iisato

⁹Bobwaniti hodingea Kumui o ake hakina habui na ni*z* habawa

¹⁰Bobwaniti boda na manungunungu o adaka bakma babu, na obwenji-obogwa ahawa.

¹¹Ngando jimina jidoa ai bato bamina o bileho; jisɔnɔmɔ ko a bokoja so bayahadi a ehole ye esuka.

¹²A mojɔ momina, moto na moto yona odingaka bo adi mombilimake, abwani honganiama bo asaka kwa.

¹³Ino onekinini bomeka bua bonci ngulu enu. Njambe t'akputojake sako jinde, na yo atajima bo odaeni na bomeka bua bonci ngulu enu; mojɔ bo bomeka bokadoa ai no, yo adi bopa no njea ebohela, bo ohɔneni bomeka bomina.

Ekɔmeli Ebato baMasiya

¹⁴A mojɔ momina baninga, toma gbeseani bosakoa bobilimo.

¹⁵Nabalaka na bato babowei. Leni no bɛnɛ mojɔ mobalaka mbi.

¹⁶Kɔpɔ ejongoaka so, te bokatana bosu na makia maMasiya? Molembɛ mobukaka so, te bokatana bosu na mokuku moMasiya?

¹⁷Molembɛ modi momɔci; oko boa, nongo adi so banɛnɛ, bodi oko mokuku momɔci, mojɔ bo so basusu bosɔkɔ libondo limolembɛ momɔci.

¹⁸Leni ekɔmeli eYisalaele; baya bayakaka masiko malitumbu bakatani na litumbu.

¹⁹Nitabalaka bo masiko mabilimo madi na cina, isa bo elimo edi eka.

²⁰Pερε; cina ebalaka mbi edi bo bapakano bakapa masiko, bamapaka a miembɔ mibe, te nongo ai Njambe. Mbi nitapalaka bo okataneni na miembɔ mibe.

²¹Obwanitini bomwaka kɔpɔ eKumu, na kɔpɔ emiembo mibe pongono. Obwanitini bosɔ libondo a mesa maKumu, na a mesa mamiembo mibe pongono.

²²Iso bodi bokeja Njambe likaka? Iso bomonci na ngulu?

²³Nakapala, nabwani bokɔ ngando jesusu; ngando jesusu ko jibɔngiti. Nakapala, nabwani bokɔ ngando jesusu; ngando jesusu ko jitabɔngejaka.

²⁴Moto abwaniti bokɔ ngando jipalaka yo mɛnɛ, oko ngando jia jikɔmejaka moto otongo.

²⁵Yakani leka losusu longejekε bato a esanjo; pε bodani na mokakwano a mojɔ momina.

²⁶Mojɔ bo ngondo esusu mɛnɛ edi ai Kumu, na leka losusu lua lodi a ngondo pongono.

²⁷Moto yona oditi na ejimeli akabea no a boyaka, na okakeni, yakani leka losusu loneaka yo no; pε bodani na mokakwano a mojɔ momina.

²⁸Okina moto ko akabala na nu bo, Iye edi tito emasiko; t'oyakeni oko, mojɔ bo moto omina ajebajai wε. Mojɔ momina modi mojɔ momolema monde, te monu.

²⁹Molema momoto otongo modi boneja mbi mua mobwani na mbi?

³⁰Nakajongoa dia, na nakayaka, okina adi bolemoa na mbi mojɔ bo nalijongoaka?

³¹Cina edi bo, okayakani isa okamwakani, isa okakɔni mokina mojɔ motongo, kɔni mijɔ misusu a bokumeja Njambe.

³²T'osakejaeni oko bato batongo libaku, isa BaYuda, isa BaEla, isa bato baDenga diNjambe.

³³Mbi mɛnɛ nakengaka bosepeja bato basusu na ngando jesusu jikɔkɔ mbi, bo bahele; te nakɔke a mojɔ mombi mɛnɛ, oko a mojɔ mobato batongo banɛnɛ.

1 Bakolinto 11

Likita liDenga

¹Ikoanani na mbi o akoanaka mbi na Masiya.

²Nasakoaka no mojɔ bo olɛkɛni mbi bihole bisusu, na otabosakani ngando jikoja mbi no.

³Endele ko, napalaka bo ocingeeni bo Masiya adi molo momoto; molo momwali modi oko muma'nde; na Njambe adi molo moMasiya.

⁴Moto aka'nga, isa akatɔndɔ mwako na egbala a molo, asambojaka molo monde.

⁵Mwali ko aka'nga, isa akatɔndɔ mwako, na apeliti eka a molo, asambojaka molo monde; ekɔmeli ende ebwani na yena emwali, bamaka nwɛ swe jinde.

⁶Mwali amiti lwa eka a molo, abwani bolena swe jinde. Na isa edi sɔni ai mwali a bolena isa a bonwɛ swe jinde, yɛ akunde molo monde.

⁷Momi ko abwaniti bokunda molo monde cina bo yo adi elimo na ekumu eNjambe; mwali ko adi ekumu emomi.

⁸Mojɔ bo momi aimana ai mwali; mwali ko amana ai momi.

⁹Na momi aikɔmɔ a mojɔ momwali; mwali ko akɔmɔ a mojɔ motni.

¹⁰A mojɔ momina, mwali abwani bolwa a molo embete ekpacı emomi, a mojɔ moba-bwɛnji.

¹¹A tei eKumu ko, mwali t'adake yo buki; acingi oko na momi. Na momi pongono t'adake yo buki; acingi oko na mwali.

¹²Mwali amana ai momi; edɛye mwali abotaka momi; na leka losusu lohulaka ai Njambe.

¹³Leni no bɛnɛ; Mwali aka'nga Njambe, pɛ bopeta lwa eka a molo, mojɔ momina mobɔngi?

¹⁴Ekɔmeli ebato basusu etakojaka no bo momi akada na swe jiyai, edi sɔni.

¹⁵Mwali ko akada na swe jiyai, jidi oko ekumu ende. Mojɔ bo yo asɔ swe jamina a bosakunda.

¹⁶Isa okina moto ko adi na kite, so boditi na ekina ekɔmeli etongo, isa Menga maNjambe.

Kola eKumu

¹⁷Nadi na eleho a bopa no, na mtasakoa no; mojɔ bo matitana manu matakɔmejaka no; mabejaka no oko bobeja.

¹⁸Mojɔ moboso oko mu; mbi na'kaka bo odini na misoo a matitana manu maDenga, na mbi najimaka mweka bo mojɔ momina modi soti.

¹⁹Odini mabondo-mabondo soti; oko boa bato basoti badi boboloa a tei enu.

²⁰Okatitanani, otayakani nongo Kola eKumu.

²¹Mojɔ bo, yana ayakaka no, moto na moto ayakaka mia mande mɛnɛ; na okina adi ngasa na otongo alangoi.

²²Boni! opelitini ndako jinu bɛnɛ a mojɔ moboyaka na bomwaka? Osambojakani Denga diNjambe, na okejakani bato babokwali sɔni. Nâbala na nu bo? Nâsakoa no? Pεpε nongo mweka.

²³Mojɔ bo mbi nasɔ oko ai Kumu mua mopeja mbi no, bo Kumu Yesu atomba molɛmbɛ na bulu bokabama yo;

²⁴ajongoa, abuka molɛmbɛ, na abala bo, Imu modi mokuku mombi mua mobukei a mojɔ monu. Kɔni boa bo osalɛjeni ai mbi.

²⁵Ama bo sieja boyaka, yo ami tomba oko kɔpɔ pongono, na abala bo, Kɔpɔ ye edi Mokongo Moyene momakia mambi. Kɔni boa, bihole hisusu himwakaka no, bo osalɛjeni ai mbi.

²⁶Mojɔ bo, bihole bisusu biyakaka no molɛmbɛ mu, na bimwakaka no kɔpɔ ye, otɔndɔkɔni mwako mobogwa boKumu oko a bodoa bonde koko.

²⁷A mojɔ momina, moto akayaka molɛmbɛ mu, isa akamwaka kɔpɔ ye eKumu, na yo pε bobɔngɔ, adi na lindo jimokuku na jimakia maKumu.

²⁸Yε moto asakokelejae yo mɛnɛ, asa ko ayake molɛmbɛ na amwake kɔpɔ.

²⁹Mojɔ bo, moto akayaka na akamwaka, pε ko bombetea mokuku moKumu, ayakaka na amwakaka bodumba bonde mɛnɛ.

³⁰A mojɔ momina, bakina banu banɛnɛ badi na bwɛmbu, na bapekaka, na bakma bahwɛkɛ hiɔ.

³¹Bokasasambeja na soti, botasamba.

³²Endele ko, bokasamba, bodi bossɔ mokindo ai Kumu, bo botasamboa na ngondo.

³³Oko boa baninga, okatitanani a mojɔ moboyaka, ambanani.

³⁴Okina onu akada na nja, yε ayake a ndako ende mεnε, bo botitana bonu botasamboa. Nadi bokolea ngando jitongo oko namaka doa mbi mεnε.

1 Bakolinto 12

Bipeeli biMwembo

¹Baninga, mbi napalaka bo ocingeeni mojɔ mobipeeli bimwembo.

²Yana adaka no bapakano, ojebakani bo ojimani bo bato balabojae no a bosakoa banjambe-babokosea baya badi oko bimimi.

³A mojɔ momina, napalaka bo ocingeeni bo Mwembo moNjambe mokabaleja moto, moto omina atahɔnɔ bosinga Yesu. Na moto amiti da na Mwembo Mosenɔke, atahɔnɔ bobala bo Yesu adi Kumu.

⁴Bipeeli bidi tungu-tungu, Mwembo ko modi oko momɔci pε.

⁵Bilomu pongono bidi tungu-tungu, Kumu ko adi oko omɔci.

⁶Na njea jibokɔ na elomu jidi tungu-tungu, Njambe ko yona okɔkɔ ngando jisusu ai bato basusu adi oko omɔci.

⁷Moto na moto asɔkɔ epeeli ende eMwembo a bokɔmeja bato basusu.

⁸Okina asɔkɔ ebaeli ebowi a Mwembo, na otongo asɔkɔ ebaeli eejebeli a Mwembo momina.

⁹Okina asɔkɔ ejimeli a Mwembo, na otongo asɔkɔ epeeli ebosengoa a Mwembo momina.

¹⁰Okina asɔkɔ epeeli a bokɔ mindumba, na otongo asɔkɔ epeeli a botɔndɔ mwako moNjambe. Okina asɔkɔ epeeli a bombetea miembo, na otongo asɔkɔ epeeli ekɔpi jitongo-tongo, na otongo koko a'kaka kɔpi jitongo-tongo.

¹¹Mwembo ko mua mokɔkɔ ngando jisusu na okabaka ai moto na moto libondo lipalaka yo, modi oko Mwembo momɔci pε.

¹²Mokuku modi eka emɔci, binama ko bidi binεnε. Na binama bisusu, nongo bikada binεnε, bikɔkɔ oko mokuku momɔci. Modi oko boa na Masiya.

¹³Mojɔ bo bobatisama so basusu a Mwembo momɔci bo bodaе mokuku momɔci, isa BaYuda, isa BaEla, isa babuli, isa basɔmi; na bomwaka so basusu na Mwembo momɔci.

¹⁴Mojo bo, mokuku moditi elembo emoci pe; modi na bilembo binene.

¹⁵Nongo ebota ekabala bo, Mbi nacingiti na mokuku mojo bo naditi ebɔ, ebaeli emina etadongeja ebota a mokuku.

¹⁶Na litoi likabala bo, Mbi nacingiti na mokuku mojo bo mbi naditi diso, ebaeli emina etadongeja litoi a mokuku.

¹⁷Mokuku mosusu mokada oko diso pe, njoki edi boda jo? Mokuku mosusu mokada oko litoi pe, soo edi boda jo?

¹⁸Njambe akolea binama bisusu a mokuku, emoci-emoci, o apalaka yo.

¹⁹Binama bisusu bikada oko emoci pe, mokuku modi boda jo?

²⁰Oko boa binama bidi bmene, mokuku ko oko omoci.

²¹Diso libwaniti bobala na ebɔ bo, Mbi nitajebaka we. Na molo mobwaniti bobala na mako bo, Mbi nitaje-baka no.

²²Pερε nongo mweka; binama bimokuku bia bidi oko ngasa a miso mabato bibongejaka mokuku.

²³Na bokumejaka binama bia bilke so oko ngasa; na bia bidi bibombamake bidi na ekumu enene, na bia bidi a bohu bibwani boa.

²⁴Njambe abongeja mokuku mosusu, bo yena edi ngasa edae na ekumu.

²⁵A mojo momina, mokuku moperiti bobɔtɔ, na binama bisusu bikomejanaka.

²⁶Enama emoci ekapeka, bisusu bitongo bipekaka pongono.

²⁷Ino odini mokuku moMasiya, odini binama binde, moto na moto oko enama.

²⁸Njambe akolea bato a tei eDenga, boso oko babwenji, na ngɔngɔ jibu oko batɔndɔi. Bacingi na bu ngɔngɔ oko bakoja, na bato bay a bakɔkɔ mindumba, bato basengo, bakomeja, bato babilomu, bato bakɔpi jinene.

²⁹Basusu badi babwenji? Basusu badi batɔndɔi? Basusu badi bakoja? Basusu bakɔkɔ mindumba?

³⁰Basusu badi basengoi? Basusu babalaka na kɔpi jinene? Basusu bakaka kɔpi jinene?

³¹Dukani oko bipeeli bia binɔi na bopele. Mbi ko nadi boneja no njea yena enɔi na bopele.

1 Bakolinto 13

Epaeli

¹Nongo nakabala na kɔpi jibato, isa jibabwənji-badiko, na napeliti epaeli, nadi oko doi dieboli, isa lisanga lia likɔkɔ nge-nge-nge.

²Namiti da na epaeli, nadi eka engasa mɛnɛ; nongo nakatɔndɔ mwako, nongo nakacingea ngando jibombamake, nongo nakada na ejebeli esusu, nongo nakada na ejimeli enɛnɛ a bodongeja meno minɛnɛnɛ, pɛ mojɔ.

³Namiti da na epaeli, nitabɔngɔ nongo mweka, nongo nakakaba leka lombi a bobɔkɔ bato babokwali, isa nakapa mokuku mombi a botumbama, pɛ mojɔ.

⁴Epaeli edi na lingbangba; edi koko na likabo. Epaeli editi na likaka, na editi na egbo.

⁵Epaeli editi na jala, na editi na ebaeli ebe. Epaeli editi na bolɛ a ngando jinde mɛnɛ pɛ, editi na misuba, na editi na kɛlɛ.

⁶Epaeli etasepaka a mojɔ mobobe, esepaka oko a mojɔ mobopele pɛ.

⁷Epaeli ehɔnɔkɔ ngando jesusu; ejimaka ngando jesusu; edi na njingo a tei engando jesusu, na edi na lingbangba a tei engando jesusu.

⁸Epaeli epeliti nongo suka. Bitɔndeli bidi bosia, na kɔpi jiyeɔ bogo; ejebeli edi bodimoa.

⁹Mojɔ bo ejebeli esu edi oko ekenge pɛ, na etɔndeli esu edi oko ekenge pɛ;

¹⁰Mua mobɔngi kanga mosusu ko mokaboloa, mua modi oko ekenge pɛ mɔisia.

¹¹Amaka mbi da yɛngɛ, nadaka na ebaeli eyɛngɛ, bolɛ bombi bodaka bolɛ boyɛngɛ, molema mombi modaka molema moyɛngɛ; ama mbi kandoa ko, nami kina oko ngando jibwɛngɛ.

¹²Bonjaka edɛye oko a talatala na ehindahindi; bô'nɛnɛ ko ngɔngɔ o bato bayɛleni. Edɛye, ejebeli embi edi oko ekenge pɛ; a busa bomina ko, nadi bojeba o ajebamaka mbi.

¹³Edɛye ngando jijisato jidikai, oko ejimeli, na njingo, na epaeli; yena enɔi jesusu ko edi oko epaeli.

1 Bakolinto 14

Epeeli eKɔpi na Epeeli eBotɔndɔ

¹Bakeani milema minu a epaeli. Dani na posa a bipeeli bimwembo, bou oko epeeli ebotɔndɔ.

²Moto yona otɔndɔkɔ na kɔpi etongo atabalaka na bato, abalaka oko na Njambe. Bato bata-mocingeaka mojɔ bo abalaka ngando jibombamake.

³Moto ko yona otɔndɔkɔ mwako, abalaka na bato bo abalehe, abakɔmejae, na agɔmbejae milema mibu.

⁴Moto akabala na kɔpi etongo asapingejaka oko yo mɛnɛ pɛ; yona ko otɔndɔkɔ mwako, apingejaka Denga.

⁵Mbi napalaka bo obaleni no basusu na kɔpi jitongo, bou oko bo otɔndɔeni mwako. Moto akabala na kɔpi jitongo, pɛ ko bojebeja Denga cina emina, atakɔmeja Denga. Oko boa yona otɔndɔkɔ mwako adi boso bonde.

⁶Baninga, mbi nakadoa ai no a bobala na kɔpi jitongo, pɛ ko botɔndɔ na eleho, na bokoja, na boboloja, nadi bokɔmeja no soti?

⁷Leka logo lodi na doi, o adi polongo na ebumba. Bomiti bɔteja ko doi dimina, odi bocingea ebomeli eleka lomina nda?

⁸Doi limondule limiti da na bohu, odi boselingoa a mojɔ mobila nda?

⁹Mojɔ monu modi koko boa; okabalani mojɔ na kɔpi etongo yena edi bato pɛ bo'ka, pɛpɛ nongo moto odi bocingea mojɔ mobalaka no, mojɔ bo obalakani oko bibalabala pɛ.

¹⁰Kɔpi jidi a ngondo jinɛnɛ mɛnɛ, na jisusu jidi na cina.

¹¹Moto ko akabala na ekina kɔpi, na mbi pɛ bo'ka kɔpi emina, mbi nadi boda MoDɔkɔ a miso mamoto yona obalaka, na yo adi boda MoDɔkɔ a miso mambi.

¹²Oko boa, ino okamboani bipeeli bimwembo, dani oko na posa ebipeeli bia bidi bokɔmeja Denga na soti.

¹³A mojɔ momina, moto yona obalaka na kɔpi etongo abwani bo'nga bo ase epeeli ebocingea bato cina.

¹⁴Mojɔ bo naka'nga na kɔpi etongo, modi mwembo mombi mua mongaka, molema mombi motacingea eka.

¹⁵Oko boa nâkɔ bo? Nadi bonga na mwembo, na nadi bonga na bocingea pongono. Nadi bo'mba njembo na mwembo, na nadi bo'mba njembo na bocingea pongono.

¹⁶Okajongoa na mwembo, moto otongo yona oditi na epeeli ewɛ, atajeba nongo bojima *Amen* yana ajongoaka wɛ, mojɔ bo atacingeaka mojɔ mobalaka wɛ.

¹⁷Wɛ mɛnɛ ojongoaka soti, yona otongo ko atapinga nongo a ejimeli ende.

¹⁸Mbi nasakoaka Njambe mojɔ bo nanci no basusu na bɛtɛ ekɔpi.

¹⁹Endele ko, na bobala bikenge koto domi na kɔpi etongo, na bikenge bitano na bocingea bombi mɛnɛ, napalaka gbo oko bo nabale na Denga oko na bikenge bitano na bocingea.

²⁰Baninga, t'odaeni oko na bocingea bobengé. Dani na ekomeli ebana bakéke a mojɔ mobobe; dani basuku ko a mojɔ mobocingea.

²¹Mosɔnɔmɔ a Mibeko bo, Kumu abali bo, Nongo nakaloma bwɛnji bombi ai bato ba, Na bato bakɔpi jitongo, Isa na minɔkɔ miDɔkɔ, Batahokea mbi nongo mweka.

²²Oko boa, kɔpi jidi oko embete ai bato bay a bajimakini, te nongo ai bato baejimeli. Etɔndeli ko emwako moNjambe edi embete ai bay a bajimaka, te nongo ai bay a bajimakini.

²³A mojɔ momina, okadani na botitana boDenga disusu, na bato basusu bakabala na kɔpi jitongo-tongo, bato batongo bakakwea, bato bay a badi pε bojima, batale bo odini na malale?

²⁴Bato basusu ko bakatɔndɔ mwako, na moto otongo akakwea yona odi pε bojima isa pε bocingea, adi bosɔ eleho ehu basusu, na adi bosamba na bu basusu.

²⁵Ngando jibombamake jimolema monde jidi boboloa a bohu, adi bokwa a boso bonde a bosakoa Njambe, na adi bojima bo Njambe adi a tei enu soti.

²⁶Cina emina edi bo, baninga? Edi oko bo, omakatitanani, isa okina onu adi na eyembo, na otongo adi na eleho, isa na bokoja, isa na kɔpi, isa na bocingea, kɔni ngando jesusu a bopingeja ejimeli enu.

²⁷A mojɔ mobobala na kɔpi etongo, bopele bo bato babale omɔciomɔci, bato babae isa basato, suka oko bato basato.

²⁸Endele ko, isa moto yona okaka kɔpi Jimina aditi, bopele bo bade oko bogo a botitana, na babale na milema mibu bɛnɛ, na Njambe.

²⁹Batɔndɔi babae isa basato badi bobala, na bato batongo badi bohokea.

³⁰Njambe ko akaboloja mokina mojɔ ai okina moto otongo yona odi ena, motɔndɔi yona obalaka adi boyεyɔ bogo.

³¹Obwanini botɔndɔ mwako no basusu, moto omɔci-omɔci; oko boa bato basusu badi bokoa, na badi bopinga a ejimeli ebu.

³²Miembo mibatɔndɔi misumaka batɔndɔi.

³³Mojɔ bo Njambe adi Njambe obowi, te nongo Njambe oyikiyiki. Ekɔmeli eMenga masusu mabato baejimeli

³⁴edi bo bali bade bogo a makita maDenga. Baditi na kpaci ebobala, na Mibeko mibalaka bo badi boda na lisuma.

³⁵Isa bapalaka bojeba mokina mojɔ, badi bohɔjɔ bami babu a ndako jibu bɛnɛ; mojɔ bo ebɔngiti na mwali bo abale a likita liDenga.

³⁶Boni! Ebaeli eNjambe eboloi boso ai no? emei oko ai no pε?

³⁷Isa okina onu alekɛ bo adi motɔndɔi, isa bo adi na bipeeli bimwembo, adi bocingea bo mijɔ misɔnei mbi no midi mobeko moKumu.

³⁸Moto yona odi pε bojeba, ye adae oko a libumi.

³⁹Oko boa baninga, bakeani milema minu a botɔndɔ mwako moNjambe. Pε bosiani bato a bobala na kɔpi jitongo.

⁴⁰Kɔni ngando jesusu oko na bowi na bongebɛnɛ.

1 Bakolinto 15

Bongɔ boBagwake

¹Baninga, mbi napalaka bo nabale na nu a mojɔ moMwako Mopele motɔndɔ mbi no. Ojimani mwako momina, na odini bambihmake a mwako momina.

²Ohelani oko na mwako momina, okamobaneani bopele—omiti kɔni boa, ejimeli enu edi eka engasa.

³Mojɔ bo mbi napa no mojɔ monɛnɛ mosɔ mbi, bo Masiya agwa a mojɔ mojibe jisu, o abalaka Misɔnɔ.

⁴Bamopusea, na angɔ koko a busa bomasato, o abalaka Misɔnɔ.

⁵Kepa amonɛ, na babwɛnji domi-na-babae pongono.

⁶Ekina ehole etongo, baninga mikama mitano bamonɛ; bakina babu banɛnɛ badi oko busa bu, na bakina babu bagwa.

⁷Yakobo amonɛ ngɔngɔ, na babwɛnji basusu pongono.

⁸Suka mɛnɛ, asaboloja ai mbi pongono, mbi mwana obongoa.

⁹Mojɔ bo mbi nadi ngɔngɔ jibabwɛnji basusu. Nabɔngiti boso kombe eobwɛnji, mojɔ bo nadingoja Denga diNjambe.

¹⁰Nadi adi mbi, oko a mojɔ momonganji moNjambe, na monganji monde ai mbi moinama. Mbi nakɔ elomu epipo, pεpε nongo okina obu obwana na mbi a njea emina; mbi mɛnɛ ko naikɔ, oko monganji moNjambe mua modi ai mbi.

¹¹Oko boa, mwako motɔndɔkɔ so basusu, isa mbi mɛnɛ, isa bo batongo, modi oko boa, na ojimani oko na mu.

¹²Atɔndɔkɔ so bo Masiya angɔ a bogwa, bakina banu babalaka bo bagwake batangɔ mojɔ moye?

¹³Isa bagwake batango, Masiya yo mene aingo a bogwa.

¹⁴Na isa Masiya aingo a bogwa, mwako motondok so modi eka engasa, na ejimeli enu enami oko bonama.

¹⁵Isa bagwake batango, so bodi batati babokosea, mojo bo botataka bo Njambe angogo Masiya a bogwa.

¹⁶Isa bagwake batango, ka Masiya yo mene aingo.

¹⁷Isa Masiya aingo, ejimeli enu edi eka engasa, na odini oko a jibe jinu.

¹⁸Na pongono, bato bay a bagwa a tei eMasiya badimoa.

¹⁹Isa njingo esu ai Masiya edi oko a mojo moehelo ye pe, bonci bato basusu na molobo.

²⁰Masiya ko anga a tei ebagwake soti, o mbuma eboso ebaya bagwa.

²¹Mojo bo bogwa bodoa na moto, na bongo bobagwake bodoa na moto pongono.

²²Basusu bagwaka na Adama; oko boa basusu basusu bombo a tei eMasiya, moto na moto a libondo linde.

²³Masiya adi o mbuma eboso, ngongong jinde oko bay a badi bato bande a bodoa bonde.

²⁴Ngongong Jimina, suka emijo misusu edoabí. A ehole emina, oko amaka gbokeja makumu masusu, kpaci jesusu, ngulu esusu, asombeljabí bokumu ai Njambe Sango.

²⁵Mojo bo yo adi boda na kpaci ebokumu, oko adi yo pe bopeta cingea bibota binde a diko disoki jinde jesusu.

²⁶Soki yena egbokabi suka mene edi oko bogwa.

²⁷Mojo bo Njambe adumba ngando jesusu a cina jibibota binde. Abalaka yo bo ngando jesusu jidi a cina jibibota binde, edi bohu mene bo yo mene yona odumba ngando ji jesusu, acingiti na ngando Jimina.

²⁸Ngando jesusu jikada a cina ende, Mwana mene adi bosuma yona odumba ngando jesusu a cina ende, bo Njambe adae ngando jesusu ai bato basusu.

²⁹Emiti da boa, cina ebatisimo ebato a mojo mobagwake edi bo? Isa bagwake batango, bato babatisamaka a mojo mobu cina eye?

³⁰Na mbi napaka njupi bihole bisusu mojo moye?

³¹Mbi nayeli bogwa tu busa; nabalaka na nu boa baninga, mojo bo odini ekumu embi a tei eMasiya Yesu Kumu osu.

³²Isa bagwake batango, mbi nana na tito babila a Epeso na ngulu embi esusu mojɔ moye? Èsɔ mbi nde? Ekada boa, bopele bo boyake na bomwake, mojɔ bo bodi bogwapuma.

³³Yε bosakoseani! Mambaci mabe mabejeka ekɔmeli epele emoto.

³⁴Sisoani, na dani na yongi epele. Yεni bokɔ bobe. Natɔndɔkɔ no, a bokeja no sɔni, bo bakina banu batajebaka nongo Njambe.

³⁵Okina moto ko adi bohɔjɔ bo, Bagwake badi bongɔ na ye? Mikuku mibu midi boda bo?

³⁶Wε egegele! Ngua jinaka wε jimiti gwa, jitato nongo.

³⁷Na jia jinaka wε jidi oko ngua, isa jindongo, isa jiekina eka etongo, te nongo mokuku mua modi bomana ngɔngɔ.

³⁸Njambe ko aepaka mokuku mopalaka yo, tu mongua oko na mokuku mua mobwani na mu.

³⁹Mikuku misusu miditi amεci. Mokina modi a mojɔ mobato, motongo a mojɔ motito, mokina motongo a mojɔ mombulu, na motongo koko a mɔjɔ moswi.

⁴⁰Mikuku midiko midi, na mikuku minase. Ekumu emikuku midiko na ekumu emikuku minase bisangiti.

⁴¹Ekumu emodika-busa na yena esonge bisangiti; na ekumu enjɔtɔ edi tungu etongo, mojɔ bo ekumu emonjɔtɔ omɔci na yena emonjɔtɔ otongo bisangiti.

⁴²Bongɔ bobagwake bodi koko boa; mokuku mosaka so ta kpɔtɔ modi mokuku mobopɔ; mua modi bongɔ a bogwa môtapɔ.

⁴³Mo puseamaka, pεpε nongo ekumu; modi bongɔ na ekumu. Mopuseamaka eka eyεmbu, modi bongɔ oko na ndangasa.

⁴⁴Mongua monaka so modi mokuku momoto; modi bongɔ oko mokuku momwembo.

⁴⁵A mojɔ momina, mosɔnɔmɔ bo, Adama, moto oboso, adaka moto obomɔ. Adama osuka adi mwembo mua mopaka bomɔ.

⁴⁶Mua momwembo moidaka boso; moto mεnε boso, mwembo ko oko ngɔngɔ.

⁴⁷Moto oboso ahula a kpɔtɔ, moto onase. Moto obabae ahula oho Diko.

⁴⁸Bato banase badi oko na elimo emoto yona onase. Bato baDiko badi na elimo emoto oDiko.

⁴⁹Adi so na elimo emoto onase, bodi boda koko na elimo emoto oDiko.

⁵⁰Baninga, mbi natɔndɔkɔ no bo mini na makia mabwaniti bosangoa Bokumu boNjambe; na eka ebopɔ ebwaniti bosangoa yena edi na bosusu.

⁵¹Hokeani! Nadi boboloja mojɔ mobombamake ai no. Iso basusu botahwε; iso basusu ko bokindoabí.

⁵²Bokindoabi so basusu bundumo, o bogbatimeja bomiso a mondule mosuka. Mojɔ bo mondule mohwiamabí, bagwake badi bongɔ na mikuku mia mibwaniti bopɔ, na so basusu bokindoabí.

⁵³Mojɔ bo mokuku mu mobopɔ modi bolwa mokuku mua mobwaniti bopɔ; na mokuku mu mobogwa, modi bolwa mokuku mua mobwaniti bogwa.

⁵⁴Mokuku mobopɔ mokalwa mokuku mua mobwaniti bopɔ, na mokuku mobogwa mokalwa mokuku mua mobwaniti bogwa, ekenge yena esɔnɔmɔ edi bongama bo, Bogwa bogboki na lilonga.

⁵⁵Wε bogwa, lilonga liwε lidi jɔ? Wε bogwa, ngɛngɛ ewε edi jɔ?

⁵⁶Ngɛngɛ ebogwa edi bobe. Ngulu ebobe edi Mibeko.

⁵⁷Yeni bosakoe Njambe yona okɔkɔ bo so bogbokejae a mojɔ moKumu osu Yesu Masiya.

⁵⁸A mojɔ momina, baninga bambi baepaeli, dani bambilimake, pε bombenɔ nongo mweka; kɔmɛni Kumu na elomu enɛnɛ masu masusu, mojɔ bo ojebakani bo elomu enu ai Kumu êtanama nongo.

1 Bakolinto 16

Bipeeli. Bileho. Njɛbɛ

¹A mojɔ mobipeeli ai bato baDenga, kɔni o akoja mbi Menga maGalatia.

²Moto na moto adi bohɛngɛ libondo lilikonja lia libwani na nde a busa boNjambe; pε bo'mbani bodoa bombi a bolɔkɔ bipeeli.

³Mbi nakamea, odini bohɔ bato, na mbi nâbapa mokanda, bo nabalome na bipeeli binu a Yelusalema.

⁴Mokabwana bo nakɛe mbi mɛnɛ, bato bamina badi bopaka mbi a njea.

⁵Namaka sieja likota liMakedonia nasa ko nadoe ai no, mojɔ bo mokano mombi modi bo nanɔe a njea eMakedonia.

⁶Isa nadi boyeyoa na nu; kako nadi bosieja edidi epio a tei enu, bo osukejaeni mbi a njea ekeke mbi.

⁷Ehole ye, nitapalaka ho nanɛnɛe na nu oko a njea pε. Kumu akajima, nadi na njingo bo nayeyoe na nu.

⁸Nadi bopeta yeyoa ko a Epeso oko a busa boDomitano,

⁹mojø bo njea enεnε na epele ehoi a boso bombi bo nakøe elomu; soki ko jidi jinεnε.

¹⁰Timoteo akamea, kɔni bo adae a tei enu o bina'nde, mojø bo akɔkɔ elomu eNjambe o akɔkɔ mbi mεnε.

¹¹Moto abwaniti bomokpεkoja. Mosukejani a njea na bowi, bo ahule ai mbi, mojø bo namo-njaka yo na baninga batongo pongono.

¹²A mojø momwangwa'su Apolo, mbi namolehi bou mεnε bo akεe na baninga oho adi no. Iyo ko apalakiti bo akεe edεye. Adi boke, akanε ehole epele.

¹³Ino, toma sεnjεlεni bopele; dani bambilimake a ejimeli enu; dani bami mεnε; dani bato bapipo.

¹⁴Kɔni bilomu binu bisusu oko na epaeli.

¹⁵Ojebakani bato baSεtεpana; baya bahekoa ai Kumu boso a likota liAkaya, oko 'bo; na badi na bingi enεnε a bokɔmeja bato ba-Denga.

¹⁶Mbi nalehaka no baninga bo odaeni na lisuma ai bato baya badi na ekɔmeli emina, na bato basusu baya babakɔmejaka, na baya bakɔkɔ elomu eNjambe.

¹⁷Nadi na sepi mojø bo Sεtεpana, na Polotunato, na Akaiko bamei jɔno; adi no bohali, bo basepejai mbi.

¹⁸Bagɔmbεjai molema mombi na milema minu pongono. Obwamni bosuma bato baya badi na ekɔmeli emina.

¹⁹Menga maMasiya oho Asia mabεjεkε no njεbε. Akwila na Pilisila, na Denga disusu dia dititanaka a ndako ebu, babεjεkε no bou a kombe eKumu.

²⁰Baninga basusu mεnε babεjεkε no njεbε. Sabεjεnεni no bεnε na njεbε esεnɔkε.

²¹Mbi Paulo nabεjεkε no njεbε ye na ebɔ embi mεnε.

²²Isa okina moto aditi na epaeli ai Kumu, yε alakejame. Yε Kumu adoe!

²³Yε monganji moKumu osu Yesu Masiya modae na nu.

²⁴Epaeli embi ai no basusu a tei eMasiya Yesu. *Amen.*

2 Bakolinto

2 Bakolinto 1

¹Njεbe esu Paulo obwεnji oMasiya Yesu a mojɔ mobolulea boNjambe, na mwangwa'mbi Timoteo, a Denga diNjambe dia didi a Kolinto, na ai bato basusu baMasiya baya badi a likota lisusu liAkaya.

²Yε monganji na bowi boNjambe Sangwa'su na Kumu Yesu Masiya bodae ai no.

Bogɔmbeja boPaulo a tei eMinɔngɔ

³Mbi nasakoaka Njambe Sange 'Kumu osu Yesu Masiya, Sango yona odi na monganji mosusu, na Njambe obogɔmbeja bosusu.

⁴Iyo agɔmbejaka so a tei eminɔngɔ misu misusu, bo so bogɔmbejae bato batongo baya badi na minɔngɔ, o agɔmbejaka Njambe so bεnε.

⁵Mojɔ bo, bokatana na Masiya a madingoa mande manεnε, bodi bosc libondo linεnε libogɔmbeja a mojɔ moMasiya.

⁶Isa so bodi na minɔngɔ, cina eminɔngɔ mimina edi bo ino oseni bogɔmbeja na mohelo. Na so bokasɔ bogɔmbeja, bodi a bogɔmbeja no, na odini bosc bogɔmbeja bomina, okadani na lingbangba a tei emadingoa, o adingoaka so.

⁷Iso bodi na njingo enεnε ai no. Bojebaka bo okaka-tanani na su a madingoa masu, odini bokatana na su koko a bogɔmbeja bosu.

⁸Baninga, iso bopalaka bo ojebeni mojɔ momonɔngɔ mone so a Asia. Iso bobukana oko bobukana na muna momonɔngɔ. Mojɔ momina monɔ ngulu esu, na boidaka na njingo ebohela.

⁹Bole bo ehole esu ebogwa emea, na mojɔ momina mohekoja ejimeli esu ai Njambe yona ongɔjɔkɔ bagwake, te nongo ai so bεnε.

¹⁰Iyo aheleja so a bogwa bua bobe; ahelejaka so koko edεye, na njingo esu edi oko ai yo bo ahelejae so a masu mangɔngɔ.

¹¹Kɔmejani so na bingeli binu, bo bato banεnε basakoe Njambe a mojɔ momonganji mosɔ so, cina ebingeli bibu.

Elomu ePaulo

¹²Iso bosepaka na mojɔ mumu; molema mosu motataka bo ekɔmeli esu a miso mabato, na a miso manu bεnε, edaka na boseñɔ na lisuma ai Njambe; te nongo na bowεi bongondo, oko na mo-nganji moNjambe.

¹³Mikanda misɔneaka so no miditi na cina etongo; midi oko na mijɔ milangaka no na micingeaka no. Nadi na njingo bo odini bocingea soti,

¹⁴o acingeaka no mweka edεye, bo obwanini bosepa a mojɔ mosu, na bo so bodi bosepa a mojɔ monu a busa boKumu Yesu.

¹⁵A mojɔ momina, mbi nadaki na njingo bo napete kε oho ai no a bohεjε sepi enu oko bohεjε.

¹⁶Mokano mombi modaka bo nancε njea enu a bokε oho Makedonia, na bohula Makedonia koko ai no, bo osukejaeni mbi a njea eYuda.

¹⁷Adaka mbi na mokano momina, nadaka na milema mibae? Mijɔ mikanaka mbi midi mijɔ mimoto ongondo? Adi mbi na minɔkɔ mibae, Ee! ee! na Pερε! pερε!

¹⁸Oko Njambe! monɔkɔ mosu ai no moditi na mojimo na bongana, Ee na Pερε.

¹⁹Iso na Silwano na Timoteo botɔndɔ no oko mwako moMwana 'Njambe, Yesu Masiya. Iyo aditi Ee na Pερε; a tei ende edi oko Eε.

²⁰Mojɔ bo sako jesusu jiNjambe jingami oko na nde; a mojɔ momina, so bokumejaka Njambe na *Amen*, a kombe ende.

²¹Njambe yo mεnε apingejaka so na no a tei eMasiya, na ahεngε so a elomu.

²²Abakea embete ende ai so, na abopa Mwembo a tei emilema misu o ndanga.

²³Mbi nabeaka Njambe o motati omolema mombi—mbi naidoa obo Kolinto, mojɔ bo naipalaka bohεjε monɔngɔ monu.

²⁴Iso ko boditi nongo bakumu baejimeli enu; bokɔkɔ elomu na nu bo odaeni na sepi, mojɔ bo odini bambilimake a ejimeli enu.

2 Bakolinto 2

¹Mbi najima a molema mombi bo nitadoa koko ai no a bokeja no wa.

²Nakakeja no wa, odi bosepeja mbi nda? oko yona odi na wa a mojɔ mombi?

³Cina emokanda mosɔnɔ mbi edaka bo bato baya babwani bosepeja mbi a bodoa bombi, batakeja mbi wa. Nale a molema mombi bo odini bosepa no basusu a mojɔ mosepi embi.

⁴Nasɔnea no boso, na monɔngɔ, na jɔɔlɔ a molema mombi, na mbisolı jinεnε, te bo nakejae no wa, oko bo ojebeni epaeli embi enεnε ai no.

⁵Isa okina moto anɔngeja batongo, ainɔngeja mbi; anɔngeja oko no bosusu, isa bakina banu banεnε. (Nitapalaka bohεjε mojɔ momina.)

⁶A mojɔ momoto omina, mokindo mossɔ yo ai banεnε banu mobwani.

⁷Edεye, obwanini bohekao a bokina mojɔ monde, na a bogɔmbeja moto omina, bo asaka dinda a monɔngɔ monde monεnε.

⁸Oko boa, mbi nangɔɔnɔkɔ no bo omonejaeni koko epaeli enu.

⁹Nasɔnea no boso a mojɔ momina, bo nameke no, a bojeba isa odini na lisuma a ngando jesusu.

¹⁰Okakineani moto, mbi namo-kineaka pongono. Mojɔ mokini mbi (isa nakini mokina mojɔ) modi a mojɔ monu, a boso boMasiya,

¹¹bo bosaka samboa na Satana; mojɔ bo bojebaka poloso ende.

¹²Iyana amea mbi a Toloa a botɔndɔ Mwako Mopele moMasiya, Kumu ahoja njea ai mbi bohu mɛnɛ.

¹³Molema mombi ko modaka na manji, cina bo nainɛ mwangwa'mbi Tito oho. A mojɔ momina, naseana na bu, na nake a Makedonia.

¹⁴Mbi nasakoaka Njambe mojɔ bo adalejaka so mondinda na Yesu, na ekumu ende, masu masusu. Na ejebeli ende enanganaka na su a bisika bisusu o soo epele.

¹⁵Mojɔ bo, so bodi ai Njambe oko soo epele eMasiya, a mojɔ mobato baya bahelaka, na baya bagwaka pongono;

¹⁶soo ebogwa ai baya bagwaka, na soo ebomɔ ai baya bahelaka. Obwani na ngando jimina nda?

¹⁷Iso botakɔkɔ bwasa na Ebaeli eNjambe, o akɔkɔ bakina. Bodi bato basoti, baya basɔ elomu emina ai Njambe. Bobalaka a boso boNjambe na a tei eMasiya.

2 Bakolinto 3

Elomu eObwɛnji

¹Iso bobengi bosakumeja koko so bɛnɛ? Iso bobwani bossɔ mikanda o asɔkɔ bakina bato, a bojebaja no ekɔmeli esu, isa mikanda minu a bojebaja bato ekɔmeli esu?

²Ino bɛnɛ odini mokanda mosu mua mosɔɔnɔmɔ a milema misu; bato basusu bamolangaka na bamojebaka.

³Na onejakani bo odini mokanda molomi Masiya na su, mua mosɔɔnɔmɔ na Mwembo moNjambe obomɔ, te nongo na madiba mamokanda; mosɔɔnɔmɔ a Inilema mibato, te a matai.

⁴Ejimeli esu edi boa ai Njambe a mojɔ moMasiya.

⁵Bobwaniti bobala bo bodi bohɔnɔ mokina mojɔ na ngulu esu bɛnɛ. Ngulu esu ecingi oko na Njambe pε,

⁶Yona obɔ̄ngeja so bo bodae bakɔ̄meli baMokongo Moyene, bakɔ̄meli baMwembo, te nongo bakɔ̄meli babi-kenge bia bisɔ̄nɔ̄mɔ̄; mojɔ̄ bo, mibeko mia misɔ̄nɔ̄mɔ̄ miwaka oko bowa; Mwembo ko mopaka bomɔ̄.

⁷Isa mojɔ̄ mobogwa mua mosɔ̄nɔ̄mɔ̄ a matai modoa na ekumu, esingaiti mua moMwembo!

⁸Mojɔ̄ bo BaYisalaele baihɔ̄nɔ̄ bonja boso boMose cina ebolailai a boso bonde, bolailai bua bodimoaka.

⁹Oko boa isa elomu ebodumba edaka na ekumu, esingaiti elomu ebolongeja!

¹⁰Soti mɛnɛ, mua modaka boso na ekumu, mopoliti koko ekumu edεye, mojɔ̄ bo ekumu etongo yena enɔ̄i emodimoja.

¹¹Mojɔ̄ bo, isa mojɔ̄ mua moidaka na boyeyoa modoa na ekumu, esingaiti mojɔ̄ mua moyeyoaka!

¹²Oko boa, adi so na njingo emina, bobalaka na nu a bohu mɛnɛ.

¹³Botakɔ̄kɔ̄ o akɔ̄ Mose yona ohua hoso bonde, bo BaYisalaele bata'ne ekumu yena edimoaka.

¹⁴Milema mibu ko miidaka nongo na njɛnɛ; nongo bakalanga Mokongo Moyou busa bu, ehuako emina edi oko, mojɔ̄ bo ehuako emina edi bodonga oko na Masiya.

¹⁵Ee, oko busa bu, bakalanga mokanda moMose, ehuako ehuaka milema mibu.

¹⁶Moto ko akahekoa ai Kumu, ehuako emina edi hodonga.

¹⁷Kumu adi oko Mwembo, na bosɔ̄nii bodi oko a esika edi Mwembo moKumu.

¹⁸Iso basusu, maso masu a bohu, bonjaka ekumu eKumu, o anjaka so a talatala, na bokindoaka a elimo ende. Bokinaka ekumu emɔ̄ci a bɔ̄sɔ̄ ekumu etongo; mojɔ̄ momina mocingi oko na Kumu yona odi Mwembo.

2 Bakolinto 4

¹Oko boa, adi so na elomu ye a mojɔ̄ momonganji moNjambe, botangwa.

²Iso boloni bikɔ̄meli bibosambolu na bipoloso; ekɔ̄meli esu editi nongo na epulu; botahékojaka Ebaeli eNjambe a ekina cina etongo. Botɔ̄ndɔ̄kɔ̄ mijɔ̄ misoti a bohu, bo bodae na lilonga a boso bobato basusu, na a boso boNjambe.

³Isa Mwako Mopele mosu modi mobombamake, mobombami oko ai bato baya bagwaka.

⁴Mojɔ̄ bo njambe ongondo ye ahua milema mibato bamina baya badi pε bojima, bo bata'ne bohu boMwako Mopele moekumu eMasiya yona odi elimo eNjambe.

⁵Iso botondok Mwako Mopele moYesu Masiya, bo yo adi Kumu, te nongo mijɔ misu bɛnɛ. Iso bɛnɛ bodi oko bakɔmeli banu a kombe eYesu.

⁶Mojɔ bo, Njambeyona obala bo, Kma bohu bohoe a tei emodidi, ahojai milema misu bohu mɛnɛ, bo apɛ bohu boejebeli eekumu eNjambe a boso boMasiya.

Njinggo ebaMasiya a tei eMinɔngɔ

⁷Ngulu yena enɔi edi ngulu eNjambe, te ngulu esu; na edi a tei esu o likonja liyumu linɛnɛ a tei eteni ehbali.

⁸Bohangami a bisika bisusu; endele ko, bobindaniti. Adi so na monɔngɔ, bodi oko na njingo.

⁹Bakanɔngeja so, botadikaka so buki pɛ. Bakadumba so nase, botagwaka.

¹⁰Iso bolwaka bogwa boYesu oko bolwa, a tei emikuku misu bihole bisusu, bo bomɔ boYesu boboloe a tei emikuku misu pongono.

¹¹Mojɔ bo, adi so mɔ, bolindoamaka a bogwa bihole bisusu a mojɔ moYesu, bo bomɔ boYesu boboloe a tei emikuku misu mibogwa.

¹²Oko boa, bogwa bokɔkɔ elomu a tei esu, bomɔ ko a tei enu.

¹³Adi so na mwembo momɔci moejimeli mua modaka na nde yona osɔnɔ bo, Mbi najimi; a mojɔ momina nabali; iso koko bojimaka na bobalaka;

¹⁴mojɔ bo bojebaka bo yona ongɔjɔ Yesu a bogwa, adi bongɔjɔ so na Yesu, na adi bokweja so na nu a boso bonde.

¹⁵Mojɔ mu mosusu modi ai no, bo monganji moNjambe mokanɛngɛ, bosakoa bodi bonɛngɛ pongono a bokumeja Njambe.

¹⁶A mojɔ momina, bota'ngwa nongo. Isa moto osu osokolu agwaka, moto yona odi a tei asɔkɔ ngulu eyene busa na busa.

¹⁷Monɔngɔ mosu mokɛkɛlɛkɛ mua moditi boyeyoa, moselingoaka ekumu enɛnɛ mɛnɛ a mojɔ mosu, ekumu yena edi boyeyoa oko na bosusu.

¹⁸Mojɔ bo, iso botanjaka ngando jinɛkɛ bato na miso; bonjaka oko ngando jia jibwaniti bo'nɛmɛ. Ngando jinɛkɛ bato na miso jitayeyoa nongo. Ngando ko jidi so pɛ bone na miso, jiyeyoaka na bosusu.

2 Bakolinto 5

¹Iso bojebaka bo diako disu diboda ya nase dikagwa, bodi boso ndako mɛnɛ ai Njambe. Etayoama na mɔmɔ mabato, na êyeyoa oko na bosusu oho Diko.

²Bobemaka a diako di, oko na posa bo bobolame atei endako esu oho Diko.

³Bokada na elwaeli emina, botada nongo mbundu.

⁴Adi so a diako di, boyeaka, na bodi na milema manji. Editi bo bopalaka bohwa mokuku mu o ahwaka so bisenja. Edi bo bopalaka bo bolwae elwaeli etongo, bo mokuku mobo gwa mokindoe bom̄.

⁵Njambe yo m̄en̄e aselingoa so a moj̄ momina, na abopa Mwembo o ndanga.

⁶Oko boa bodi na eci masu masusu. Bojebaka bo boditi na Kumu esika em̄ci yana adi so a mokuku mu.

⁷Moj̄ bo, bodalaka oko na ejimeli, te na nj̄en̄e emiso.

⁸Bodi na eci, na posa esu edi bo bodo-nge a mokuku mu, bo boda a esika edi Kumu.

⁹A moj̄ momina, budukaka njea bo bomosepejae, isa a mokuku mu, isa oho.

¹⁰Moj̄ bo, iso basusu bodi bo'ma a bohu a boso bomongbelenḡ moesambi eMasiya, bo moto na moto ase ndese ende a moj̄ mobopele, isa a moj̄ mobobe bok̄ yo a mokuku mu.

Ngulu eBabwənji

¹¹Iso bokengaka bojimeja bato, moj̄ bo bonjaka Kumu oko na b̄. Iso b̄en̄e bodi a bohu a miso maNjambe. Nadi koko na njingo bo ek̄om̄eli esu edi bohu a Inilema minu.

¹²Botasalongejaka koko ai no. Bopaka no oko njea ebosepa a moj̄ mosu. Oko boa odini bos̄nibeja ai bato baya basakumejaka a moj̄ mongando jingasa, te ngando jisoti

¹³Isa bodi na lilale, lidi a moj̄ moNjambe. Isa bodi na yongi epele, edi a moj̄ monu.

¹⁴Bosusaka njea engen̄j̄ eMasiya; moj̄ bo bojebaka na soti bo om̄ci agwea bato basusu; oko boa bato basusu bagwa.

¹⁵Na yo agwea bato basusu bo mihelo mibato baya badi m̄, mitaya da ai bo b̄en̄e, oko ai yona obagwea, yona onḡ koko a bogwa a moj̄ mobu.

¹⁶A moj̄ momina, iso botajeba koko moto a mokuku p̄e. Bojeba Masiya a mokuku boso; ed̄eye ko botamojobaka koko boa.

¹⁷Moj̄ bo, isa moto adi a tei eMasiya, adi moto moyene. Ngando jiyou jisia. Ngando jisusu jidi oko jiyene.

¹⁸Moj̄ mu mosusu mocingi na Njambe yona ohuleja so ai yo m̄en̄e a tei eMasiya, na abopa elomu ebosiili.

¹⁹Cina emina edi bo, Njambe yo m̄en̄e adaka a tei eMasiya mosili ongondo ye ai yo m̄en̄e, p̄e bolanga jibe jibu o nongo, na abopa bwənji bobosiili.

²⁰Oko boa so bodi babwənji baMasiya. Njambe alehaka no na ebaeli esu, na so bongɔɔnɔkɔ no a kombe eMasiya bo ojimeni mokongo moNjambe.

²¹Masiya aijeba nongo bobe; Njambe ko amokɔ bo adae bobe a mojɔ mosu, bo so bodaе bodongo boNjambe a tei ende.

2 Bakolinto 6

Lingbangba na Ejimeli ePaulo

¹Akɔkɔ so elomu na Njambe yo mənɛ, bongɔɔnɔkɔ no bo otasɔni monganji moNjambe ess'sɔ.

²Mojɔ bo yo abalaka bo, Mbi nahokea wε a ehole yena ebwana; Nakɔmeja wε a busa bobohela. Hokeani! ehole yena ebwani edi oko edεye. Busa bobohela bodi oko edεye.

³Iso bokɔkɔ bo botasakeja nongo moto libaku, bo elomu esu esaka samboa.

⁴Adi so bakɔmeli baNjambe, bokɔkɔ ngando jisusu bo bodaе na esako epele. Bodi na lingbangba linɛnɛ a tei eminɔngɔ, na taka, na jɔɔlɔ,

⁵na nji, na blɔkɔ, na bigbomegbome, na bilomu, na taka ehiɔ, na nja,

⁶na ekɔmeli epele, na ejebeli esoti, na eci, na monganji, na Mwembo Mosənɔke, na epaeli mənɛ,

⁷na ebaeli esoti, na ngulu eNjambe, na molilo mobila mobodongo a ebo ebami na a ebo ebali,

⁸na ekumu, na bosamboa, na bosakoa, na biloli. Adi so na mwako mosoti, babalaka bo bodi bato babokosea.

⁹Bodi na esako epele, bato ko pε bojeba so. Bodi o bagwake, endele ko bodi oko mɔ; asɔkɔ so nji, pε ko bogwa.

¹⁰Adi so na molɔbɔ, bosepaka bihole bisusu. Adi so bənɛ bato babokwali, bohεjεkε likonja libato batongo. Bodi boangasa; endele ko, leka losusu lodi oko ai so.

Eleho ePaulo ai BaKolinto

¹¹Bobalaka na nu BaKolinto na bohu mənɛ. Milema misu midi bwase ai no.

¹²Odini na esika enɛnɛ a tei emilema misu; milema minu bənɛ ko midi na sii.

¹³Oko boa, bopele bo bosɔnibɔtɔne o ekɔmeli ebɛngɛ; hojani milema minu pongono.

¹⁴T'okataneni oko na bato baya badi pε bojima Njambe, mojɔ bo bopele na bobe te bapandake nongo limbaci. Na bohu na modidi te bapandake limbaci.

¹⁵Masiya na Beliala baditi na monɔkɔ momɔci; na moto oejimeli, na moto yona opeliti ejimeli, baditi a libondo limɔci.

¹⁶Tempelo eNjambe ebɔngiti nongo na bilimo. Iso bodi tempelo eNjambe obomɔ; mojɔ bo Njambe abala bo, Mbi nâda a tei ebu, na nadala a tei ebu; Nada Njambe obu, na bo bâda bato bambi.

¹⁷A mojɔ momina, Kumu abalaka bo, Imanani a tei ebu; sahengeni; Pe bobenjeni nongo eka ebosɔtɔ, Na mbi nâsɔ no bopele.

¹⁸Mbi nâda sangwa'nu; Ino ôdani bana-bami bambi na bana-bali bambi. Kumu ongulu ebonɔ abalaka boa.

2 Bakolinto 7

¹Baninga, adi so na sako jiji, bopele bo bosasenojae a mbindo jesusu jimokuku na jimwembo, na bo bosahenge ai Njambe na soti, oko na lisuma ai yo.

²Pani so pokiso a tei emilema minu. Iso boikɔ nongo bobe ai moto. Boilaboja nongo moto. Boikɔ nongo moto poloso.

³Nita-balaka boa a bodumba no. Odini a tei emilema misu, isa bokahela, Isa bokagwa, o ami mbi bala na nu boso.

⁴Mbi najimaka no na soti mɛnɛ. Nasakumejaka bou a mojɔ monu. Molema mombi mogɔmbi soti, na sepi embi epetoaka a tei eminɔngɔ misu.

⁵Mojɔ bo, yana amea so a Makedonia, boinɛ nongo bowi; bopukaka a bisika bisusu, mane a sokolu, na bɔ a tei.

⁶Njambe ko, yona ogɔmbejaka baya badi na milema mititake, agɔmbeja so na bodoa boTito,

⁷te na bodoa bonde pε, oko a mojɔ mobogɔmbeja bossɔ yo ai no, yana atɔndɔ yo so mojɔ moposa enu enɛnɛ ai so, na wa enu, na bingi enu a mojɔ mombi. Sepi embi edaka enɛnɛ a mojɔ momina.

⁸Isa nakeja no wa na mokanda mombi, naditi na dosa a mojɔ momina. Yana anɛ mbi bo odini na wa a mojɔ momokanda mombi—eiyeyoa ko—mbi nadaka na wa pongono.

⁹Edɛye ko nasepaka, te a mojɔ mowa enu, oko cina bo wa emina ehekoja milema minu. Njambe ajima bo odaeni na wa, bo otadingoani na mojɔ mokɔ so.

¹⁰Mojɔ bo, Njambe akakeja moto wa, wa emina esukeaka oko na bohekoja bomolema a mojɔ mobohela, te nongo na bio. Suka ko ewa engondo edi oko bogwa.

¹¹Anjani bingi yena edi na nu edeye a mojɔ mowa ekeja Njambe no, na posa enu bo osalengejaeni, na kɛlɛ enu, na posa enu, na bingi enu, na bodingoa bonu. Onejaini bo oditini nongo na lindo.

¹²Oko boa, isa mbi nasɔ̄nea no mokanda, naisɔ̄nɔ a mojɔ momoto yona okɔ bobo, isa a mojɔ momoto yona osɔ̄ monɔ̄ngɔ momina; nasɔ̄nɔ bo epaeli enu enεnε ai mbi eboloe ai no bɛnɛ a boso boNjambe.

¹³Milema misu midi mihananake a mojɔ momina. Te nongo bo milema misu pε midi mihananake; sepi esu ehε bou mεnε a mojɔ mosepi eTito, mojɔ bo ohahanejani molema monde.

¹⁴Isa mbi nasakoa no ai yo, naisamboa na nu; o ami mbi bala na nu mijɔ misoti, mua mobala mbi na Tito a bosakoa no modaka soti pongono.

¹⁵Epaeli emolema monde ai no edi enεnε mεnε, mojɔ bo atabosaka bo omosɔ̄ni na lisuma na mongongoma.

¹⁶Mbi nadi na sepi, mojɔ bo naditi nongo na mokakwano a mojɔ monu.

2 Bakolinto 8

Bileho a Mojɔ moBipeeli

¹Baninga, bodi bojebeja no edeye mojɔ momonganji mokɔ Njambe O a Menga maMakedonia.

²Bamekama na monɔ̄ngɔ monεnε, na badaka na bokwali bonεnε; sepi ebu ko ehε oko hohε, na badaka na likabo linεnε mεnε.

³Mbi natɔ̄ndɔ̄kɔ na soti bo mwεngi mobipeeli bibu mobwana na mwεngi molikonja libu; ee, likonja libu liibwana na mwεngi mobipeeli bipa bo na milema mibu misusu.

⁴Bangɔ̄nɔ so na bopipo mεnε bo bobapε njea ebokɔ̄meja bato baNjambe na bipeeli.

⁵Na bakɔ̄ boa, te nongo a njea edaka so na njingo; basapa bo bɛnɛ boso ai Kumu o epeeli, na ngɔ̄ngɔ ai so, oko na bolulea boNjambe.

⁶A mojɔ momina, so bobei Tito bo asiejae elomu ye emonganji a tei enu, o ama yo banga boko.

⁷Odini na bingi a ngando jisusu, na ejimeli, na bɛtε ebobala, na ejebeli, na lingbangba, na epaeli enu ai so; oko boa toma dani na bingi a elomu ye emonganji pongono.

⁸Nitadumbaka nongo mobeko. Nangɛkε oko epaeli enu na bingi ebato batongo, isa edi epaeli esoti.

⁹Ojebakani monganji moKumu osu Yesu Masiya; nongo adaka yo konji, akindoa moto obokwali a mojɔ monu, bo bokwali bonde bopɛ no makonja manɛnɛ.

¹⁰Mbi nalehaka no oko boleha; bopele bo osejaeni mojɔ mokana no yanga yena enɔ, mojɔ mobanga no bokɔ.

¹¹Kinani bingi enu ebokɔ mojɔ momina ebwane na posa yena edaka na nu ebokɔ, oko na mwɛngi molikonja linu.

¹²Isa moto adi na posa ebopa epeeli, abwani bopa libondo lilikonja lipeli yo; isa apeliti likonja abwaniti bopa.

¹³Nitabalaka boa a bohɛje muna monu, na bokamoa muna mobato batongo, oko a bobwaneja mojɔ mosusu.

¹⁴Adi no na likonja linɛnɛ edɛye, obwanini bosieja taka ebu. Oko boa, likonja libu likahɛ, na ino okadani na taka, badi bokɔmeja no. Oko boa ôdani amɛci.

¹⁵Mosɔnɔmɔ boa bo, Iyona ondoa leka lonɛnɛ aidika na eka; Iyona ondoa oko mweka pɛ, aitaka.

¹⁶Mbi nasakoaka Njambe mojɔ bo yo alumeja molema moTito na bolɛ ai no, o adi mbi mɛnɛ.

¹⁷Ajimi mojɔ mongɔɔni mbi yo; yo mɛnɛ ko adaka na posa bo akɛe oho ai no, na adi bodoa na bingi enɛnɛ.

¹⁸Bolomaka na nde, mwangwa'su yona odi na esakoli epele a Menga masusu a mojɔ moetɔndeli ende eMwako Mopele.

¹⁹Mojɔ motongo koko—Menga mamohɔ bo adale na mbi a elomu ye emonganji, yena ekɔkɔ so na bingi enɛnɛ a bokumeja Kumu.

²⁰Bokɔkɔ boa, bo moto asaka da na mokakwano a mojɔ molikonja linɛnɛ lia lidi na su a bokaba.

²¹Bomekaka bo ngando jikɔkɔ so jibɔnge, te a miso maKumu pɛ, oko a miso mabato pongono.

²²Bomeka bingi emwangwa'su bou mɛnɛ bihole binɛnɛ; na bingi ende ehɛi oko bohɛ cina eepaeli ende ai no. A mojɔ momina bomo-lomaka na bu batongo.

²³A mojɔ moTito—yo adi mopakali ombi, na acingami na mbi a elomu enu; a mojɔ mobaninga basu, badi babwɛnji baMenga, badi ekumu eMasiya.

²⁴Oko boa nejani bato bamina epaeli enu, bo Menga manɛe epaeli emina pongono; nejani bo so botasakoaka no ngasa.

2 Bakolinto 9

¹Ebɔ̄ngiti bo nasɔ̄nee no mokanda a mojɔ̄ mobipeeli ai bato baMasiya,

²mojɔ̄ bo najebaka bingi enu. Nasakoaka no ai bato baMakedonia a mojɔ̄ momina. Nabatɔ̄ndɔ̄kɔ̄ bo moselingo moAkaya mobwana yanga yena enɔ̄; na bingi enu esisoja bato babu banɛnɛ.

³Nalomaka baninga ko bo onejaeni bo mbi naisakoa no ngasa, na bo odaeni na moselingo o ami mbi bala.

⁴Bato baMakedonia bakadoa na mbi, na bakatana no pεpε nongo moselingo, so bodi bosamboa cina eejimeli esu ai no, na no bɛnɛ pongono.

⁵A mojɔ̄ momina, mbi nalei bo nabwani bosueja baninga boso ai no. Oko boa badi bokolea bipeeli bidikeja no, Obwanini bopa bipeeli bimina na likabo mɛnɛ, te nongo na ekɔ̄mɛli etako.

⁶Pε bobosani mojɔ̄ mumu; moto aka'na dona na lima, atabuka ndongo jinɛnɛ, na moto yona onaka dona na likabo, adi bobuka ndongo jinɛnɛ.

⁷Moto abwani bopa epeeli ekani yo a molema monde, te nongo na misuba, isa na lima, mojɔ̄ bo Njambe apalaka bo moto apε epeeli ende na sepi.

⁸Na Njambe abwani bojongoa no na majongoa manɛnɛ mɛnɛ, bo otatakanı nongo eka, na bo odaeni na libondo linɛnɛ a mojɔ̄ mobilomu bisusu bipele.

⁹Mosɔ̄nɔ̄mɔ̄ bo, Akabi na monganji; api bipeeli ai babokwali. Bodongo bonde bodi boyeyoa oko na bosusu.

¹⁰Iyo, yona opaka moswa 'gbie ngua a bona, na molembε a boyaka, adi bopa no ngua na likabo linɛnɛ mɛnɛ; na adi bohejε mbuma jinu jibodongo.

¹¹Oko boa, ôjongoamani na majongoa masusu bo odaeni na likabo linɛnɛ ai bato batongo, na so bokapa bipeeli bimina ai bato batongo, badi bosakoa Njambe a mojɔ̄ momina.

¹²Mojɔ̄ bo, suka eelomu ye ebokɔ̄meja editi a bokɔ̄meja baMasiya a taka ebu pε; ekɔ̄kɔ̄ bo bato banɛnɛ basakoaka Njambe bou mɛnɛ.

¹³Baku-mejaka Njambe a mojɔ̄ mohsuma linu, na ejimeli enu, a Mwako Mopele moMasiya, na monganji mobipeeli binu ai bo bɛnɛ na ai bato basusu, yana anɛkɛ bo elomu ye ebokɔ̄meja.

¹⁴Bangaka Njambe a mojɔ̄ monu, na badi na bolε ai no bou mɛnɛ, a mojɔ̄ momonganji monɛnɛ mokɔ̄ Njambe no.

¹⁵Yeni bosakoe Njambe a mojɔ̄ moepeeli ende yena enɔ̄ kɔ̄pi emoto.

2 Bakolinto 10

Elomu ePaulo

¹Mbi Paulo, nakada a tei enu, nadi o moto-ngasa, bohali ko ko nadi na bogale; mbi nangɔɔnɔkɔ no na bowi na boyembu boMasiya.

²Nangaka no bo nakadoa oho ai no, otalindani mbi a bobala na bopipo, o akanaka mbi bobala na bakina bato baya balekε bo ekɔmeli esu edi oko ekɔmeli ebato bangondo.

³Bodi a ngondo soti; bila enaka so ko editi bila engondo.

⁴Mojɔ bo molilo mosu mobila moditi molilo mongondo; molilo momina ko modi na ngulu eNjambe a bogbokeja bisika bipipo bisoki.

⁵Bobejaka ndungu jibato, na egbo yena esakumejaka a bolona ejebeli eNjambe, na bopeaka male masusu masungu, bo madae na lisuma ai Masiya.

⁶Na lisuma linu likabwana, bodi na moselingo bo bodingojae lipanga lisusu.

⁷Ino onjakani oko boso bomoto pε? Isa okina moto ajimaka bo adi moto oMasiya, abwamti bobosa bo so bodi koko bato baMasiya, o adi yo mεnε.

⁸Nongo nakasakumeja bou mεnε a mojɔ mokpacı esɔ mbi ai Kumu, nadi bolonga, mojɔ bo apani kpaci emina a bopingeja no, te a bodumba no.

⁹Nitapalaka bo bato balεe bo nangbengbejaka no na mikanda mimbi.

¹⁰Bakina babalaka bo, Mikanda minde midi mipipo, na midi na kpaci; yo mεnε ko akada a tei esu, adi oko na boyembu, na etɔndeli ende edi ngasa mεnε.

¹¹Bato baya babalaka boa babwani bocingea bo bikenge bisu a mikanda yana adi so bohali, na bikɔmeli bisu a tei enu bidi oko amεci.

¹²Iso botapalaka bo bosa'ngεe na bo bosabwanejae na bato baya basakumejaka bo bεnε. Ibo basa'ngεke na mwεngi mobu bεnε; moto na moto anjaka okina otongo bo asa'ngεe na nde; bapeliti bocingea.

¹³Iso ko botasakumeja bou; bodi bosakumeja oko na mwεngi mopa Njambe so, na mwεngi momina momeaka ai no.

¹⁴Iso botanɔkɔ mwei mosu; elomu esu editi ai no? Omea boso ai no na Mwako Mopele moMasiya nda? te so?

¹⁵Botasakumejaka ngasa; bota-sakumejaka a mojɔ mobilomu bibato batongo; na ejimeli enu ekahe, njingo esu edi bo mwei moelomu esu a tei enu modi bokε bohali mεnε,

¹⁶bo botɔndε Mwako Mopele a makota maya manɔi no, pε bosakumeja nongo na elomu ekɔ moto otongo a esika etongo.

¹⁷Moto akapala bo asakumejae, yε akumejae oko Kumu.

¹⁸Mojo bo, Kumu akalongeja moto, moto omina adi molongi, te moto yona osalongejaka yo mene.

2 Bakolinto 11

¹Nitapalaka bo ongwaeni bogegele bombi bokba; dani na lingbangba a mojo mombi.

²Nadi na likaka a mojo monu, na likaka limina lihuli ai Njambe, mojo bo mbi nahanga no moki o moseka mosenke ai mum'a'nde omoci, bo napε no ai Masiya.

³Njø ko akosea Ewa na poloso ende; na mbi nadi na mokakwano bo milema minu misaka beha boa pongono, na osaka kinani lisuma linu lisenke ai Masiya.

⁴Mojo bo okina moto akadoa a botondø mojo moYesu otongo,—te yona otøndøkø so—osøkøni moto omina; na osøkøni mwembo motongo—te nongo mwembo mosø no; na ojimakani mokina mwako motongo—te nongo Mwako Mopele mosø no.

⁵Mbi nalekø bo naditi nongo ngøngø jibabwønji bamina bagala.

⁶Isa napeliti bøte ebobala, nadi na ejebeli; naneja no mojo momina bohu mene a ngando jisu.

⁷Mbi natøndø no Mwako Mopele moNjambe, pε ko bosø nongo likonja a mojo momina; yana asatiteja mbi boa a bokumeja no, nakø mojo mobe?

⁸Menga matongo madika ngasa mojo bo nasø likonja ai bo, bo nabwane bokømø no ngasa.

⁹Adaka mbi na taka a tei enu nainøngeja moto bo akømejae mbi, mojo bo baninga baya badonga oho Makedonia bakømejani na leka lotakaka na mbi. Mbi nakø bo nitada nongo muna ai no, na nadi bokø boa.

¹⁰Natøndøkø no na soti eMasiya mene yena edi a tei embi, bo mtakma bosakumeja na mojo momina a makota masusu maAkaya.

¹¹Mojo moye? Naditi na epaeli ai no? Njambe ajebaka bo nadi na epaeli ai no.

¹²Mbi ko nadi bokø o akøkø mbi edøye, bo nagegeanejae bato baya basakumejaka bo babwani na su.

¹³Bato bamina badi babwønji babokosea, bakømøli baepulu; badi oko na elwaeli pε ebabwønji baMasiya.

¹⁴Iso boditi na bokamoa a mojo momina, cina bo Satana yo mene adi na elwaeli eobwønji obohu.

¹⁵Oko boa, bakɔmeli bande bakakosea bo badi bakɔmeli babodongo, bobwaniti bokamoa. Suka ebu ēbwana na bikɔmeli bibu.

¹⁶Natɔndɔkɔ no koko bo pεpε nongo moto onu obwani bolε bo mbi nadi egegele. Okaleni ko bo nadi egegele, asɔni mbi o egegele, bo mbi nasakumejae pongono.

¹⁷Abalaka mbi boa, nitabalaka na ebaeli eKumu; nabalaka oko na bogegele, cina eejimeli embi bo nabwani bosakumeja.

¹⁸Bato banεnε basakumejaka na ngando jingondo; oko boa mbi koko nadi bosakumeja.

¹⁹Adi no bato babowei no bεnε, otangwani bigegele.

²⁰Moto akapika no babuli, akayaka leka lonu losusu, akasamboja no, akada na egbo, akaboma maso manu, otalonani moto omina.

²¹Nadi na sɔni a bobala na nu bo mbi naihɔnɔ bokɔ boa. Pε mojɔ; isa bato bamina basakumejaka, mbi nadi bosakumeja pongono. (Nabalaka o egegele!)

²²Isa bo badi BeEbele, mbi nadi MoEbele pongono, isa bo badi BaYisalaele, mbi nadi MoYisalaele pongono; isa bo badi bana baAbalayama, mbi nadi mwana oAbalayama pongono.

²³Isa bo badi bakɔmeli baMasiya, esingaiti mbi. (Nabalaka o moto olilale.) Mbi nakɔ bilomu bmεnε; nakwea a blɔkɔ bihole binεnε; batuani nji pε njengi; napa njupi bihole binεnε;

²⁴BaYuda batua mbi nji bihole bitano, nji domi-isato na libwa, nji domi-isato na libwa.

²⁵Batuani na miba-kake bihole bisato. Ba'la mbi matai ehole emɔci. Nasopea na masua bihole bisato. Nadaka dusu limɔci a madiba-mamukwa oko a boliko.

²⁶Nake mengɔ minεnε. Napa njupi a dua, napa koko njupi a mojɔ momibengo; napa njupi a mojɔ mobato bahkota limbi mεnε, na a mojɔ mobapakano pongono; napa njupi a ngando, na njupi a lisobe; napa njupi a madiba-mamukwa, na njupi a mojɔ mobaninga babokosea.

²⁷Nadaka na bilomu na minɔngɔ bou mεnε, pε bohwε na bulu, oko na nja, na ekangola bou mεnε, na bikia bihole binεnε, na pio na mbundu pongono.

²⁸Te nongo ngando jimina pε; nadi na muna a molema mombi tu busa a mojɔ moMenga masusu.

²⁹Okina akapeka, mbi napékaka pongono. Okina akakwa, molema mombi mongoaka oko bongoa.

³⁰Isa nadi bosakumeja, nasakumeja oko a mojɔ mongando jia jinejaka boyɛmbu bombi.

³¹Njambe, Sange 'Kumu Yesu yona odi na bojongoa oko na bosusu, ajebaka bo nitakosaka.

³²Adaka mbi oho Damaseke, *gouverneur* ongando, mokɔmeli oAleta yona odaka kumu, adukeja mbi a ngando esusu eDamaseke bo apee mbi.

³³Mbi ko nahela a mɔmɔ mande; banɔjɔ mbi a linanisa na basoloja mbi a mongba mongando a tei eekɔlɔ.

2 Bakolinto 12

¹Moto abwaniti bosakumeja; mbi ko nadi bosakumeja; nadi bobala a mojɔ monjɔti na maboloja maKumu.

²Mbi naje-baka moto a tei eMasiya yona otombama oho a Diko yena enɔi, bianga bisii edεye domi-na-binei. (Isa a mokuku, isa amana a mokuku, nitajeba; Njambe pε ajebaka.)

³Najebaka bo moto omina atombama a Paladiso. (Isa a mokuku, isa amana a mokuku mtajeba; Njambe pε ajebaka.)

⁴Na aka mijɔ mibombamake Inia mibɔngiti na moto bobala.

⁵Mbi nadi bosakumeja a mojɔ momoto omina; a mojɔ mombi mɛnɛ ko, nadi bosakumeja oko a mojɔ moboyɛmbu bombi pε.

⁶Akɔki mbi pala bo nasakumejae, ka nitada nongo egegele, mojɔ bo nabwani bobala oko ngando jisoti. Nadi bokina mojɔ momina ko; mojɔ bo mtapalaka bo bato balɛe bo nadi ekina elimo etongo, oko moto onɛkɛ bo na miso, na gala ekaka bo na matoi.

⁷Mbi mɛnɛ nasɔ njubɛ a mokuku, bo nasaka huula na egbo a mojɔ momaboloja maNjambe manɛnɛ, oko obwɛnji oSatana a bopukeja mbi, bo nasaka da na egbo.

⁸Nangɔɔnɔ Kumu bihole bisato bo aedongejae.

⁹Iyo ko abala na mbi bo, Monganji mombi mobwani na wɛ, mojɔ bo ngulu embi edi boboloa na soti oko a tei eboyɛmbu. A mojɔ momina, nadi bosakumeja na sepi mɛnɛ a mojɔ moboyɛmbu bombi, bo ngulu eMasiya edae ai mbi.

¹⁰Oko boa, nasepaka na boyɛmbu, na biloli, na minɔngɔ, na madingoa, na jɔɔlɔ, a mojɔ moMasiya. Mojɔ bo, ehole edi mbi na bwɛmbu, ehole edi mbi na ngulu oko yena.

¹¹Adi mbi na ebalabala? Ino bɛnɛ olindini mbi, no bay a babwani bojima mbi. Mojɔ bo, nongo adi mbi moto-ngasa, naditi nongo ngɔngɔ jibawenji bagala, pɛpɛ nongo mweka.

¹²Bimbete, na mindumba, na bilomu bipipo, bingameja elomu embi eobwɛnji a tei enu na lingbangba linɛnɛ.

¹³Ngando jikɔ mbi a Menga matongo, naikɔ a tei enu pongono? Mojɔ mu momɔci ko modi; naidaka muna ai no. Yɛni mbi mojɔ mu mobe!

¹⁴Hokeani; nadi na moselingo mobodoa ai no—ehole ebisato ye; na nitada nongo muna ai no. Mbi mtapalaka leka lonu, napalaka oko no bɛnɛ. Bana te babɔkɔke baboti; baboti ko babɔkɔkɔ bana babu.

¹⁵Mbi nadi bopa leka lombi losusu na sepi, na nadi bosapa mbi mɛnɛ pongono a mojɔ momiembo minu. Epaeli enu ai mbi ekatita, pɛ mojɔ; epaeli embi ai no ehɛkɛ oko bohɛ.

¹⁶Nongo okajimani bo naidaka muna ai no, obalakani bo nadi na epulu, na nakɔ mokina mojɔ mopoloso ai no.

¹⁷Yana aloma mbi bato ai no, nasɔ ekina eka enu ai bato bamina?

¹⁸Na'nga Tito bo akɛe, na naloma moninga otongo bo amopakae. Tito akonja likonja linu? Iso boidaka na ekɔmɛli emina pongono? Ekɔmɛli esu na nde te emɔci?

¹⁹Olkɔni ekoka ye bo so bosalongejaka ai no? Ngando jisusu jibalaka so baninga jidi a bopingeja no; na bojibalaka a boso boNjambe na a tei eMasiya.

²⁰Mokakwano mombi modi bo, nakamea oho ai no, nitatana no o adi mbi na njingo; na bo mbi mɛnɛ nitada o alekɛ no. Isa nadi botana no na miano, na kɛnɔ, na likaka, na misoo, na biloli, na egbo na wokowoko?

²¹Nadi na mokakwano isa Njambe adi bokeja mbi sɔni a boso bonu a bodoa bombi; isa nadi boyea bio a mojɔ mobato banɛnɛ bay a bakɔ bobo boso, na bajasakini dosa a mojɔ mobikɔmeli bibu bibosɔtɔ, na bɔɔli, na bosambolu.

2 Bakolinto 13

Bileho biSuka

¹Ehole ye edi ehole ebisato ebodoa bombi ai no. Bolena bomojɔ bobwani na batati babae isa basato.

²Mbi naleha bato bay a bakɔ bobo boso, na basusu batongo pongono; na nabale-haka koko edɛye, o akɔ mbi yana adaka mbi na nu ehole ebibae, bo mbi nakadoa, nitadoa nongo na bwɛmbu.

³Odukakani embete bo Masiya abalaka a tei embi. Iyo aditi na boyembu ai no; adi na ngulu a tei enu.

⁴Iyo agwa a mole-mobokea oko na boyembu; adi mɔ ko a mojɔ mongulu eNjambe. Iso pongono bodi bayembu a tei ende; endele ko, bodi na bomɔ bonde a mojɔ mongulu eNjambe bo bokɔe elomu a tei enu.

⁵Sakokelejani no bɛnɛ, a bojeba issa odini na ejimeli soti. Samekani no bɛnɛ. Otajebakani bo Yesu Masiya adi a tei enu? Emiti da boa, odini oko badaloi.

⁶Nadi na njingo bo odini bojeba bo iso boditi badaloi.

⁷Bongaka Njambe bo otakɔni nongo bobe, te a bolongeja so, oko bo okɔeni bopele pɛ, nongo adi so badaloi.

⁸Mojɔ bo bobwaniti boda na Soti soki; bodi oko a dɔngɔ diSoti.

⁹Iso bosepaka yana adi so na bwɛmbu, isa ino odini na bopipo. Bongaka bo obɔngeni na soti.

¹⁰Nassonɔkɔ mijɔ mi yana adi mbi bohali, bo nitabala na nu na bopipo a bodoa bombi na kpaci esɔ mbi ai Kumu a bopingeja bato, te a bodumba bato.

¹¹Mojɔ mosuka baninga,—asɔni njɛbe embi. Bɔngejani midi minu. Hokeani eleho embi. Dani na molema momɔci. Dani na bowi, na Njambe obowi lida na nu.

¹²Abɛjɛnɛni na njɛbe esenɔke.

¹³Bato basusu baDenga babɛjɛke no.

¹⁴Yε monganji moKumu Yesu Masiya, na epaeli eNjambe, na bokatana boMwembo Mosenɔke bodaε na nu basusu.

Bagalata

Bagalata 1

¹Njεbe esu Paulo obwεnji na baninga basusu baya badi na mbi, a Menga maGalatia.

²(Mbi naditi obwεnji obato; naditi na kpaci emoto, oko kpaci eYesu Masiya, na eNjambe Sango yona omongɔjɔ a bogwa.)

³Yε monganji na bowi boNjambe Sango, na boKumu osu Yesu Masiya boda ai no.

⁴Iyo asapa a mojɔ mojibe jisu bo asikoe so a ngondo ye ebe, o akana Njambe Sangwa'su.

⁵Yε ekumu edae ai yo oko na bosusu. *Amen.*

⁶Mbi nakamoaka bo oyeyoani nongo a bobule yona obea no a monganji moMasiya, na ohekoani a mokina mwako motongo

⁷Mokina Mwako Mopele motongo moditi; bakina bato ko banɔngejaka no, na bapalaka botatana Mwako Mopele moMasiya.

⁸Moto akatɔndɔ no mokina mwako motongo mua moditi Mwako Mopele motɔndɔ so no, isa mbi mεnε, isa okina obwεnji oDiko, yε moto omina asingame.

⁹Mbi natɔndɔ no eyou, na natɔndɔkɔ no koko e dεye, bo moto akatɔndɔ no mokina mwako motongo mua moditi Mwako Mopele mosɔ no, yε asingame.

¹⁰Edukaka mbi e dεye nde? —gala epele a miso mabato, isa a miso maNjambe? Mbi napalaka bo nasepejae bato soti? Akɔki mbi pala bosepeja bato pε, ka naditi nongo mokɔmeli oMasiya.

Ejimeli ePaulo na Elomu Ende

¹¹Baninga, mbi natɔndɔkɔ no bo Mwako Mopele motɔndɔkɔ mbi moditi mojɔ momoto.

¹²Naimosɔ ai moto, na moto aikojani Mwako Mopele; edi oko Yesu Masiya yona omoboloja ai mbi.

¹³Ino ojebakani moda mombi moyou yana adaka mbi na ejimeli eBaYuda; ojebakani bo nadingoja na nabeja Denga diNjambe.

¹⁴Nano kola jilikota limbi jinεnε na ejebeli engando jiBaYuda, na nadaka na bingi enεnε mεnε a mojɔ mongando jibatata.

¹⁵Njambe ko, yona ohengé mhi oko a bobotama bombi, abea mbi na monganji monde,

¹⁶na ajima bo abolojae Mwana'nde ai mbi, bo natondœ Mwako monde ai bapakano. A ehole emina, naibala nongo na moto a mojɔ momina.

¹⁷Naikε nongo a Yelusalema a bo'nene na bato baya badaka babwɛnji boso bombi. Nakε oko a Alabia, na nahula ngɔngɔ a Damaseke.

¹⁸Yana anɔ bianga bisato, nakε a Yelusalema a bo'nene na Petelo, na nayeyoa na nde masu domi-na-matano.

¹⁹Nainε babwɛnji batongo; nanε oko Yakobo pε, mwanange 'Kumu.

²⁰Mijɔ misɔneaka mbi no midi soti mene—oko Njambe!

²¹Nakε ngɔngɔ a makota maSilia na Kilikia.

²²A ehole emina, baipaka ne boso bombi a Menga maMasiya oho Yuda.

²³Bama ka oko boka pε bo, Yona onɔngeja so boso, atɔndɔkɔ e dεye mwako moejimeli emeka yo bobeja.

²⁴Na basakoa Njambe a mojɔ mombi.

Bagalata 2

Mijɔ miEjimeli na Mijɔ miMibeko

¹Yana anɔ koko bianga domi-na-binei, nasɔmbɔ koko na Balanaba a Yelusalema. Nabea Tito pongono bo apakae mbi.

²Mbi nakε mojɔ bo Njambe aboloja mokina mojɔ ai mbi, na nabalakea Mwako Mopele motɔndɔkɔ mbi a tei ebapakano. Nakɔ boa oko na basuku bakpaci pε, te na bato batongo, bo najebe isa njea ema mbi susa na yena esusaka mbi e dεye ebɔngi.

³Tito, yona odaka na mbi, adaka MoEla; ibo ko baibekea bo bamolene ganda.

⁴Bakina baninga babokosea ko bakwea kengi a tei esu na poloso, bo bakoke-lejae bosɔmi bosu bua bodi na su a tei eMasiya Yesu, a bohuleja so a libuli.

⁵Iso ko boibabokea, pεpε nongo mweka, bo Mwako Mopele moyeyoe na nu.

⁶Na baya badaka na kpaci (Gala ebu editi eka a miso mambi; Njambe anjaka bato basusu amεci,) baibakea nongo mokina mojɔ a mwako mombi.

⁷Endele ko, yana acinea 'bo bo mbi nasɔ Mwako Mopele a mojɔ mobapakano, o ama so Petelo a mojɔ mobato baejimeli eBaYuda,

⁸(Mojo bo, yona ohɔ Petelo bo adae obwɛnji ai bato baejimeli eBaYuda, ahɔ koko mbi bo nadae obwɛnji ai bapakano,)

⁹na yana ane bo monganji moNjambe mosɔ mbi, Yakobo na Petelo na Yoane, baya badaka makwe maDenga, bapa so na Balanaba ebɔ ebami ebocinama, bo so bokɛe oko ai bapakano, na bo bɛne ai BaYuda.

¹⁰Balejɛ so oko mojo momɔci, bo botabosa bato babokwali, na mbi nadaka na bingi a mojo momina.

¹¹Yana ko adoa Petelo a Antiochia, mbi nalemoa na nde na bopipo mɛnɛ; mojo bo adaka na lindo.

¹²Yakobo aloma bakina bato oho, na yana adaka bo pɛ bopeta mea, Petelo ayakaka na bapakano. Yana ko amea bato bamina, asahɛngɛ, na abɔtɔnɔ na bapakano, mojo bo abangaka BaYuda.

¹³Bakina BaYuda batongo bakɔ na poloso boa, na Balanaba yo mɛnɛ ajima ekɔmeli ebu.

¹⁴Mbi ko, yana ane mbi bo batasusaka njea esoti eMwako Mopele, nabala na Petelo yana adaka bo basusu baboli; nabala bo, Isa wɛ MoYuda okɔkɔ o akɔkɔ bapakano, te nongo ekɔmeli eBaYuda, omekaka na bopipo a bohekoja bapakano a ekɔmeli eBaYuda mojo moye?

¹⁵Nongo adi so BaYuda a mojo mobobotama bosu, te bapakano babe,

¹⁶bojebaka bo moto adi bolonga oko a mojo moejimeli ai Yesu Masiya pɛ, te nongo a mojo mobilomu biMibeko; mojo bo so bɛne bojimea Masiya Yesu bo bolonge a mojo moejimeli ai Masiya, te nongo a bilomu biMibeko; cina bo pɛpɛ nongo moto odi bolonga a mojo mobilomu biMibeko.

¹⁷Endele ko, isa bone bo so pongono bodi bato babe yana adukaka so lilonga atei eMasiya, bobe bomina bocingi na Masiya? pɛpɛ nongo mweka!

¹⁸Naka-ŋɔjɔ ngando jidumba mbi, najimaka bo nadi moto mobe.

¹⁹Mojo bo mbi nagwa a Mibeko oko cina eMibeko, bo nahele ai Njambe.

²⁰Mbi nagwa na Masiya a mole-mo-boke; endele ko nadi mɔ, te mbi mɛnɛ ko, oko Masiya yona odi mɔ a tei embi. Bomɔ bua bodi na mbi a mokuku e dɛye bodi bomɔ boejimeli, ejimeli ai Mwana oNjambe yona opala mbi na osapa a mojo mombi.

²¹Mbi nitalona monganji moNjambe, cina bo, isa lilonga licingi na Mibeko, bogwa boMasiya boditi nongo na cina.

Bagalata 3

Mibeko na Ejimeli

¹Ino BaGalatia, ino bindanga. Oseli no nda? ino baya bane na miso manu Yesu Masiya a mole-mobokea, bohu mene.

²Mbi napalaka bohɔjɔ no mojɔ momɔci pε. Osɔni Mwembo cina ebilomu biMibeko, isa cina eejimeli a Mwako Mopele?

³Adi no bindanga soti? Abanga no na Mwembo, opalakani bosukeja oko na ngando jimini?

⁴Minɔngɔ minε no midaka oko ngasa? Isa midaka ngasa soti?

⁵Iyona opaka no Mwembo na okɔkɔ mindumba a tei enu, akɔkɔ boa cina ebilomu biMibeko, isa a mojɔ moejimeli eMwako Mopele?

⁶Abalayama ajima Njambe, na ejimeli emina elangama ai yo o bodongo.

⁷Oko boa toma jebani bo baya badi na ejimeli, badi bana baAbalayama.

⁸Mosɔnɔ moneja eyou bo Njambe adi bolongeja bapakano a mojɔ moejimeli, na mojebeja Abalayama Mwako Mopele na ebaeli ye, Makota masusu mangondo mâjongoama oko na wε.

⁹Oko boa, baya badi bato baejimeli bajongoamaka na Abalayama, moto oeujimeli.

¹⁰Bato basusu baya bajimaka oko bilomu biMibeko badi cina jinakeja. Mojɔ bo mosɔnɔmɔ bo, Moto amiti suma ngando jisusu jia jisɔnɔmɔ a mokanda moMibeko adi cina jinakeja.

¹¹Pερε nongo moto odi bolonga a boso boNjambe cina eMibeko; mojɔ momina modi bohu mene. Mojɔ bo yona odi na bodongo a cina eejimeli, yo âhela.

¹²Mibeko ko micingiti na ejimeli, mojɔ bo yona okɔkɔ ngando jmina adi boda a tei engando jmina.

¹³Masiya asikoa so a esinga eMibeko, mojɔ bo yo mene adaka esinga a mojɔ mosu. Mojɔ bo mosɔnɔmɔ bo, Moto na moto yona ogwaka a mole alakejami.

¹⁴Modaka boa bo bojongoa boAbalayama boda ai bapakano oko na Masiya Yesu, na bo so bose Mwembo mua modikejama oko a cina eejimeli.

Cina eMibeko miMose

¹⁵Baninga, ye nabale na monde mobato. Moto akadikaneja leka na mokanda, nongo mokanda mokanda momoto pε, na bato bakajima mokanda momina, okina otongo atahakoa mokanda momina, ata-bakea mokina mojɔ motongo a mokanda momina.

¹⁶Oko boa, njikano jidaka ai Abalayama na ai mbota ende. Aibala bo, Ai mbota jiwε, o mbota jinεnε; oko, Ai Mbota ewε, mbota ewε emɔci, oko Masiya.

¹⁷Cina emojo mobalaka mbi edi oko ye; Njambe abakea mokongo. Mibeko ko mia midoa ngɔngɔ, yana anɔ bianga mikama minei na domi-isato, miikputoja mokongo momina, miidongeja nongo njikano.

¹⁸Mojo bo, isa lisango lidi a njea eMibeko, liditi a njea enjikano. Njambe ko alidikaneja ai Abalayama oko na njikano.

¹⁹Oko boa, mojo moMibeko modi bo? Mibeko Mibakeama a mojo mojibe, oko a ehole ebodoa bomwana omina, mwana onjikano; na babwεnji-aDiko bapeja Mibeko a mɔmɔ mamosiili.

²⁰Mosiili aditi a mojo momoto omɔci pε; Njambe ko adi omɔci.

²¹Ekada boa, Mibeko mikεseni na njikano jiNjambe? pεpε nongo mweka! Mojo bo, Njambe, akɔkɔ yo pa Mibeko mia Mibwani bopa bomɔ, ka bodongo bocingi oko na Mibeko.

²²Misɔnɔ ko minejaka bo bato basusu badi cina ebobe, bo baya bajimaka base njikano, oko na ejimeli ai Yesu Masiya.

²³Boso-boso, yana adaka ejimeli emina pε bopeta doa, Mibeko mihika so a bobanea so, oko a ehole ehoboloa boejimeli ngɔngɔ.

²⁴Oko boa, Mibeko midaka o moto yona opea so ebo a boneja so njea ai Masiya, bo bolonge a mojo moejimeli.

²⁵Adi so ko na ejimeli e dεye, boditi koko a mɔmɔ mamolɔndi.

²⁶Mojo bo odini no basusu bana baNjambe a mojo moejimeli ai Yesu Masiya.

²⁷Ino basusu baya babatisama ai Masiya, balwa Masiya oko bolwa.

²⁸A tei ende, moto aditi MoYuda issa MoEla, isa mobuli issa sɔmi, issa momi issa mwali, mojo bo odini no basusu moto omɔci a tei eMasiya Yesu.

²⁹Isa odini bato baMasiya, odini bana baAbalayama, na basangoli banjikano.

Bagalata 4

¹Mojo mobalaka mbi modi bo, Isa sangoli adi yεnge, nongo akada moswa 'ngando, adi o mobuli.

²Adi a mɔmɔ mabakoja na babanei oko a ehole ejimaka sangwa'nde.

³Iso bodi koko boa. Amaka so da bεnge, bomi daka oko a iibuli lingando jingondo ye.

⁴Yana ko abwana ehole, Njambe aloma Mwana'nde yona obotama na mwali, yona obotama cina jiMibeko,

⁵a bosikoa baya badaka cina jiMibeko, bo bose bosomi bosu bobana.

⁶Na adi no bana bande, Njambe aloma Mwembo moMwana'nde a tei emilema misu, na Mwembo mosembaka bo, Aba! Sesa!

⁷Oko boa oditi koko mobuli, odi mwana mene. Na adi we mwana, odi sangoli, cina emonganji moNjambe.

⁸Boso-boso, oijebakani nongo Njambe; odakani babuli baba-njambe baya baditi banjambe na soti.

⁹E deye ko ojebakani Njambe,—gbo oko Njambe yona ojebaka no; oko boa osombokoni koko a ngando jingasangasa jia jipehti nongo ngulu, na opalakani bo odaeni koko a libuli lingando jima mojo moye?

¹⁰Bole bonu bodi oko a masu, na songe, na bididi, na bianga.

¹¹Mbi nadi na mokakwano isa elomu embi a tei enu enami oko bonama.

¹²Baninga, mbi nangaka no bo odaeni na mbi o adaka mbi na nu. Mbi naditi na nu nongo mojo.

¹³Ojebakani bo natondɔ no Mwako Mopele ehole eboso oko na yogo a mokuku.

¹⁴Na osɔni mbi o obwɛnji oNjambe, o Yesu Masiya yo mene. Oilonani mbi; oisetojani mbi nongo adaka no na jeti a mojo momokuku mombi.

¹⁵Monganji mua modaka na nu a ehole emina modi jo? Mojo bo, mbi natondɔkɔ no bo, Akɔkɔ no hɔnɔ, ka ohwani miso manu a hopa mbi.

¹⁶E deye ko odini nambi soki, mojo bo natondɔkɔ no mua modi soti?

¹⁷Ibo batongo badi na bingi enene a mojo monu; editi ko bingi esoti. Bapalaka bo babɔtejae no na su, bo odaeni na bingi a mojo mobu.

¹⁸Isa odini na bingi a mojo mongando jipele, obwanini boda na bingi emina bihole bisusu, te yana adi mbi na nu pe.

¹⁹Bana bambi, mbi napekaka koko na bipeko bilibota a mojo monu, bo elimo eMasiya eboloe a tei enu.

²⁰Posa embi edi bo nadae na nu e deye, bo nabale na nu na monɔkɔ motongo, cina bo nadi na mokakwano a mojo monu.

²¹Tɔndɔni mbi mojo mu; ino baya bapalaka boda cina jiMibeko, otahokeani Mibeko?

²²Mojo bo mosoncɔmɔ bo, Abalayama adaka na bana-bami babae. Abota okina na mobuli, na yona otongo na mwali osɔmi.

²³Yona obotama na mobuli, abotama o abota-maka bana basusu; yona ko obotama na mwali osɔmi, abota cina esako eNjambe.

²⁴Mojo momina modi oko monde. Bali bamina badi o mikongo Mibae. Okina obu, Agala, yona obota bana a mojo molibuli, adi o Mono moSinai.

²⁵Iyo Agala adi o Mono moSinai a Alabia. Cina emina edi oko Yelusalema; mojo bo ngando eYelusalema yena edi e dεye, edi a libuli, na bana bande pongono.

²⁶Yelusalema oho diko ko edi na bosɔmi, na yo adi ngwa'su.

²⁷Mojo bo, mosoncɔmɔ bo, Da na sepi, wε motete yona opeliti libota; Imba na sepi, wε yona oditi na bipeko bilibota; Mojo bo, bana bamwali yona odikai elengeli, Banɔi bana bamwali yona odi na momi.

²⁸Baninga, iso bodi bana banjikano, o adaka Isaka.

²⁹Yona obotama a ehole emina o moto omini, anɔngeja yona obotama o moto oMwembo, na edi koko boa e dεye.

³⁰Mosoncɔ ko mobalaka bo? Mobalaka bo, Bengana mobuli-mwali na mwana'nde, mojo bo mwana omobuli atasangoa na mwana omwali yona odi sɔmi.

³¹Oko boa baninga, so boditi bana bamobuli; bodi oko bana bamwali yona odi sɔmi.

Bagalata 5

¹Masiya asikoa so bo bodaе na bosɔmi. A mojo momina, dani bambihmake a bosɔmi bonu; T'oじimeni oko bo opikameni koko a libuli.

²Eleho embi Paulo ai no edi oko ye; isa ojimakani mojo mobolena ganda, Masiya adi oko ngasa ai no.

³Mbi najebejaka no bo moto na moto yona ojimaka mojo mobolena ganda, abwani bosuma Mibeko kanga misusu mεnε.

⁴Isa odukakani lilonga a njea eMibeko, obɔtɔni na Masiya oko bobɔtɔnɔ; okwani, na okwani monganji moNjambe.

⁵Mojo bo njingo elilonga lisu edi oko na Mwembo, na licungi oko na ejimeli.

⁶Bolena boganda, isa bodi isa boditi, boditi nongo na cina a tei eMasiya; mojo mosusu modi oko ejimeli yena esanejaka na epaeli.

⁷Ino opotakani mbango bopele boso; ombej ei no nda bo otasumani mwako mosoti?

⁸Bopangoa bomina bocingiti nongo na yona obea no.

⁹Mitek e misusu Mibongoaka oko na ekenge ek eke elipetu.

¹⁰Mbi nadi na njingo ai Kumu bo so na no bodae na molema momoci. Moto ko yona onongejaka no âs mokindo monde men e.

¹¹Baninga, isa mbi nakojaka moj mobolena ganda, banongejaka mbi moj moye? Akoki mbi k boa, ka mole-mobokea moditi koko libaku.

¹²Yeni baya banongejaka no babejae mikuku Mibu ben e.

Eleho a Bosuma Mwembo

¹³Banninga, obeamani bo odaeni na bosomi; endele ko, p e boji-mani bo bosomi bonu bop e no mokalo a bosuma posa jimokuku. Moto na moto adi bokome mina'nde oko na epaeli.

¹⁴Moj bo cina eMibeko misusu edi a ekenge ye emoci, Toma pala motuteano mow e o asapalaka we men e.

¹⁵Okaswianani na okakokalanani, nganjaman bo otawanani.

¹⁶Mbi nabalaka bo, Sumakani Mwembo bo otagbokani na posa jimokuku.

¹⁷Moj bo posa jimokuku jinaka na Mwembo, na posa jiMwembo jinaka na mokuku; jilonanaka oko bolonana, bo otakoni ngando jipalaka no.

¹⁸Okasumakan Mwembo, oditini cina jiMibeko.

¹⁹Bikomeli bimokuku bidi bohu men e, oko bibi,—bcli, ndukeli, lisongi,

²⁰bole, demba, lisoki, miano, likaka, kenj, bolonana, misoo, ejimeli ebokosea,

²¹soki, bolangoa, matanga, na ngando jesusu jia jidi boa. Mbi nalehaka no e deye o aleha mbi no boso, bo baya badi na bikomeli bimina batasangoa bokumu boNjambe.

²²Mbuma jiMwembo ko jidi oko jiji,—ngenj, sepi, bowi, lingbangba, monganji, bodongo, likabo, bosangbindea.

²³P e nongo mokina mobeko modi bodumba ngando Jimina.

²⁴Ibaya badi bato baMasiya bakaaleja mokuku a mole-mobokea, na posa na masongi mamokuku pongono.

²⁵Isa bohelaka a moj moMwembo, bobwani bosuma Mwembo pongono.

²⁶Bobwamti bosakumeja; p e bodingeanani; p e bokejanani likaka.

Bagalata 6

¹Baninga, okahuoajani moto na mojɔ mobe, mo bay a badi na Mwembo odini bohuleja moto omina na milema mi yεmbu. Nganjama ko bo otamekama wε mεnε.

²Kamoanani mina, moto na moto akamoe muna momina'nde; oko boa odini bosuma Mibeko miMasiya.

³Moto yona odi oko moto-ngasa pε, akale bo adi moto monεnε, usakoseaka yo mεnε.

⁴Moto na moto adi bokokeleja ekɔmεli ende mεnε. Oko boa âda na njea bo asakumejae na ngando jinde mεnε, pε bosa'nge na moto otongo.

⁵Mojɔ bo moto na moto adi botomba muna monde mεnε.

⁶Moto akakoja moto otongo Ebaeli, moto omina abwani bomoko monganji na leka londe losusu.

⁷T'osakoseeni oko; moto atasεkε Njambe, mojɔ bo moto adi bojua oko jia jinaka yo.

⁸Moto aka'na dona oko a mojɔ momokuku, adi boyaka mbuma jibopɔ a mokuku monde mεnε. Moto ko aka'na dona a Mwembo, adi bojua ejueli a Mwembo, oko bomɔ bua bodi na bosusu.

⁹Ebɔngiti bo bongwae bilomu bipele; mojɔ bo, bomiti 'ngwa, ehole ekahwana, iso bodi bojua.

¹⁰Oko boa, boka'nε njea a bokɔ bopele, yεni bokɔ bopele ai bato basusu, gbo oko ai bay a badi a denga diejimeli.

Ekumu ePaulo Edi Oko a Mole-Mobokea

¹¹Anjani mboa ji jinεnεnε jisɔnɔkɔ na mbi mokanda ai no na ebɔ embi mεnε.

¹²Bato bay a badi na bingi ai no a mojɔ mobolena ganda, badi oko na posa eembete emokuku, bo batadingoa a mojɔ momole-mobokea moMasiya.

¹³Mojɔ bo, ibo bεnε, bato bay a bajimaka bolena, batasumaka Mibeko, na bapalaka bo balenejae no, bo basakumejae na mikuku minu.

¹⁴Mbi ko naditi nongo na ekina ekumu etongo, oko yena emole-mobokea moKumu osu Yesu Masiya, mojɔ bo ngondo ebakeama a mole-mobokea ai mbi, na mbi nabakeama a mole-mobokea a ngondo, a mojɔ monde.

¹⁵Bolena boganda, isa bodi isa boditi, bodi mojɔ mongasa; mojɔ momɔci mua mobwani modi oko moto moyene.

¹⁶Bowi na wa, ai bato basusu baya badalaka a njea ye, na ai Yisalaele oNjambe.

¹⁷E dεye, yε bonɔngeja mbi koko, pεpε nongo moto, mojɔ bo nadi na bihuli biYesu a mokuku mombi.

¹⁸Baninga, yε monganji moKumu osu Yesu Masiya modae na miembo minu. *Amen.*

Baεpεsɔ

Baεpεsɔ 1

¹Njεbe embi Paulo, obwεnji oMasiya Yesu a mojɔ mobolulea boNjambe, ai baMasiya baya badi oho Εpεsɔ, na baya badi na lisuma ai Masiya Yesu.

²Yε monganji na bowi boSangwa'su Njambe na Kumu osu Yesu Masiya hodae na nu.

Bojongoa boNjambe a tei eMasiya

³Yεni bosakoe Njambe Sange eKumu osu Yesu Masiya, yona ojongoa so a tei eMasiya na majongoa masusu mamwembo na ma-Diko.

⁴Iyo ahɔ so a tei ende oko ngondo ye epetakini yoama, ho bodae basεnɔke, pεpε nongo litɔnɔ a boso bonde.

⁵Ahεngε so na ngenjɔ ende bo bodae bana bande mεnε balisango cina eYesu Masiya. Mokano monde modaka boa na sepi,

⁶bo angamejae ekumu emonganji monde, na akɔ so monganji momina a tei eMwana'nde ongεnɔ.

⁷Lisiko lisu lidi oko a tei ende a mojɔ momakia mande, na bo yε bojibe jisu a mojɔ momonganji monde mua monɔi.

⁸Iyo anεngeja monganji monde ai so boa cina ebowεi na bocingea bonde.

⁹Ajima bo ajebejae so cina ebolulea bonde, na aneja so bo cina emokano monde edi bo

¹⁰atitanejae ngando jesusu a tei eMasiya, ngando jiDiko, na ngando jinase, oko etango emasu emaka bwana.

¹¹Lisango lisu lidi a tei ende, lia lihεngεmε na mokano monde yona okɔkɔ ngando jesusu na bowεi na bolulea bonde mεnε.

¹²Cina emina edi bo gala eekumu ende ehεe a mojɔ mosu baya bajima Masiya boso.

¹³Ino pongono, ama no ka Ebæli eSoti, oko Mwako Mopele moboheleja bonu, omi jimani oko yo, na o'sɔni embete eMwembo Moseñɔke monjikano,

¹⁴mua modi ndanga elisango lisu, oko a ehole ebosɔ lisango limina, a mojɔ mobosakoa ekumu ende.

¹⁵Mbi naka mwako moejimeli enu ai Kumu Yesu, na ngenjɔ enu ai bato bande basusu.

¹⁶A mojɔ momina, nasakoaka Njambe bihole bisusu a mojɔ monu, yana alangaka mbi kombe jinu a ma'nga mambi.

¹⁷Nangaka koko bo Njambe oKumu osu Yesu Masiya, Sango yona odi na ekumu esusu, apε no mwembo mobowei na bocingea, a bojebeana na nde soti,

¹⁸na bo ahojae miso mamilema minu, bo ocingeeni njingo ebobeia bonde, na ekumu enεnε mεnε elisango linde a tei ebasenɔke,

¹⁹na ndangasa ende pε njengi ai so bay a bajimaka; mwengi momina modi oko elomu ekɔ yo na bopipo bongulu ende

²⁰a tei eMasiya yana amongɔjɔ a bogwa, na amo-bakea oho Diko a ebo ende ebami

²¹bo anɔe bakumu basusu bou mεnε, na kpaci jesusu, na ngulu jesusu, na makumu masusu, na kombe jesusu boy a jida ehole ye, na a ehole ebodoa.

²²Na adeja ngando jesusu cina jibibota binde, na amobakea bo adae Kum oDenga a mojɔ mongando jesusu,

²³mojɔ bo Denga didi mokuku monde, na yo alumejaka mokuku momina o alumejaka yo leka losusu mεnε.

Baεpεsɔ 2

¹Ino odakani kanga bagwake mεnε a mojɔ momalaboa manu na jibe jinu.

²Mida minu midaka oko moda mongondo ye, na odakani na lisuma ai kumu yona odi na bokumu bonde a pwea, oko mwembo mua modi na ngulu a tei ebana balipanga e dεye.

³Iso pongono, so basusu, bopangana na bu, na lisuma lisu lidaka oko a posa jimokuku. Bodaka babuli baposa jimokuku na jimolema. Bodaka bana bakεlε oko a bobotama bosu, iso na 'bo tungu emɔci.

⁴Njambe ko anɔi na wa, na apalaka so na ngenjɔ enεnε;

⁵a mojɔ momina, nongo adaka so bagwake a mojɔ mojibe jisu, iyo apa so bomɔ yana apa yo Masiya bomɔ (ohelni oko a mojɔ momonganji moNjambe), na angɔjɔ so na Masiya, na adeja so na nde a bisika biDiko, a tei eMasiya Yesu,

⁷bo anejae monganji monde pε njengi, na likabo linde ai so, a tei eMasiya Yesu, a bilulu bia bidoakini.

⁸Mojɔ bo ohelini a mojɔ moejimeli, cina emonganji moNjamhe; mojɔ momina mocingiti na nu bεnε; modi oko epeeli eNjambe.

⁹Mocingiti nongo na bilomu, bo moto asaka sakumeja.

¹⁰Mojo bo 'so bodi elomu ekɔkɔ Njambe; boyoama a tei eMasiya a mojo mobilomu bipele, na Njambe abiselingoa eyou bo bokɔe bilomu bimina. Bokatana a tei eMasiya

¹¹BaYuda baya basɔkɔ embete ubolena-ganda a mokuku oko a mɔmɔ mabato, babeaka no bamwea. A mojo momina obwanitini bobosa bo obotamani oko bapakano.

¹²A ehole emina odakani habɔtɔnɔke na Masiya, pεpε nongo lisango a bokumu boYisalaele, pεpε nongo libondo a mikongo minjikano, pεpε nongo njingo, pεpε nongo Njambe a ngondo.

¹³E dεye ko, a tei eMasiya, mo baya badaka boso bohali, obatamani hulelu a mojo momakia maMasiya.

¹⁴Mojo bo yo adi mokongo mosu mobosiili. Iyo akataneja so baya badaka babae bo bodaе oko omɔci pε, na abuka Ngbungbu ebobɔteja a tei esu.

¹⁵Abakea mokongo mobosiili na mokuku monde mεnε, bo asiejae mokongo moMibeko na mongila, na bo apε bowi oko na boyoa bomoto omɔci moyene a tei ende mεnε, oko na bu babae.

¹⁶Akɔ boa bo akatanejae so babae na Njambe, o mokuku momɔci a mojo momole-mobokea. Oko boa asieja lisoki limina.

¹⁷Iyo adoa, na atɔndɔ mwako mobowi ai no baya badaka bohali, na ai baya badaka hulelu.

¹⁸Mojo bo so basusu babae bodi na njea ebokwea ai Sango na mwembo momɔci a mojo monde.

¹⁹Oko boa oditini koko midoa na bakendeli; mo na basenɔke odini ngando emɔci, na odini bana badenga diNjambe.

²⁰Babwεnji na batɔndɔi badi eyoeli-ecina enu, na Masiya Yesu yo mεnε adi litai limogbukusu.

²¹Eyoeli esusu ekatani a tei ende, na eyoamaka bo edae tempelo esenɔke a tei eKumu.

²²Na okatanani no bεnε a tei ende o ndako, bo odaeni tempelo eMwembo a mojo moNjambe.

Baɛpɛsɔ 3

¹A mojo momina, mbi Paulo, nadi lisungu liYesu Masiya a mojo monu bapakano.

²Nadingaka bo o'kani mwako momonganji mokɔ Njambe ai mbi, bo nakɔe elomu ai no.

³Njambe aboloja ai mbi cina emokano monde mua modaka mobombamake, o ami mbi sɔnɔ mweka.

⁴Okalangani bikenge bimina odini bocingea ejebeli embi emojo mobombamake moMasiya.

⁵Mojo momina moipaka boloa ai bato babilulu bitongo; moboloi ko e deye ai babwɛnji basenɔke, na ai batɔndɔi bande, oko na Mwembo.

⁶Cina emina edi bo bapakano badi basangoli pongono; badi binama bimokuku momɔci, na basangoaka njikano yena edi a tei eYesu Masiya a mojo moMwako Mopele.

⁷Mbi nahomɔ bo nadae mokomeli oMwako Mopele, cina eepeeli emonganji moNjambe mua mossɔ mbi ai yo na ndangasa engulu ende.

⁸Mbi nassɔ monganji mu, bo nabolojae ai bapakano mijɔ miyumu miMasiya mia midi na bonetɔ, oko mbi yona odi ngɔngɔ jibasenɔke basusu,

⁹na bo nanejae bato basusu cina emojo mua modaka mobombamake oko a libangake mɛnɛ a tei eNjambe yona okɔ leka losusu.

¹⁰Cina emina edi bo bakumu na bato basusu bakpaci oho Diko hacingee mojo mobowei bonene boNjambe a mojo moDenga.

¹¹Mokano mokana yo a libangake a tei eMasiya Yesu Kumu osu modaka boa.

¹²Na so bodi na njea bohu mɛnɛ a bodoa ai Njambe, pɛpɛ nongo mokakwano, cina eejimeli esu ai yo.

¹³A mojo momina, mbi nangaka no bo otangwaeni cina eminɔngɔ misɔkɔ mbi a mojo monu; midi oko ekumu enu.

¹⁴A mojo momina, mbi natitaka na magbunda a boso boSango

(¹⁵menga masusu, isa oho Diko, isa ya nase, masɔkɔ kombe oko ai yo),

¹⁶bo apɛ no bopingeja bongulu eMwembo monde a tei enu, moto namoto, oko nalikabo liekumu ende yena enɔi.

¹⁷Nangɔɔnɔkɔ bo Masiya adihe esika eboda a milema minu cina eejimeli enu, na bo odaeni bambilimake na ngbi a epaeli;

¹⁸bo odini bohɔnɔ a bocingea na basenɔke basusu, cina esasa, na boyai, na ndinda, na boka, bongenɔ eMasiya,

¹⁹na bo ojebeni ngɛnɔ eMasiya yena enɔi ejebeli esusu, na bo olumeni botɔ na boluma boNjambe kanga boyai mɛnɛ.

²⁰E dεye, ekumu ai yo yona obwani bokɔ ngando jesusu jia jinci mijɔ misusu mingaka so, na milεke so bou mεnε, cina engulu yena ekɔkɔ a tei esu,

²¹ekumu ai yo a tei eDenga, na a tei eMasiya Yesu a bilulu bisusu pε suka. *Amen.*

Baεpεsɔ 4

Bokatana boEjimeli

¹Oko boa, mbi lisungu liMasiya, nangɔɔnɔkɔ no bo odaeni na mida mia Mibwani na bobeia bobeama na nu,

²oko na bosatiteja bonεnε, na bombɔki, na lingbangba. Moto adi boda na moto otongo oko bowi a mojɔ moepaeli.

³Dani na bingi a bobanea bokatana boMwembo; sakandanani na licinga libowi.

⁴Mokuku modi momɔci pε, na Mwembo modi momɔci pε, mojɔ bo obeamani a njingo emɔci yana abeama no.

⁵Kumu adi oko omɔci pε, ejimeli emɔci, batisimo emɔci,

⁶na Njambe omɔci, yona odi Sange 'bato basusu; iyo anɔi basusu; adi a ndanda ebasusu na adi a tei ebasusu.

⁷Iso ko bossɔ monganji, moto na moto oko na mwɛngi moepeeli eMasiya.

⁸A mojɔ momina abala bo, Iyana ake yo oho diko, ake na lindundu limasungu, Na akaba bipeeli ai bato.

⁹Cina emina edi bo, lyo ake diko? Edi oko bo ama soloa oko a bisika binase bingondo.

¹⁰Yona osoloa, adi oko yo yona okε diko, na anɔ busa mεnε, bo alumejae ngando jesusu.

¹¹Na bipeeli bipa yo bidaka bo bakina bato badebabwɛnji, bakina batɔndɔi, bakina balehi, na bakina bo badebanjeli na bakoja,

¹²a bobɔngeja basεnɔke, a mojɔ moelomu ebokɔmε Denga, na a mojɔ moeyoeli emokuku moMasiya,

¹³oko a ehole ehomea bosu basusu a boka-tana boejimeli, na a ejebeli eMwana 'Njambe, bo bokandoe bato bapingake, na bo mwɛngi mosu mobwane na mwɛngi mobobɔngɔ boMasiya.

¹⁴Bobwaniti boda koko bana bakεkε, bay a bahombahombaka na baεpεnεkε na pwea jesusu jibokoja bobato baepulu bay a badi na poloso a bokoja ngando jibokosea.

¹⁵Bobwani bopea boku mijɔ misoti, oko na epaeli, bo bokandoe a njea jesusu a tei eMasiya yona odi molo.

¹⁶Edi oko a mojɔ monde na bokatana bongulu ende, bo mokuku mosusu mocingami o eyoeli emɔci, na mopingi na macinga masusu; elomu ebinama bisusu epingejaka mokuku bo mokandoe na mosapingejae na epaeli.

¹⁷Ebaeli embi, na eleho embi ai no a kombe eKumu, edi bo otadani koko na mida Mibapakano bay a basumaka mabunga mamilema Mibu.

¹⁸Bocingea bobu bodi bokutubanake, na babɔtɔnɔ na bomɔ boNjambe cina elibumi libu lia licini na milema Mibu mipipo.

¹⁹Baditi koko na sɔni; basa'pa a ngando jibosɔtɔ, na badi oko na posa ebokɔ mijɔ misusu Mibosambolu.

²⁰Ino ko oikoani na Masiya boa,

²¹isa omohokeani na soti, na isa osɔni bokoja ai yo, oko mijɔ misoti mia midi a tei eYesu.

²²Toma hwani moto moyou yona odaka na ekɔmɛli eyou, yona odi mopɔke mene a mojɔ moposa jibokosea.

²³Dani bato bayene a tei emiembo na milema minu.

²⁴Toma lwani moto moyene yona oyoama a elimo eNjambe, na bodongo, na boseñɔ bosoti.

²⁵A mojɔ momina, toma lonani bokosea; balani moto na mina'nde moto oko mua modi soti, mojɔ bo bodi binama bia bicingani.

²⁶Okadani na kεlε t'okɔeni oko bobe. T'ojimeni oko bo kεlε enu edipe na busa.

²⁷T'okineni oko pokiso a mojɔ moSatana.

²⁸Isa moto adaka mobi, abwaniti boba na ikina. Abwani bokɔ elomu epele na mɔmɔ mande, bo adihe likonja a bopa baya badi na taka.

²⁹T'okineni oko ekenge ebe emané a Ininɔkɔ minu; dani ko na ebaeli epele, a boleha na bokɔmeja baya bakaka.

³⁰T'okejaeni oko Mwembo Moñjambe sɔni, mojɔ bo o'sɔni embete ende a mojɔ mobusa bobosikoa.

³¹Toma dongejani lisoki lisusu, na kεlε, na kεnjɔ, na misoo, na malɔngi, na bikɔmɛli bisusu bibe.

³²Na dani na monganji, moto ai mina'nde moto, na molema mo yεmbu; kinanani jibe, moto na mina'nde moto, o akwa Njambe jibe jinu a tei eMasiya.

Baεpεsɔ 5

Ekɔmeli eBato baMasiya

- ¹Ikoanani na Njambe o bana baepaeli.
- ²Dani na ngɛnɔ o O adaka Masiya na ngɛnɔ ai so, na asapa ai Njambe a mojɔ mosu, epeeli eso epele elitindi na lisiko.
- ³A mojɔ mobɔɔli, na ngando jibosambolu, na mbengea, t'okineni oko bo mijɔ mi midae a minɔkɔ minu; Mibɔngiti nongo na bato baMasiya.
- ⁴Pε bobala nongo mijɔ misɔni, isa ebalabala, isa ngɛke; Sakoani ko Njambe.
- ⁵Toma iebani mojɔ mu na soti; pεpε nongo moto obɔɔli, pεpε nongo moto obosambolu, pεpε nongo moto ombengea (cina emina edi moto yona osakoaka njambe obokosea) odi bosangoa lisango a Bokumu boMasiya na boNjambe.
- ⁶T'oじmeni oko bo moto akosee no na ebalabala, mojɔ bo kεlε eNjambe edi ai bana balipanga a mojɔ mongando jimina.
- ⁷A mojɔ momina, t'opanganeni oko na bato bamina.
- ⁸Odakani bosoboso modidi; e dεye ko odini bohu atei eKumu; oko boa, toma dani na bikɔmeli bibana babohu.
- ⁹Mojɔ bo bohu bobotaka oko ngando jesusu jipele, jibɔngɔke najisoti.
- ¹⁰Jimanioko ngando jia jisepejaka Kumu.
- ¹¹Toma buleni ngando jingasangasa jimodidi; anejani na bikɔmeli binu bo ngando jimina jidi jibe.
- ¹²Mojɔ bo edi sɔni mεnε a bobala a mojɔ mongando jikɔkɔ bato bamina a libombi.
- ¹³Bohu bokahoja mojɔ, modi boholoa a bohu; cina bo, mokaboloa modi a bohu.
- ¹⁴A mojɔ momina, abala bo, Wε yona ohwεi hiɔ, sisoa! Angɔ a bogwa, Na Masiya âpa wε bohu.
- ¹⁵Toma nganjamani a mojɔ momida minu; dani na bopasa, pεpε bogegele.
- ¹⁶Pε bonamejani masu manu, mojo bo masu ma madi mabe.
- ¹⁷T'odaenioko na yebe; cingeani ko bolulea boNjambe.
- ¹⁸T'olangoenioko na vino; mojɔ momina modi bosambolu; endelesko dani balumake na Mwembo.
- ¹⁹Masolo manu mabwani boda na njembo jipele, njembo jibosakoa na njembo jiMwembo. Imbani na sakoani Kumu na milema minu misusu.

²⁰Sakoani Njambe Sango bihole hisusu, a mojɔ mongando jisusu, a kombe eKumu osu Yesu Masiya.

Mojɔ moMomi na Mwali

²¹Sumanani moto na moto oko na lisuma ai Masiya.

²²Ino bali, dani na lisuma ai bami banu, o asumaka no Kumu.

²³Mojɔ bo momi adi molo momwali, o adi Masiya molo moDenga, dia didi mokuku monde, na yo adi Moheleja omokuku momina.

²⁴Denga disumaka Masiya; oko boa bali badi bosuma bami babu a ngando jisusu.

²⁵Ino bami, dani na ngenjɔ ai bali banu, o adaka Yesu na ngenjɔ a Denga, na asapa a mojɔ moDenga

²⁶bo ahsenojae cina ebosənɔ bobososa bomadiba maEbaeli.

²⁷Akɔ boa bo Denga dimae a boso bonde na ekumu enenɛ, lihengemeké na lisənɔke, pεpε nongo litɔnɔ, isa maninginingi, isa mojɔ motongo.

²⁸Oko boa, bami babwani boda na ngenjɔ ai bali babu o apalaka bo mikuku Mibu bɛnɛ. Moto yona odi na ngenjɔ ai mwali onde adi na ngenjɔ ai yo mɛnɛ.

²⁹Mojɔ bo moto t'alonake mini minde mɛnɛ; amibɔkɔkɔ na amibaneaka, o akɔkɔ Masiya na Denga.

³⁰Mojɔ bo so bodi binama bimokuku monde.

³¹A mojɔ momina, motoadi bokina sango na nango a bokatana na mwali onde bo ibo babaē badae munu momɔci.

³²Mojɔ momina modi na cina enenɛ ebombamake. Mbi nabalaka a mojɔ moMasiya na Denga.

³³Oko boa, yε moto na moto adae na mwali onde ngenjɔ o asapalaka yo mɛnɛ, na mwali adae na lisuma ai muma'nde.

Baεpεsɔ 6

¹Ino bana, toma sumani baboti banu a tei eKumu; mojɔ mu mobɔngi.

²Toma suma sangwao na ngwao, (imu modi mobeko moboso na njikano)

³bo mijɔ miwɛ Mibɔnge, na oyeyoe ekoka a ngondo ye.

⁴Ino basango, t'okejaeni oko bana banu kelɛ; babɔkɔni, na balehani na bokoja boKumu.

⁵Ino bakɔmeli, toma sumani baya badi baswa banu ya nase, oko na bɔ na mongongoma, na molema mosoti, o asumaka no Kumu.

⁶Kɔni ngando jipalaka Njambe na milema minu, o bakɔmeli baMasiya, te nongo a bosepeja bato baya banjaka no na miso pε.

⁷Kɔni elomu enu na bingi, te nongo ai bato, oko ai Kumu yo mɛnɛ.

⁸Jebani bo moto na moto adi bosɔ ndese ai Kumu a mojɔ mongando jisusu jipele jikɔkɔ yo, nongo akada mobuli isa mwana'sɔmi.

⁹Ino baswa, toma kɔni koko boa na bakɔmeli banu. Yeni bogbilimwana kɛnjo. T'obosaeni oko bo Moswa'bu na onu adi oho Diko, na yo anjaka bato basusu amɛci.

Molilo moBila moBato baNjambe

¹⁰Mojɔ mosuka,—sapingejani a tei eKumu na bopipo bondangasa ende.

¹¹Lwani molilo mosusu mobila moNjambe bo ohɔneni ndungu jiSatana.

¹²Mojɔ bo, bila enaka so editi na mini na makia; edi oko na makumu, na kpaci, na bakumu bangondo ye emodidi, na mandundu mamiembo Mibe a bisika bidiko.

¹³A mojɔ momina, toma tombani molilo mosusu mobila moNjambe, bo ohɔneni bila a busa bua bobo; na omaka gbokejani, osa ko odikaeni oko bambilimake.

¹⁴Imani ngbi. Kandani njingo eSoti a moongo manu. Lwani bosɛnɔ o ebende a bupa.

¹⁵Kinani moselingo moMwako Mopele mobowi modae sapata a bibota binu.

¹⁶Toma tombani nguba eejimeli a bokumba nde jimosa jiyona Mobe; mojɔ mu modi monɛnɛ mɛnɛ.

¹⁷Lwani egbala epipo eboheleja, na tombani abɛnɛ oMwembo yona odi Ebæli eNjambe.

¹⁸Ingakani bihole bisusu na Mwembo, tungu jisusu jibingeeli na mangɔnɔ; toma nganjamani na bopipo a mojɔ momina, na ingakani a mojɔ mobaMasiya basusu,

¹⁹na a mojɔ mombi pongono, bo nadæ na bɛtɛ ebobala a botɔndɔ na eci cina eMwako Mopele.

²⁰Nadi ohwɛnji a minyɔlɔ oko a mojɔ momina. Ingakani bo nadæ na eci yena ebwani na mbi a bobala.

²¹Odini boka miako mimbi na Lukiko mwangwa'su, yona odi mokɔmeli olingbangba oKumu; yo adi bojebeja no mijɔ misusu.

²²Mbi namolomi oho ai no oko a mojɔ momina, bo ojebeni mijɔ mimbi, na bo agɔmbejae milema minu.

²³Yε bowi na ngenjɔ na ejimeli eNjambe Sango, na Kumu Yesu Masiya, edae ai baninga.

²⁴Yε monganji moNjambe modae na bato basusu baya bapalaka Kumu osu Yesu Masiya na ngenjɔ yena etasia.

Bafilipoi

Bafilipoi 1

¹Paulo na Timoteo, bakɔmeli baMasiya Yesu, ai basenɔke basusu baMasiya Yesu baya badi a Pilipoi, na ai banjeli na basuku baDenga pongono.

²Yε monganji na bowi boNjambe Sangwa'su, na boKumu osu Yesu Masiya, bodaе na nu.

Sepi ePaulo a Mojɔ moBaPilipoi

³Mbi nasakoaka Njambe bihole bisusu bilɛkε mbi no.

⁴Te nakinake bosepa a bingeeli bimbi bisusu a mojɔ monu basusu,

⁵cina ebokɔmeja bonu a elomu eMwako Mopele, banga na busa boboso mɛnɛ oko a ehole ye.

⁶Mbi najebaka na soti bo yona obanga elomu epele a tei enu âesukeja bopele a mojɔ mobusa boYesu Masiya.

⁷Ebɔngi bo mbi nadæ na bolɛ bomina a mojɔ monu basusu, cina bo nabaneaka no a tei emolema mombi, isa a mbɔci ji, isa a elomu ebobanea na bopingeja elomu eMwako Mopele, oko no bay a bakanati na mbi a bossɔ monganji moNjambe.

⁸Njambe yo mɛnɛ ajebaka na soti bo nadi na nu posa oko na ngɛnjɔ eMasiya Yesu.

⁹Na mojɔ mongaka mbi modi bo epaeli enu ehɛe bou mɛnɛ, na bo elume na ejebeli na bocingea,

¹⁰a bombetea ngando jia jinɔi na bopele, bo odaeni pɛpɛ nongo mojɔ, pɛpɛ nongo pita, a mojɔ mobusa boMasiya.

¹¹Yε lituna linu lidae lituna limbuma jipele jibodongo jia jidi a tei eYesu Masiya, a bokumeja na bosepeja Njambe.

Paulo a Blɔkɔ a Mojɔ moMwako Mopele

¹²Baninga, napalaka bo ojebeni bo mijɔ minɛkε mbi mikɔmejaka elomu eMwako Mopele oko bokɔmeja.

¹³Bajebaka ya a ngando ebasoda, na a bisika bisusu bitongo, bo nadi a blɔkɔ a mojɔ moMasiya.

¹⁴Na baninga banenɛ bahɛi na ejimeli ai Kumu a mojɔ mombɔci jimbi, na badi na eci a botɔndɔ mwako moNjambe, pɛpɛ nongo bɔ.

¹⁵Bakina batondokɔ mwako moMasiya oko na likaka na misoo, batongo ko batondokɔ na milema mipele.

¹⁶Ibaba bakɔkɔ boa cina eepaeli. Bajebaka bo mbi nadi ya a bokakela Mwako Mopele.

¹⁷Iba batongo ko batondokɔ mwako moMasiya na miano, te nongo na soti, oko na njingo bo bapukejae mbi ya a blɔkɔ.

¹⁸Pε mojɔ! batondokɔ mwako moMasiya a njea ji jesusu, isa a mojɔ moegbo, isa a mojɔ mosoti; mbi nasepaka a mojɔ momina, na nitakina bosepa.

¹⁹Najebaka bo suka emojɔ mu êda oko bohela bombi cina ebingeeli binu, na bokɔmeja boMwembo moYesu Masiya.

²⁰Posa embi enenɛ na njingo embi jidi bo nitasamboa nongo; bou oko bo nakumejae Masiya na eci enenɛ a mokuku mombi, isa na mohelo mombi, isa na bogwa bombi.

²¹Mojɔ bo, ai mbi, bomɔ bodi oko Masiya, na bogwa bodi ndese.

²²Endele ko, isa ebɔngi bo nayeyoe a mokuku mu a mojɔ moelomu embi, nadi na mokakwano a mojɔ mobohɔ bombi.

²³Nadi a mɛlɛ manjea. Posa embi edi bo nayane bo nadae na Masiya; mojɔ mua monɔci na bopele oko mu.

²⁴Endele ko, ebɔngi bo nayeyoe a mokuku mu a mojɔ monu.

²⁵Adi mbi na ejimeli emina, najebaka bo nadi boda na nu, na nâyeyoa na nu basusu, a bodaleja no, na a bosepeja no a ejimeli.

²⁶A mojɔ momina, sepi enu a tei eMasiya Yesu edi bohε a mojɔ mobodoa bombi koko ai no.

Moda moBato baMasiya

²⁷Ino ko, toma dani na ekɔmeli yena ebwani na Mwako Mopele moMasiya. Oko boa, nongo nakadoa a bo'nɛnɛ na nu, isa nakadika ya, nadi boka mwako monu, bo odini bambilimake na molema momɔci, a bo'na o moto omɔci a mojɔ moejimeli eMwako Mopele.

²⁸T'obangeni oko soki jinu nongo mweka. Mojɔ mu modi embete ai bo a mojɔ mobokwa bobu, na a mojɔ moboheleja bonu bua bohulaka ai Njambe.

²⁹Mojɔ bo libondo linu liditi ejimeli ai Masiya pε; lidi oko bo odingoeni a mojɔ monde.

³⁰O'kakani e dεye bo mbi nanaka bila; oko boa, bila enaka mbi, yena enε no na mbi boso, edi bila enu pongono.

Bafilipoi 2

- ¹Isa bogɔmbeja bodi a tei eMasiya, na peye eepaeli, na bokatana boMwembo, na wa, na monganji
- ²Sepejani mbi na soti a mojɔ mobokatana bonu na molema momɔci. Dani na epaeli emɔci, mokano momɔci, na mwembo momɔci.
- ³Pε bokɔni mokina mojɔ na likaka, isa a mojɔ moegbo. Satitejani a milema minu, oko na bolε bo bato batongo banɔi no na bopele.
- ⁴Moto na moto a tei enu abwani boda na bolε ai bato batongo, te a mijɔ minde mɛnɛ.
- ⁵Kinani bo molema mua modaka a tei eMasiya modae a tei enu.
- ⁶Mojɔ bo, yo, nongo adaka yo na elimo eNjambe, ailε nongo bo bobwana bonde na Njambe bodi eka eyumu a bobanea.
- ⁷Asahangoja, na alwa elimo emobuli, na abotama na mokuku momoto.
- ⁸Adaka yo na elimo emoto, asatiteja, na adaka na lisuma oko a bogwa, ee oko a bogwa bomole-moboakea.
- ⁹A mojɔ momina, Njambe amokumeja bou mɛnɛ, na amopa ekina kombe yena enɔi kombe jisusu boyo,
- ¹⁰bo muuli masusu boyo madi bo'mbama a kombe eYesu, isa oho Diko isa ya nase, isa cina enase ye,
- ¹¹na bo minɔkɔ nususu mijime bo Yesu Masiya adi Kumu, a mojɔ moekumu eNjambe Sango.
- ¹²Baninga, ino odakani na lisuma bihole bisusu yana adaka mbi na nu. A mojɔ momina, toma dani na bingi e dεye adi mbi bohali, a hongameja bohela honu, na bɔ na mongongoma.
- ¹³Mojɔ bo Njambe yo mɛnɛ akɔkɔ elomu ende a tei enu, bo opaleni na okɔeni bolulea bonde bopele.
- ¹⁴Kɔni bilomu bisusu, pεpε nongo manungunungu na miano,
- ¹⁵bo odaeni bana baNjambe bayo baditi nongo na mojɔ, bayo badi na milema mi yεmbu, pεpε nongo litɔnɔ a tei eelulu ye engulumake elipanga. Ino odini a tei ebu o paka jia jihojaka ngondo.
- ¹⁶Peani Ebæli ebomo oko boku. Oko boa mbi nadi bosepa a busa boMasiya bo naipota epotapota, na bo naikɔ elomu ekɔkɔ.

¹⁷Ee, nongo makia mambi makasopea a diko di epeeli enu elitumbu, oko ejimeli enu, nadi na sepi, na nasepaka na nu basusu.

¹⁸Oko boa toma sepani pongono, na sepani na mbi.

Timoteo na Epapulodito

¹⁹Njingingo embi edi ai Kumu Yesu bo nalomee no Timoteo ngɔngɔ bosme; oko boa nadi boka miako minu, na molema mombi modi bogɔmbo.

²⁰Naditi na moto otongo yona obwani na nde, mojɔ bo yo alekɛ no na soti mɛnɛ.

²¹Ibo batongo balekɛ oko ngando jibu bɛnɛ pɛ, te nongo jia jiMasiya.

²²Ino ko ojebakani bo yo apasami a elomu eMwako Mopele yena ekɔkɔ yo na mbi, o akɔmejaka mwana sangwa'nde.

²³Oko boa nadi na njingo bo namaka nɛ suka emojɔ mombi, namolome oho ai no.

²⁴Na nadi na ejimeli ai Kumu bo nitayeyoa a bodoa ai no mbi mɛnɛ.

²⁵Mbi ko najimi bo nalomee no e dɛye mwangwa'mbi Epapu-lodito yona ocingami na mbi a elomu na a bila, obwɛnji onu ai mbi na toma jinu a bokɔmeja mbi a taka embi.

²⁶Mojɔ bo yo adi na posa bo anɛnɛe na nu, na adi na monɔngɔ cina bo mwako moyogo ende momea oho ai no.

²⁷Yo adaka na yogo soti, na apaka gwa; Njambe ko amokea wa, te nongo yo pɛ, oko mbi pongono, bo monɔngɔ mombi mosaka gbasoe.

²⁸Oko boa nadi na posa enɛnɛ bo namolome ai no, bo odaeni na sepi a bo'nɛnɛ na nde, na bo molema mombi mogɔmbe pongono.

²⁹Mo'sɔni bopele a kombe eKumu na sepi enɛnɛ, na dani na liSuma ai bato baya badi o adi yo.

³⁰Mojɔ bo yo apaka gwa a elomu eMasiya; na apa njupi bo akɔmɛe mbi a kombe enu.

Bafilipoi 3

Eleho a Bokatana na Masiya

¹Mojɔ motongo baninga, sepakani a tei eKumu. Mbi nitangwa nongo bosɔnea no ekenge emina, na obwanini boejima.

²Toma dingani a mojɔ mombwa; toma dingani a mojɔ mobato baya badi na bikɔmeli bibe; toma dingani a mojɔ mobato babolena-ganda babokosea.

³Babolena-ganda basoti badi oko so baya basakoaka Njambe a mwembo, baya bakumejaka Masiya Yesu, na bapeliti nongo ejimeli a ngando jimokuku.

⁴Akɔki mbi pala, ka nabwani bojima ngando jimokuku. Isa okina moto alekɛ bo abwani boda na ejimeli a ngando jimokuku, esingaiti mbi!

⁵Balena mbi ganda yana adaka mbi na masu bomwambe. Nadi moto ombota eYisalaele, moto olıkota liBenyamina. Nadi moEbele, mwana oBaEbele. A njea eMibeko, nadaka MoPalusi.

⁶Nadaka na bingi a bonɔngeja Denga. Nadaka na lisuma mene a Mibeko, pεpε nongo mojɔ.

⁷Mbi ko nadumba ngando ji jesusu a mojɔ moMasiya, oko ngando jia jidaka na yumu a miso mambi.

⁸Ee soti, mbi nalangaka ngando jesusu o ngando jingasa pε, a mojɔ moejebeli eMasiya Yesu Kumu ombi yena enɔi na yumu. Najima bo nabungejae ngando jesusu a mojɔ monde; najilangaka o pita pε, bo Leka lombi loyumu lodesoko Masiya pε, na bo nadae a tei ende,

⁹te nongo a mojɔ mobodongo bombi mene bua bocingi na Mibeko, oko a mojɔ mobodongo bua bocini na ejimeli ai Masiya, bua bohulaka ai Njambe a mojɔ moejimeli.

¹⁰Nakɔ boa bo najebe Masiya, na ndangasa yena engɔ na nde a bogwa, bo nakatane na nde a madingoa mande, na bo nakatane na nde a bogwa bonde

¹¹oko na njingo ebomea a bongɔ bobagwake.

¹²Editi bo mbi namei a suka emina, isa bo mbi nabɔngi na soti. Endelete ko, nakɔkɔ na bopipo bo namee a mwɔngi mua mobwani, cina bo Masiya apee mbi oko a mojɔ momina.

¹³Baninga, mbi nitalɛkɛ bo nabɔngi; endelete ko, nakɔkɔ mojɔ mu momɔci; nabosaka ngando jia jidi ngɔngɔ, na nasalindaka na bopipo a ngando jia jidi boso.

¹⁴Napotaka oko na miso mambi a suka enjea, na ndese edi oko bobeabonjambe bua bonɔi, a tei eMasiya Yesu.

¹⁵A mojɔ momina, so baya badi bato bapingake bobwani boda na mokano momina. Isa odini na mokina mokano motongo, Njambe yo mene adi bocingea no mojɔ momina.

¹⁶Mojɔ momɔci ko, bobwani bodala a njea yena edi boso, oko na lisuma a ngando jijebaka so.

¹⁷Banninga, ikoanani na mbi. Anjani baya banejaka no ekoaneli o anejaka so.

¹⁸Cina bo, ekɔmeli ebato banenɛ edi oko ekɔmeli ebato baya badi soki jimole-mobokea moMasiya. Natomba bobala na nu a mojɔ mobu bihole binenɛ, na natɔndɔkɔ no koko e dεye na bio.

¹⁹Suka ebato bamina edi oko bogwa. Njambe obu adi oko sɔpɔ jibu bɛnɛ, na basakumejaka na sɔni ebu. Badi na bolɛ oko a ngando jingondo ye.

²⁰Iso ko bodi na bosɔmi bosu oho Diko, na bonjaka na tɛndɛ bo Moheleja, Kumu osu Yesu Masiya ahule ena.

²¹Iyo adi bokindoja mokuku mosu monase, bo modae na elimo emokuku monde mɛnɛ moekumu, oko na ngulu yena edi ai yo a bogbokeja ngando jesusu.

Bafilipoi 4

Moda moBato baMasiya

¹A mojɔ momina, baninga bambi baepaeli, toma dani bambilimake boa a tei eKumu. Mbi nadi na posa ai no; sepi embi edi ai no, na odini ekumu embi.

²Mbi nalehaka Ewodia, na nalehaka Suntuke, ho badae na molema momɔci a tei eKumu.

³Na nangaka wɛ pongono, wɛ limbaci limbi a elomu, bo okɔmejae bali bamina, mojɔ bo bakɔ elomu eMwako Mopele a dɔngɔ dimbi, ibo na Kelemento na bina'mbi batongo baya badi na kombe jibu a mokanda mobomɔ.

⁴Sepakani ai Kumu bihole bisusu; najɔkɔ na nu koko bo, Sepakani.

⁵Kɔni bo bato basusu banɛe bombɔki bonu. Kumu adi mbuci mɛnɛ.

⁶T'odaeni oko na mokakwano nongo mweka; jebejani Njambe ko ngando jesusu jia jitakaka na nu, oko na bo'nga, na bongɔɔnɔ, na bosakoa.

⁷Na bowi boNjambe bua bonɔi bocingea bomoto, bodi bobanea milema minu na miembo minu a tei eMasiya Yesu.

⁸Mojɔ mosuka baninga, baneani a milema minu oko ngando jia jidi soti, jia jibɔngi, jia jidi bojo, jia jidi jisɛnɔke, jia jidi na epaeli, jia jidi na gala epele,—isa jinɔi na bopele, isa jibwani na bosakoa.

⁹Kɔni ngando jikoa no na jisɔ no ai mbi, ngando ji'ka no na jinɛ no na mbi; na Njambe obowi âda na nu.

¹⁰Mbi nadi na sepi enɛnɛ ai Kumu, mojɔ bo bolɛ bonu ai mbi bosisoi koko e dεye. Odakani na bolɛ ai mbi soti, na etaka na nu oko njea a boneja bolɛ bonu.

¹¹Nitabalaka boa a mojɔ motaka embi, cina bo mbi najebi e dεye njea ebosepa na ngando jimbi tungu jesusu.

¹²Nalandoi na taka, nalandoi koko na lituna. Najebi boda na ligola, isa na nja, na leka lonené, isa na bokwali.

¹³Nahonkɔ ngando jesusu a tei ende yona opaka mbi ngulu.

¹⁴Endele ko, okɔini bopele a bokatana na mbi a minɔngɔ mimbi.

¹⁵Ino BaPilipo, ojebakani bo pεpε nongo dikwa Denga ditongo dijima na mbi a mojɔ mobopa na bosɔ bipeeli, oko no pε, yana adonga mbi a Makedonia a libangake lielomu eMwako Mopele.

¹⁶Nongo adaka mbi a Tεsalɔnike, olomeani mbi bipeeli bihole bibae a bokɔmeja mbi a taka embi.

¹⁷Yena edukaka mbi ko editi epeeli mεnε; nadukaka oko bo odaeni na mbuma jinεnε a mojɔ moesako enu.

¹⁸Mbi ko nasi leka losusu. Nadi na lituna lileka, mojɔ bo nasi toma eloma no na Epapulodito. Naditi koko na taka, na toma enu edi o epeeli esoo epele ejimaka Njambe, na emosepejaka.

¹⁹Njambe ombi adi bopa no ngando jesusu jia jitakaka na nu, oko na mwengi momakonja maekumu ende a tei eMasiya Yesu.

²⁰Ekumu ai Njambe Sangwa'su oko na bosusu. *Amen.*

²¹Abejεni bato basusu baDenga a tei eMasiya Yesu. Baninga baya badi na mbi ya babεjεkε no.

²²Bato baMasiya basusu babεjεkε no, gbo oko baya badi bakɔmeli bandako eKaisala.

²³Yε monganji moKumu osu Masiya modae na miembo minu.

Bakɔlɔsai

Bakɔlɔsai 1

¹Paulo, obwənji oMasiya Yesu oko na bolulea boNjambe, na Timoteo mwangwa'su,

²ai bato baDenga, na ai baninga basusu balisuma ai Masiya a Kɔlɔsai. Yε monganji na bowi boNjambe Sangwa'su bodaе na nu.

³Iso bosakoaka Njambe, Sange 'Kumu osu Yesu Masiya a mojɔ monu, na bongaka a mojɔ monu bihole bisusu,

⁴cina bo boka mwako moejimeli enu ai Masiya Yesu, na epaeli enu ai bato basusu baejimeli,

⁵a mojɔ monjingo yena ehengemε oho Diko a mojɔ monu. O'kani mojɔ monjingo emina boso oko na bikenge bisoti, bikenge biMwako Mopele.

⁶Mwako momina momea ai no, mojɔ bo monanganaka a ngondo esusu. Mobotaka mbuma na mokɛkε bohε; modi oko boa a tei enu pongono, banga na busa boka no, na bojeba no, cina emonganji moNjambe na soti.

⁷Okoani mojɔ momina na Epapala, moninga osu oepaeli a elomu. Iyo adi mokɔmeli osoti oMasiya a mojɔ monu,

⁸na ajebja so mojɔ moepaeli enu a tei eMwembo.

Bonga boPaulo

⁹Iso bobanga bonga Njambe a mojɔ monu a busa boka so mojɔ momina, na botakinaka bonga. Bongaka bo olumeni na ejebeli ebolulea boNjambe, oko na bowei na bocingea bosusu boMwembo,

¹⁰bo odaeni na mida mia midi bokumeja kombe eKumu, mia midi bomosepeja na soti, na bo obotenı mbuma a tei ebilomu bisusu bipele, na bo ohɔeni na ejebeli eNjambe.

¹¹Yε ngulu ende yena enɔi, epingejae no na ngulu esusu, bo ohɔneni mijɔ misusu na lingbangba, na eci, na sepi pongono.

¹²Sakoani Sango yona obɔngejai so bo bosangoe libondo lihsango libasenɔke a bohu.

¹³Iyo ahelejai so a ngulu emodidi, na akwejai so a Bokumu boMwana'nde ongɛnɔjɔ.

¹⁴A tei ende, iso bodi na lisiko, bo yε bojibe.

Ekumu eYesu

¹⁵Iyo adi elimo eNjambe yona odi so pε bone na miso; adi Sɔmi obato basusu bayoama.

¹⁶Leka losusu loyoama na nde, oho Diko na ya nase; leka lonɛke so na miso, na leka lodi so pε bone na miso, na bakumu na makumu, kpaci na ngulu—ngando jesusu jiyoama na nde, na a mojɔ monde.

¹⁷Iyo adi boso bongando jesusu, na ngando jesusu jicingi na nde.

¹⁸Denga didi mokuku monde, na yo adi molo. Iyo adi libangake. Iyo abotama boso a tei ebagwake bo adae boso bongando jesusu.

¹⁹Mojɔ bo Njambe ajima na bolulea bonde bopele bo bonjambe bonde bosusu boda a tei ende,

²⁰bo yo adae mosili, na abakea mokongo mobosiili na makia mande a mole-mobokea, a bohuleja ngando jesusu ai yo mɛnɛ, isa oho Diko isa ya nase.

²¹Ino odakani na lipɔlɛ ai yo; odakani na nde soki a milema minu, bato babikɔmeli bibe.

²²Iyo ko akwea bosili, na akataneja no koko a njea ebogwa bomokuku monde, bo amejae no a boso bonde na boseñɔ, pɛpɛ nongo litɔñɔ, pɛpɛ nongo mojɔ,

²³okayeyoani bambilimake na ngbi a ejimeli, pε nongo bodonga a njingo eMwako Mopele moka no. Mwako momina motɔndɔmɔ ai bato basusu ya nase, na mbi Paulo nahɛngemɛ ho nadae mokɔmeli omwako momina.

Elomu ePaulo ai Bapakano

²⁴Mhi nasepaka e deye a mojɔ mominɔngɔ minɛkε mbi a kombe enu. Masiya adingoaka a mini mimbi a mojɔ momokuku monde, oko Denga dinde; na mbi napalaka bo nabwanejae libondo limadingoa mamina.

²⁵Mojɔ bo nadi mokɔmeli oDenga cina ekpací esɔ mbi ai Njambe a mojɔ monu, bo natɔndɔe Mwako moNjambe kanga mosusu mɛnɛ,

²⁶oko mojɔ mua modaka mobombamake ekoka enɛnɛ mɛnɛ ai bilulu binɛnɛ; moboloi ko e deye ai baejimeli baNjambe.

²⁷Mojɔ bo Njambe ajima bo abanejae bo mojɔ mu mobo-mbamake modi mojɔ moekumu enɛnɛ mɛnɛ a tei ebapakano,—cina emina edi Masiya a tei enu, njingo eekumu.

²⁸Iso botɔndɔkɔ mwako monde; bolehaka bato basusu, na bokojaka bato basusu na bowei bosusu, bo bokwejae a boso boNjambe moto na moto mobɔngɔke a tei eMasiya.

²⁹Elomu ekɔkɔ mbi edi oko a mo jɔ momina; naekɔkɔ na molema mombi mosusu, oko na ngulu ende yena elindaka mbi na bopipo.

Bakɔlɔsai 2

¹Napalaka bo ojebeni bo nanaka bila enεnε a mojɔ monu, a mojɔ moBaLaodikea, na bato basusu bay a banɛkini boso bombi na miso.

²Nakɔkɔ boa bo Inilema Mibu mihεe na eci o akatanaka ho na epaeli, na bo babɔnge a mojɔ mobowei bosoti a bocingea mojɔ mobombamake moNjambe, oko Masiya.

³Mijo misusu miyumu Mibowei na miejebeli midi a tei ende.

Bileho a Mojɔ Momwako Mobokosea

⁴Nabali boa, bo moto asaka kosea no na bikenge biepulu.

⁵Nadi na nu bohali; endele ko nadi na nu a mwembo, na nanɛkε na sepi mεnε mida minu mingebenɛkε, na ejimeli enu embilimake a tei eMasiya.

⁶Oko boa, ami no sɔ Kumu Yesu Masiya, toma dalani a tei ende oko boa.

⁷Kinani njeli jinu jidae a tei ende; dani bambilimake a diko dieyoeli ecina yena edi a tei ende, o asɔ no bokoja; dani koko na bosakoa bonεnε ai Njambe.

⁸Toma nganjamani bo moto atakosea no na bikenge bibowei, na mijɔ mingasangasa mia mihilaka ai bato pε, na micingi na ejimeli a miembο mingondo, te nongo na Masiya.

⁹Mojɔ bo bonjambe bosusu mεnε bodi a tei eMasiya o mokuku,

¹⁰na bomɔ bodi bolumeja no, oko a tei ende yona odi Kumu omakumu masusu na bakumu basusu.

¹¹Ino o'sɔni embete ebolena-ganda te nongo a mɔmɔ mabato a bodongeja mini mimokuku, oko ai Masiya na bolena bonde;

¹²na opuseamani na nde a batismo, na ongɔni koko a bogwa oko na nde, a mojɔ moejimeli a ngulu eNjambe yona omongojɔ a bogwa.

¹³Njambe amopa bomɔ, na apa no bomɔ a tei ende, oko no bay a badaka bagwake a tei ejibe, pεpε nongo embete ebolena-ganda a mokuku, na akina jibe jinu jisu.

¹⁴Ahakoa mokanda momijɔ mia midaka o nongo jisu, na aseja mojɔ momina; aebakea a mole-mobokea monde na kala.

¹⁵Abeja makumu na bakumu; abasambo-ja a boso bobato na abagbokeja a mole-mobokea.

¹⁶T'ojimeni oko bo moto asambejae no a mojɔ moboyaka na bomwaka, isa a mojɔ momabonje, na Sabata, na ekɔmeli enu yana atekε songe.

¹⁷Ngando ji jesusu jidi oko esie pε engando jia jidi boda ngɔngɔ; mokuku mεnε modi oko Masiya.

¹⁸T'ojimeni oko bo obungejaeni ndese enu a mojɔ momoto yona obekeaka no bo osatitejaeni a bosakoa babwεnji badiko. Moto omina alekε oko mijɔ minjɔti pε, na egbo emolema monde mobe.

¹⁹Aciniti nongo na Molo; mojɔ bo bmama bisusu bimokuku bikatani a mojɔ momongi na sisa, na mokuku mosusu mokandoaka na ngulu eNjambe.

²⁰Isa ogwani na Masiya a mijɔ mingondo, odini na ekɔmeli ebato bangondo mojɔ moye?

²¹Osumakani Mibeko mi mojɔ moye?—Yε bobakea ebɔ a eka emina; yε boyaka eka emina; yε bopea eka emina,

²²(oko leka lua logwaka a elomu) Ngando Jimina jidi oko Mibeko na bokoja bobato pε.

²³Jidi na bokina bowεi a miso mabato, a mojɔ mobosakoa bonεnε, na bosatiteja, na bodingoja bomokuku; endele ko, jidi oko ngasa mεnε, na jitakɔmejaka nongo a bogbojeja posa jimokuku.

Bakɔlsai 3

¹Ino, isa ongɔni na Masiya a bogwa, dukani ngando jidiko, a esika edi Masiya a ebɔ ebami eNjambe.

²Bakeani milema minu a ngando jidiko, te a ngando jinase.

³Mojɔ bo ino odini bagwake, na bomɔ bonu bobombami na Masiya a tei eNjambe.

⁴Masiya adi bomɔ bosu; iyo akamana a bohu ino ômanani na nde Pongono a ekumu.

Mida Mibato baMasiya

⁵A mojɔ momina toma wejani ngando jingondo ye a tei enu, bɔɔli, mijɔ Mibosambolu, lisɔngi, posa jibe, mbengea. (Mojɔ momina modi bosakoa bobokosea.)

⁶Kenjɔ eNjambe edi ai bana balipanga a mojɔ mongando Jimina.

⁷Ino odakani na bikɔmeli bimina yana adaka no a tei engando Jimina.

⁸E dεye ko, toma dumbani ngando ji jesusu; kεle, kεnjo, ekɔmeli ebe, bolɔngɔ, bikenge bibosambolu a minɔkɔ minu.

⁹T'okoseanani oko, mojɔ bo ohwani moto moyou na bikɔmeli binde,

¹⁰na olwani moto moyene yona odi na elimo eyene, oko elimo ende yona omoyoa a mojɔ moejebeli ende.

¹¹A eyoeli emina, bato baditi BaEla isa BaYuda, bato babolena-ganda isa pε bolena-ganda, isa bato babohali, isa BaSukutea, isa babuli, isa basɔmi; mojɔ mosusu modi Masiya a tei ebato basusu.

¹²Njambe ahɔ no, basenɔke na bato baepaeli. A mojɔ momina kwani elwali enu edae milema miwa, na peye, na bosatiteja, na bo yεmbu, na bowi.

¹³Isa moto adi na moto otongo mojɔ, aditi bokεnɔ na nde, adi bomoyε. Masiya a yε no; oko boa toma yεnu Pongono.

¹⁴Ngenjɔ ko enɔi ngando ji jesusu; ekatanejaka na boka-tana bosoti.

¹⁵Kinani bowi boMasiya boda na bokumu a milema minu; obeamani bo odaeni mokuku momɔci oko a mojɔ momina. Dani koko na bosakoa.

¹⁶Kinani Ebæli eMasiya edae a tei enu, na enεnge a tei enu na bowεi bosusu. Ikojanani na lehanani na njembo jiNjambe, njembo jibosakoa, njembo jiMwembo. Imbani njembo ai Njambe na sepi a milema minu.

¹⁷Okakɔni mokina mojɔ, isa bobala, isa elomu, kɔni ngando jesusu a kombe eKumu Yesu, na sakoani Njambe Sango a kombe ende.

¹⁸Ino bali, toma dani na lisuma ai bami banu; obwanini boda boa a tei eKumu.

¹⁹Ino bami, toma dani na ngenjɔ ai bali banu; pε bodani na bu bεlεbεlε.

²⁰Ino bεnge, toma sumani baboti banu a ngando jesusu; mojɔ momina mosepejaka Kumu.

²¹Ino basango, pε botukoani bana banu, bo milema Mibu misaka ngwa.

²²Ino bakɔmeli, sumakani baswa banu ya nase a mijɔ misusu; pε bokɔni elomu enu a miso mabu pε, a bosepeja bato; kɔni na milema minu misusu na lisuma ai Kumu.

²³Kɔni bilomu binu bisusu na bingi, o bakɔmeli baKumu, te bakɔmeli babato.

²⁴Jebani bo ôsɔni lisango ai Kumu o ndese enu. Kɔmεni Masiya Kumu.

²⁵Mojɔ bo moto yona okɔkɔ bobe âsɔ ndese ebobe. Njambe adi oko na mwεngi momɔci pε a mojɔ mobato basusu.

Bakɔ̄lsai 4

- ¹Ino baswa, anejani ekɔ̄meli epele ebɔ̄ngɔ̄ke ai bakɔ̄meli banu; pε bobosani bo ino bɛnɛ odini koko na Moswa'nu a Diko.
- ²Dani na lingbangba a bonga; sɛnjelɛni a bonga na sepi.
- ³Ingani a mojɔ̄ mosu pongono, bo Njambe ahojae njea ai so a botɔ̄ndɔ̄ mojɔ̄ mobombamake moMasiya; mbi nadi a minyɔ̄lɔ̄ oko a mojɔ̄ momina.
- ⁴Ingani bo nabolojae mojɔ̄ momina a bohu na ebaeli yena ebwani.
- ⁵Kinani bikɔ̄meli bmu bidae na bowɛi a mojɔ̄ mobato basokolu; pε bonamejani masu manu.
- ⁶Kinani epaeli ehenge ebaeli enu o ahengaka moto mia na mukwa, bo ojebeni bosɔ̄nibeja ebaeli yena ebwani ai moto na moto.
- ⁷Tukiko adi botɔ̄ndɔ̄ no mijɔ̄ mimbi misusu. Iyo adi mwangwa' mbi oepaeli, na mokɔ̄meli osoti, na akɔ̄mɛkɛ Kumu o akɔ̄kɔ̄ mbi.
- ⁸Mbi namolomi ai no oko a mojɔ̄ momina, bo ake mwako monu, na apingejae milema minu.
- ⁹Nalomi koko Onesimo, mwangwa'mbi osoti na oepaeli, yona odi moto onu bɛnɛ. Ibo badi bopa no mwako mosusu mosu jɔ̄nɔ̄.
- ¹⁰Alisitaluko, yona odi na mbi a blɔ̄kɔ̄, alomeaka no njɛhɛ, na Malako pongono, pakɔ̄ eBalanaba (o'sɔ̄ni monɔ̄kɔ̄ a mojɔ̄ monde; akadoa ai no, mo'sɔ̄ni bopele),
- ¹¹na Yesu yona odi na kombe Yuse-to; BaYuda baya bakɔ̄mejaka mbi a elomu eBokumu boNjambe, oko bo basato pε, na bagɔ̄mbejai molema mombi.
- ¹²Epapulo, moto onu bɛnɛ, alomeaka no njɛbɛ pongono. Iyo adi mokɔ̄meli oMasiya, na angaka a mojɔ̄ monu na bingi bihole bisusu, bo odaeni bato bapingake na bambilimake a bosuma bolulea boNjambe bosusu.
- ¹³Mbi nadi monjɛnɛki obingi ende a mojɔ̄ monu, na a mojɔ̄ mobato baLaodikia, na bato baYelaphi.
- ¹⁴Luka, monganga oepaeli, na Dema, babɛjɛkɛ no njɛbɛ.
- ¹⁵Abɛjɛni baninga baLaodikia; abɛjɛni Numpa, na Denga lia lidi a ndako ende.
- ¹⁶Okasiejani bolanga mokanda mu a tei enu, pε bobosani bo bamolange a Denga diLaodikia; ino ko toma langani mokanda moLaodikia pongono.
- ¹⁷Pani Alukipo monɔ̄kɔ̄ mu; Banea elomu esɔ̄ wε ai Kumu, bo okɔ̄e elomu emina na soti.

¹⁸Asɔni njεbe embi Paulo na ebo embi embi mεnε. Pe bobosani minyɔlɔ mimbi. Yε monganji moNjambe modae na nu.

1 Batesalōnike

1 Batesalōnike 1

¹Paulo na Sakwano na Timoteo a Denga diBaTēsalōnike dia didi a a tei eNjambe Sango na Kumu Yesu Masiya. Yε monganji moNjambe na bowi bodaе na nu.

Ejimeli eBaTēsalōnike

²Iso bosakoaka Njambe bihole bisusu a mojɔ monu, na bota-bosaka no nongo mweka a ma'nga masu.

³Mojɔ bo bolɛkε elomu eejimeli enu, elomu enu eepaeli, na njingo enu yena etambɛkε, ai Kumu osu Yesu Masiya, a boso boNjambe Sangwa'su.

⁴Baninga, Njambe adi na nu ngɛnjo, na so bojebaka bo yo ahɔ no.

⁵Mwako Mopele mosu moidoa ai no na kɔpi pε; modoa na ngulu, na Mwembo Mosenɔke, na ejimeli enenε. Ojebakani ekɔmeli yena edaka na su a tei enu a mojɔ monu.

⁶Okoanani na su, na Masiya pongono, yana asɔ no Ebæli a minɔngɔ minenε, na osepani na sepi eMwembo Mosenɔke.

⁷Oko boa onejani ekoaneli ai bato basusu baejimeli a Makedonia na a Akaya.

⁸Mojɔ bo onanganejani Mwako Mopele moKumu, te a Makedoma na a Akaya pε; bato bajebaka mojɔ moejimeli enu a bisika bisusu, so bɛnε pε bobatɔndɔ.

⁹Bato bamina babalaka a mojɔ mobodoa bosu ai no, bo o'sɔni so bopele, na bo okwani bosakoa bobilimo, na ohekoani ai Njambe, a bokɔmɛ Njambe osoti na obomɔ,

¹⁰na a bo'mba bohula boMwana'nde oho Diko yona ongɔjɔ yo a bogwa, oko Yesu yona ohelejaka so a likundu lia likekɛ adoe.

1 Batesalōnike 2

Elomu ePaulo a Tēsalōnike

¹Baninga, ojebakani no bɛnε bo mɔngɔ moke so ai no moidaloa nongo.

²Nongo ama so dingoa na ama so samboa a Pilipoi, bomi hε oko na eci eNjambe, o ajebaka no, a botɔndɔ no Mwako Mopele moNjambe o bila mɛnε.

³Eleho esu editi na bokosea, isa bosɔtɔ, isa epulu.

⁴Iso botɔndɔkɔ mwako a bokumeja Njambe yona onjaka milema misu, te a bosepeja bato; mojɔ bo Njambe yo mɛnε ajima bo akine Mwako Mopele a mɔmɔ masu.

⁵Ojebakani no bēnē bo boitombea no na bibaeli bisu. Na boimeka bodiha likonja na poloso; Njambe yo mēnē adi monjēnēki osu.

⁶Boipala bo bato bakumejae so, isa no bēnē, isa bato batongo. Nongo adaka so babwēnji baMasiya, boipala bo bodaе muna ai no.

⁷Bodaka na bo yēmbu mēnē a tei enu, o ekōmeli emwali yona obimbaka bana bande lipaapoko.

⁸Oko boa, adaka so na epaeli enēnē ai no, bodaka na posa a bopa no milema misu bēnē, te Mwako Mopele moNjambe pē, mojō bo bodaka na nu ngēnjō.

⁹Baninga, otabosakani elomu na monōngō mosu. Yana atōndōkō so Mwako Mopele moNjambe a tei enu, bokōkō elomu mabulu na mei bo botada nongo muna ai no.

¹⁰Ekōmeli esu a tei enu baejimeli edaka esēnōke na bojo, pēpē nongo mojō; ino bēnē odini banjēnēki bamojō momina, na Njambe pongono.

¹¹Ojebakani bo bodaka na nu basusu o adi sange ebana na bana bande. Boleha no moto na moto, bopingeja milema minu, na bongōcōno no

¹²bo okumejaeni Njambe na mida minu, oko Njambe yona obea no a Bokumu bonde na ekumu ende.

¹³Yana asō no bwēnji ai so, oko Ebæli eNjambe, oesōni o Ebæli eNjambe mēnē, te ebæli ebato. Iso bosakoaka Njambe bihole bisusu a mojō momina. Mojō bo edi Ebæli eNjambe soti, yena ekōkō elomu a tei enu baya bajimaka.

¹⁴Banninga, odakani bakoaneli baMenga maNjambe a tei eMasiya oho a Yuda; mojō bo ino o'sōni minōngō ai bato balikota linu bēnē, o asō bo ai BaYuda.

¹⁵Mojō bo BaYuda bawa Kumu Yesu, na bawa batōndōi, na babengana so; bakejaka Njambe kēlē, na badi na bato basusu soki.

¹⁶Batandanejaka so bo bosaka tōndō bapakano Mwako Mopele bo bahele. Oko boa balume—jaka mwēngi mojibe jibu bihole bisusu. Likundu ko liNjambe limei oko ai bo.

¹⁷Banninga, adaka so na nu bohali ekina ehole, te a molema oko a mokuku, bodaka na posa enēnē mēnē a bo'nēnē na nu.

¹⁸Bokana bo bodoе ai no—mbi Paulo nakenga bihole bmēnē—Satana ko adipa so njea.

¹⁹Njingō esu, na ekumu esu, na likongo lisu lisepi nda, a boso boKumu osu Yesu a bodoа bonde? te no?

²⁰Mojō bo ino odini ekumu esu na sepi esu.

1 Batesalōnike 3

Məngɔ moTimoteo a Təsalōnike

¹Mojɔ momina mogbasoa na su oko bogbasoa. A mojɔ momina, bojima bo mbi nadikae a Atena mbi buki.

²Na boloma mwangwa'su Timoteo, mokɔmeli oNjambe, a elomu eMwako Mopele moMasiya. Bomoloma bo ambilimejae no a ejimeli enu, na a boleha no,

³bo pəpə nongo okina onu ombe a mojɔ mominɔngɔ mi. Ojebakani no bənɛ bo minɔngɔ midi oko libondo lisu.

⁴Iso botomba botɔndɔ no eyou, yana adaka so a tei enu, bo bodi bonɛ minɔngɔ; na ojebakani e dəye bo modi oko boa.

⁵A mojɔ momina, naihɔnɔ bo'mba koko, na naloma bo najebe mojɔ moejimeli enu. Nadaka na mokakwano bo Momeki asaka meka no, na elomu esu esaka nama.

⁶Timoteo ko adongi oho ai no na amei ya. Na yo atɔndɔi so mwako mopele moejimeli enu, na epaeli enu. Ajebajai so koko bo odini na bole bopele ai so masu masusu, na bo odini na posa a bonɛne na su, o adi so na posa a bonɛne na nu.

⁷A mojɔ momina baninga, nongo adi so na minɔngɔ na jɔɔlɔ so bənɛ, ejimeli enu esejai mokakwano mosu a mojɔ monu.

⁸Mojɔ bo, adi no bambilimake a tei eKumu, o so boheli.

⁹Iso bodi bosakoa Njambe na ye, a mojɔ monu? Cina bo bosepaka na enanga a mojɔ monu a boso boNjambe.

¹⁰Na bongɔnɔkɔ na bingi enɛnɛ na bulu na moi, bo bonɛnɛ na nu, a bobɔngeja ejimeli enu isa etaki na eka.

¹¹Yε Njambe Sangwa'su yo mɛnɛ, na Kumu osu Yesu, bapɛ so njea ai no.

¹²Yε Kumu ahɛjɛe epaeli enu egbasoake mɛnɛ, moto ai mina'nde moto, na ai bato basusu, o apalaka so no.

¹³Yε ambilimejae milema minu bo midae misenɔke, pəpə nongo litɔnɔ, a boso boNjambe Sangwa'su, a bodoa boKumu osu Yesu na basenɔke bande basusu.

1 Batesalōnike 4

Moda Mobato baMasiya

¹Mojɔ motongo baninga; okoanani na su ekɔmeli yena ebwani na nu a bosepeja Njambe. Oko boa bongɔnɔkɔ no, na bolehaka no e dəye a kombe eKumu Yesu,

bo odaeni na ekɔmeli emina. Okɔkɔni boa; endele ko, toma nɔjɔni mwɔngi momina.

²Ojebakani bokoja bosɔ so ai Kumu Yesu a bopa no.

³Bolulea boNjambe bodi oko bo odaeni bahɛngemɛke ai yo, bo obɔtɔneni na edukeli,

⁴bo moto na moto onu ajebe bosɔ mwali onde mɛnɛ na bosɛnɔ na lisuma,

⁵te nongo na posa na lisɔngi o akɔkɔ bapakano baya batajebaka Njambe.

⁶Moto abwaniti bokosea, isa bokɔ bobe ai mwangwa'nde na mojɔ momina. Mojɔ bo Njambe akundaka likundu a mojɔ mojibe jia jesusu, o aleha so no na bopipo ehele.

⁷Njambe aibea so bo bodaen na bosɔtɔ; abea so bo bodaen na bosɛnɔ.

⁸Oko boa, moto akasɛtoja ebaeli ye, atasɛtojaka moto; asɛtojaka oko Njambe yona opaka no Mwembo Mosɛnɔke monde.

⁹Ebɔngiti bo nasɔnee no a mojɔ moepaeli ai baninga, mojɔ bo Njambe yo mɛnɛ akoja no bo opalaneni.

¹⁰Na ekɔmeli enu edi boa soti ai baninga basusu baya badi a Makedonia. Pe mojɔ; bole-haka no koko bo ohɛeni koko na epaeli bou mɛnɛ.

¹¹Kinani mida minu midae na bombɔki. Lени mijɔ minu bɛnɛ. Kɔni bilomu na mɔmɔ manu, o aleha so no boso.

¹²Oko boa, bato bangondo badi bone ekɔmeli enu epele, na otadani nongo na taka.

Bodoa boMasiya

¹³Baninga, botapalaka bo odaeni a libumi a mojɔ mobato baya bagwa. Obwanitini bobaye a o akɔkɔ bato batongo baya bapeliti nongo njingo.

¹⁴Mojɔ bo, bokajima bo Yesu agwa, na bo angɔ koko a bogwa, oko boa, Yesu akadoa, Njambe adi bohuleja baya bagwa, oko na Yesu.

¹⁵Bobalaka na nu oko ekenge esɔ so ai Kumu; iso baya badi mɔ, baya bâdika ya oko a bodoa boKumu, botanɔ boso bobato baya bagwa.

¹⁶Mojɔ bo, mosuku obabwɛnji baDiko âdumbea na kɔpi epipo, na mondule moNjambe mohweama. A ehole emina, Kumu yo mɛnɛ âdonga a Diko, âtita na bobekoa bonɛnɛ, na baya bagwa a tei eMasiya bângɔ boso.

¹⁷Ngɔngɔ jibu, so baya bâdika mɔ, bôtombama na bu a ehole emɔci a tei ebiyembi, bo bolenoane Kumu oho ta busa, na bôda na Kumu boa oko na bosusu mɛnɛ.

¹⁸A mojɔ momina, toma gɔmbejanani milema na bikenge bimina.

1 Batesalɔnike 5

¹Baninga, ebɔngiti bo nasɔnee no a mojɔ bianga na bididi.

²Ojebakani no bɛnɛ bo Busa boKumu bodi bodoa o adoaka mobi na bulu.

³Yana abalaka bato bo, Bowi! Bopele! bigbili bidoa bundumo ai bo a ehole emina, na batanɛ nongo njea ehohela.

⁴Ino baninga ko oditini a modidi bo busa bomina bodoe ai no na mbɛmbɛ emobi.

⁵Odini basusu bana babohu, bana bamose; boditi bato babulu na bamodidi.

⁶Oko boa bobwaniti bohwɛ hiɔ o akɔkɔ bakwa; bobwani boda oko misu bo bosənjɛle.

⁷Bay a bahwɛkɛ, bahwɛkɛ na bulu, na bay a balangoaka, balangoaka na bulu.

⁸Iso ko, bato babohu, bobwani bosənjɛle na bolwa ebende ebupa, yena edi ejimeli na epaeli, na kɛsike eebende a molo, yena edi njingo ebohela.

⁹Mojɔ bo Njambe ahɔ so bo bohele a mojɔ moKumu osu Yesu Masiya, te a mojɔ mokənjo.

¹⁰Yesu Masiya agwea so bo bodes na nde, isa a bogwa isa a bomɔ.

¹¹A mojɔ momina, lehanani na pingejanani, o akɔkɔ no.

¹²Iso bongɔɔnɔkɔ no baninga bo odaeni na lisuma ai bato baya bakɔkɔ elomu a tei enu, baya badi basuku banu a tei eKumu na balehaka no.

¹³Dani na epaeli enɛnɛ ai bo a mojɔ moelomu ebu.

¹⁴Iso bongɔɔnɔkɔ no baninga bo oleheni baya balaboaka; pingejani milema Mibato baya bangwai; mbilimeja ba yɛmbu; dani na lingbangba ai bato basusu.

¹⁵Nganjamani bo moto atasɔmbeja bobe oko na bobe; dukani njea a bokɔ bopele, moto ai mina'nde moto, na ai bato basusu.

¹⁶Sepani bihole bisusu.

¹⁷Ingakani, pɛ bokina.

¹⁸Sakoani Njambe a mojɔ mongando jisusu, mojɔ bo Njambe apalaka bo Okɔeni boa a tei eMasiya Yesu.

¹⁹T'obumeeni oko Mwembo.

²⁰Pɛ bosətojani biseko.

²¹Kokelejani ngando jesusu, na jimani oko jia jidi jipele.

²²Toma kiani tungu jibobe jesusu mene.

²³Ye Njambe obowi yo mene aseñojae no bopée, na abanee no bopele, oko mwembo, na molema, na mokuku, pere nongo mojo, oko a bodoa boKumu osu Yesu Masiya.

²⁴Iyona obea no atakputoja sako, na yo adi hoko.

²⁵Baninga, ingakani a mojo mosu.

²⁶Abejeni baninga basusu njebé na bohia boseenke.

²⁷Mbi nalehaka no a kombe eKumu bo olangeni mokanda mu ai baninga basusu.

²⁸Ye monganji moKumu osu Yesu Masiya modae na nu.

2 Batεsalɔ̄nike

2 Batεsalɔ̄nike 1

¹Paulo na Silwano na Timoteo, a Denga diBaTεsalɔ̄nike dia didi a tei eNjambe Sangwa'su na Kumu osu Yesu Masiya.

²Yε monganji na bowi boNjambe Sango na Kumu Yesu Masiya bodae na nu.

Ejimeli eBatεsalɔ̄nike

³Baninga, iso bobwani bosakoa Njambe bihole hisusu a mojɔ monu. Mojɔ momina mohɔngi, cina bo ejimeli enu ekɛkɛ bohε bou mεnε, na epaeli enu, moto ai mina'nde moto, ehɛkɛdea pongono.

⁴A mojɔ momina, so bosakoaka no a Menga maNjambe, a mojɔ molingbangba na ejimeli enu, a tei eminɔ̄ngɔ na madingoa masɔ̄kɔ no.

⁵Mojɔ momina modi embete bo Njambe asambejaka bojo; odingoakani a mojɔ moBokumu boNjambe, na yo abɔ̄ngejaka no a mojɔ moBokumu bomina.

⁶Na Njambe akadingoja baya badingo-jaka no, asambejaka oko bojo,

⁷na âhemeja so na no baya badi-ngoaka, a busa bômana Kumu osu Yesu oho Diko na bahwεnji bande bapipo,

⁸a bokunda likundu na mosa ai baya badi pε bojima Njambe, na pε bosuma Mwako Mopele moKumu osu Yesu.

⁹Ibo bâdingoa na bodumba bua bodi na bosusu, na bâda na boso boKumu na ekumu engulu ende, kanga bohali mεnε

¹⁰yana âdoa yo, bo basεnɔke bande bamokumejae, na bato basusu baya bajimaka bakamoe a busa bomina (cina bo ojimani tati esu a tei enu).

¹¹A mojɔ momina, so bongaka bihole bisusu a mojɔ monu, bo Njambe abɔ̄ngejae no a mojɔ mobobea bonu; yε abɔ̄ngejae na ngulu ende mikano minu misusu mipele, na bilomu bisusu biejemeli enu,

¹²bo kombe eKumu osu Yesu Masiya edae na ekumu a tei enu, na bo odaeni na ekumu a tei ende, cina emonganji moNjambe osu naKumu Yesu Masiya.

2 Batεsalɔ̄nike 2

Bodoa boMasiya

¹Baninga, a mojɔ mobodoa boKumu osu Yesu Masiya na bobolea bosu ai yo, bongɔ̄nɔ̄kɔ no

²bo otasanɔngejani, na bo otakakwanani a milema minu, isa a mojɔ momwembo, isa ekina ebaeli, isa mokina mokanda mobalaka bato bo mosɔnɔmɔ na mbi, bo Busa boKumu bomei.

³T'ojimeni oko bo moto akosee no nongo mweka. Mojɔ bo bopengoa bonɛnɛ bôpeta da oko Busa bomina bomeakini; na Moto oBobe adi bopeta mana, oko Mwana oMokindo,

⁴na Soki yona osakumejaka bo anɔi Njambe mɛnɛ, na bo anɔi mijɔ misusu misakoaka bato. Adi boda a tempelo eNjambe, na âsakumeja bo yo adi Njambe.

⁵Obosaini bo mbi natɔndɔ no mijɔ mimina yana adaka mbi oho ai no?

⁶Na ojehakani bo mokina mojɔ momo-mbɛjɛkɛ bo asaka mana oko ehole ende ebwanakini.

⁷Mojɔ bo Ndungu eBobe ekɔkɔ elomu ende oko e dɛye; endele ko, yona omo-mbɛjɛkɛ e dɛye adi bomombɛjɛ oko a ehole ende ebodonga.

⁸Yona Mobe asa ko amane. Kumu Yesu ko adi bomowa na mohuli momo-nɔkɔ monde, na âmoghoneja na ekumu ehodoa bonde.

⁹Yona Mobe ko akamana, âda na ngulu esusu eSatana, na âkɔ bimbete, na mindumba Mibokosea

¹⁰na epulu enɛnɛ ebobe, a mojɔ mobato bay a badi bogwa, cina bo balona epaeli eSoti bo bahele.

¹¹A mojɔ momina, Njambe adi boloma ekina ngulu elaboake a tei ebu bo bajimee oko bokosea.

¹²Oko boa, bato basusu bay a baijimea Soti na basepa oko na bobe, bâdumbama oko bodumbama.

¹³Baninga, Kumu adi na nu ngɛnɔ; na so bobwani bosakoa Njambe bihole bisusu mojɔ bo Njambe ahɔ no oko a libangake bo oheleni, oko na hosenoja boMwembo, na cina eejimeli eSoti.

¹⁴Iyo abea no na Mwako Mopele mosu oko a mojɔ momina, bo osɛni ekumu eKumu osu Yesu Masiya.

¹⁵Oko boa baninga, dani bambilimake; peani boku bokoja bossɔ no ai so, isa na monɔkɔ, isa na mokanda.

¹⁶Yε Kumu osu Yesu Masiya yo mɛnɛ, na Njambe Sangwa'su, yona opala so na opa so bogɔmbeja bua bodi na bosusu, na njingo epele oko na monganji monde. Yε agɔmbejae milema minu na ambihmejae no a bilomu bisusu bipele, na bikenge bisusu bipele.

2 Bat̄sal̄nike 3

Bileho Bisuka

- ¹Mojo motongo baninga,—mgakani a mojo mosu, bo Ebaeli O eKumu enangane na egbokejae o akɔi yo a tei enu.
- ²Ingakani bo bohele a mɔmɔ mabato babe balaboake; mojo bo bato basusu bapeliti ejimeli.
- ³Kumu ko atakputoa. Iyo âmbilimeja no, na âkakela no ai Yona Mobe.
- ⁴Iso koko bodi na ejimeli ai Kumu a mojo monu, bo okɔkɔni na bo Okɔeni ngando jilehaka so no.
- ⁵Yε Kumu adalejae milema minu a njea engenjε eNjambe, na a lingbangba liMasiya.
- ⁶Iso bobekēaka no baninga a kombe eKumu osu Yesu Masiya bo obɔtɔneni na baninga basusu baya badi na ekɔmeli ebe, baya badi pε bosuma bokoja bossɔ no ai so.
- ⁷Ojebakani no bɛnɛ bo obwanini bokoana na su, mojo bo ekɔmeli esu a tei enu eidaka ebe.
- ⁸Boiyaka molembε momoto ngasa. Bokɔ elomu na bulu na moi, elomu epipo emidungu, bo botada nongo muna ai no.
- ⁹Te bo boibwana bossɔ monganji monu; bokɔ boa bo okoaneni na ekoaneli esu.
- ¹⁰Mojo bo, bopa no mobeko mu yana adaka so na nu, bo, Moto amiti kɔ elomu, atayaka.
- ¹¹Iso bokaka mwako mobakina banu baya badi na ekɔmeli ebe, pε bokɔ nongo elomu, na balekε oko mijɔ Mibato batongo pε.
- ¹²Iso bobekēaka na bolehaka bato baya badi na ekɔmeli emina, a kombe eKumu Yesu Masiya, bo bakɔe elomu na yongi, a bodiha molembε mobu bɛnɛ.
- ¹³Ino ko baninga, t'ongwaeni oko bikɔmeli bipele.
- ¹⁴Moto akalona bosuma mijɔ Mibalaka so a mokanda mu, mombeteani; t'okataneni oko na nde, bo omokejaeni sɔni.
- ¹⁵Pε ko bomonjani o soki enu; molehani o mwangwa'nu.
- ¹⁶Yε Kumu obowi yo mɛnɛ apε no bowi bihole bisusu a njea jisusu. Yε Kumu adae na nu basusu.
- ¹⁷Mbi Paulo nasɔnɔko njεbε ye na ebo embi mɛnɛ; edi embete embi a mikanda mimbi misusu. Bosɔnɔ bombi bodi oko boa.

18Yε monganji moKumu osu Yesu Masiya modae na nu basusu.

1 Timoteo

1 Timoteo 1

¹Mbi Paulo, obwənji oMasiya Yesu cina emobeko moNjambe Moheleja osu, na moMasiya Yesu njingo esu, ai Timoteo mwana'mbi osoti a tei ejimeli.

²Yε monganji, na wa, na bowi boNjambe Sango na Masiya Yesu Kumu osu bodae na wε.

Mijo Mibokosea na Mwako Mopele Mosoti

³Nalejekε wε eleho epa mhi wε yana akε mbi a Makedonia, bo oyeyoe a Epesɔ a boleha bakwa bato bo batakoja bokina bokoja botongo,

⁴na bo batajima masɔ, na kombe jimbottambota pε suka, jia jingɔjɔkɔ kitε pε; jitakɔmejaka elomu eNjambe a mojɔ moejimeli.

⁵Cina eeleho esu edi oko epaeli yena emanaka a molema mosenɔke, na bolε bopele, na ejimeli esoti.

⁶Bakina bato ko balaboa a ngando Jimina, na bahekua a bobala mijɔ mia mipeliti nongo cina.

⁷Bapa-laka bo bade bakoja baMibeko, na batacineaka ema ebikenge bibalaka bo, na mijɔ mitɔndɔkɔ bo na bopipo.

⁸Iso bojebaka bo Mibeko midi mipele, isa moto akɔkɔ ngando jia jibwani na Mibeko.

⁹Bojebaka bo Mibeko miditi a mojɔ mobato baya badi bojo, oko a mojɔ mobato baya bapeliti lisuma, bato balipanga, bato baya bapeliti ejimeli ai Njambe, bato babe, bato babosambolu, na babosetɔ, bawoi babasango, na bawoi babanango, na bawoi babato,

¹⁰bato babɔɔli, bami baya basabejaka na bami, bato baya ba'baka bato oko bo'ba, bakosei, batati babokosea, na ngando jisusu jitongo jia jita-bwanaka na bokoja bosoti

¹¹boMwako Mopele moekumu eNjambe obojongoa, mua mosɔ mbi a bobanea.

¹²Mbi nasakoaka Masiya Yesu Kumu osu yona opani ngulu, mojɔ bo yo ajima bo nadi na lisuma, na ahɔ mbi a mojɔ moelomu ende;

¹³oko mbi yona odaka boso moto opɔmbɔli, mbi yona omodingoja na omotangola. Iyo ko akeani wa, mojɔ bo nama kɔ boa cina elibumi na kitε.

¹⁴Na monganji moKumu osu mopetaoa bou mεnε ai mbi, na ejimeli na epaeli jia jidi a tei eMasiya Yesu.

¹⁵Ekenge ye edi soti, na ebwani bo boesε na ejimeli esusu, bo Masiya adoa a ngondo a boheleja bato babe. Mbi nadi kumu obato babe;

¹⁶endele ko, nasɔ wa eNjambe, bo Yesu Masiya apete neja lingbangba linde a tei embi, na bo nadae ekoaneli ai bay a badi bomojimea ngɔngɔ, a bosɔ bomɔ bua bodi na bosusu.

¹⁷Ee, ekumu na lisuma ai Kumu yona odi na bosusu, yona oditi na bogwa, yona otaboloaka na miso, yona odi Njambe omɔci pε. *Amen.*

¹⁸Mbi nalehaka wε Timoteo mwana'mbi na eleho ye; ebwani na bileho bipa batɔndɔi a mojɔ mowε boso, bo, lna bila epele.

¹⁹Pea ejimeli boku na molema mopele pongono. Bakina bato balona mojɔ momina, na bapengoi a njea eejimeli.

²⁰Umenalo na Alesandele badi a libondo limina. Mbi ko nabahεngei ai Satana bo bacinee na bakine botangola Njambe.

1 Timoteo 2

Mojɔ Mobo'nga

¹Eleho embi eboso edi a mojɔ mobo'nga, bo bingeeli na mangɔnɔ na masakoa madae a mojɔ mobato basusu;

²a mojɔ moba-kumu, na bato bay a badi na kpaci, bo boda bogo na bo mohelo mosu modae na bowi, oko na yongi na lisuma ai Njambe.

³Mojɔ mu modi mopele, na mosepejaka Njambe Moheleja osu.

⁴Iyo apalaka bo bato basusu bahele, na bo badae na ejebeli eSoti.

⁵Mojɔ bo Njambe adi omɔci, na mosili adi omɔci a sibano eNjambe na bato, oko moto Masiya Yesu

⁶yona osapa yo mεnε, lisiko libato basusu. Iyo angameja mojɔ momina a ehole yena ebwana.

⁷A mojɔ momina, mbi nahɔmɔ bo nadae motɔndɔi na obwεnji (naba-laka na soti mεnε, te nongo na bokosea) na a bokoja bapakano ejimeli na Soti.

⁸Napalaka bo bami ba'nge a bisika bisusu, na bangɔjɔe mɔmɔ masεnɔke, pεpε kεlε, pεpε kitε.

⁹Napalaka koko bo bali baiwae bisenja bia bibɔngi, te nongo na jala, na posa bo basanejae. Babwaniti bobaka swe jimosεsε, isa na manaka na leka loyumu, isa mokina molilo moyumu.

¹⁰Elwali yena ebwani na bali baejimeli edi oko bikɔmeli bipele.

¹¹Mwali adi bohokea bokoja na bowi, na lisuma linεnε.

¹²Mbi nitajimaka bo mwali akojae bami isa bo adae na kpaci ai bo; adi boda oko bogo.

¹³Mojɔ bo Adama ayoama boso, Ewa ko ngongo.

¹⁴Na Adama ailengεmε; yona olengεmε na yona okwa, oko mwali.

¹⁵Endele ko, mwali adi bohela na bohota, akayeyoa na ejimeli, na epaeli, na boseñɔ, na yongi.

1 Timoteo 3

Elomu Ebanjeli na Basuku Badenga

¹Isa moto apalaka asε elomu emonjeli oDenga, apalaka elomu epele; mojɔ momina modi soti.

²Monjeli oDenga ko adi boda na esako epele mεnε, momi omwali omɔci pε, moto obowi na molema motitake, moto oyongi epele yona odi na monganji ai bato, na bowei a bokoja;

³te nongo moto obolangoa, isa moto okεlε, oko moto obowi; te nongo moto omiano, isa moto yona odi na posa eli-konja.

⁴Abwani boda na kpaci a ndako ende mεnε, na bobanea bana bande mεnε, bo badae na lisuma, na ekɔmeli epele.

⁵Mojɔ bo, moto amiti hɔnɔ elomu endako ende mεnε, adi bobanea Denga diNjambe na ye?

⁶Monjeli abwaniti boda mocingami moyene, asaka sε bodumba boSatana a mojɔ moegbo ende.

⁷Abwani boda na gala epele a boso bobato basokolu, bo atasamboa, na bo ata'ta elambo eSatana.

⁸Basuku baDenga pongono badi boda bato bayongi epele, m nongo bato baminɔkɔ Mibae, isa bato babolangoa, isa bato baya badi na posa elikonja.

⁹Badi bobanea mijɔ miejimeli a milema misεnɔke.

¹⁰Bopele bo bapete meka; na bakapasama na soti, pεpε nongo mojɔ, babwani bokɔ elomu ebasuku baDenga.

¹¹Bali babu pongono badi boda na yongi epele, te nongo bato babiloli, oko bato babowi na lisuma a ngando jesusu.

¹²Mosuku oDenga abwani boda na mwali omɔci pε; badi boda na kpaci ai bana babu, na a ndako jibu bεnε.

¹³Ibaya bakɔkɔ elomu epele emosuku oDenga badi na esako epele, na bahɛkɛ na eci a ejimeli ai Yesu Masiya.

¹⁴Nadi na njingo bo nadoe oho ai wε ngɔngɔ mweka; endele ko nasɔnei wε mijɔ mimi

¹⁵bo nakayeyoa a bodoa, odi bojeba moda mua mobwani na bato bandako eNjambe, yena edi Denga diNjambe obomɔ, likwe na eyoeli-ecina esoti.

¹⁶Cina eejimeli esu ai Njambe enɔi bocingea bomoto. Mojɔ momina modi soti mɛnɛ. Iyo asaboloja a mokuku momoto; Mwembo mongameja mojɔ monde; Babwɛnji baDiko bamone; Makota mangondo maka mwako monde; Bato bangondo bamojimea; Asɔmɔ a ekumu eDiko.

1 Timoteo 4

Bileho ai Timoteo a Mojɔ Moelomu Ende

¹Mwembo mobalaka na bohu mɛnɛ bo bakina bato badi bolaboa a ejimeli a masu masuka. Bâhokea miembo Mibokosea, na bokoja bomiembo Mibe,

²cina epoloso ebakoja babokosea. Milema Mibato bamina midi o migo.

³Balembaka bato bo batalongana, na bakojaka bo bato badi bokia leka. Njambe yo mɛnɛ akɔ leka lomina, bo baya bajimaka na bajebaka mijɔ misoti, baloyaka na sepi na bo'nga.

⁴Mojɔ bo leka losusu lokɔ Njambe lodi lopele. Pεpε nongo eka emɔci edi na ekia; bobwani bosɔ leka losusu na bosakoa;

⁵edi eka esɛnɔke a mojɔ moEbaeli eNjambe na bo'nga.

⁶Okaleje baninga ngando jimina, ôda mokɔmeli mopele oMasiya Yesu yona obeki na bikenge biejemeli, na bokoja bopele boma wε sɔ.

⁷Toma lona ko masɔ mangasa maya mapeliti cina. Kɔ bo odae mopingake a ngando jiNjambe.

⁸Bopingeja bomokuku bodi mojɔ mopele mweka; ngando jiNjambe ko jibɔngejaka a njea jesusu, na jidi na sako a mojɔ momohelo mu, na mua modi ngɔngɔ.

⁹Mojɔ momina modi soti mɛnɛ, na mobwani na ejimeli esusu.

¹⁰A mojɔ momina so bokɔkɔ elomu na bosamboaka, cina bo njingo esu edi ai Njambe obomɔ, yona odi Moheleja obato boyo, gbo oko baya bajimaka.

¹¹Leha na koja ngando jimina.

¹²T'okane oko bo moto asetojae wε mojɔ bo odi oko mwenga pε. Aneja bato baejimeli ekoaneli epele na ebæli ewε na moda mowε, a mojɔ moepaeli, na ejimeli, na bosənɔ.

¹³Adi mbi pε bopeta doa, toma da na bingi a bolanga mokanda moNjambe, a botɔndɔ mwako moNjambe, na a bokoja.

¹⁴T'onamejae oko epeeli yena edi a tei ewε; oesɔ na bileho yana abakea basuku baDenga mɔmɔ mabu ai wε.

¹⁵Kɔ ngando jimina na bingi; kɔ na molema mowε mosusu, bo bato basusu badi bonε bo ohɛke na ngulu.

¹⁶Toma sənjεlε bopele a mojɔ mowε mεnε, na a mojɔ mobokoja bowε. Okakɔ boa, odi bohela wε mεnε, na odi boheleja bato bay a bakaka wε.

1 Timoteo 5

Bileho a Mojɔ Mobali-Babogwa na Basuku

¹T'olemoe oko na mosuku na bopipo; moleha ko o sangwao. Leha bami batongo o baninga.

²Kina basuku bali bade o bangwao, na bali batongo o ngεnε, oko na lisuma linεnε.

³Da na lisuma ai bali-babogwa basoti.

⁴Isa mwali-obogwa adi na bana, isa pape, ibaba badi bopeta cingea bo babwani boda na likabo ai bato babu bεnε, na monganji ai baboti babu. Njambe yo mεnε ajimaka mojɔ momina.

⁵Mwali-obogwa ko osoti yona opeliti bato, adi na njingo ai Njambe, na angaka Njambe na bulu na mei, na bingeli na mangɔɔnɔ.

⁶Mwali-obogwa ko yona odi na posa engando jingondo, nongo adi yo mɔ, adi oko mogwake.

⁷Toma baleha na bopipo a mojɔ mongando ji, bo batakwa na mijɔ.

⁸Isa moto atabaneaka bato bande mεnε, na bato badenga dinde mεnε, moto omina angani ejimeli, na anɔi mopakano na bobè.

⁹Mwali-obogwa amiti nɔ bianga domi-isamano, mwali omomi omɔci pε, kombe ende ebwaniti bosɔnɔmɔ a mokanda mobali-babogwa.

¹⁰Adi boda na esako epele a mojɔ mobikɔmeli binde bipele, mwali yona obɔkɔ bana, yona odaka na monganji ai bakɛndeli, yona ososa bibota bibato baDenga, yona okɔmeja bato bay a badaka na monɔngɔ, na odaka na bingi a ngando jisusu jipele.

¹¹Pε bojima bali-babogwa baya badi oko baseka pε, mojɔ bo posa jibu jikagbasoa, badi bolona Masiya, na bâpala bo balongane koko.

¹²Oko boa bakwaka na mojɔ, cina bo bakinaka ejimeli ebu eboso.

¹³Mojɔ motongo—adi bo pε elomu, balandoaka na ekɔmeli ebongε a ndako ndako. Na baditi oko edada pε; badi na bibalabala, na ekpai, na babalaka mijɔ mia Mibɔngiti na bu.

¹⁴A mojɔ momina, mbi napalaka bo bali-babogwa baya baditi basuku balongane koko, babote bana na babanee ndako jibu. Oko boa, baya badi na su soki batadiha njea a bololea so.

¹⁵Mojɔ bo bakina balaboa soti a bosusa Satana.

¹⁶Isa moto oejimeli, kako momi, kako mwali, adi na bali-babogwa baya bacingi na nde, abwani bobakɔmeja. Oko boa Denga ditada na muna mobu, na lidi bokɔmeja bali-babogwa baya badi na taka.

¹⁷Bato babwani boda na lisuma linεnε ai basuku baDenga baya bakɔkɔ elomu epele, gbo oko ai baya badi na elomu ebotɔndɔ Mwako Mopele, na ebokoja.

¹⁸Mojɔ bo mokanda moNjambe mobalaka bo, T'okande oko ebombo engɔmbɔ yona ondaka ndongo. Na Mokɔmeli abwani bosɔ likonja linde.

¹⁹Bakalanga kombe emosuku oDenga na mokina mojɔ, obwaniti boka mojɔ momina isa batati babae kako basato baditi.

²⁰Isa bakina bakɔkɔ bobe, toma lemoa na bu a boso bobato basusu, bo batongo babange.

²¹Mbi nalehaka wε a hoso boNjambe, na Masiya Yesu, na babwεnji baDiko baya bahɔmɔ, bo okɔe ngando jmina na bojo mεnε; da na ekɔmeli emɔci ai bato basusu amεci.

²²A mojɔ mobobakea mɔmɔ ai moto, pε bokɔ mojɔ momina na pεlεpεlε. Pε bopanda na moto a bobe bonde. Anganjama bo otada nongo na mojɔ.

²³T'omwake oko madiba pε; odi bomwaka ekenge ekekεlεkε evino a mojɔ mosɔpɔ na bipeko bipekaka na wε mandεli-mandεli.

²⁴Jibe jibakina bato jidi a bohu, oko basa-mbakini; jia jibakwa batongo ko jiboloaka oko ngɔngɔ.

²⁵Bikɔmeli bipele bidi koko a bohu boa, na bia biditi a bohu biboloa ngɔngɔ.

1 Timoteo 6

¹Bato basusu baya badi a libuli babwani boda na lisuma ai baswa'bu, bo kombe eNjambe etasamboa, na bokoja bosu pongono.

²Isa baswa'bu badi na ejimeli, babwaniti bobanyamola na mokalo bo badi baninga. Badi bono na bingi a bobakome, mojo bo bakomeké bato baejimeli baya babwani boss epaeli. Ikoja na leha ngando Jimina.

Bileho Bisuka

³Isa moto akojaka mij Mibokosea, pe bojima bikenge bibongoke biKumu osu Yesu Masiya, na bokoja bua bocingi na ekomecli emoto oNjambe,

⁴moto omina adi oko na egbo; t'ajebake nongo mojo. Adi oko na posa emisoo na kite; na ekomecli emina engojoklikaka, na miano, na biloli, na nduki emij,

⁵na bibalabala a tei ebato baya badi balaboake a milema Mibu; bapeliti nongo mojo mosoti, na badingaka bo ejimeli al Njambe edi njea a bokonja likonja.

⁶Ejimeli ai Njambe ko yena editi na bomboa boleka, ebwani na bokonja bolikonja lmene.

⁷Mojo bo bodoaka a ngondo ye boa ngasa, na bokayana, botahonc botomba eka ernoci.

⁸Isa bodi na mia na bisenja, leka lomina lobwani na su.

⁹Ibaya badi na posa elikonja bakwaka a ndingea, na bataka elambo, na balaboaka na posa jibe jingasa jia jidindejaka bato a bogwa na bodimoa.

¹⁰Mojo bo posa elikonja edi cina ejibe jesusu. Bakina bato balaboi a njea eejimeli oko a mojo moposa emina, na basandeaka na nde jiminongo minene.

¹¹Wε ko, moto oNjambe, toma bulε ngando Jimina. Dala a njea ebodongo, na yongi epele, na epaeli, na lingbangba, na bomboki.

¹²Ina bila epele eejimeli. Pea bomo boku, bomo bua botasia. Obeama a mojo momina, na otata tati epele a boso bobatati banene.

¹³Nalehaka wε a boso boNjambe yona opaka bato basusu bomo, na a boso boMasiya Yesu yona otata tati epele a boso boPontio Pilato,

¹⁴bo osume mobeko, bo moda mowε motada na litonc, pεpε nongo mojo, oko a bodoa boKumu osu Yesu Masiya.

¹⁵Iyona obojongoa, yona odi na ngulu esusu, Koi o baroi, na Kumu obakumu, adi boneja mojo momina oko ehole ekabwana.

¹⁶Iyo pe aditi nongo na bogwa; adi a bohu bua bono, bo moto atahonc bobatama; moto amonekini na atahonc bomone. Ekumu ai yo, na bokumu, oko na bosusu. *Amen.*

¹⁷Leha bato baya badi na likonja a ngondo ye bo batasakumeja, na bo batada na ejimeli a makonja maya madi na mokakwano, oko ai Njambe yona opaka so leka na likabo linene a bosepeja so.

¹⁸Baleha bo bakoe bopele, bo bahee na bikomeli bipele, na bo badea na monganji na likabo.

¹⁹Oko boa badi bobomba likonja liyumua mojo moehole ebodoa, a edejai esoti, bo badea na bomo bua bodi bomo bosoti.

²⁰Ee Timoteo, banea elomu esso we a bobanea. Bule ko bibaeli bibokosea, na bibalabala biejebeli yena editi ejebeli esoti,

²¹mojo bo bakina bato baso mijoo mimina, na balaboa a njea eejimeli. Ye monganji moNjambe modae na we.

2 Timoteo

2 Timoteo 1

¹Mbi Paulo, obwənji oMasiya Yesu cina ebolulea boNjambe, a mojɔ mosako ebomɔ bua bodi a tei eMasiya Yesu, ai Timoteo, mwana'mbi oepaeli

²yε monganji, na wa, na bowi boNjambe Sango, na Masiya Yesu Kumu osu bodaе na wε.

³Mbi nasakoaka Njambe yana alekε mbi wε a ma'nga mambi bihole bisusu na bulu na moi, mbi yona omokɔmɛkε na molema moseñɔke o amokɔmɛ basangwa'mbi.

⁴Alekε mbi mbisoli jiwε, nadi na posa a bo'nene na wε, bo molema mombi molume na sepi.

⁵Mbi te nabosake bo odi na ejimeli esoti, oko ejimeliyena edaka na Loi tata owε, na ngwao Eunike. Najebaka koko na soti bo ejimeli emina edi a tei ewε pongono.

⁶A mojɔ momina, nalehaka wε a bohεjε epeeli eNjamhe a tei ewε, o abwanejaka moto mosa, oko epeeli esɔ wε na bobakea bomɔmɔ mambi.

⁷Mojɔ bo Njambe aipa so mwembo mobomeli, oko mwembo mongulu, na epaeli, na bowεi.

⁸A mojɔ momina, obwaniti boda na sɔni a botata tati ai Kumu osu, isa a mojɔ mombi lisungu linde. Asɔ ko libondo limonɔngɔ mosɔkɔ mbi a mojɔ moMwako Mopele, o apaka Njambe wε ngulu.

⁹Iyo abohelejai na abobei a elomu esenɔke, te a mojɔ mobilomu bisu bεnε, oko a mojɔ momokano monde mεnε, na monganji monde mopa yo so a tei eMasiya Yesu oko a libangake mεnε.

¹⁰Monganji momina moboloi e dεye na bodoa boMoheleja osu Masiya Yesu, yona ogbokeja bogwa, na ameja bomɔ a bohu, na bomɔ bua botagwa, a mojɔ moMwako Mopele.

¹¹Mbi nahengεmε bo nadae motɔndɔi, na obwənji, na mokoja oMwako momina,

¹²na nadingoaka a mojɔ momina; pε mojɔ, naditi nongo na sɔni, cina bo mbi najebaka yona ojimaka mbi, na najebaka na soti bo yo abwani bobanea mua mopeja mbi yo, oko a Busa bomina.

¹³Kina bokoja bosoti bossɔ wε ai mbi bodaе ekoaneli ai wε; bobanea na ejimeli, na epaeli, ai Masiya Yesu.

¹⁴Banea mojɔ moyumu mossɔ wε, oko na ngulu eMwembo Mosenɔke, mua modi a tei ewε.

¹⁵Ojebaka bo bato basusu baAsia baloni mbi, na Pugelo na Elumogene pongono.

¹⁶Nangaka Kumu bo adae na monganji a denga diOnesipolo, mojɔ bo yo asepeja molema mombi bihole binɛnɛ, na aika sɔni a mojɔ mominyɔlɔ mimbi.

¹⁷Yana amea yo a Loma, aduka mbi na bingi enɛnɛ na aboloja mbi.

¹⁸Yε Kumu ajime bo Kumu amokɔe monganji a Busa bomina. Ojebaka koko na bopele mɛnɛ bo akɔmeja mbi a Ερεσ bou mɛnɛ.

2 Timoteo 2

Eleho ePaulo ai Timoteo

¹Wε ko mwana'mbi, da moto ongulu a mojɔ momonganji mua modi a tei eMasiya Yesu.

²Jebeja bato baejimeli ngando jika wε ai mbi a boso bobatati banɛnɛ, bo babwane bokoja bato batongo.

³Adi wε soda mopele oMasiya Yesu, asɔ libondo liwε limonɔngɔ.

⁴Isa moto adi soda, abɔtɔni na bilomu bitongo bingondo, bo ase-pejae kapiteni onde.

⁵Na moto yona opotaka mbambano amiti suma Mibeko mimakou, atalonga nongo.

⁶Moswa 'gbie, yona okɔkɔ elomu, abwani bossɔ libondo liboso limbuma jigbie.

⁷Toma le mijɔ Mibalaka mbi; Kumu adi bopa wε bocinea a mojɔ mongando jisusu.

⁸Kina bolε bowε bodaε ai Yesu Masiya ombota eDawidi yona ongɔ a bogwa; Mwako Mopele mombi oko mu.

⁹Mbi nadingoaka o moto mobe, na nadi a minyɔlɔ a mojɔ momina. Ebaeli eNjambe ko editi a minyɔlɔ.

¹⁰Na mbi nahɔnɔkɔ ngando ji jisusu a mojɔ moBahɔmɔke, ho 'bo pongono base mohelo mua modi ai Masiya Yesu, na ekumu yena edi na hosusu.

¹¹Ebaeli ye edi soti; isa bogwi na nde, bôhela na nde pongono.

¹²Bokayeyoa na lingbangba, bôkumejama koko na nde. Bokamongana ko, yo adi bongana so.

¹³Nongo ejimeli ekataka na su, yo t'akputojake nongo sako, mojɔ bo aditi bosa'ngana yo mɛnɛ.

Eleho a Mojɔ Mobakoja Babokosea

¹⁴Toma lęje bato ngando jimina, na baleha a boso boNjambe bo batanoana moano a mojɔ mobikenge bikɔpi. Mojɔ momina mobɔngiti, na mobejaka milema Mibato baya bakaka.

¹⁵Kɔ na ngulu ewε esusu bo opasame a boso boNjambe, o moto yona oditi na sɔni a mojɔ moelomu ende, yona odi na bɛtε a elomu eEbaeli eSoti.

¹⁶Toma bɔtɔnɔ ko na bibalabala na kitε jingasangasa. Mojɔ bo ngando jimina jidi bolaboja bato a njea jibe,

¹⁷na bokoja bobu bodi o pola emonio yena ehɛkε a boyaka mokuku.

¹⁸Umenaio na Pileto badi a libondo limina. Ibo bapengoi a njea esoti; babalaka bo bo'ngɔ a bogwa bosia ehele, na babejaka ejimeli ebakina bato.

¹⁹Pε mojɔ; eyoeli-ecina embilimake eNjambe eyeyoaka, yena edi na mosɔnɔ mu, Kumu ajebaka bato bande mεnε. na Yε moto na moto yona ongaka a kombe eKumu acie bobe.

²⁰Ndako enεnε editi na bisεi biwɔlɔ na palata pε. Bikina biyoama na mole na libali pongono. Bikina bidi a mojɔ moelomu epele, na bikina bitongo bidi a mojɔ moelomu engasa.

²¹Moto akasabanea na boseñɔ, na akabɔtɔnɔ na ngando jimina, yo ada esεi eekumu yena esεnoi a mojɔ moelomu emoswa'nde, na ebwani na bilomu bisusu bipele.

²²Cia posa jibe jimwenga. Susa na bingi njea ebodongo, ejimeli, epaeli, bowi, na bato baya basakoaka Kumu na milema misεnɔke.

²³Toma lona ko bibalabala bingasa na bikiτe. Ojebaka bo bingɔjɔkɔ oko miano pε.

²⁴Mokɔmeli ko oKumu abwaniti bonoana moano; adi boda na molema mo yεmbu ai bato basusu, na bɛtε ebokoja, moto olingbangba.

²⁵Adi boleha baya badi na nde soki oko na bo yεmbu, na njingo bo Njambe abase dosa bo bajεbε Soti.

²⁶Oko boa, bakasisoa, badi bohela a elambo eSatana yona obapea masungu bo bakɔe bolulea bonde.

2 Timoteo 3

¹Toma jeba bo ehole eminɔnɔ edabi a masu masuka.

²Mojo bo epaeli ebato edabi oko ai bo bене; badabi na posa elikonja, bato baegbo na jala, bato babosambolu, bato balipanga ai baboti, pε lisuma, bato bapomboli,

³bato bay a bapeliti nongo epaeli, bato bay a bakputojaka sako, bato babiloli, bato bay a basumaka oko posa jibu bене, bato basanga, soki jibato bapele,

⁴bato bangabi, bato baelabe bay a basakumejaka bo bене; na Njambe na bo bене, bapa-laka gbo oko bo bене.

⁵Badabi na ekina elimo eejimeli ai Njambe a sokolu, banganabi ko ngulu eejimeli emina.

⁶Pε bopangana nongo na bato bay a badi na bikомели bimina. Mojo bo bakina babu bakweaka a tei ebato na poloso, na bapangoaka bali ba yεmbu bay a bangwai muna mojibe jibu, bali bay a badingoaka na posa jibe jineне,

⁷bay a bakoaka bihole bisusu, pε ko bomea a ejebeli eSoti.

⁸Yane na Yambele baswiana na Mose eyou; bato bamina ko baswianaka na Soti; milema Mibu mipoi, na ejimeli ebu edi oko ejimeli ebokosea.

⁹Elomu ebu etabongo ko, mojo bo bato basusu badi bone libunga libu a bohu, o ane bo libunga libato ba babae.

¹⁰Wε ko ojebaka na bopele mεnε bokoja bombi, ekомели embi, mokano mombi, ejimeli embi, lingbangba limbi, epaeli embi, bomboki bombi,

¹¹bodingoa na minongo mimbi, na mijо minε mbi a Antioquia, a Ikonia na a Lusetulia. Naso bodingoa bonenε na eci; Njambe ko ahelejani a minongo mi misusu.

¹²Ee, bato basusu bay a bapalaka bosusa Yesu Masiya na soti badi bodingoa.

¹³Bato babe ko, na bato babokosea badi bohε na bobe; badi balaboake bo bене, na balabojaka bato batongo pongono.

¹⁴Wε ko yeyoa a ngando jikoa wε. Ojijimaka na soti, na ojebaka bay a bakoja wε.

¹⁵Olandoa na Mokanda moNjambe oko a bwεngε bowε, mua mobwani bopa wε bowεi a mojo momohelo cina eejimeli ai Masiya Yesu.

¹⁶Njambe assoneja Misongo misusu na Mwembo monde; Mibwani a mojo mobokoja, a mojo moboleha, a honeja mabunga, na a bojebeja ngando jisoti,

¹⁷bo moto yona odi moto oNjambe adae mobongoke, na adae na molilo mosusu a boko bilomu bisusu bipele.

2 Timoteo 4

¹Mbi nalehaka wε a boso boNjambe, na a boso boMasiya Yesu yona odi bosambeja bahelake na bagwake; nalehaka wε a mojɔ mobodoa bonde na bokumu bonde.

²Tɔndo Mwako Mopele na bingi, isa na pela, isa na ngange. Lemoa na bato; basia, baleha, na pε bongwa nongo bokoja.

³Mojɔ bo ehole ekεkε adoe bo bato batahɔnɔ bohokea bokoja bosoti. Badi boduka bakoja banεnε o apa-laka milema Mibu bεnε, mojɔ bo matoi mabu mɔda na kalakala a boka mijɔ miyene.

⁴Batahokea koko mijɔ misoti, na bâhekua oko a masɔ.

⁵Wε ko, sabekea bihole bisusu. Da na eci a tei ebodingoa. Kɔ elomu emotɔndɔi oMwako Mopele. Kɔ ngando jisusu jia jicingi na elomu ewε.

Bole boPaulo a Bogwa

⁶A mojɔ mombi mεnε, edikai mweka pε bo makia mambi masopee o lisiko. Ehole embi eboyana edi hulelu.

⁷Mbi nani etumba epele. Namei a suka enjea embambano. Nabanei ejimeli.

⁸E dεye, likongo libodongo liselingoami a mojɔ mombi; Kumu yona osambejaka na soti, âebakea ai mbi a busa bomina; te nongo ai mbi pε, oko ai bato basusu baya badi na posa ebodoa bonde.

Bileho Bisuka

⁹Kenga bodoa ai mbi ngɔngɔ mweka, mojɔ bo Dema akini mbi.

¹⁰Iyo adi oko na posa engando jingondo ye, na akεi a Tεsalɔnike. Kulusene akεi a Galatia. Tito akεi a Dalamatia.

¹¹Odikai na mbi oko Luka pε. Bea Malako; doa na nde pongono, mojɔ bo yo abwani bokɔmeja mbi a elomu.

¹²Nalomi Tukiko a Epεssɔ.

¹³Okadoa, doa na kasaka eyai ekina mbi a ndako eKalupo a Toloa, na mikanda pongono; na pε bobosa nongo mikanda Mibosɔnɔ.

¹⁴Alesandele, molui oliboma, anɔngeja mbi bou mεnε. Kumu ko adi bomopa ndese yena ebwani na bikɔmeli bindé.

¹⁵Toma nganjama wε mεnε na moto omina, mojɔ bo adaka na lisoki linεnε a mwako mosu.

¹⁶A ehole eesambi embi eboso, pεpε nongo moto oyeyoa a dɔngɔ dimbi. Ibo basusu bakina mbi oko bokina. Nangaka bo Njambe aba yεe mojɔ momina.

¹⁷Kumu ko adaka ami a dɔ̃ngɔ̄ dimbi, na apani ngulu a botɔ̄ndɔ̄ Mwako Mopele mosusu, bo bapakano basusu ba'ke. Oko boa nahela a mino magbɔ̄ngɔ̄.

¹⁸Kumu adi boheleja mbi a ndungu jesusu jibe, na âbanea mbi a mojɔ̄ moBokumu bonde boDiko. Ekumu ai yo oko na bosusu! *Amen.*

¹⁹Abεjε Puliseka na Akwila, na denga dionesipolo.

²⁰Elaseto adikai a Kolinto; nakwa Tulopimo na yogo a Melita.

²¹Kenga na bopipo a bodoa oko adi edidi epio pε bopeta mea. Yubulu abεjεkε wε njεbε, na Pude, na Kulaudia, na baninga basusu babεjεkε wε pongono.

²²Yε Kumu adae na mwembo mowε. Yε monganji moNjambe modae ai no.

Tito

Tito 1

¹Mbi Paulo, mobuli oNjambe, na obwensi oYesu Masiya a mojɔ moejimeli ebahɔmɔke baNjambe, na ejebeli engando jisoti yena ewani na ekɔmeli ebato baNjambe,

²bo badea na njingo ebomɔ bua bodi na bosusu, bomɔ bodikeja Njambe a libangake mɛnɛ; na yo Pakputojake nongo sako.

³Na angameja ebaeli ende a ehole ebwanake, oko na bwensi bossɔ mbi na mobeko moNjambe Mobeleja osu:

⁴Ai Tito, mwana'mbi osoti a tei eejimeli esu na wε. Ye monganji na bowi boNjambe Sango na Yesu Masiya Moheleja osu bodea na wε.

Eleko a Mojɔ moDenga diKulete

⁵Mbi nakina wε a Kulete bo okolee mijɔ mia midika a bokolea, na a bohɔ basuku baDenga a ngando na ngando, o ama mbi tɔndɔ wε.

⁶Mosuku oDenga abwani boda na ekɔmeli esɛnɔke mɛnɛ, oko momi yona odi na mwali omɔci pε, na bana bande bato baejimeli bayo baditi na lipanga, na bayo baditi na gala ebe.

⁷Mojɔ bo monjeli oDenga abwani boda na ekɔmeli esɛnɔke yena ewani na mokɔmeli oNjambe, te nongo moto oegbo na kεlε, isa moto obolangoa, isa moto odane, isa moto yona odi na posa elikonja.

⁸Abwani boda na monganji ai bakendeli, moto yona opalaka ngando jipele, moto obowi, moto oyongi, mosɛnɔke, moto obodongo;

⁹moto yona oPeaka Ebaeli esoti oko boku, oko Ebaeli essɔ yo na bokoja, bo abwane bokoja ngando jisoti na bogbokeja bato bakite.

¹⁰Mojɔ bo bato balipanga badi banɛnɛ, bato babibalabala na babokosea, gbo oko bato baejimeli eBaYuda.

¹¹Bato bamina babwani bogboka mojɔ bo babejaka milema mimenga manɛnɛ, na bakojaka ngando jia jibɔngiti nongo mweka, oko na njingo elikonja pε.

¹²Okina obu, mowεi obu bɛnɛ, abala bo, BaKulete badi bakosei bihole bisusu, tito babe, bato bayenga na baekusu.

¹³Ekenge emina edi soti mɛnɛ. A mojɔ momina toma baleha na bopipo bo badea bato banjilake a Ejimeli,

¹⁴na bo batahokea masɔ maBaYuda, na Mibeko Mibato bayo baloni njea esoti.

¹⁵Ngando jesusu jidi jisenoke ai bato basenoke. Pe nongo mojo momoci ko modi moseno ke ai bapoke na ai bato baya badi pe bojima, mojo bo milema Mibu, na bileli bibu, bidi bipoke.

¹⁶Batondok na monok bo bajebaka Njambe; bamonganaka ko na bikomeli bibu. Badi bato babosambolu, bato balipanga; babongiti nongo na ekwa ekomeli epele.

Tito 2

Eleho ai Basuku Bami na Bali

¹A mojo mowe men, koja mijia Mibwani na bokoja bosoti.

²Leba basuku-bami bo bade na bodongo, bato bayongi na bomboki, bato banjilake a Ejimeli, na epaeli, na lingbangba.

³Leha basuku-bali bo bade na ekomeli elisuma, te nongo na biloli, na bo batada nongo babuli babolangoa.

⁴Badi bopa bileho bipele; oko boa badi bokoja bali baya badi oko baseka pe, bo bade na epaeli ai bami babu na ai bana babu,

⁵bo bade na yongi epele, te nongo na ndukeli, bato babingi a elomu endako jibu, bato baepaeli na lisuma ai bami babu, bo Ebaeli eNjambe etasamboa.

⁶Leha koko menga bo basabekee.

⁷Aneja we men ekoaneli epele na bikomeli biwe bisusu. Kina bokoja bowe bode bokoja bosoti, bobwanake; kina ebaeli ewe edae ebaeli esoti.

⁸Oko boa batahono bodumba we, na yona odi na we soki adi bosamboa, mojo bo ata'ne mojo mobe bo alolee so.

⁹Leha babuli bo bade na lisuma ai baswa'bu, na bo babasepejae na bilomu bibu bisusu; baditi boboma na bu kite;

¹⁰baditi boda na liba; babwani boda na lisuma linene lisoti, bo bokoja boNjambe Moheleja osu bode na gala epele a mojo mobikomeli bibu bisusu.

Monganji moNjambe

¹¹Mojo bo monganji moNjambe moboloa a bohu a boheleja bato basusu.

¹²Mokojaka so bo bolone ngando jesusu jia jikeseni na njea eNjambe, bo bolone posa jingondo, bo bosangbindee, bo bode na ekomeli yena edi bojo, na lisuma ai Njambe a ngondo ye.

¹³Bodibo'mba njingoesuyena enoi, okoboboloa boekumu eNjambe osu monene na Moheleja osu Yesu Masiya,

¹⁴yona osapa a mojɔ mosu, bo abosikoe a bobe bosusu, na bo aboseñojae bo bodaе oko ai yo mɛnɛ, bato babingi a bikɔmeli bipele.

¹⁵Koja ngando jimina. Leha, na lemoa na bato na kpaci enɛnɛ. T'ojime oko bo moto asetojae wɛ.

Tito 3

¹Lejɛ bato bo badi bosuma bakumu na basuku. Babwani boda na lisuma; badi boda na moselingo a bokɔ bilomu bisusu bipele.

²Babwaniti bolɔngɔ nongo moto, isa boda na nduki emijɔ; badi boda na milema mi yɛmbu, na bombɔki mɛnɛ, ai bato basusu.

³Mojɔ bo so bɛnɛ bodaka boso na bogegele, na lipanga, bato balaboake, na babuli baposa jibe, na balisɔngi. Mida misu midaka masu masusu oko na bobe na likaka. Bato balona so, na so bolonana so bɛnɛ.

⁴Yana ko aboloa monganji moNjambe Moheleja osu, na epaeli ende ai bato,

⁵yo aheleja so, te cina ebikɔmeli bisu bipele, oko a mojɔ mowa ende mɛnɛ, na boseñoja bobobotama boyene, na eyoeli eyene eMwembo Mosenɔke

⁶mosopa yo na likabo linɛnɛ ai so a tei eYesu Masiya Moheleja osu,

⁷bo bolonge cina emo-nganji monde, na bo bodaе basangoli babomɔ bua bodi na bosusu o adi so na njingo.

⁸Ekenge emina edi soti, na mbi napalaka bo okojae ngando jimina na bingi, bo bato bay a bajimaka Njambe bade na bingi a bikɔmeli bipele. Mijɔ mi midi mipele mɛnɛ na Mibɔngejaka bato.

⁹Toma lona ko mabɔjɔ maya mapeliti cina, na mijɔ mimbota jibato, na miano, na mosoo a mojɔ moMibeko. Ngando jimina jidi oko ngasa mɛnɛ, na jibɔngiti nongo mweka.

¹⁰Moto akabɔtɔ na nu, moleha ehole emɔci, isa bihole bibae, na mokina yo.

¹¹Ojebaka bo moto omina adi molaboake, moto mobe, na asadumbaka yo mɛnɛ.

¹²Namaka loma Alutema isa Tukiko ai wɛ, kenga bodoa ai mbi bokpa a Nikɔpoli, mojɔ bo najimi bo nayeyoe oho edidi esusu epio.

¹³Selingoa na bopele mɛnɛ a mojɔ momɔngɔ moSena yona odi juji, na Apolo, ho batataka nongo eka.

¹⁴Bato basu badi bokoa bo bakɔe bilomu bipele.

¹⁵Bato basusu bay a badi na mbi ya babεjekε wɛ njεbε. Abejɛ bato bay a bapalaka so a Ejimeli. Ye monganji moNjambe modae na nu basusu.

Pilemona

Pilemona 1

¹Mbi Paulo, lisungu liMasiya Yesu, na Timoteo mwangwa'su ai Pilemona moninga osu a elomu,

²ai ngene esu Apia, a Alukipo moninga osu a bila, na a Denga lia lidi a ndako ewe.

³Ye monganji na bowi boNjambe Sangwa'su, na Kumu osu Yesu Masiya, bodaé na we.

⁴Mbi nasakoaka Njambe bihole bisusu yana alangaka mbi kombe ewe a ma'nga mambi.

⁵Mojo bo nakaka mwako moepaeli ewe, na ejimeli ewe, ai Kumu Yesu, na ai bato basusu baDenga.

⁶Mbi nangaka Njambe bo bakakatana na we a ejimeli, badi bohe na ejebeli ebopele bosusu bua bodi ai so a tei eMasiya.

⁷Moninga, yana aka mbi mwako moepaeli ewe, mbi nasepa bou mené, cina bo milema mibato baDenga miso ngulu a mojo mowé.

Mojo Momobuli Onesimo

⁸A mojo momina, nongo adi mbi na kpaci a tei eMasiya a botondó we ngando jia jibwani na we a bokó,

⁹Napalaka bongcongo we a mojo moepaeli, oko mbi Paulo yona odi mosuku mené, na lisungu liMasiya Yesu e deye.

¹⁰Nangcongkó we a mojo momwana'mbi Onesimo. Mbi namobota adi mbi ya a minyolo.

¹¹Iyo adaka na we boso oko moto-ngasa. Edeye ko abwani bokomeja so na we.

¹²Mbi namosombejaka ai we, o molema mombi mené.

¹³Nadaki na posa bo adikae na mbi ya a bokome mbi a kombe ewe, yana adi mbi ya a minyolo a mojo moMwako Mopele.

¹⁴Napaliti ko bokó boa, adi we pe bopeta jima mojo momina. Okakó mbi monganji, mobwani boda na bolulea bowé mené, te a mojo mokpaci embi.

¹⁵Isa abotci na we ehole ye ekue bo omose koko na bosusu,

¹⁶te nongo o mobuli, oko moto yona onɔi mobuli, oko moninga oepaeli. Isa adi moninga ombi oepaeli, esingaiti ai wε, o moto mεnε, na a tei eKumu pongono.

¹⁷Oko boa, isa onjaka mbi o minao, mosɔ yo o mbi mεnε.

¹⁸Isa akɔ mokina mojɔ mobe ai wε, isa adi na nongo ai wε, langa mojɔ momina o nongo embi.

¹⁹Mbi Paulo nasɔnɔkɔ mojɔ mu na ebɔ embi mεnε—Nadi bosɔmbeja nongo emina. Nabwaniti bolejε wε bo odi na nongo ai mbi; nongo emina edi oko we mεnε.

²⁰Ee moninga, kɔ mbi monganji mu a kombe eKumu. Gɔmbeja molema mombi a tei eMasiya.

²¹Nasɔnei wε mokanda mu mojɔ bo najimaka bo odi na lisuma. Najebaka bo otakputoa bokɔ mojɔ mopalaka mbi; ee, odi bonɔ mojɔ momina na monganji.

²²Mokina mojɔ motongo, —selingoa ekina ekenge endako a mojɔ mombi; nadi na njingo bo osenɔ mbi koko o epeeli, cina ebingeeli binu.

²³Epapulo lisungu liMasiya Yesu yona odi na mbi ya, abεjεkε wε njεbε.

²⁴Malako, na Alisitaluko, na Dema, na Luka, bina'mbi a elomu, babεjεkε wε pongono.

²⁵Yε monganji moKumu Yesu Masiya modae na mwembo mowε.

Baebele

Baebele 1

Ekumu eMwana o Njambe

¹Njambe abala na batata basu eyou bihole binené na njea jitongotongo na minokɔ Mibatɔndɔi.

²Edεye ko abali na su a masu ma masuka, oko na Mwana'nde. Amohɔ bo adae sangoli ongando jisusu, na ayoa koko ngondo ye na ngulu ende.

³Iyo adi bolailai boekumu eNjambe; adi elimo esoti eNjambe, na abeaka ngondo jisusu na ebaeli engulu ende. Ama yo pa lisiko a mojɔ mojibe, ami ko da oko a dɔngɔ diebɔ ebami eKumu oDiko.

⁴Na kombe esangoi yo, na kombe jibabwɛnji, kombe esangoi yo enɔi bou mɛnɛ; oko boa yo mɛnɛ anɔi babwɛnji bou mɛnɛ.

⁵Njambe abala na okina obwɛnji-odiko ekina ehole bo? Wε odi Mwana'mbi, Mbi naboti wε busa bu isa Mbi nâda Sangwa'nde, Na yo âda Mwana'mbi.

⁶Na Pongono, yana akwejaka yo Mwana'nde sɔmi a ngondo, abalaka bo, Yε babwɛnji basusu baNjambe bamosakoe.

⁷A mojɔ mobabwɛnji-baDiko, abalaka bo, Akɔkɔ bo babwɛnji bande badae o mahweya, Na bakɔmeli bande o biemi bimosa.

⁸A mojɔ moMwana ko, abalaka bo, Ee Njambe, ngendε ewε edi na bosusu mɛnɛ. Tondo eBokumu bowε edi tondo ebosambeja bojo.

⁹Wε opalaka bodongo na olonaka bobe. A mojɔ momina, Njambe, Njambe owε asuoa wε Sali esepi bo odae boso bobabinao.

¹⁰Na Wε Kumu, oyoa ngondo a libangake mɛnɛ. Busa bodi koko elomu emɔmɔ mawε.

¹¹Ngando Jimina jidi bodimoa; wε ko oyeyoaka na bosusu. Ngando Jimina jidi bogwa o agwaka bisenja.

¹²Ojibulabí o abulaka moto kasaka, Na jikindoabí elimo etongo. Wε oko odi na bosusu oko elimo emɔci, Na bianga biwε bipeliti nongo suka.

¹³Iyo ko abala na okina obwɛnji-oDiko bo? Da ya a ebɔ embi ebami Bo mbi nadumbe soki jiwε o ebakei ebibota biwε.

¹⁴Babwɛnji-baDiko basusu baditi miembo Mibokɔmeja? Abalomaka bo bakɔmee basangoli bamobel.

Baebele 2

¹A mojɔ momina, so bobwani bopea boku ngando jika so, na bopipo mɛnɛ, bo bosaka laboa bohali.

²Mojɔ bo, isa bwɛnji bua bodoa na babwɛnji-baDiko bodaka na kpaci, na baya balona na basopa mobeko basɔ mokindo mua mobwana,

³esingaiti so; bokabule boheleja bu bonɛnɛ, bodi bohela na ye? Kumu yo mɛnɛ abanga botɔndɔ mojɔ moboheleja bomina, na baya bamoka banga-meja mojɔ momina ai so.

⁴Na Njambe aneja bo tati ebu edi soti, oko na bimbete, na mindumba, na mijɔ Mibokamoa, na bipeeli biMwembo, o ajima yo na bolulea bonde.

⁵Iso bobalaka a mojɔ mongondo ebodoa; na Njambe aideja ngondo emina a kpaci ebabwɛnji-badiko.

⁶Tati emoto a ekina esika edaka bo, Moto adi nda? Wε odi na bole ai yo mojɔ moye? Mwana'moto adi nda? Omobaneaka mojɔ moye?

⁷Omodeja a ngɔngɔ jibabwɛnji-baDiko ehole ekue. Omokumeja na ekumu na lisuma o likongo a molo monde. Omopa kpaci a ngando jikɔ wε na mɔmɔ mawε.

⁸Odeja ngando jesusu a cina jibibota binde. Yana amopa yo kpaci a ngando jesusu, Njambe aikina nongo eka emɔci yena editi a kpaci ende. Ende ko, so bonɛkini ngando jesusu a cina ekpací ende.

⁹Bonɛkε Yesu ko, yona odejama ekina ehole a ngɔngɔ jihabwɛnji-baDiko; bomonɛkε yo yona okumejama na ekumu, na lisuma, o likongo a molo monde a mojɔ mobogwa bone yo, bo adingoe na bogwa a mojɔ mobato basusu, oko na monganji moNjambe.

¹⁰Mojɔ bo, yona oyoa leka losusu, na leka losusu lodi a mojɔ monde, adi oko yona opala bo akwejae bana banɛnɛ a ekumu, mobwana na nde soti bo abɔngejae yona ohoja njea ebu ebohela, oko na bodingoa.

¹¹Mojɔ bo, yona osenɔjaka, na baya basenɔi badi na sango omɔci. A mojɔ momina yo aditi na Sɔni a bobabakea kombe bananango.

¹²Abala bo, Mbi nadi bojebeja banangwa'mbi kombe ewε; Nadi bosakoa wε a tei eDenga.

¹³Abala koko bo, Mbi nadi bobakea molema mombi ai yo. Na Mbi yona, na bana bapani Njambe.

¹⁴Oko boa, isa bana basangoaka mokuku na makia, yo mɛnɛ alwa elimo ebu, bo agbokejae yona odi na kpaci ebogwa, oko Satana mɛnɛ, a mojɔ mobogwa bonde,

¹⁵na bo acingoe basusu baya badaka a libuli masu mabu masusu, a cina ebc bobogwa.

¹⁶Mojo bo elomu ende editi a mojo mobabwənji-baDiko, oko a mojo mobana baAbalayama.

¹⁷Oko boa ebɔ̄ngɔ na nde bo adae na bananango elimo emɔci, amεci mεnε, bo adae nganga monεnε owa na ejimeli a elomu eNjambe, a bopa lisiko a mojo mojibe jibato.

¹⁸Iyo adi na ngulu a bokɔmeja baya badi a tei ebomeka, mojo bo adingoa yo mεnε yana amekama yo.

Baebèle 3

Mose Mokɔmeli. Yesu Mwana

¹Baninga basεnɔke, baya babeama a bokatana a elomu eDiko, toma lεni Yesu, Obwənji na Nganga Monεnε oe;jimeli esu.

²Iyo adaka na lisuma ai yona omohɔ, o amaka da Mose na lisuma a ndako ende esusu.

³Na Yesu na Mose ko, Yesu anɔi na ekumu; mojo bo moyoeli ondako adi na ekumu, te ndako eyoaka yo.

⁴Tu ndako edi na moyoeli; edi Njambe ko yona oyoa leka losusu.

⁵Mose adaka na lisuma o mokɔmeli ondako eNjambe bo atate tati engando jia jibalama oko ngɔ̄ngɔ.

⁶Masiya ko adaka na lisuma limwana a ndako eNjambe. Ndako emina edi oko so, bokapea boku oko a suka ejimeli esu, na njingo esu yena edi ekumu esu.

⁷A mojo momina Mwembo Mosεnɔke mobalaka bo, Oka'kani monɔkɔ monde busa bu,

⁸T'opingejaeni oko milema minu o akɔ bo a ehole ebokeja kεlε, A busa bobomeka a lisobe.

⁹Batata banu bameka mbi a esika emina, Na banε bilomu bimbi bianga macinda mabae.

¹⁰A mojo momina, mbi naka kεlε na elulu emina, na nabala bo, Milema Mibu midi na bosusu oko milaboake, Baijeba nongo njea jimbi.

¹¹Na mbi nabεlε bεli a kεlε embi bo, Batakwea nongo a liheme limbi.

¹²Anganjamani baninga, bo okina onu asaka da na molema mobe mokite, mua modi bolaboja no a njea eNjambe obomɔ.

¹³Salehanani tu busa yana adi so na ekenge ye "busa bu" a kɔpi esu, okina onu asaka da na ebaso a molema, cina eepulu ebobe.

¹⁴Mojo bo libondo lisu lidi a tei eMasiya, bokapea boku oko a suka, ejimeli yena edaka na su a libangake,

¹⁵yana adi so na ehole eekenge ye, Oka'kani monokɔ monde busa bu, T'opingejaeni oko milema minu o akɔ bo a ehole ebokeja kεlε.

¹⁶Na badaka na lipanga ndani? oko baya baka, ee, oko bo basusu baya bamana na Mose a Ejipeto.

¹⁷Na bakeja Njambe kεlε bianga macinda mabae ndani? Oko baya bakɔ bobe, na njemba jibu jidika a lisobe.

¹⁸Na abεlε bεli ai nda bo batakwea a liheme linde?—oko baya badaka na lipanga.

¹⁹Oko boa bocineaka bo baibɔngɔ bo bakwee a mojo mokite.

Baebele 4

Liheme Libato baMasiya

¹Oko boa, adi so na sako ebokwea a liheme linde, yεni so bodae na bɔ bo okina onu asaka kputoa.

²Mojo bo iso boki koko Mwako Mopele, o ama bo ka. Bwεnji ko boka bo bonama oko bonama, ema bo baya baka bwεnji baibosɔ na ejimeli.

³Iso ko baya bajimi bokweaka a liheme, o ahala yo bo, Nabεlε bεli a kεlε embi bo, Ibo batakwea nongo e liheme limbi. Bilomu binde ko bisia oko a bobanga bongondo.

⁴Mojo bo abala a ekina esika a mojo mobusa bosambo bo, Njambe ahema a bilomu binde bisusu a busa bosambo.

⁵Abala koko a esika ye bo, Ibo batakwea nongo a liheme limbi.

⁶Oko boa, isa baya baka Mwako Mopele baibɔngɔ bo bakwee cina elipanga, sako ebokwea edikai a mojo mobakina batongo, bo bakwee.

⁷Njambe ajima koko bokina busa a mojo momina, oko busa bu, o abala yo na Dawidi ngɔngɔ mεnε ekenge emi so bala bo, Oka'kani monokɔ monde busa bu, T'opingejaeni oko milema minu.

⁸Mojo bo, Yoswa, akɔkɔ yo pa bato liheme, ka Njambe aibala ngɔngɔ a mojo mobusa botongo.

⁹Oko boa, liheme liSabata lidikai a mojo mobato baNjambe.

¹⁰Mojo bo, moto akakwea a liheme liNjambe, ahemaka a hilomu hinde, o ahema Njambe a bilomu binde.

¹¹A mojɔ momina, bobwani boda na bingi a bokwea a liheme limina, bo pεpε nongo moto odi bokwa na ekɔmeli emina elipanga.

¹²Mojɔ bo, Ebaeli eNjambe edi mɔ, edi na ndangasa, na enɔi ambombo na bopɔlu. Ekwelɛkɛ moto a bobɔteja molema na mwembo, na mongi na libɔngɔ; na esambejaka male na mikano mimolema.

¹³Pεpε nongo moto odi bosabomba ai yo, na mijɔ misusu midi bohu na mbundu mene a miso mande yona osambejaka so.

Yesu Nganga Monenɛ Yona Onɔi

¹⁴Adi so ko na Nganga Monenɛ yona onɔi oho Diko, oko Yesu Mwana 'Njambe, kwani bopee boku ejimeli esu.

¹⁵Mojɔ bo, iso boditi na Nganga Monenɛ yona opeliti wa ai so yana adi so na bwɛmbu, oko Nganga Monenɛ yona onɔ njea jisusu jibomeka o akɔkɔ so, pε ko bokɔ nongo bobe.

¹⁶A mojɔ momina, so bobwani bobatama na mongbelengɔ momonganji, pεpε nongo mokakwano, bo bose wa, na bo bobolojae monganji a bokɔmeja so a ehole etaka.

Baebele 5

¹Bahɔkɔ Nganga Monenɛ bihole bisusu a tei ebato bo akwee bosili a sibano ebato na Njambe, na bo apɛ bipeeli na masiko a mojɔ mojibe.

²Ajebi boda na molema mo yɛmbu ai bato baya badi na libumi, na baya badi balaboake, mojɔ bo yo abindani na bwɛmbu yo mene.

³A mojɔ momina, abwani bopa masiko, te a mojɔ mojibe jibato pε, oko a mojɔ mojibe jinde mene pongono.

⁴Moto atasabakea a ekumu emina yo mene; Njambe amobeaka o akɔ yo na Alona.

⁵Oko boa, Masiya aisabakea Nganga Monenɛ yo mene. Okina amohɔ, oko yona obala na nde bo, Wε odi Mwana'mbi; Mbi naboti wε busa bu.

⁶Na abalaka koko a esika etongo bo, Wε odi Nganga na bosusu mene, Oko na bonganga boMalekisedeke.

⁷Yesu, yana adaka yo ya nase, angaka, na angɔɔnɔkɔ na bopipo, na mbisolí pongono, ai yona obwana bomoheleja a bogwa. Na yo amoka cina elisuma linde ai Njambe.

⁸Nongo adaka yo Mwana, akoa lisuma oko na minɔngɔ misɔ yo.

⁹Na ama yo bɔngɔ a njea jesusu, ami da oko moboloja omohelo na bosusu ai bato basusu baya bamosumaka.

¹⁰Na Njambe amobakea Nganga Monene obo-nganga boMalekisedeke.

¹¹Iso bobwani bobala na nu ngando jinene a mojɔ momina; jidi ko na kρɔkɔɔ a bocingea, mojɔ bo odini na bohoka mweka e dεye.

¹²Ino obwanini boda bakoja ehole eyai; e dεye ko otakakani moto no bεnε a bokoja no koko mijɔ Miboso mεnε miEbaeli eNjambe. Okindoini bato baya babwani na mabεi, te nongo dia dimosuku.

¹³Mojɔ bo, yona onungaka mabεi alandoakini na mijɔ Mibodongo; adi oko mwana mokεkεleke.

¹⁴Dia lidi a mojɔ mobato bapingake, baya balandoi na ekɔmεli ebokokeleja mijɔ, baya babwani bobɔteja bopele na bobe.

Baebele 6

¹A mojɔ momina, bobwani bokina mijɔ miMasiya mia midi o mijɔ Mibana, bo bonε a mijɔ Mibosuku. Bobwaniti bosɔnibɔ koko a botanda eyoeli-ecina, oko bohekoja bomolema a bokina bilomu bingasangasa, na ejimeli ai Njambe,

²na bileho a mojɔ batisimo, bobakea bomɔmɔ, bongɔ bobagwake, na bosambeja bua bodi na bosusu.

³Njambe akajima, so bodi bokɔ boa.

⁴Mojɔ bo, isa bato basi bohu, na balεli epeeli eDiko, na basi epeeli eMwembo Mosεnɔke,

⁵na balεli ebaeli epele eNjambe, na ngulu engondo ebodoa,

⁶bato bamina bakalaboa, njea editi bo bahekojae koko milema, mojɔ bo babakeaka koko Mwana 'Njambe a mole-mobokea na bolulea bobu bεnε, na bamopɔmbejaka a boso bobato.

⁷Mojɔ bo, mokpɔtɔ mokasɔ mbua baya bakwaka a esika emina bihole hisusu, na mokabota leka a mojɔ mobato baya balia gbie, bojongoa boNjambe bodi a mokpɔtɔ momina.

⁸Isa ko mobotaka oko njubε na njani pε, motabɔngɔ nongo, moditi na bojongoa; mobwani oko na mosa.

⁹Baninga, nongo abalaka so boa, njingo esu a mojɔ monu editi boa; edi a mojɔ mongando jipele jia jicingi na boheleja.

¹⁰Mojo bo Njambe t'abungake mojo; atabosa elomu enu, na epaeli enejaka no a kombe ende yana akoméke no bato baNjambe, na obakomékéni oko e deye.

¹¹Posa esu edi bo moto na moto a tei enu adae na bingi a bobanea tende ende esusu oko a suka mene.

¹²PE bodani na bomeli. Ikoanani ko na bato baya basangoaka njikano cina eejimeli na lingbangba.

¹³Mojo bo, yana akina Njambe Abalayama sako, abele beli a kombe ende mene. Aihonc bobele beli a kombe eokina otongo, mojo bo pere nongo okina otongo odi boso bonde.

¹⁴Abala bo, Soti mene, mbi nâjongoa weoko na bojongoa; Nâheje mbota eweoko boheje.

¹⁵Oko boa, Abalayama, ama yo da na lingbangba, ami ko sooko bodikeja.

¹⁶Bato babeléké beli a kombe emoto yona odi boso bobu, na isa badi na kité, kité emina edi bosia a mojo mobeli.

¹⁷Oko boa Njambe abele beli pongono, mojo bo apala bo basangoli bandi-keja bacingee na soti bo bodikeja bonde botakputoa nongo.

¹⁸A mojo momina, so baya bacii bo bobolame, bobwani bosapingeja na bopea boku njingo yena edi a boso bosu, cina emijó mi Mibae mia mitakputoa nongo, mojo bo Njambe atahonc bokosea na mijó mimina.

¹⁹Iso bopeli njingo emina o longo emwembo, njingo esoti na embilimake yena ekweaka a dongo ditongo diehuako.

²⁰Na Yesu yo mene asui hoso bosu, na akwei a tei eesika emina a mojo mosu, mojo bo adi Nganga Monene na bosusu, oko na bonganga boMalekisedeke.

Baebèle 7

¹Iyo Malekisedeke, kumu oSalema, adaka nganga oNjambe obonc. Asongana na Abalayama yana ahulaka yo a bowa bakumu a bila, na amojongoa.

²Abalayama amokaba libondo lidomi lileka losusu. Cina ekombe ende edi boso Kumu oBodongo; na adi koko Kumu oSalema; cina emina edi Kumu oBowi.

³Apeliti sango isa nango, pere koko mbota; masu mande pere libangake, ehelo ende pere suka; adi nganga na bosusu na elimo eMwana 'Njambe.

⁴Leni moto omina monene, mojo bo Abalayama amopa libondo lidomi lileka lopea yo a bila.

⁵Bana baLewi baya badi a elomu enganga, badi na kpaci eMobeko bo base libondo lidomi ai bato, oko ai bato babu bɛnɛ, nongo adi bo bana baAbalayama.

⁶Iyo ko yona oditi na bu mbota, asɔ libondo lidomi ai Abalayama yona odaka na ndikeja, na amojongoa.

⁷Mojɔ modi bohu mɛnɛ bo moto yona ojongoaka anɔi yona osɔkɔ bojongoa, pɛ kitem.

⁸Ibaya basɔkɔ libondolidomi ya, badi oko bato babogwa; iyo ko adi mo, na tati edi a mojɔ momina.

⁹Oko boa bobwani bobala bo Lewi yo mɛnɛ, yona osɔkɔ libondo lidomi, akaba libondo lidomi yana akɔ Abalayama boa,

¹⁰mojɔ bo adaka oko a sɔpɔ jitata onde yana asongana yo na Malekisedeke.

¹¹Isa bonganga boLewi bodi bobɔngeja bato soti, (mojɔ bo bato basɔ Mibeko cina ebonganga bomina) ebɔngi bo okina nganga otongo adoe mojɔ moye, te nongo na bonganga boAlona, oko na bonganga boMalekisedeke?

¹²Mojɔ bo bonganga boyene bodi na Mobeko moyene pongono.

¹³Mijo mi Mibalama a mojɔ momoto olıkota litongo, na pɛpɛ nongo moto olıkota limina okɔ elomu ehtumbu.

¹⁴Na mojɔ modi bohu mɛnɛ ho Kumu osu adaka olıkota liYuda, na Mose ailanga nongo kombe elikota limina a mojɔ mobonganga.

¹⁵Mojɔ momina monɔi na bohu a mojɔ monganga otongo yona odoa na elimo eMalekisedeke,

¹⁶yona odi nganga na ngulu ebomɔ bua bodi na bosusu, te nongo na kpaci emokina mobeko a mojɔ mombota ende.

¹⁷Mojɔ bo tati edi a mojɔ monde bo, Wε odi nganga na bosusu obonganga boMalekisedeke.

¹⁸Ekina ekɔmeli eyou ehɛngɛmɛ cina bo edaka e yɛmbu, na eibɔngɔ.

¹⁹(Mojɔ bo Mobeko moibɔngeja eka). Na njingo etongo eboloi yena enɔi na bopele, na so bodi bobatama na Njambe oko na njingo emina.

²⁰Mojɔ momina moitaka bɛli.

²¹BaLewi bakwea a elomu enganga, pɛ bobɛlɛ nongo bɛli. Yesu ko adi nganga cina ebɛli ende yona obala na nde bo, Kumu abɛli bɛli, na aditi na ebaeli etongo. Wε odi nganga oko na bosusu.

²²A mojɔ momina, Yesu adi mokando moMokongo mua monɔi na bopele.

²³Mojo motongo, nganga badaka banene; baihono boyeyoa, a mojo mobogwa.

²⁴Iyo ko adi nganga oko na bosusu, cina bo yo mené adi oko na bosusu.

²⁵A mojo momina, yo abwani boheleja na bosusu mené, baya badoaka al Njambe na njea ende, mojo bo yo adi mo oko na bosusu bo adae mosili a mojo mosu.

²⁶Nganga monene yona odi boa abwana na su soti, mosenoke, pere nongo lindo, pere nongo litono, mobotonoke na babe, yona ongojomo a Diko yena enoi.

²⁷Iyo abwaniti bopa masiko tu busa, o akoko nganga batongo a mojo mojibe jibu bene na jibato batongo pongono. Iyo ak obo ehole emoci yena ebwani na bosusu, yana asapa yo mené lisiko.

²⁸Mobeko mohengek bato a elomu enga-nga baya badi oko ba yembu; ebaeli ebeli ko, yena edoa ngongo jiMobeko, ehengek Mwana yona odi mobongoke oko na bosusu mené.

Baebele 8

Yesu Nganga Monene na Mokongo Moyene

¹Cina engando jimi so bala edi bo, Iso bodi na Nganga Monene o boa, yona odi a eb oebami emongbeleng moKumu oDiko.

²Adi mokomeli a tei eesika esenoke, a tei eEtondo esoti yena epika Kumu, te moto.

³Nganga basusu bahengemek a bopa bipeeli na masiko. Oko boa yo koko abwani boda na eka a bopa.

⁴Akoki yo da ya nase, ka aditi nongo nganga, cina bo nganga badi ya baya bapaka bipeeli o adi ekomeli eMobeko.

⁵Elomu ekoko bo edi embete na elimo eesika esenoke oho Diko; mojo bo yana akana Mose bopika Etondo, Njambe amoleha bo, Toma nganjama bo okoe leka losusu oko na elimo yena eboloi ai we a mono.

⁶E deye ko, elomu eso Masiya enoi yena ebu bou mené, mojo bo adi mosili oMokongo mua monci mua moyou, cina bo modi na madikeja maya manci na bopele.

⁷Isa mokongo moboso mobongo na soti, ka pokiso eiboloa a mojo momokongo moMibae.

⁸Njambe ane mij Mibu yana abala yo bo, Kumu abalaka bo, A masu mangongo, Mbi nadi bobakea mokongo moyene Na likota liYisalaele, na likota liYuda.

⁹Te nongo o mokongo mobakea mbi na basangwa'bu, A busa bopea mbi bo na ebɔ̄ Bo nabamanejae a Ejipito; Mojɔ̄ bo, ibo baiyeyoa a mokongo mombi, Na mbi nababule oko bobule. Ebaeli eKumu edi boa.

¹⁰Kumu abalaka bo, Mokongo mobakeabí mbi a masu mangɔ̄ngɔ̄ Na likota liYisalaele modi oko mu; Mbi nasabí Mibeko mimbi a tei emiembo mibu; Namisɔ̄nɔbí a milema mibu. Mbi nadabí Njambe obu, Na bo badabí bato bambi.

¹¹Moto atabalabí koko na mina'nde Isa moto na mwangwa'nde bo, Jeba Kumu. Mojɔ̄ bo bajebabí mbi kanga basusu mɛnɛ, Na bakɛkɛlɛkɛ na banɛnɛnɛ pongono.

¹²Mojɔ̄ bo nadabí na wa a mojɔ̄ momabunga mabu, Na nitalɛ koko jibe jibu.

¹³Abalaka yo a mojɔ̄ moMokongo moyene, anjaka mua moboso o eka yena editi koko na cina. Na isa eka editi koko na cina, na isa ebengi bogwa, edikai mweka pɛ bo edimoe na bosusu.

Baebele 9

¹Mokongo moboso modaka na Mibeko a mojɔ̄ mobosakoa, na modaka na esika ebosakoa ya nase.

²Mojɔ̄ bo bapika Etondo, na epei-epaka, na mesa, na milɛmbɛ mia mitandama a boso boNjambe; leka lomina lodaka a ekenge eboso; kombe eesika emina edi Esika-eBoseñɔ̄.

³Etondo etongo edaka a tei, a ngɔ̄ngɔ̄ jingbungbu ejibae; kombe eesikaemina edi Esika-enɔ̄i-Boseñɔ̄.

⁴Litumbu lia liliuama na wɔ̄lɔ̄ lidaka ena, na edejai emokongo yena ehuama na wɔ̄lɔ̄; esei yena eluama na wɔ̄lɔ̄ edaka a tei a mojɔ̄ momanna, na pango aAlona yena etɔ̄, na matai maMokongo.

⁵Bilimo biekumu bidaka a diko diedejai, na esie emina ehua mongbelɛngɔ̄ mowa. Botabala a mojɔ̄ mocina jileka lu losusu e deye.

⁶Bakolea leka losusu boa, bo nganga bakwee a etondo eboso masu masusu a mojɔ̄ moelomou ebu.

⁷A tei eetondo ebibae ko, nganga monɛnɛ akweaka oko yo buki tu yanga ehole emɔ̄ci, na t'akputoake botomba makia bo amapejae a mojɔ̄ monde mɛnɛ, na a mojɔ̄ mojibe jibato.

⁸Mwembo Mosenɔ̄ke monejaka na mojɔ̄ momina bo njea ebokwea a tei eEsika-enɔ̄i-Boseñɔ̄ eipaka boloa a ehole edaka Etondo eboso.

⁹Mojo momina modi oko monde a mojo moehole ye, yana apaka bo bipeeli na masiko maya mabwaniti bobongeja molema momoto yona osakoaka;

¹⁰ngando Jimina jicingi na boyaka, na bomwaka, na bososa na madiba; Mibeko a mojo momokuku mia midi na kpaci oko a ehole ehobongeja.

¹¹Yana ko adoa Masiya, Nganga Monene a mojo mongando jipele jibodoa, yo anō njea eetondo yena enoi na buke na bopele (eipikama na momo, eiyoama na ekomeli engondo ye),

¹²na akwea a Esika-eBoseno ehole emoci pē yena ebwani na bosusu; aikwea na makia makambeli na bana-bangombō, oko na makia mande mēne, na aboloja lisiko lia lidi oko na bosusu.

¹³Mojo bo, isa makia mangombō na kambeli na mihulu mimwana-ngombō mia mimeseké bo ai bato baekia Mibabongejaka a njea emokuku,

¹⁴esingaiti makia maMasiya yona osapa lisiko, pēpē nongo litōnō, ai Njambe a njea eMwembo mua modi na bosusu; madi bosenoja milema minu a bilomu bigwake, bo okoméeni Njambe obomō.

¹⁵A mojo momina, yo adi mosili oMokongo Moyene, bo bay a babeama base lisango lia lidikejama, lia lidi na bosusu, cina ebogwa bua bobasikoaka a jibe jia jidi a cina eMokongo moboso.

¹⁶Mojo bo isa lisango lidi, yona okinaka lisango limina adi bopeta gwa.

¹⁷Moto amiti gwa, otongo atasangoa; lisango libwaniti isa moto yona okinaka lisango adi oko mo.

¹⁸A mojo momina Mokongo moboso mobakeama na makia.

¹⁹Mojo bo, Mose, ama yo langa mijō misusu miMiheko ai bato basusu, ami tomba oko makia mabana-bangombō na makambeli, na madiba na makambule makpetu na kasa jilitindi, na amesē mokanda mēne na bato basusu pongono.

²⁰Na abala bo, Ima madi makia maMokongo mobakei Njambe na nu.

²¹Amesē koko boa Etondo na leka losusu lobo-sakoa, oko na makia.

²²Edi Soti bo Mibeko mikojaka bo leka losusu losenoaka na makia; makia mamiti sopea, bo yē bojibe boditi.

²³Isa leka lua lodaka oko bimbete bingando jiDiko losenoa a mojo momasiko mamina, ngando jiDiko mēne jibwana na masiko maya manci masiko mamina na bopele.

²⁴Mojo bo Masiya aikwea a Esika-eBoseno yena eyoama na momo, yena edi oko embete pe eEsika-eBoseno esoti; akwea a Diko men bo amae a boso boNjambe e deye a mojo mosu.

²⁵Aikwea bo asape bihole binene, o akweaka Nganga Monene a Esika-eBoseno yanga na yanga na makia maya maditi makia mande men.

²⁶Akoki yo ko boa, ka adingoe bihole binene, banga na libangake lingondo. Iyo ko adoa ehole emoci pe a suka ebianga, bo asape yo men lisiko a bodongeja bobe.

²⁷Bato te babambake bogwa, bua bodi ehole emoci, na ngongo jimina oko esambi.

²⁸Oko boa Masiya pongono asapa lisiko ehole emoci, bo atombe muna mojibe jibato banene; na adoabi koko, te a mojo mobobe, oko a boheleja haya bamonjaka yo na tende.

Baebele 10

¹Mibeko midi oko embete pe engando jipele jibodoa, te elimo men engando jimina. A mojo momina, Mibwaniti bolongeja na soti baya badoaka na masiko yanga na yanga.

²Isa mabwani, ka bato bakina bopa masiko. Akoki bo senoa, ka baya basakoaka batada koko na ejebeli ebobe.

³Masiko mamina ko malejek bato a mojo mobobe yanga na yanga.

⁴Cina bo makia mangombo na maka-mbeli mabwaniti bodongeja jibe nongo mweka.

⁵A mojo momina, Masiya, yana adoa yo a ngondo, abala bo, We t'opalake masiko na bipeeli; Oselingoi ko mokuku a mojo mombi;

⁶We Posepake nongo na masiko malitumbu, na bipeeli a mojo mobobe.

⁷Oko boa, mbi nabali bo, Mbi yona; Mbi nadoi bo nakoe bolulea bowe Njambe; Mojo momina mosonomo a mokanda moMisomo a mojo mombi.

⁸Abala boso bo, We t'opalake na t'osepake na masiko, na bipeeli, na bipeeli bilitumbu, na masiko a mojo mobobe (bapaka leka lomina cina eMibeko).

⁹Na ngongo, abala bo, Mbi yona; mbi nadoi bo nakoe bolulea bowe. Oko boa adongejaka mua moboso, bo abakee mua moMibae.

¹⁰Na so bohengeme ai Njambe cina ebolulea bomina, a mojo moepeeli emokuku moYesu Masiya o lisiko ehole emoci, yena ewani na bosusu.

¹¹Nganga basusu bakɔkɔ elomu ebu busa na busa; bapaka masiko bihole bisusu amεci, maya mabwaniti bodongeja jibe nongo mweka.

¹²Masiya ko, ama yo pa lisiko limɔci lia libwani na bosusu mεnε, ami da oko a ebɔ ebami eNjambe,

¹³na ambaka oko bo soki jinde jidae ebakei a cina jibibota binde.

¹⁴Cina bo, yo abɔngeja na bosusu, baya bahεngεmε ai Njambe, oko na lisiko limɔci.

¹⁵Mwembo Mosenɔke mongamejaka koko mojɔ momina ai so. Mojɔ bo, abala boso bo,

¹⁶Kumu abalaka bo, Imu modi Mokongo mobakeabí mbi na bu A suka emasu mamina; Nasabí Mibeko mimbi a tei emilema Mibu; Namisɔnɔbí oko a bolε bobu.

¹⁷Na abala ngɔngɔ bo, Nitale koko jibe jibu, na mapanga mabu, na ikina.

¹⁸Oko boa isa jibe jikinami, jibwaniti koko na lisiko a mojɔ mojibe.

¹⁹A mojɔ momina baninga, so bodi na njea bohu a bokwea a Esika eBoseñɔ, cina emakia maYesu,

²⁰oko na njea eyene, njea ebomɔ echoja yo a ngbungbu, oko mokuku monde mεnε.

²¹Na adi so na Nganga Monεnε a ndako eNjambe,

²²bobwani bobatama na molema mosoti na ejimeli enεnε, pεpε kitε, na milema misu mibɔtɔnɔke na ejebeli ebobe, na mikuku misu misosamake na madiba mapele.

²³Yeni so bopee boku njingo ejimaka so, pε nongo bokamakama, mojɔ bo yo atakputoja nongo sako ekina yo.

²⁴Kinani bodaε na mbambano a mojɔ moepaeli na bilomu bipele.

²⁵Bobwaniti bokputoa a matitana o akɔkɔ bakwa; hεjεni bingi a bolehana moto na mina'nde moto, o anεkε no bo Busa bomina bokεkε adoe.

²⁶Bokakɔ bobe na bolulea bosu bεnε, yana adi so na ejebeli enjea esoti, likina lisiko litongo a mojɔ mojibe liditi.

²⁷Edikai oko njingo eesambi yena ekɔkɔ maneene, na mosa monεnε mua modi botumba soki.

²⁸Isa moto yona osεtoja Mibeko miMose agwa na sanga, cina etati ebatati babae isa basato,

²⁹esingaiti moto yona opombéjaka Mwana 'Njambe, yona osétojaka makia maMokongo maya mamohengé ai Njamhe, o eka engasa, na asambojaka Mwembo momonganji moNjambe.

³⁰Mojo bo so bojebaka yona obala bo, Likundu lidi mojo mombi; mbi nakundabí. Na abala koko bo, Kumu asambejabí bato bande.

³¹Modi mojo mobo bonené a bokwa a momo maNjambe obomo.

³²Toma leni masu maboso. Yana aso no bohu a masu mamina, odakani na lingbangba a tei eminongó o bila mené.

³³Bikina bihole baseké no, batangola no, na bapukeja no; bihole bitongo ocinamani na bato batongo baya badaka na minongó mimina.

³⁴Odakani na wa ai bato baya badaka a minyélo. Yana atomba bato leka lonu, odakani oko na sepi, cina bo ojebakani bo lisango linu linzi na bopele, lia lidi boyeyoa.

³⁵A mojo momina, t'obungejaeni oko eci enu mojo bo edi na ndese enené.

³⁶Etakaka na nu oko lingbangba bo okjeni bolulea boNjambe, na bo oseni mua modikeja yo.

³⁷Mojo bo edikai oko mweka pε, Na yona odi na sako ebodoa adi bodoa; atayeyoa a bodoa.

³⁸Moto ombi obodongo adi bohela oko na ejimeli. Akasombó mandulendule ko, molema mombi motasepa na nde.

³⁹Iso ko boditi bato baya basombóko mandulendule bo bobunge, oko bato baya badi na ejimeli a boheleja miembo Mibu.

Baebele 11

Ejimeli

¹Ejimeli edi ndanga engando jilendeké so; enejaka so bo ngando jidi so pε bone na miso jidi soti.

²Bato baehele baso tati epele oko a mojo moejimeli.

³Edi oko a mojo moejimeli bo bocingeaka bo Njambe ayoa ngondo na ebaeli ende, na bo atomba leka lodi so pε bone na miso a boko leka loneké so.

⁴Na lisiko lipa Abela, na lisiko lipa Kama, lia liAbela lmø na bopele, oko a mojo moejimeli. Alonga na du o moto obodongo, mojo bo Njambe ajima masiko mande. Iyo agwa; abalaka ko na su e dεye a njea eejimeli emina.

⁵Anoka akindoa a mojɔ moejimeli, bo atanɛe nongo bogwa, na aiboloa koko, mojo bo Njambe amotomba. Adaka yo pε bopeta kindoa, adaka na esako bo asepejaka Njambe.

⁶Isa ejimeli editi, moto t'ahɔnɔke bosepeja Njambe. Mojɔ bo moto yona odoaka a Njambe abwani bopeta jima bo Njambe adi, na bo asepejaka bayamodukaka.

⁷Noa asɔ eleho ai Njambe a mojɔ mo ngando jidaka yo pε bopeta ne na miso; ahokea, na ayoa masua oko a mojɔ moejimeli, bo ahelejae denga dinde. Oko boa adumba ngondo, na asangoa bodongo bua bocingi na ejimeli.

⁸Abalayama asuma Njambe cina eejimeli, yana abeama yo bo akεe a ekina esika, yana adaka yo pε bopeta Sangoa esika emina; na angɔ, pε ko bojeba esika ekεkε yo.

⁹Adaka mokendeli a esika ebodikeja, oko a mojɔ moejimeli; edaka o esika ebato batongo, na yo apika bitondo a esika emina, bo adae ena na Isaka na Yakobo, basangoli na nde babodikeja bomɔci.

¹⁰Mojɔ bo njingo ende edaka oko a ngando mɛnɛ yena edi na eyoeli-ecina eboyeyoa; yona okana ngando emina, na moyoeli ongando emina adi oko Njambe.

¹¹Sala yo mɛnɛ, nongo adaka yo mobange, asɔ ngulu bo alwae demi cina eejimeli, mojɔ bo ajima bo yona omokinea sako atakpu toja sako.

¹²Oko boa momi omɔci, mokuku monde oko mogwake, abota bato banɛnɛ pε njɛngi, bayabadi o njɔtɔ badiko, na mbumee jimbongu emadiba-mamukwa.

¹³Ibo basusu bagwa na ejimeli, pε ko bossɔ ngando jibodikeja. Bajinɛ ko bohali, na basepa a mojɔ momina, cina bo bajima bo badi oko bakendeli na midoa a ngondo.

¹⁴Bato bayababalaka boa, banejaka na soti bo badukaka ngando oko boduka, ngando ebu bɛnɛ.

¹⁵Akɔkɔ bo le ngando ema bo kina, ka badaka na njea ebosɔnibɔ oho.

¹⁶Posa ebu ko edi a ngando yena enɔi na bopele, oko oho Diko. A mojɔ momina, Njambe aditi na sɔni a boda Njambe obu, mojɔ bo yo aselingoa ngando a mojɔ mobu.

¹⁷Abalayama, yana amekama yo, apa Isaka o lisiko cina eejimeli. Iyo, yona osɔ madikeja, ajima bo ape mwana'nde omɔci o lisiko.

¹⁸Na sako edaka a mojɔ momwana omina bo, Bato bambota ewε badi bomana oko ai Isaka.

¹⁹Iyo ajima bo Njambe adi na ngulu a bongoj̄ bato a bogwa m̄en̄e. Na amos̄ koko boa, moj̄ bo adaka o mogo.

²⁰Isaka ajongoa Yakobo na Esau a moj̄ mongando jibodoa, oko cina eejimeli.

²¹Yakobo, yana adaka yo oko a bogwa, ajongoa bana-bami baYosepa, om̄ci om̄ci, cina eejimeli, na asambimeja na pango ende bo ange Njambe.

²²Yosepa, yana abenga yo bogwa, abala a moj̄ moboyana boBa-Yisalaele oko cina eejimeli, na akina mon̄k̄ a moj̄ monjemba ende.

²³Baboti baMose bamobomba songe basato yana abotama yo, cina eejimeli, moj̄ bo ban̄e bo adi mwana mopele, na baibanga mobeko mokumu.

²⁴Mose, yana akandoa yo, alona bo bamobee mwana omwa'mwali oPalo.

²⁵Na bocingama na bato baNjambe a bodingoa bobu, na bosepa na sepi yena etayeyoaka a moj̄ mongando jibe, yo apala gbo oko bocingama na bato baNjambe a bodingoa bobu.

²⁶Na biloli a moj̄ moMasiya, na leka loyumu loEjipeto, yo ajima bo biloli a moj̄ moMasiya bin̄ci na yumu, moj̄ bo abakea miso mande a ndese.

²⁷Adonga a Ejipeto cina eejimeli, p̄e bobanga nongo k̄le ekumu, moj̄ bo adaka na molema mombilimake, o moto yona onjaka okina yona otaboloaka na miso.

²⁸Aselingoa Kola eBon̄, na ames̄e makia cina eejimeli, bo obw̄enji-obogwa an̄e bas̄mi baYisalaele.

²⁹Baleka Madiba Makpetu o ngondo m̄en̄e ekokake, cina eejimeli. BaEjipeto ko, ameka bo bok̄ boa, bagwa a madiba.

³⁰Ama bo hombâ Yeliko masu sambo, mongba-momatai mongando momi sopea oko bosopea cina eejimeli.

³¹Laba, mwali ondukeli, aigwa na bato balipanga, cina eejimeli, moj̄ bo ass̄ k̄engi na bowi.

³²Moj̄ motongo m̄bala mbi nda? Ehole etakaka na mbi a bot̄nd̄ mij̄ miGidona, na Balaka, na Samasona, na Yepeta, na Dawidi, na Samwele, na bat̄nd̄ci.

³³Edaka oko a moj̄ moejimeli bo bagbokeja makumu, basambeja mij̄ na soti, bas̄ madikeja, badipa min̄k̄ migb̄nḡ,

³⁴badima ngulu emosa, bahela a mwenḡ moab̄ne, bas̄ ngulu a tei eyogo, badaka bato bapipo a bila, na bacieja mandundu masoki jibu.

³⁵Bali bas̄ koko bato babu baya bahula a bogwa. Batongo batuama nji oko a bogwa, p̄e bojima bo bacinoame, bo banḡe a bom̄ bua bon̄ci na bopele.

³⁶Eatongo koko badingoana matangola, na nji, ee na minyɔlɔ, na blɔkɔ pongono.

³⁷Baba'la matai, baba'la na misumani, bagwa na abenɛ, balwa biobo bibata na kambèli; badaka na bokwali, na esɔpi, na jɔɔlɔ enenɛ.

³⁸Ngondo eibɔngɔ a mojɔ mobu; njea jibu jidaka oko a lisobe, na a meno, a mimbondɔ, na a bibubondo bingondo.

³⁹Ibo basusu bangameja ejimeli ebu, pε ko bɔɔsɔ mua modikejama.

⁴⁰Mojɔ bo Njambe aselingoa mokina mojɔ mua monɔi na bopele a mojɔ mosu, bo bobɔngɔ bobu bodaе na su pongono.

Baebele 12

Lingbangba a Bomeka

¹Lindundu linɛnɛ libatati lihikaka so. A mojɔ momina, bopele bo bodumbe mina misusu mitombaka so, na bobe bua bobindanejaka so, bo bopote na lingbangba a njea yena edi a boso bosu.

²Kwani miso masu madae oko ai Yesu, yona obanga na yona odi bobɔngeja ejimeli esu. Iyo ahɔnɔ mole-mobokea, na ale bo sɔni emina edi eka engasa, oko a mojɔ mosepi yena edaka a boso bonde, na adi a edie a ebɔ ebami emongbelengɔ moNjambe.

³Kinani bolε bonu bodaе ai yo yona ohɔnɔ lisoki libato babe, bo osaka ngwaeni, na oSaka mbɛni a milema minu.

⁴Anaka no bila na bobe, makia manu masopeakini a bila emina.

⁵Na obosaini eleho yena elehaka no o bana; Mwana'mbi, t'olεe oko bo bosisa boKumu bodi mojɔ mokɛkɛ. Akalemoa na wε, t'omɛmelεe oko.

⁶Mojɔ bo, Kumu akapala moto, amosisaka, Na atuaka bana basusu basɔkɔ yo.

⁷Dani na lingbangba a tei ebosisa. Njambe akojaka no o bana. Okwa mwana adi, na sangwa'nde pε bomotna?

⁸Nji jidi a mojɔ monu basusu. Omiti sɔni nji, oditini bana basoti, oko bana babɔɔli.

⁹Isa bodaka na lisuma ai basangwa'su ya nase baya batua so, bota-suma Sango omiembo na lisuma linɛnɛ bo bohele?

¹⁰Basangwa'su hatua so ehole ekue, yana adaka bo na bolε bomina. Njambe ko atuaka so a bobɔngeja so, bo bose libondo libosɛnɔ bonde.

¹¹Bosisa bosusu bodi na mwano a ehole emina, te nongo sepi. Bato ko hakakoa na mojɔ momina, bosisa bomina bobotaka mbuma jibowi na bodongo ai bo.

¹²A mojɔ momina, pingejani mɔmɔ manu maya mangwai, na muli manu maya madi ma yεmbu.

¹³Liani njea jitangboake a mojɔ mobibota binu, bo yona otɛngɔkɔ atabukea ekɔ, oko bo ahεe na ngulu.

¹⁴Kɔni na ngulu enu esusu bo odaeni na bato basusu oko bowi, na bo odaeni na bosεnɔ, mojɔ bo moto amiti da na bosεnɔ atanε nongo Kumu.

¹⁵Nganjamani bo okina moto atakputoa bɔsɔ monganji moNjambe, bo mokina monginga moboyo mosaka tɔ, a bonɔngeja no, na a bobeja bato banεnε.

¹⁶Nganjamani bo okwa onu atada moto obɔɔli, pεpε ejimeli, o adaka Esau yona osɔmbɔtɔnɔ lisango linde lisɔmi a mojɔ moteni emɔci edia.

¹⁷Ojebakani bo yana adaka yo na posa ngɔngɔ a bosangoa bopamboa, alonama oko bolonama; nongo aduka yo na mbisolı, aiboloja nongo pokiso a bohekoja molema.

¹⁸Ino oibatamani na mono momɔmɔkɔ bato na mɔmɔ, mua mongoa na mosa, na modidi, na eyembi, na mopomba,

¹⁹na doi limondule, na doi likɔpi; bay a baka kɔpi emina bangɔɔnɔ bo ekinaekenge etongo etabalama na bu.

²⁰Mojɔ bo baihɔnɔ mobeko bo, Nongo tito akabatama na mono, badi bomo'la matai.

²¹Mojɔ momina modaka maneene mεnε. Mose yo mεnε abala bo, Mbi nadi na bɔ na mongongoma.

²²Ino ko odoini a Mono moSiona, a ngando eNjambe obomɔ, Yelusalema yena eDiko, ai mandundu mababwεnji-baDiko pe njengi.

²³Odoini a likita na denga dibana basɔmi bay a badi na kombe jibu oho Diko, ai Njambe yona odi Juji obato basusu, a miembo Mibato baejimeli bay a babɔngɔ.

²⁴Na odoini ai Yesu yona okwea bosiili na Mokongo Moyene, na a makia maya mameɛɛmi; na makia mande, na makia maAbela, makia mande manɔi na bwεnji bopele.

²⁵Nganjamani, osaka lonani boka yona obalaka. Mojɔ bo, isa bato baihela bay a balona boka yona obaleha ya nase, esingaiti so, boka-sεtoja yona obalaka oho Diko; iso bohela na ye?

²⁶Ngondo ejonga a mojɔ mokɔpi ende a ehole emina. Na sako ende edi e dεye bo, Mbi nadi bojungeja koko ehole etongo, te ngondo pe, oko Diko pongono.

²⁷Koko ehole etongo; ekenge emina edi na cina bo leka lua lojongabí lodi bokindoa elimo etongo, bo leka lua lobwaniti bokumana lodi boyeyoa.

²⁸Bokumu bosökə so bobwamti bokumana; a mojɔ momina, kinani bosakoe Njambe na bosakoa bosoti, oko na lisuma na bɔ.

²⁹Mojɔ bo Njambe osu adi mosa mɛnɛ mua mosiejaka oko bosieja.

Baebèle 13

Bileho Bisuka

¹Pε bokinani bopalana o baninga.

²T'obosaeni oko bokɔ monganji ai midoa, mojɔ bo bakina baya bakɔ boa basɔ babwɛnji, pε ko bojeba.

³Pε bobosani bato baya badi a blɔkɔ; lɛni bo odini na bu a blɔkɔ no bɛnɛ. Pε bobosani bato baya badingoaka, mojɔ bo odini na mikuku no bɛnɛ.

⁴Bolongana bobwani boda mojɔ molisuma ai bato basusu, na esambe emomi na mwali ebwani boda na bosɛnɔ. Mojɔ bo Njambe adi bosambeja bato balisɔngi na bato babɔ̄li.

⁵T'odaeni oko na posa elikonja. Dani na sepi a mojɔ moleka lopeli no, mojɔ bo Njambe abala bo, Mbi nitakwa wε, nitabule wε nongo mweka.

⁶A mojɔ momina bobwani bobala na ejimeli esu esusu bo, Kumu adi Mokɔmeja ombi; nitabanga nongo eka. Moto adi bokɔ ai mbi ndeni?

⁷Pε bobosani basuku banu baya batɔndɔ no mwako moNjambe. Lɛni suka emihelo Mibu; ikoanani na ejimeli ebu.

⁸Yesu Masiya adi busa bu, o adaka yo busa bi, na adi boda boa oko na bosusu mɛnɛ.

⁹T'ojimeni oko bo makoja mayene matongotongo mala-bojae no. Njea esoti edi bo molema momoto mosɔkɔ ngulu oko na monganji moNjambe, te nongo na leka loboyaka. Baya bajimaka leka lomina baibɔ̄ngɔ nongo a mojɔ momina.

¹⁰Iso bodi na litumbu limasiko, na baya bakɔkɔ elomu ebu a Etondo baditi na kpaci a boyaka a litumbu limina.

¹¹Mojɔ bo Nganga Monɛnɛ akweaka a Esika-eBossɛnɔ na makia matito, o lisiko a mojɔ mobobe, na batumbaka njemba jitito bamina a sokolu engando.

¹²Oko boa, Yesu pongono adingoa a sokolu emongba mongando, bo asenojae bato na makia mande mɛnɛ.

¹³A mojɔ momina, atombaka so muna mobiloli a mojɔ monde, kinani bomane ai yo a sokolu engando.

¹⁴Mojɔ bo boditi na ngando eboyeyoa ya nase. Ngando edukaka so edi ngando ebodoa.

¹⁵Yeni so bopɛ lisiko libosakoa ai Njambe bihole bisusu, oko na nde; cina emina edi mbuma jimaposo maminɔkɔ maya majimaka kombe ende.

¹⁶Pɛ bobosani bilomu bipele bokɔ, na boda na likabo; masiko Inaya mase-pejaka Njambe oko ma.

¹⁷Sumakani basuku banu, na kɔni o apalaka bo, mojɔ bo badi o banjeli bamilema minu, o bato bay a badi boneja elomu ebu. Kɔni bo elomu ebu edae na sepi, te nongo na manji, osaka samboani no bɛnɛ.

¹⁸Ingakani a mojɔ mosu. Bojimaka bo boditi na mojɔ a molema. Posa esu edi bo bodes na ekɔmeli epele a njea jisu.

¹⁹Mbi nalebaka no na bopipo bo Okɔeni boa, bo nasɔmbe ai no bokpa.

²⁰Njambe obowi angɔjɔ koko Kumu osu Yesu a bogwa, Monjeli Monɛnɛ obata, na makia maMokongo mua modi na bosusu.

²¹Yε abɔngejae no na ngando jisu jipele a bokɔ bolulea bonde, na akɔe a tei enu o apalaka yo, a mojɔ moYesu Masiya. Ekumu ai yo oko na bosusu. *Amen.*

²²Mbi nangɔɔnɔkɔ no baninga bo osen'i bopele ekenge ye eeleho embi, mojɔ bo nasɔnei no oko mokanda mokue.

²³Obwanmi bojeba bo bacingoi mwangwa'su Timoteo. Akamea bokpa, iso na nde bodi bo'nɛnɛ na nu.

²⁴Abɛjɛni basuku banu basusu, na bato baDenga basusu. Bato baltalia babɛjɛke no njɛbɛ.

²⁵Yε monganji moNjambe modae na nu basusu. *Amen.*

Yakobo

Yakobo 1

¹Njεbe embi Yakobo, mokɔmeli oNjambe na oKumu Yesu Masiya, ai makota domi-na-mabae maya manangana.

²Baninga, okanεni bomeka tungu na tungu, dani na sepi a mojɔ momina.

³Ojobakani bo ejimeli enu ekamekama, lingbangba linu lidi bohε.

⁴Lingbangba ko libwani bokɔ elomu ebɔngɔke mεnε bo odaeni bato babɔngɔke, pε botaka nongo mokina mojɔ.

⁵Okina onu akataka bowεi, yε ange Njambe, nongo ase; mojɔ bo yo adi na likabo linεnε ai bato basusu, atajuma nongo mweka.

⁶Adi bongako na ejimeli, pεpε nongo kite; mojɔ bo yona odi na kite adi o mula momadiba mua molindoamaka na mopimboaka na pwea.

⁷Moto omina abwaniti bolε bo adi bossɔ eka ai Kumu,

⁸mojɔ bo adi moto omilema Mibae, na ekɔmeli ende esusu edi na mokakwano.

⁹Moto obokwali akasɔ ekina ekumu, yε adae na sepi a mojɔ momina;

¹⁰na moto olikonja akasamboa, yε asepe pongono, mojɔ bo yo adi bogwa o agwaka malekε manjienjie.

¹¹Busa bokahoa, na moi mokagbasoa, njienjie jiwɔssɔkɔ oko bowɔssɔ, malekε makwaka na esengɔ emina esusu esiaka. Moto olikonja adi bowɔssɔ koko boa a tei ebilomu binde.

¹²Moto akahɔnɔ bomeka, moto omina adi na bojongoa; mojɔ bo, akapasama adi bossɔ likongo libomɔ lidikeja Njambe ai bayo bamo-palaka.

¹³Moto akamekama, abwaniti bobala bo, Njambe amekaka mbi; mojɔ bo Njambe atamekamaka na bobe, na atamekaka moto.

¹⁴Moto ko amekamaka yana alaboaka yo na posa jinde mεnε jia jimolengεke.

¹⁵Posa ekalwa, ebotaka oko bobe, na bobe bokagbasoa bobotaka oko bogwa.

Ekɔmeli eMoto oEjimeli

¹⁶Pε bobungani, baninga baepaeli.

¹⁷Bipeeli bisusu bipele, na toma jisusu jibɔngɔke, jihulaka oho diko ai Sango obohu bosusu. Iyo adi na bosusu oko tungu emɔci; esie ebohekaoa bonde editi.

¹⁸Iyo abota so na ebaeli esoti, oko a mojɔ mobolulea bonde mεnε, bo bodae o mbuma jiboso jibato bande.

¹⁹Baninga bambi baepaeli, jebani mojɔ mu. Yε moto na moto adae na njoki a bohokea, pε ko bobala bokpa-bokpa, na pε boka kεlε bokpa.

²⁰Mojɔ bo kεlε emoto etasukeaka na bodongo boNjambe.

²¹Oko boa, toma dumbani bosotɔ bosusu, na njani jinεnε jibobe. Kinani Ebaeli ekwee o ngua a tei emilema minu mi yεmbu, Ebaeli yena ebwani boheleja miembo minu.

²²Kɔni o akojaka Ebaeli. T'odaeni oko bato baya ba'kaka pε, baya basakoseaka bo bεnε.

²³Mojɔ bo yona o'kaka Ebaeli, pε ko bokɔ, adi o moto yona onjaka elimo eboso bonde a talatala.

²⁴Anjaka elimo ende, na akadonga, abosaka bokpa elimo ende.

²⁵Yona ko onjaka a tei eMobeko mosoti, Mobeko mobosɔmi, na akada na lingbangba, na akakɔ oko bokɔ, te nongo moto yona o'kaka na abo-saka, moto omina adi bossɔ bojongoa na bokɔ.

²⁶Isa moto alekε bo adi na ejimeli ai Njambe, pε ko bogbokeja yemi ende, akoseaka molema monde mεnε; ejimeli emoto omina edi eka engasa.

²⁷Ejimeli esoti yena edi na bosεnɔ a miso maNjambe Sangwa'su edi oko ye,—a bonja bana-bamalike na bali-babogwa a minɔngɔ Mibu, na a bosabanea, pεpε nongo litɔnɔ lipita jingondo.

Yakobo 2

Epaeli

¹Baninga, adi no na ejimeli ai Kumu osu Yesu Masiya, Kumu oEkumu, Podaeni oko na ekɔmeli ebokumeja bakina bato, na bolona batongo.

²Okina moto akadoa a botitana bonu na elwali ebobuno bonεnε, na pεtε jiwɔlɔ a sapi; na moto obokwali akakwea oko na bipupu pε;

³na okanjani oko moto yona odi na elwali epele a bobala na nde bo, Da ya a edie ye epele; na okabalani na moto obokwali bo, Ima oho, isa, Da ya nase a dɔngɔ diegboto embi;

⁴okakɔni boa, otakabakani bato a Milema minu? Otasambe-jakani bato na bileli bibe?

⁵Baninga baepaeli, hokeani. Njambe ahɔ bato babokwali bangondo mojɔ bo likonja libu lidi oko ejimeli, bo badae basangoli baBokumu bodikeja yo ai baya bamopalaka.

⁶Ino ko osambojakani moto obokwali. Banɔngejaka no banda, te bato balikonja? Bagbulaka no a bisambi banda, te bo?

⁷Kombe yena ebeama na nu edi na ekumu; baloleaka ko kombe emina banda, te bato bamina?

⁸Okɔkɔni bopele isa osumakani Mobeko moKumu mua mosɔnɔmɔ a Misɔnɔ bo, Toma pala motuteano mowε o asapalaka wε mεnε.

⁹Okakumejani ko bakina bato, na okalonani batongo, okɔkɔni bobè; na Mobeko modumbaka no o bato babe.

¹⁰Mojɔ bo, moto aka-kputoa na mojɔ momɔci pε, adi na lindo jiMibeko misusu, nongo akasuma misusu mitongo.

¹¹Yona obala bo, T'ongεe oko bɔɔli, abala koko bo, T'owoe oko moto. Oko boa, okawa moto, osopaka Mobeko, nongo adi wε pε bongε nongo bɔɔli.

¹²Kinani bibaeli binu na bikɔmeli binu bibwane na bato baya badi bosamba na Mibeko Mibosɔmi.

¹³Mojɔ bo, moto yona opeliti wa atasamba na wa. Wa edi bolonga a esambi.

Ejimeli na Bikɔmeli

¹⁴Baninga, moto akabala bo adi na ejimeli na apeliti bikɔmeli, adi bobɔngɔ na ye? Ejimeli emina ebwani bomoheleja?

¹⁵Isa mwananange'moto, isa ngεnε emoto adi mbundu, na adi na nja busa na busa,

¹⁶na okwa onu akabala na bu bo, Kε bopele, sahumeja na mosa, na gola na dia, pε ko bobapa leka a mojɔ momikuku Mibu, mojɔ momina mobɔngi?

¹⁷Oko boa, ejimeli ngasa, pε bikɔmeli, edi oko eka ego.

¹⁸Okina moto ko adi bobala bo, Wε odi na ejimeli; mbi nadi na bikɔmeli. Anejani ejimeli ewε yena edi ngasa, pεpε bikɔmeli, na mbi nadi boneja wε ejimeli embi oko na bikɔmeli bimbi.

¹⁹Ojimaka bo Njambe adi omɔci; mojɔ momina modi mopele. Endelete ko, miembo Mibe mijimaka pongono, na midi na bongongoma.

²⁰Wε egegele, otajebaka bo ejimeli ngasa, pεpε bikɔmeli edi eka engasa?

²¹Tata osu Abalayama ailonga a cina ebikɔmeli yana abakea yo mwana'nde Isaka a litumbu o lisiko?

²²Onεkε bo ejimeli edaka ecingi na bikɔmeli binde; ejimeli ende ebɔngɔ oko na bikɔmeli binde.

²³Oko boa mosono mongama mua mobalaka bo, Abalayama ajimea Njambe, na moj̄ momina molangama ai yo o bodongo, na bamobea Limbaci liNjambe.

²⁴Oneke bo moto alongaka na bikomeli, te na ejimeli ngasa.

²⁵Laba, mwali ondukeli, alonga koko boa na bikomeli yana aso yo kengi na abayneja a njea etongo.

²⁶Mokuku mokada ngasa, pere mwembo, modi oko mogwake; ejimeli edi koko boa; isa eciniti na bikomeli edi eka ego.

Yakobo 3

Eleho a Moj̄ Momonoko

¹Baninga bambi, T'ojimeni oko bo banenē banu bade bakoja. Moj̄ bo ojebakani bo so baya bakoja bodi bosamba na esambi epipo.

²Iso basusu bodi na mabunga manenē. Isa moto aditi nongo na libunga a ebaeli ende, adi moto mobongoke menē yona odi na ngulu bo asangbindee mokuku mosusu.

³Bokasa bibende a minoko mipunda bo basume so, bodi bohekoja mikuku Mibu misusu.

⁴Leni masua pongono; nongo makada manenēna mahudamaka na pwea jipipo, madi boheko a moj̄ moyenda ekkekéléké, o apalaka moto oyenda.

⁵Yemi edi koko boa; edi licinga likeké limokuku, esakumejaka ko na ngando jinenēna. Mokonda mosusu mobwani bongoa na mosa mokkekéléké menē.

⁶Na yemi edi mosa; yemi edi bokumu bobobe a tei emacinga masu; ebejaka mokuku mosusu, na etumbaka mohelo momoto na mosa moGehena.

⁷Bato hahonok̄ bogbokeja tito, na mbulu, na nj̄, na tito bamadiba; na babagbokejaka, tungu jisu.

⁸Pere nongo moto ko ojebaka bogbokeja yemi. Bobe boyemi bopehti mboci; elumi na mbondo menē.

⁹Bosakoaka Kumu na Sangwa'su na yemi, na bosingaka bato baya bayoama a blimo eNjambe oko na yemi.

¹⁰Bosakoa na masingi mamanaka a monoko momoci! Baninga, moj̄ momina mobongiti.

¹¹Mokelé momoci modi bomeja madiba mapele na madiba mabe pongono?

¹²Baninga, bomwe bodi bobota makpa? Lingolo lidi bobota mamwe? Oko boa pongono, madiba mamukwa matameja nongo madiba mapele.

Bowei Bosoti

¹³Okina onu adi na bowei na ejebeli emijo? Mohelo monde mopele modi boneja bikomeli bipele, oko na molema motitake mobowei

¹⁴Isa odini na likaka na mosoo a milema minu, pe bosa-kumejani, pe bonganani mojo moSoti.

¹⁵Bowei bomina boditi bowei boDiko; bodi oko bowei bongondo ye, bowei bua bocingi na Posa jimokuku, na miembo Mibe.

¹⁶Mojo bo, isa likaka na misoo midi a ekwa esika, miano na bikomeli bisusu bibe bidi koko ena.

¹⁷Bowei bodiko bodi boso boseneke; bodi koko na bowi na bo yembu; bohokeaka mijjo na molema bwase; bolumi na wa na mbuma jipele; boditi na minjko Inibae, isa na bokosea.

¹⁸Bay a badukaka bowi banaka ngua jibowi, na badi bobuka mbuma jibowi.

Yakobo 4

Eleho a Mojo Moposa

¹Mane na miano a tei enu mahulaka jo? Mitahulaka a posa jinu jia jinaka a tei ebinama binu?

²Omboakan pe ko bodiha, na owakani. Odini na mbengia, pe ko boheno boso. Oko boa onakani, na odini na miano. Opelitini eka, mojo bo ota'ngakani.

³Onga-kani pe ko boso, mojo bo ongakani na libunga, na njingo bo onamejaeni mua mongaka no na posa jinu jibe.

⁴Ino Bali bandukeli! Otajebakani bo limbaci lingondo lidi lisoki ai Njambe? Oko boa, moto yona opalaka bo apande limbaci na ngondo adi na Njambe oko soki.

⁵Ino odingakani bo ebaeli eMisono edi ngasa yena ebalaka bo, Epaeli ende edi na likaka a mojo momwembo moko yo a boda a tei esu?

⁶Iyo ko ahnejek monganji oko boheje. A mojo momina Misono Mibalaka bo, Njambe anaka na bato baegbo, Adi ko na monganji ai bato bamilema mititake.

⁷Oko boa toma sumani Njambe. Imani a bona na Satana na adi bocia no.

⁸Sabateani na Njambe, na yo adi bosabatea na nu. Ino bato babe, senojani momo manu. Ino bato babokosea, senojani milema minu boree.

⁹Dani na esopi; yeani kondjo na mbisol. Yeo enu ebwani bohekao bio, na sepi enu ebwani bohekao wa.

¹⁰Satitejani a boso boNjambe, na yo adi bongoj no.

¹¹Baninga, t'olɔ̃ngɔ̃neni oko. Moto akalɔ̃ngɔ̃ mwangwa'nde, issa akasambeja mwangwa'nde, alɔ̃ngɔ̃kɔ̃ Mibeko, na asambejaka Mibeko. Isa osambejaka Mibeko, otasumaka Mibeko, na osabakeaka juji.

¹²Obakeaka Mibeko oko omɔ̃ci pε; juji omɔ̃ci oko yo, yona obwani boheleja isa bodumba. Wε ko yona osambejaka minao moto, wε odi nda?

Mojo Molikonja

¹³Hokeani e dεye, no bato bay a babalaka bo, Bodi bokε a ekina ngando busa bu isa puma; bodi boyeyoa oho yanga emɔ̃ci a bokɔ̃ bwasa na bohεjε likonja lisu.

¹⁴Otajehakani nongo mojo mua mobwani bokwa puma. Mohelo monu modi bo? Odini oko lidudu, pε, lia liyeyoaka mweka, na lidimoaka oko bodimoa.

¹⁵Obwanini bobala bo, Njambe akajima, bôda na bomɔ̃, bôkɔ̃ mojo mu, issa mojo mua.

¹⁶E dεye ko, osakumejakani na egbo enu. Bosakumeja bomina bodi mojo mobe.

¹⁷Moto yona ojebaka bokɔ̃ bopele, pε ko bokɔ̃ bopele, akɔ̃kɔ̃ oko bobe.

Yakobo 5

¹Ino bato balikonja, yeani mbisoli e dεye; ngbεngbεmεni a mojo mominɔ̃ngɔ̃ mia mikεkε adoe ai no.

²Makonja manu mapɔ̃i; bisenja binu bibehi na sε.

³Wɔ̃lɔ̃ enu, na likonja linu lipalata, libehi na bikpa; bikpa bimina bidi botata tati a bodumba no, na bidi boyaka mini minu o ekɔ̃mεli emosa. Ino obombini likonja linεnε a masu masuka.

⁴Hokeani; likonja lisonge libasali banu bay a baliaka gbie jinu, likonja litombi no na bokosea, libekoaka oko bobekoa. Bio bibasali bay a babisaka a gbie bime i a matoi maKumu oma-ndundu madiko.

⁵Ogolakani ya nase na leka lopele, pε bosajuman i nongo eka. Ogolejakani milema minu a busa bomogweli monεnε.

⁶Odumbini na owoini moto obodongo, na yo pε boswiana na nu.

⁷Baninga, toma dani na lingbangba oko a bodoa boKumu. Anjani moto yona odi na gbie; yo ambaka mbuma jipele jigbie, na adi na lingbangba oko a ehole ekwaka mbua baboso na mbua basuka a gbie.

⁸Toma dani na lingbangba koko boa. Pingejani milema minu, mojo bo bodoa boKumu bodi hulelu.

⁹T'ohimaneni oko baninga, osaka sambani. Hokeani; juji adi a modipe.

¹⁰Baninga, ikoanani na batondɔi baya babala a kombe eKumu, ikoanani na lingbangba libu a bodingoa.

¹¹Iso bosakoaka bato baya badaka na lingbangba. Ojebakani mojɔ molingbangba liJobo, na onenɔ mokano moKumu ai yo, mojɔ bo Kumu adi na wa na monganji botɔ.

¹²Baninga, mojɔ monenɛ mnenɛ oko mu;—t'obeleni oko beli, isa beli a mojɔ moDiko, isa beli a mojɔ mongondo, isa ekina beli etongo. Kwani mojimo monu modae oko Ee, na bongana bonu oko pεpε, bo otakwani na mojɔ.

¹³Isa okina onu adi na monɔngɔ, adi bonga Njambe. Isa okina onu adi na sepi adi bo'mba njembo.

¹⁴Isa okina onu adi na yogo, adi bobea basuku baDenga. Ibo badi bonga Njambe a mojɔ monde na badi bomosuo a kombe eKumu.

¹⁵Na bonga bua bodi na ejimeli bodi boheleja moto yona opekaka, na Kumu adi bomo-ŋɔŋɔ. Isa akɔi mikina mijɔ Mibe, adi bossɔ bo yε bojibe.

¹⁶A mojɔ momina, toma bolojani jibe jinu, moto ai mina'nde moto, na ingani Njambe, moto a mojɔ momina'nde moto, bo oheleni.

¹⁷Elia adaka moto na ekɔmeli emoto o adi so bεnε. Iyo anga Njambe na bingi bo mbua atakwa, na mbua aikwa a ngondo bianga bisato na songe basamano.

¹⁸Anga koko Njambe, na mbua ahula Diko, na kpɔtɔ jibota koko.

¹⁹Banninga bambi, okwa onu akalaboa a njea esoti, na okwa otongo akamohuleja,

²⁰moto omina abwani bojeba bo yona ohulejaka moto mobe a njea elibunga linde, adi boheleja mwembo momoto omina a bogwa, na adi bokunda jibe jinεnε.

1 Petelo

1 Petelo 1

¹Mbi Petelo, obwənji oYesu Masiya, ai bato bangabi bay a banangana a Ponto, Galatia, Kapodokia, Asia, na Bitunia,

²ai bato bahə Njambe na mbuno ende mənə, bato bahəngə yo na Mwembo bo badea na lisuma ai Yesu Masiya, na bo baməsəme na makia mande. Yə monganji moNjambe na bowi bohə ai no bou mənə.

Eleho a Mojɔ Molingbangba

³Ekumu ai Njambe Sange 'Kumu osu Yesu Masiya. Edi oko a mojɔ momonganji monde monənə bo so bobotama koko a boda na njingo ebomɔ, ema ebongɔ boYesu Masiya a bogwa,

⁴na bo bosangoe lisango lia litabeha nongo, lisango lisənɔke lia litagwa, lia lihəngəmə ai no oho Diko.

⁵Njambe abaneaka no na ngulu ende cina eejimeli, a mojɔ momohelo moselingoa yo, mua modi boboloa a bohu a ehole esuka.

⁶Sepani a mojɔ momina, nongo adingoaka no ehole ekue na minɔngɔ tungu na tungu.

⁷Oko boa, bomeka boejimeli enu bôda na bosakoa, na ekumu, na lisuma, a bodoa boYesu Masiya. Mojɔ bo, isa bamekaka wɔlɔ na mosa, wɔlɔ eka ebobeha, esingaiti ejimeli enu yena enɔi wɔlɔ na yumu.

⁸Ino omonekinini, omopalakani ko. Nongo adi no pɛ bomonə e dəye, omojimakani, na osepakani a mojɔ monde na sepi pɛ njəngi yena enɔi kɔpi emoto.

⁹Suka eejimeli enu edi bo osəni mohelo momiembo minu.

¹⁰Batɔndɔi bay a bapa biseko a mojɔ momonganji mua mohəngəmə ai no, baduka na batunda a mojɔ mobohela bomina.

¹¹Yana apaka bo biseko a mojɔ momadingoa maMasiya, na ekumu yena edaka ecini ngɔngɔ, badaka na posa ebojeba moto omina na ehole eləjəkə Mwembo moMasiya a tei ebu.

¹²Mojɔ moboloa ko ai bo, bo ngando jisɔkɔ bo jidaka a mojɔ monu, te nongo a mojɔ mobu bənə. Na bato bay a batɔndɔki no Mwako Mopele na ngulu eMwembo Mosənɔke mua mohula Diko, babolojai ngando jimina ai no. Babwənji-baDiko badi koko na posa bo bacingee ngando jimina.

Eleho a Mojɔ Mobosənɔ

¹³A mojɔ momina, toma ngbimejani bocingea bonu; sangbi-ndeani; kinani njingo enu esusu edae a monganji moNjambe mua modoabi ai no yana aboloabi Masiya.

¹⁴Dani bana balisuma; pe bogbokani na posa jibe, jia jidaka na nu a ehole elibumi linu.

¹⁵Iyona obea no adi mosenɔke; oko boa toma dani basenɔke pongono a mida minu misusu.

¹⁶Mosɔnɔmɔ bo, Ino ôdani basenɔke, mojɔ bo mbi nadi mosenɔke.

¹⁷Iyo asambejaka moto na moto bongbebongbe cina ebikɔmeli binde, na okamo'ngani o Sango, kinani mida minu misusu midae oko na bɔ a ehole emɔngɔ monu ya nase.

¹⁸Ojebakani bo osikoamani a ngando jingasangasa jibasangwa'nu, te nongo na makonja mabo-beha o adi wɔlɔ na palata;

¹⁹osikoamani oko na makia mayumu maMasiya, o makia mamwana-bata yona opeliti nongo litɔnɔ, pεpε nongo ehuli.

²⁰Iyo ahɛngɛmɛ a mojɔ momina oko ngondo epe-takini yoama, na adoa a masu masuka a mojɔ monu.

²¹Ejimeli enu ai Njambe edi a njea ende. Na Njambe amongɔjɔ a bogwa, na amokumeja, bo ejimeli enu, na njingo enu, jidae oko ai yo.

²²Lisuma linu a mijɔ miSoti lisenojai milema minu, bo odaeni na epaeli esoti ai baninga; oko boa toma palanani na ngulu emilema minu.

²³Obotamani koko na bobotama bobomɔ, te nongo na bobotama bobogwa, oko na ebaeli eNjambe yena edi mɔ, yena eyeyoaka oko na bosusu.

²⁴Mojɔ bo, Bato basusu badi o njienjie; Ekumu emoto edi o ihlele jinjenjie; Njienjie jiwɔssɔkɔ, na fulɛlɛ jikwaka nase;

²⁵Ebaeli eNjambe ko eyeyoaka oko na bosusu. Ebaeli emina edi oko Mwako Mopele mua motɔndɔmɔ ai no.

1 Petelo 2

¹Dumbani bobe bosusu, na epulu esusu, na bokosea, na likaka, na malɔngi masusu.

²Adi no bana baya bapakiti botama, kwani posa enu edae a mabɛ masenɔke mamwembo, bo okandoeni a mojɔ mobohela,

³isa onenɔ na soti bo Kumu adi na monganji.

⁴Doani ai yo, oko a Litai lia lidi mɔ; bato balilona; Njambe ko alihɔ, na lidi na yumu a miso mande.

⁵Ino pongono toma dani matai maya madi mɔ, maya mayoama a ndako emwembo, na nganga basenɔke a bopa masiko mamwembo maya masepejaka Njambe a njea eYesu Masiya.

⁶Modi a Misɔnɔ bo, Anjani; mbi nasambeaka litai a Siona, Litai lihɔ mbi a mojɔ molikulu, na lidi na yumu. Na yona omojimeaka atasamboa.

⁷Oko boa yo adi na yumu ai no bay a bajimaka. A mojɔ mobato ko bay a batajimaka, Litai lilona bayoi Lidi litai limogbukusu lilikulu.

⁸na Litai limina lidi bosakeja bato, Lidi litai linenɛne a bokweja bato. Mojɔ bo basakaka libaku cina bo batasumaka Ebaeli; suka ebu edi boa.

⁹Ino ko odini mbota ehɔmɔke, nganga babokumu, likota lihengemek, bato baNjambe, bo onejaeni bilomu bipelle binde yona obea no bo omaneni a modidi, a boda a bohu bonde bua bodi mojɔ mobokamo.

¹⁰Odakani boso bato bangasa; e dεye ko odini bato baNjambe. A ehole emina, oipaka, sɔni monganji moNjambe; e dεye ko osini monganji moNjambe.

Ekɔmeli eBato baEjimeli

¹¹Baninga, mbi nangɔnɔkɔ no o midoa na bakendeli, bo okieni posa jibe jimokuku jia jinaka bila na mwembo.

¹²Dani na mida mipele a tei ebapakano. Oko boa, nongo bakalɔngɔ no o bato babe, badi bone bipelle binu bipelle, na bakumeja Njambe a busa bobo-doa bonde ai bo.

¹³Dani na lisuma ai bato basusu bay a badi na kpaci ai no, a mojɔ mokombe eKumu,

¹⁴isa ai “roi” yona odi boso, isa ai bakɔmeli bande bay a basɔ kpaci ai yo, a bosambeja bato babe na bakumeja bato bay a bakɔkɔ bopele.

¹⁵Mojɔ bo bolulea boNjambe bodi bo ogbokejaeni bibalabala bibato babogegele, oko na bikɔmeli binu bipelle.

¹⁶Odini na bosɔmi; pε ko bojimani bo bosɔmi bonu boda mokalo a mojɔ mobokɔ bobe; dani o babuli baNjambe.

¹⁷Dani na lisuma ai bato basusu. Dani na epaeli ai baninga. Bangani Njambe. Sumanı “roi”.

¹⁸Ino bakɔmeli, sumani baswa banu na lisuma lmɛnɛ, te bay a badi bapele na ba yɛmbu pε, oko bay a badi na swε pongono.

¹⁹Isa moto adi na lingbangba a tei eboditigoa boangasa cina elisuma linde ai Njambe, mojɔ momina modi mopele.

²⁰Okakɔni bobe, na bakatua no a mojɔ momina, na okahɔnɔni mokindo monu, obwanini bosakumeja? Okasɔni ko minɔngɔ a mojɔ mobopele bokɔkɔ no, t'omemeleni oko; Njambe asepaka na mojɔ momina.

²¹Mojɔ bo obeamani a njea emina, cina bo Masiya yo mene adingoa a mojɔ menu, na akinea no ekoaneli bo osuseni mɔɔle mande.

²²Iyo aikɔ nongo bobe. Bokosea boiboloa nongo a monɔkɔ monde.

²³Bamo-lolea, yo ko pε bosonibeja. Yana adingoa yo, aikenjɔ nongo; asakinea a mɔmɔ mande yona osambejaka na soti.

²⁴Iyo alwa yo mene muna mobobe bosu a mokuku monde mene a mole-mobokea, bo so bogwε a bobe, na bo bohele a mojɔ mobodongo. Ino ohelani oko a mojɔ mopola jinde.

²⁵Odakani o bata balaboake; e dεye ko ohulini ai Monjeli na Mobanei omiembo minu.

1 Petelo 3

¹Ino bali pongono, toma sumani bami banu; oko boa isa bakina babu batajimaka Ebaeli, badi bohekua cina emoda mobali babu, nongo adi bo pε boka Ebaeli,

²yana anekε bo moda monu mosenɔke molisuma.

³Molilo monu mobwaniti boda molilo mosokolu, ebakeli eswe na bolwa boleka lowɔlɔ na bisenja.

⁴Molilo monu mobwani boda a tei, mua mobombami a molema, oko mwembo mo yεmbu mobowi; molilo momina motabeha, na modi na yumu enεne a miso maNjambe.

⁵Bali basenɔke baehele baya bajima Njambe basalila boa, na basuma bami babu.

⁶Sala asuma Abala-yama boa, na amobea kumu onde. Ino odini bana bande, okakɔni bopelε, pεpe nongo mokakwano, pεpa nongo bɔ.

⁷Ino bami pongono, toma dani na bolε ai Bali banu. Dani na lisuma ai bo, mojɔ bo badi ba yεmbu. Ino na bo pongono odini basangoli bamonganji mobomo. Kɔni boa bo mokina mojɔ mosaka bindaneja bingeeli binu.

Ekomeli eBato baMasiya

⁸Mojɔ motongo; dani no basusu na molema momɔci, na peye na epaeli ai baninga, na wa, na bombɔki.

⁹Bakakɔ no bobe, t'osɔnibejaeni oko bobe; bakalolea no, Tosɔnibejaeni oko na biloli. Sɔmbejani oko na bojongoa. Obeamani bo okɔeni boa, bo osangoeni bojongoa.

¹⁰Mojo bo, Isa moto apalaka mohelo, Isa apalaka bone masu mapele, Yε akine bobala bobe na yemi ende, Na bokosea na biposo bimonɔkɔ monde.

¹¹Yε abulɛe bobe oko bobulɛ, bo akɔe bopele; Yε aduke na akimane bowi.

¹²Mojo bo miso maNjambe manjaka bato babodongo, Na matoi mande mahokeaka bo'nga bobu. Boso boKumu ko bolonaka baya bakɔkɔ bobe.

¹³Isa odini na bingi a mojo mobopele, odi bonɔngeja no nda?

¹⁴Nongo okadingoani a mojo mobodongo, sepani a mojo momina. T'odaeni oko na bɔ a mojo mobu, pεpε nongo mokakwano.

¹⁵Bakeani Masiya o Kumu a tei emilema minu. Isa moto adi bokokeleja no a mojo monjinga yena edi a tei enu, dani na moselingo bihole bisusu a bosalongeja; mosɔnibejani na ebaeli e yεmbu elisuma.

¹⁶Yεni boda na lindo a milema minu; oko boa, nongo bakatɔkɔlɔ no, baya bakɔkɔ boa badi bosamboa, cina eekɔmeli enu epele a tei eMasiya.

¹⁷Na bodingoa a mojo mobopele, na bodingoa a mojo mobobe, boditigoa a mojo mobopele bonɔi na bopele, isa bolulea boNjambe bodi boa.

Ekoaneli eYesu Masiya

¹⁸Mojo bo Masiya yo mεnε agwa ehole emɔci a mojo mojibe, yona obodongo a mojo mobato babe, bo abatee so na Njambe. Agwa a mokuku, ahela ko a mwembo.

¹⁹Na akε a mwembo bo alehe miembo a blɔkɔ,

²⁰oko miembo mia midaka na lipanga ehelehele, yana adaka Njambe na lingbangba a ehole eyoaka Noa masua; na bato bomwambe a tei emasua bahela a madiba, oko bato baleka pε.

²¹Madiba mamina madi embete ebatisimo; batisimo emina editi a bodongeja mbindo a mokuku; edi oko mojimo momolema mopele ai Njambe, na ehelejaka no e deye cina ebongɔ boYesu Masiya a bogwa.

²²Iyo akε oho Diko, na adi a ebo ebami eNjambe; na babwεnji baDiko na bakumu na bato bakpacι bamosumaka.

1 Petelo 4

¹Masiya adingoa a mokuku; oko boa sapingejani koko na bole bomina. Mojo bo moto yona odingoi a mokuku akini bokɔ bobe,

²bo atasuma koko posa jimokuku a masu maya madikai, oko bolulea boNjambe.

³Ehole yena edaka no na bikɔmeli bibapakano esii edεye; mojɔ bo odakani na lisɔngi, posa jibe, bolangoa, makita mamana, matanga, na bosakoa bobilimo.

⁴Ibo bakamoaka bo otacingamakani koko na bu a ngando ji jibe, na baloleaka no.

⁵Bato bamina ko badi bosɔnibeja ai yona odi bosambeja baya badi mɔ na bagwake pongono.

⁶Mojɔ bo bagwake pongono baka Mwako Mopele oko a mojɔ momina, bo bahele a njea emwembo o adi Njambe, nongo asambama bo o bato a njea emokuku.

⁷Suka engando jesusu edi hulelu; a mojɔ momina, sangbindeani, na dani na mongangele a mojɔ mobo'nga.

⁸Mojɔ monɛnɛ modi bo opalaneni na ngɛnɔ enɛnɛ, mojɔ bo ngɛnɔ ekundaka jibe kanga jinɛnɛ mɛnɛ.

⁹Dani na monganji, moto ai mina'nde moto; pε bodani na lima.

¹⁰Sakɔmejani na epeeli esi moto na moto, o bakɔmeli baya basi monganji moNjambe tungu na tungu.

¹¹Isa moto atɔndɔkɔ mwako, abwani botɔndɔ oko mijɔ miNjambe. Moto akakɔ ekina elomu, abwani boekɔ na ngulu epaka Njambe, bo Njambe ase ekumu na ngando jesusu, cina eYesu Masiya. Ekumu na bokumu ai yo oko na bosusu! *Amen.*

¹²Baninga, t'okamoeni oko a mojɔ mobodingoa bua bodoi ai no o mosa a bomeka no; moditi mojɔ mobokamo.

¹³Sepani ko a mojɔ momina, mojɔ bo osɔkɔni libondo limadingoa maMasiya, bo odaeni koko na sepi na enanga a boboloa boekumu ende.

¹⁴Bakapɔmbeja no a mojɔ mokombe eMasiya, odini na bojongoa, mojɔ bo Mwembo moekumu, Mwembo moNjambe modi ai no.

¹⁵Pεpε nongo moto onu ko obwani bɔsɔ mokindo momowoi, isa mobi, isa moto obikɔmeli bibe, isa moto onduki emijɔ.

¹⁶Moto ko akadingoa mojɔ bo adi moto oMasiya, abwaniti boda na sɔni; abwani bokumeja Njambe a mojɔ mokombe emina.

¹⁷Mojɔ bo ehole ebosambeja Denga diNjambe emei; na esambi ekabanga na su, suka ebato baya batasumaka Mwako Mopele moNjambe êda bo?

¹⁸Isa moto obodongo adi bohela oko na pasa, mojɔ momoto mobe, na moto yona odi pε bojima Njambe, môda bo?

¹⁹Oko boa, isa bolulea boNjambe bodi bo bato badingoe, badi bokɔ bopele, na badi bopeja miembo mibu a mɔmɔ maMoyoi yona obwani bojimama.

1 Petelo 5

¹Mbi nalehaka basuku banu, mojɔ bo nadi mosuku mbi mɛnɛ, na monjɛnɛki omadingoa maMasiya, na sangoli olibondo liekumu yena eboloabí ngɔngɔ.

²Baneani bwela boNjambe bua bodi a tei enu. Dani babanei babu te nongo mojɔ bo edi elomu enu, oko a mojɔ moepaeli, te nongo a mojɔ monjinggo elikonja, oko a mojɔ mobingi enu bɛnɛ.

³Adi no na libondo libato a bobanea, pɛ bosakumejani a boso bobu. Anejani ekoaneli epele ai bwela bosusui

⁴Na Mobanei Monɛnɛ akadoa, ôsɔni corona eekumu yena etagwa.

⁵Ino menga pongono, dani na lisuma ai basuku. Kinani elwali enu basusu edae oko molema motitake, moto ai mina'nde moto. Mojɔ bo Njambe alonaka bato baegbo, na akɔkɔ monganji ai baya basatitejaka.

⁶A mojɔ momina, satitejani cina eebɔ epipo eNjambe, bo angɔjɔe no a ehole ebwanake.

⁷Kinani Njambe akamoe muna momikakwano minu misusu, mojɔ bo bolɛ bonde bodi oko ai no.

⁸Sangbindeani; sɛnjelèni. Satana, soki enu, adukaka bato bo aba yake, na ababɛmbɛkɛ na wio o ekɔmeli egbɔngɔ yona ogbemaka.

⁹Dani bambilimake a ejimeli enu, na inani na nde. Ojebakani bo baninga banu a ngondo esusu badingoaka boa.

¹⁰Omaka dingoani ekina ehole, Njambe yona odi na monganji mosusu, yona obea no a tei eMasiya a ekumu ende yena etasia, adi bobɔngeja no yo mɛnɛ, adi bopingeja na bombilimeja no.

¹¹Bokumu ai yo oko na bosusu. *Amen.*

¹²Mbi nanjaka Silwano o mwangwa'mbi oe;jimeli; nasɔnei no mokanda mu mokue oko na ebɔ ende, a boleha no, na a bolɛjɛ no a mojɔ momonganji mosoti moNjambe. Dani bambilimake a monganji momina.

¹³Denga diBabilo, lia lidi koko lihɔmɔke, libɛjɛkɛ no njɛbɛ, na mwana'mbi Malako koko.

¹⁴Abɛjɛnɛni na njɛbɛ eepaeli. Yɛ bowi bodes na nu basusu baya badi a tei eMasiya.

2 Petelo

2 Petelo 1

¹Simona Petelo, mobuli na obwensi oYesu Masiya, aibaya bakatani na su a ejimeli emoci a tei ebodongo boNjambe na boMoheleja osu Yesu Masiya.

²Yε monganji moNjambe monengε ai no, na bowi pongono, cina eejebeli enu eNjambe na eYesu Kumu osu.

Mida Mibato Baejimeli

³Njambe, na ngulu ende, abopi bipeeli bisusu bia bibwani na mohelo na ejimeli, cina eejebeli ende yona obea so a ekumu ende na boseno bonde.

⁴Api so madikeja maya manci na yumu na bopele a tei ende, bo oheleni a bopɔ bua bodi a ngondo, bua bocini na posa jibe, cina emadikeja mamina, na bo odaeni na elimo eNjambe a tei enu.

⁵A mojɔ momina, kɔni na bingi enu esusu a bobakea ekɔmeli esenɔke a ejimeli enu, ejebeli a ekɔmeli esenɔke,

⁶bosa-ngbindea a ejebeli, lingbangba a bosangbindea, lisuma a lingbangba,

⁷epaeli ai baninga a lisuma, na ngɛnɔ ai epaeli.

⁸Isa odini na ngando Jimina, na jikanengε ai no, jikɔkɔ bo otadani bingbendele na batete a mojɔ moejebeli eKumu osu Yesu Masiya.

⁹Ngando Jimina ko jikataka na moto, moto omina adi na miso mago, t'anekε nongo bohali, na abosai bosenoja bonde a jibe jiyou.

¹⁰Oko boa baninga, dani na bingi a bongameja bobea bonu na bohɔ bonu. Okakɔni boa otasakan ni nongo libaku.

¹¹Oko boa, njea ebokwea a Bokumu boKumu osu Yesu Masiya, bua bodi na bosusu, êda kanga bohu mɛnɛ ai no.

¹²Nongo ajebaka no ngando Jimina, nongo adi no bambilimake a mijɔ miSoti mipeli no, mbi nitakputoa a bolejε no ngando Jimina.

¹³Adi mbi a mokuku mu, nalekε bo nabwani bosisoja no na bilelo.

¹⁴Mojɔ bo najebaka bo edikai mweka pε bo nakine mokuku mu, o anejani Kumu osu Yesu Masiya.

¹⁵Nadi bokolea koko bo odaeni na njea a bosalejε ngando jiji, ngɔngɔ jibogwa bombi.

¹⁶Mojo bo, yana ajebeja so no mojo mobodoa boKumu osu Yesu Masiya, na mojo mongulu ende, boitondɔ no masɔ maya macingi na bowei bobato. Iso bonekum Ende na miso masu bɛnɛ.

¹⁷Iyo asɔ bosakoa na ekumu ai Njambe Sango yana ahula kɔpi a ekumu eDiko ai yo bo, Iyoyo adi Mwana'mbi ongɛnjɔ; nasepaka na nde bou.

¹⁸Iso boka kɔpi emina ekahule Diko, mojo bo bodaka na nde a mono mosenɔke.

¹⁹Na bojebaka bo ebaeli ebatɔndɔi edi ebaeli esoti. Ino obwanini bohokea ebaeli emina. Edi o paka yena ehojaka esika emodidi, oko a ehole echoaka busa na emanaka monjɔtɔ mokembe a milema minu.

²⁰Toma cingeani mojo mu monenɛ;—pɛpɛ nongo eseko eMisɔnɔ edi na cina etongotongo a mojo mobato.

²¹Mojo bo ebaeli ebatɔndɔi eidoa na bolulea bomoto; bato ko baya balindama na Mwembo Mosenɔke babala mua mohula ai Njambe.

2 Petelo 2

Bakoja Babokosea

¹Batɔndɔi babokosea badaka a tei ebato ehele, na bakoja babokosea badi bongɔ a tei enu pongono. Badi bodoa na mijɔ Mibokosea a bolaboja bato na poloso. Badi bongana Kumu yona obasikoa, na likundu libu litayeyoa a bodoa.

²Bato banenɛ ko badi boci-ngama na bu na bosambolu bobu; na njea esoti êsamboa a mojo mobato bamina.

³Bwasa bobu a tei enu bôda oko bikenge bibo-kosea, cina eposa elikonja. Mokindo ko mobato bamina mokoleama eyou, na likundu libu libwɛhti.

⁴Njambe aikmea nongo babwɛnji-baDiko baya bakɔ bobe; abadumba a Lifelo, na abadeja a mimbɔndɔ mimodidi a bo'mba esambi.

⁵Na aikina ngondo eyou; aheleja oko Noa, motɔndɔi oejimeli, na bato batongo sambo, yana adindeja yo ngondo ebato babe na pela.

⁶Ajima bo asiejae ngando ji, Sɔdɔmɔ na Gomola; na ajitumba, bo jidikae oko mihulu mimosa pɛ, bo jidae embete ai bato babe.

⁷Aheleja Loto, moto oejimeli, yona odaka na monɔngɔ a mojo mobikɔmeli bibosambolu bibato babe.

⁸(Mojo bo, yana adaka moto yona oejimeli a tei ebu, adaka na esɔpi a molema monde masu masusu a mojo mobikɔmeli bibu bibosambolu binɛkɛ yo na miso, na bikaka yo na matoi.)

⁹Kumu ajebaka boheleja a bomeka baya bamojimaka, na bohengé bato babe a mojɔ momokindo mobusa boEsambi,

¹⁰ju oko baya badi babuli baposa jibu jibe jibosambolu, na basetojaka bato bakpaci. Bato bamina badi na jala na libwano botɔ. Te babangake bololea ngando jiekumu.

¹¹Nongo babwənji-baDiko baya banɔi na ngulu na kpaci, batamejaka mijɔ Mibato bamina a boso boKumu.

¹²Bato bamina ko badi o tito baya basumaka posa jibu, baya babotama a mojɔ mobobengi na bowa; baloleaka ngando jidi bo pε bocingea; badi bogwa a mojɔ mobopɔ bobu bɛnɛ, na bâsɔ mokindo mua mobwani na bobe bobu.

¹³Sepi ebu edi oko a bolangoa na mose. Badi bato bapita na bosɔtɔ; agolaka bo magola a tei enu, basasepejaka oko na ngando jibu jibosambolu.

¹⁴Miso mabu malumi na bɔɔli na posa ebobe. Milema Mibu milandoi na mbengia, na balengéké bato baya baditi bambilimake. Badi bana bamasingi.

¹⁵Amabo kina njea esoti, bami ko laboa oko bolaboa, na basusaka njea eBalama, mwana 'Bosɔlɔ yona opala bokɔ bobe a mojɔ molikonja.

¹⁶Punda ko, yona opeliti kɔpi, abala na kɔpi emoto, ambejɛ lilale limotɔndɔi, na alemoa na nde a mojɔ mobobe bonde.

¹⁷Bato bamina badi Miboka ngasa, pεpε nongo madiba, na biyembi bia bilindama na lihweya. Modidi tuu monase mohengemɛ a mojɔ mobu.

¹⁸Mojɔ bo balengéké bato baya bapakiti bɔtɔnɔ na bato balaboake; babalengéké na ngando jibosambolu na jilisɔngi, oko na bibalabala bingasa biegbo.

¹⁹Babadikejaka bosɔmi, ena kobo bɛnɛ badi oko babuli babosambolu. Cina bo, moto akagboka na mokina mojɔ, adi mobuli omojɔ momina.

²⁰Mojɔ bo, isa babɔtɔnɔ na bosɔtɔ bongondo cina eejebeli eKumu na Moheleja osu Yesu Masiya, na basɔmbi koko, na bagboki na ngando jimina, moda mobu mongɔngɔ monɔi moda moboso na bobe.

²¹Ama bo jeba njea yena edi bojo, ba'mi ko lona oko mobeko mosenɔke mossɔ bo; akɔki bo pε bojeba nongo njea emina, ka enɔi na bopele.

²²Mokina monde mosoti mongami na bu bo, Mbwa asɔmbi a mikango minde mɛnɛ; okasosa ngulube adi bosabilingana a masɛtɛ.

2 Petelo 3

Bodoa boKumu

- ¹Baninga, imu modi e dεye mokanda moMibae mosɔnei mbi no. Namekaka bosisoja bole bonu bopele na bileho a mikanda misusu Mibae,
- ²bo otabosani mijɔ Mibala batɔndɔi basεnɔke eyou, na mobeko moKumu na Moheleja mosɔ no ai babwεnji banu.
- ³Mojɔ moboso—toma cingeani bo bato babiloli badi bodoa a masu masuka a mojɔ mobololea.
- ⁴Badi bosuma oko posa jibu bεnε; badi bobala bo, Sako ebodoa bonde edi jɔ? Mojɔ bo, banga na boyoa bongondo, na ehole egwa basangwa'su, ngando jisusu jidi oko amεci.
- ⁵Ibo bapalaka bodipa miso mabu a mojɔ mu bo, busa bodaka kanga ehele mεnε, na ngondo pongono emana a madiba, na edaka a tei emadiba, cina eebaeli eNjambe.
- ⁶Na ngondo yena edaka a ehole emina edinda na pela, na egwa, oko a mojɔ momadiba mamina.
- ⁷Busa ko na ngondo yena edi e dεye jibaneamaka cina eebaeli emina a mojɔ mobotumba; jihεngεmε a bo'mba busa boEsambi na bodumba bobato babe.
- ⁸Baninga, t'obosaeni oko mojɔ mu; dusu limɔci libwani na bianga koto emɔci, na bianga koto emɔci bibwani na dusu limɔci, a miso maKumu.
- ⁹Kumu Yakputojake nongo sako jinde o alekε bakina bato. Iyo t'angwake no, mojɔ bo atapalaka bo moto abunge nongo omɔci: apalaka bo bato bahekoiae milema mibu kanga basusu mεnε.
- ¹⁰Busa boKumu ko bodoabí o adoaka mobi. Busa bodi-moabí na daka enεnε a ehole emina; njɔtɔ banangoabí na mosa; ngondo etumbamabí na mosa, na leka losusu lua lodi ena.
- ¹¹Oko boa, ajebaka so bo leka lu losusu lodi bonangoa, mida minu Mibwani boda na bosεnɔ na ejimeli ai Njambe,
- ¹²yana ambaka no bodoa bobusa bua boNjambe na posa enεnε; mojɔ bo Busa mεnε bodi bongoa na bonangoa, na njɔtɔ badi bonangoa na mosa pongono.
- ¹³Njinggo esu ko edi oko a Busa boyene na ngondo eyene, o akwa yo sako, na bodongo bodabi ena.
- ¹⁴A mojɔ momina baninga, alendεkε no ngando jimina, kɔni na bingi bo yo abolojae no, pεpε nongo litɔnɔ, pεpε nongo mojɔ, oko na bowi.
- ¹⁵Jimani bo Kumu osu ambaka na lingbangba a boheleja. Paulo moninga osu oepaeli asɔnea no boa pongono na bowεi boso yo.

¹⁶Iyo abala a mojɔ mongando jimina, o akɔkɔ yo a mikanda minde misusu. Mikina mijɔ a mikanda minde midi na kpɔkɔsɔ a bocingea. Baya bapeliti bowei, na bay a baditi bambilimake badukaka cina etongo a mikanda mimina, na basabejaka boa; bakɔkɔ boa pongono na Misɔnɔ mitongo.

¹⁷Ino ko baninga, ajebaka no oko ngando jimina jidoakini, toma nganjamani, bo osaka laboani a mojɔ mobo-kosea bobato babe, na otadani koko bambilimake.

¹⁸Heni oko na monganji na ejebeli eKumu na Moheleja osu Yesu Masiya. Ekumu ai yo e dɛye oko a ehole yena epeliti suka. *Amen.*

1 Yoane

1 Yoane 1

¹Imua modaka kanga a bobanga mene, mua moka so, mua mone so na miso, mua monja so, mua mobanda so na momo, modaka oko Ebaeli ebomo.

²Bomo bomana a bohu. Iso bone bomo bomina, botondok so mojo momina. Bwensi botondok so no bodi oko bomo bua bodi na bosusu, bua bodaka na Sango, na boboloa ai so.

³Iso botondok so no oko mua mone so, na mua moka so, bo okataneni na su; na bokatana bosu bodi na Sango, na Mwana'nde Yesu Masiya.

⁴Bosoneaka no ngando jiji bo sepi enu enengue oko bonenge.

Njambe adi Bohu

⁵Bwensi boso ai yo, bwensi botondok so no, bodi oko bu;—Njambe adi bohu. Modidi moditi nongo a tei ende.

⁶Bokabala bo bodi na nde limbaci yana adalaka so a modidi, bokoseaka; na mida misu, na mijio misoti misangiti nongo mweka.

⁷Bokadala ko a bohu, o adi yo a bohu, bokatanaka, moto na mina'nde moto, na makia maYesu Mwana'nde masenojaka so a bobe bosusu.

⁸Boka-bala bo boditi na bobe, bosakoseaka So bene, na Soti editi a tei esu.

⁹Bokajima jibe jisu, yo t'akputojake nongo sako, adi bojo, na a ye jibe jisu, na asenoja so a bobe bosusu.

¹⁰Bokabala bo bokoiti nongo bobe, bomolangaka o mokosei, na ebaeli ende editi a tei esu.

1 Yoane 2

¹Bana bambi bakke, mbi nasoneaka no ngando jiji bo otakoni nongo bobe. Moto ko akak so bobe, bodi na mosili a esika eSango, oko Yesu Masiya, yona obodongo.

²Iyo adi lisiko a mojo mojibe jisu, te jisu pe, oko a mojo mojibe jingondo esusu.

Lisuma a Mibeko

³Bokasuma mibeko mide, bodi bojeba na soti bo bomojobaka, oko na mojo momina.

⁴Moto akabala bo, Mbi namojobaka, na moto omina pe bosuma mibeko minde, adi oko mokosei, na Soti editi a tei ende.

⁵Moto ko akasuma ebaeli ende, ngenjɔ eNjambe ebɔngi soti a tei ende. Bojebaka bo bodi a tei ende oko na mojɔ momina.

⁶Moto yona obalaka bo adi a tei ende abwani bodala a njea edalaka yo.

⁷Baniga, mobeko mosɔnɔkɔ mbi ai no moditi mobeko moyene. Modi oko mobeko moyou mua modaka na nu a bobanga. Mobeko mu moyou modi oko Ebaeli e'ka no.

⁸Endele ko, mobeko mosɔneaka mbi no modi moyene, modi mobeko mosoti a tei ende na a tei enu. Cina bo modidi mokɛkɛ anɔe, na bohu bosoti bohoi e dɔye.

⁹Moto akabala bo adi a bohu yana alonaka yo mwangwa'nde, adi oko a modidi.

¹⁰Moto yona odi na mwangwa'nde epaeli adi a bohu, na libaku liditi a tei ende.

¹¹Moto ko yona odi na mwangwa'nde soki adi a modidi, na adalaka a modidi; t'ajebake esika ekɛkɛ yo, mojɔ bo modidi mohindejaka miso mande.

¹²Nasɔneaka no bana bambi bakekɛ, mojɔ bo jibe jinu jikinama a mojɔ mokombe ende.

¹³Nasɔneaka no basango, mojɔ bo oje-bakani yona odaka oko a bobanga mɛnɛ. Nasɔneaka no menga, mojɔ bo ogbokejami yona Mobe. Nasɔnei no bana bakekɛ mojɔ bo oje-bakani Sango.

¹⁴Nasɔnei no basango, mojɔ bo ojebakani yona odaka oko a bobanga mɛnɛ. Nasɔnei no menga, mojɔ bo odini na ndangasa, na Ebaeli eNjambe eyeyoaka a tei enu, na ogbokejaini yona mobe.

¹⁵T'opalakeni oko ngondo, isa leka lua lodi a ngondo. Isa moto apalaka ngondo, apeliti nongo ngenjɔ ai Sango a tei ende.

¹⁶Mojɔ bo, ngando jisusu jia jidi a ngondo, na posa emokuku, na posa emiso, na jala emohelo mu, jicingi oko na ngondo pε, te nongo na Sango.

¹⁷Ngondo ekɛkɛ adimoe, na posa engondo pongono. Moto ko yona okɔkɔ bolulea boNjambe ayeyoaka oko na bosusu.

¹⁸Bana bambi, ehole esuka emei. Ino o'kani bo Soki-eMasiya adi bodoa. Soki-jiMasiya badoi banɛnɛ, na badi e dɔye; oko boa bojebaka bo ehole esuka emei.

¹⁹Bahɔtɔnɔ na su oko bobɔtɔnɔ; baidaka bato basu. Akɔki bo da bato basu ka bayeyoi na su. Bamana ko, na mojɔ momina monejaka bo baditi bato basu, bo basusu mɛnɛ.

²⁰Ino ko osini kpaci ai Yona Mosenɔke, na odini na ejebeli, no basusu.

²¹Mbi nasɔneaka no mojɔ bo ojebakani Soti, na oje-bakani bo Soti etabotaka bokosea. Nitasɔneaka no mojɔ bo otaje-bakani Soti.

²²Odi mokosei nda? Oko yona onganaka bo Yesu adi Masiya. Iyo adi Soki-eMasiya, oko yona onganaka Sango na Mwana.

²³Pερε nongo moto yona onganaka Mwana odi na Sango. Moto ko yona ojimaka Mwana adi na Sango pongono.

²⁴Ino ko, kinani mojɔ modae a tei enu mua moka no a bobanga. Mojɔ moka no a bobanga mokayeyoa a tei enu, odini boyeyeo no bɛnɛ a tei eMwana na a tei eSango.

²⁵Na sako ekinea yo so edi oko bomɔ bua bodi na bosusu.

²⁶Nasɔnei no ngando jmina a mojɔ mobato bay a bapalaka bola-boja no.

²⁷Bosopea ko bosɔ nb ai yo boyeyoaka na nu. Mojɔ mua motakaka na nu moditi bo okina otongo akojae no, mojɔ bo bosopea bonde bokojaka no a mojɔ mongando jesusu. Bosopea bomina bodi soti mɛnɛ, te nongo bokosea. A mojɔ momina, yeyoani a tei ende, o akoa no na bosopea bomina.

²⁸E dεye, bana bambi, yeyoani a tei ende. Oko boa, yo akamana, bodi bo'ma a boso bonde na eci, te nongo na sɔni.

²⁹Isa ojebakani bo yo adi na bodongo, ojebakani bo moto na moto yona odi na ekɔmeli ebodongo abotami na nde.

1 Yoane 3

Bana baNjambe

¹Anjani ngenjɔ enɛnɛ epa Njambe so, bo so bodaе na kombe jibana baNjambe. Na bodi bana baNjambe. A mojɔ momina, ngondo Pejebake so, mojɔ bo eimojeba yo.

²Baninga, so bodi bana baNjambe oko e dεye. Bojobakini elimo esu engɔngɔ; endele ko, bojobaka bo yo akadoa a bohu, so bodabí na elimo ende, mojɔ bo bodi bomonɛ o adi yo.

³Moto na moto yona odi na njingo emina ai yo, asasenojaka o adi yo mosenɔke.

⁴Moto na moto yona okɔkɔ bobe asopaka Mibeko. Bobe bosusu bodi oko bosopa boMibeko.

⁵Ojebakani bo yo adoa a bodongeja jibe. Bobe boditi nongo a tei ende.

⁶Moto yona oyeyoaka a tei ende t'akɔke bobe. Yona okɔkɔ bobe amonɛkini na amojobakini.

⁷Bana bambi, T'ojojimeni oko bo moto alabojae no. Yona odi na ekɔmeli ebodongo adi moto obodongo, o adi yo na bodongo.

⁸Moto yona okɔkɔ bobe adi moto oSatana, mojɔ bo Satana akɔ bobe a bobanga mɛnɛ, na akɔkɔ bobe oko e dɛye. Cina ebodoa boMwana 'Njambe edi oko bo abejae bilomu biSatana.

⁹Moto yona obotama na Njambe t'akɔke bobe, mojɔ bo bana baNjambe bayeyoaka a tei ende, na babwaniti bokɔ bobe, mojɔ bo babotama na Njambe.

¹⁰Bodi bombetea bana baNjambe na bana baSatana oko na mojɔ momina. Moto amiti da na ekɔmeli ebodongo aditi moto oNjambe, na moto yona odi na mwangwa'nde soki koko boa.

¹¹Iso bodi bopalana; bwɛnji bosɔ no a bobanga mɛnɛ oko bu.

¹²Bobwaniti boda na ekɔmeli eKaina, yona odaka moto oSatana na awa mwangwa'nde. Na awa mwangwa'nde mojɔ moye? Mojɔ ke bo bikɔmeli binde mɛnɛ bidaka bibe, na bia bimwangwa'nde bidaka bipele.

¹³Baninga, ye bokamoani bo ngondo edi na nu soki.

¹⁴Iso bojebaka bo bomani a bogwa, na bokwei a bomɔ, cina bo bopalaka baninga. Moto amiti pala, adi oko a tei ebogwa.

¹⁵Moto yona odi na mwangwa'nde soki adi mowoi; na ojebakani bo mowoi apeliti nongo bomɔ bua bodi na bosusu a tei ende.

¹⁶Bojebaka ngɛnɔ̄oko na mojɔ mu, bo yo apa mohelo monde a mojɔ mosu; na so hobwani bopa mihelo misu a mojɔ mobaninga.

¹⁷Moto akane bo mwangwa'nde adi na taka, yana adi yo mɛnɛ na likonja lingondo, na akadipa molema monde ai yo, ngɛnɔ̄eNjambe editi a tei ende.

¹⁸Bana bambi, ngɛnɔ̄esu ebwaniti boda a bikenge bimonɔkɔ pɛ, oko na ekɔmeli na soti.

¹⁹Oko boa bodi bojeba bo bodi bana basoti, na bodi bohahaneja milema misu a boso bonde, isamilema misu midumbaka so;

²⁰mojɔ bo, na Njambe na milema misu, Njambe adi boso; na yo ajebaka ngando jisusu.

²¹Baninga, isa milema misu mitadumbaka so, boditi nongo na mokakwano a boso boNjambe,

²²na bosɔkɔ ai yo mua mongaka so, cina bo bosumaka Mibeko minde, na bokɔkɔ ngando jia jimosepejaka.

²³Mobeko monde modi oko bo bojimee kombe eMwana'nde Yesu Masiya, na bo bopalaneni o apa yo so mobeko.

²⁴Moto yona osumaka Mibeko minde ayeyoaka a tei ende, na yo ayeyoaka a tei emoto omina. Na bojebaka bo ayeyoaka a tei esu oko na Mwembo mopa yo so.

1 Yoane 4

Mojo moBakoja baBokosea

¹Baninga, t'ojimeni oko miembu misusu. Sisoani miembu a bojeba isa micingi na Njambe, cina bo batondji babokosea banene banangani a ngondo.

²Odini bombetea Mwembo mo-Njambe oko na mojo mu; miembu misusu mia mijamaka bo Yesu Masiya adoa o moto, micingi na Njambe.

³Miembu misusu mia mijimiti Yesu, micingiti nongo na Njambe. Mwembo mua modi boa modi oko mwembo moSoki-eMasiya; o'kani bo mwembo momina modi bodoa, na modi a ngondo e deye.

⁴Bana bambi, ino odini bana baNjambe, na ogbokejami miembu mimina, cina bo, na yona odi a tei enu, na yona odi a ngondo, yona odi a tei enu anci na ngulu.

⁵Bato bamina badi bato bangondo; oko boa ngando jibalaka bo jidi ngando jingondo, na ngondo ebabokeaka.

⁶Iso ko bodi bato baNjambe. Moto na moto yona ojebaka Njambe ahokeaka so; na moto na moto yona oditi moto oNjambe t'ahokeake so. Oko boa bombeteaka mwembo mosoti na mwembo molaboake.

Mojo moNgensi

⁷Banninga baepaeli, yen'i boda na ngensi, moto ai mina'nde moto. Mojo bo ngensi ehulaka ai Njambe, na moto yona odi na ngensi abotama na Njambe na ajebaka Njambe.

⁸Moto yona opeliti ngensi t'ajebake Njambe, mojo bo Njambe adi ngensi.

⁹Ngensi eNjambe eboloa a tei esu oko na mojo mu, bo Njambe aloma mwana'nde obotama omoci a ngondo, bo so bohele a mojo monde.

¹⁰Iye edi ngensi, te bo so bodaka na ngensi ai Njambe, oko bo yo adaka na ngensi ai so, na aloma Mwana'nde bo adae lisiko a mojo mojibe jisu.

¹¹Banninga baepaeli, isa ngensi eNjambe ai so edaka boa, iso bobwani boda na ngensi pongono, moto ai mina'nde moto.

¹²Moto anekini Njambe, pere nongo omoci. Njambe ko ayeyoaka a tei esu, na ngensi ende ebongi a tei esu, isa bodi na ngensi moto ai mina'nde moto.

¹³Bojebaka bo bodi a tei ende, na bo yo adi a tei esu, mojo bo abopi Mwembo monde.

¹⁴Iso bone, na botondok bo Sango aloma Mwana'nde o Moheleja ongondo.

¹⁵Moto na moto yona ojimaka bo Yesu adi Mwana 'Njambe, Njambe adi a tei ende, na yo mene a tei eNjambe.

¹⁶Iso bojebaka na bojimaka ngenj eNjambe ai so. Njambe adi ngenj. Moto yona odi a tei engenj adi a tei eNjambe, na Njambe adi a tei ende.

¹⁷Ngenj ebangi ai so bo botada nongo na mokakwano a busa boEsambi moj bo so bodi a ngondo o adi yo.

¹⁸B o boditi nongo a ngenj. Ngenj yena ebangi ebanganaka bo. Bo bodi oko a moj momokindo, na isa moto adi na bo, ngenj ende ebongiti.

¹⁹Iso ko bodi na ngenj, moj bo yo adaka na ngenj ai so boso.

²⁰Moto akabala bo, Mbi nadi na ngenj ai Njambe, yana adi yo na mwangwa'nde soki, moto omina adi mokosei. Moj bo isa aditi na ngeng ai mwangwa'nde yona onenek na nde, atada nongo na ngenj ai Njambe yona odi yo pe bone.

²¹Na so bos mobeko mu ai yo, bo moto yona odi na ngenj ai Njambe abwani boda koko na ngenj ai mwangwa'nde.

1 Yoane 5

¹Moto na moto yona ojimaka bo Yesu adi Masiya abotama na Njambe. Na moto na moto yona odi na ngenj ai moboti, adi koko na ngenj ai mwana'nde.

²Oko boa bojebaka bo bodi na ngenj ai bana baNjambe isa bodi na ngenj ai Njambe, na isa bosumaka Mibeko minde.

³Isa ngenj ai Njambe edi, lisuma a Mibeko minde lidi koko. Na Mibeko minde miditi na kpokos.

⁴Moto na moto yona obotama na Njambe agbokejaka ngondo; na lilonga lia ligbokejaka ngondo lidi oko ejimeli esu.

⁵Ogbokejaka ngondo nda? Oko yona ojimaka bo Yesu adi Mwana 'Njambe.

⁶Edi oko yo, Yesu Masiya, yona odoa na madiba na makia; te na madiba pe, oko na madiba na makia pongono.

⁷Na Mwembo modi motati, moj bo Mwembo modi Soti.

⁸Batati badi basato, oko Mwembo na madiba na makia; na tati ebu basato edi oko tati emoci.

⁹Bokajima tati ebato, tati eNjambe enoi tati ebato, moj bo tati eNjambe edi tati a moj moMwana'nde.

¹⁰Moto yona ojimaka Mwana 'Njambe adi na tati emina a tei ende mene. Moto yona odi pe bojima Njambe, akok Njambe mokosei, mojo bo atajimaka tati etataka Njambe ai Mwana'nde.

¹¹Na tati emina edi oko ye, bo Njambe apa so bomo bua bodi oko na bosusu; na bomo bomina bodi a tei eMwana'nde.

¹²Moto yona odi na Mwana a tei ende adi na bomo. Yona ko opeliti Mwana apeliti bomo.

Bileho Bisuka

¹³Mbi nasonei no ngando jiji, no bayo bajimaka kombe eMwana 'Njambe, bo ojebeni bo odini na bomo bua bodi na bosusu.

¹⁴Na ejimeli esu ai yo edi bo boka'nga mokina mojo mua mobwani na bolulea bonde, yo adi boka so.

¹⁵Na isa bojebaka bo yo ahokeaka mij misusu mingaka so, bojebaka bo bosi mij mingaki so ai yo.

¹⁶Moto akajeba bo mwangwa'nde akok mokina mojo mobe mua mobwamti na bogwa, adi bonga Njambe, na yo adi bomopa bomo a mojo mobato bayo bakoi bobe bua bobwaniti na bogwa. Bokina bobe bodi oko bobe bobogwa; nitabalaka bo moto adi bonga a mojo mobobe bomina.

¹⁷Mijo misusu mia miditi mipele midi Mibe; mokina ko moditi bobe bobogwa.

¹⁸Bojebaka bo moto na moto yona obotama na Njambe t'akoke bobe. Moto yona obotama na Njambe asabaneaka, na yona Mobe atabakea nongo ebai yo.

¹⁹Iso bojebaka bo bodi bana baNjambe, na bo ngondo esusu edi a momo mayona Mobe.

²⁰Bojebaka bo Mwana 'Njambe adoi, na abopi boemgea a bojeba yona oSoti. Na bodi a tei ende yona odi Soti, oko a tei eMwana'nde Yesu Masiya. Iyo adi Njambe oSoti, na bomo bua bodi na bosusu.

²¹Bana bambi, inganjamani a mojo mobanjambe babokosea.

2 Yoane

2 Yoane 1

¹Mbi mosuku oDenga ai Kilia mwali mohɔmɔke na ai bana bawε. Mbi napalaka no na soti, na te mbi pε, oko basusu batongo bayo bajebaka mojɔ mosoti,

²cina eSoti yena edi a tei esu, na edi boda na su oko na bosusu.

³Monganji na wa na bowi jida na su; jikahule al Njambe Sango na ai Yesu Masiya, Mwana 'Sango, a tei eSoti na ngɛnɔ.

⁴Mbi nadaka na sepi enɛnɛ yana atana mbi bakina bana bawε bakadale a njea esoti, o ama so sɔ mobeko ai Sango.

⁵Na mojɔ mongaka mbi wε e dεye Kilia, modi bo bodese na epaeli, moto ai mina'nde moto. Nitasonneaka wε mobeko moyene; modi oko mobeko mosɔ so a bobanga mɛnɛ.

⁶Ngɛnɔ edi oko ye, bo bosume Mibeko minde. Mobeko modi oko mu, bo osuseni njea engɛnɔ, o aka no a bobanga.

⁷Mojɔ bo bakosei banɛnɛ banangani a ngondo, bayo batajimaka bo Yesu Masiya adoa o moto. Yona odi boa adi mokosei, na adi soki-eMasiya.

⁸Toma nganjamani bo otabungejaeni ndese eelomu enu, na bo osen̄i ndese enu esusu.

⁹Moto yona okinaka njea, pε boyeyoa a bokoja boMasiya, aditi na Njambe a tei ende. Yona oyeyoaka a bokoja boMasiya, adi na Sango na Mwana pongono a tei ende.

¹⁰Moto akadoa ai no yona oditi na bokoja bomina, pε bomosɔni a ndako, pε bomobɛjɛni njɛbɛ;

¹¹mojɔ bo, yona omo-bɛjɛke njɛbɛ akatani na nde a bilomu binde bibe.

¹²Nadi na ngando jinɛnɛ a bosɔnea no; napaliti ko bo najisɔne a mokanda, mojɔ bo nadi na njingo bo nadoe a bo'nɛnɛ na nu, na a bobala na nu na monɔkɔ mɛnɛ. Sepi esu edi bobɔngɔ boa.

¹³Bana bamwangwao mohɔmɔke babɛjɛke wε njɛbɛ.

3 Yoane

3 Yoane 1

- ¹Mbi mosuku oDenga ai moninga Gayo; ngenjɔ embi ai wε na soti.
- ²Moninga, mbi nangaka Njambe bo mijɔ miwε misusu Mibɔnge, na bo odae na mokuku monjilake o adi wε na mwembo monjilake.
- ³Mojɔ bo mbi nadaka na sepi yana amea bakina baninga ya, na babala a mojɔ moSoti yena edi a tei enu, na bo odalakani a njea esoti.
- ⁴Mbi naka'ka bo bana bambi badalaka a njea esoti, sepi embi enɔi oko bonɔ.
- ⁵Moninga, elomu ekɔkɔ wε a mojɔ mobaninga, na a mojɔ momidoa, edi elomu eejimeli mεnε.
- ⁶Ibo batati tati a mojɔ mongenjɔ ewε a boso boDenga. Bopele bo obakɔmejae a mɔngɔ mobu; mojɔ momina mobwani na elomu eNjambe.
- ⁷Mojɔ bo bakei a mojɔ mokombe ende, pε bosɔ nongo eka ai bapakano.
- ⁸Oko boa bobwani bokɔmeja bato bamina, bo bokatane na bu a elomu eSoti.
- ⁹Nasɔni mokanda a Denga; yo ko Diotulepe Yajimake kpaci esu; apalaka bo asakumejae a tei ebu.
- ¹⁰Oko boa, mbi nakadoa nadi bolejε bato a mojɔ mobikɔmeli binde, na bo alɔngɔkɔ so na bibaeli bibe. Te mojɔ momina pε,—alonaka bosɔ baninga, na alemoaka na bato baya bapalaka bosɔ baninga, na abamejaka a Denga.
- ¹¹Baninga, pε bokoani na bobe; ikoanani oko na bopele pε. Moto yona okɔkɔ bopele adi moto oNjambe. Moto ko yona okɔkɔ bobe anɛkini Njambe.
- ¹²Bato basusu basakoaka Demetulio, na mwako mosoti motataka ai yo pongono. Mbi namosakoaka pongono, na ojebakani bo tati embi edi tati esoti.
- ¹³Nadaki na mijɔ minɛnɛ a bosɔne a wε; mtapalaka ko bo namisɔne a mokanda.
- ¹⁴Nadi na njingo bo nanɛnɛ a wε ngɔngɔ mweka, na bodi bobalana oko na monɔkɔ.
- ¹⁵Yε bowi boda ai wε. Binao babεjekε wε njεbε. Abejε bma'su, moto na moto na kombe ende.

Yuda

Yuda 1

¹Mbi Yuda, mobuli oYesu Masiya, na mwanange 'Yakobo, ai baya babeama, baya baso ngənjɔ eNjambe na baya babaneamaka a mojɔ moYesu Masiya.

²Yε monganji na bowi na ngənjɔ jinəngε ai no.

³Baninga, adaki mbi na mokano bo nasɔnee no mokanda a mojɔ mobohela hosu na nu, najimi bo nasɔnee no, oko na bonga ai no, a bona na bopipo a mojɔ moejimeli yena epama ai basənɔke ehole emɔci pε.

⁴Cina bo bakina bato bakwei a tei enu na poloso, bato babe baya bahekojaka monganji moNjambe a bosambolu, na banga-naka Moswa na Kumu osu omɔci, Yesu Masiya. Mokindo mobato bamina mokoleama ehele.

⁵Napalaka bolεjε no, nongo ajebaka no ngando ji jesusu, bo Kumu yona oheleja bato a Ejipeto, aweja ngɔngɔ bato baya baijima.

⁶Na babwənji-baDiko koko, baya baidika a bokumu bobu na bakina esika ebu, yo abadeja a minyɔlɔ mimodidi mua modi na bosusu, a bo'mba Esambi ebusa bua bonεnε.

⁷Sɔdɔmɔ na Gomola koko, na ngando jitongo jia jidaka a esika emina; mojɔ bo ekɔmeli ebu edaka oko bɔɔli, na ngando jibosambolu pε. Mokindo mobu modi oko mosa mua motadimoa a mojɔ moembete ai so.

⁸Bato bamina badi koko na ekɔmeli emina. Babejaka mikuku Mibu na posa jibu. Basetojaka kpaci, na baloleaka bato baekumu eDiko.

⁹Nongo Mikaele, mosuku obabwənji-baDiko, yana aswiana yo na Satana a mojɔ momokuku moMose, aipala bomotɔkɔlɔ; abala oko bo, yε Njambe alemoe na wε.

¹⁰Bato bamina ko baloleaka ngando jidi bo pε bocingea. Ejebeli ebu edi oko ejebeli etito, na basabejaka na ejebeli emina.

¹¹Boditigoa ai bato bamina! Mojɔ bo badalaka a njea edala Kaina. Bakoañaka na libunga liBalama oko na posa elikonja, na bagwaka a mojɔ molipanga o agwa Kole.

¹²Bato bamina badi mabaku a kola jinu. Bapehti nongo sɔni a mojɔ moma-tanga mabu. Posa jibu jidi oko ai bo bεnε pε. Badi biyembi ngasa pε madiba, bia bipεpεnεkε na pwea; badi o mele mikakanake miyanga mia midi mitete, Mibikoamake, mia migwi bihole bibae.

¹³Bamejaka mapuli mabosambolu bobu o ekɔmeli emula monene momadiba-mamukwa. Badi o njɔtɔ balaboake, baya bahengemé a mojɔ momo-didi tuu oko na bosusu.

¹⁴Anoka, yona odaka a elulu esambo ngɔngɔ jiAdama, apa koko eseko a mojɔ mobato bamina; abala bo, Anjani, Kumu akekɛ adoe na mandundu mabasenɔke bande

¹⁵Bo asambejae bato basusu, Na bo adumbe bato basusu babe, A mojɔ mongando jisusu jibe jikɔ bo, Na bibaeli bisusu bibe bibala bato babe a mojɔ monde.

¹⁶Bato bamina badi bato babomemelε na bamanungunungu, baya basumaka oko posa jibu bɛnɛ; bibaeli bibu bidi bibaeli biegbo, na basakoaka bato oko na njingo ebosc eka.

¹⁷Ino ko baninga, toma salejeni bibaeli bibala babwɛnji baKumu osu Yesu Masiya eyou.

¹⁸Babala na nu bo bato babiloli badi bodoa a masu masuka, baya badi bosuma oko posa jibu bɛnɛ pɛ.

¹⁹Bato bamina bapengolaka batongo, badi bato babosambolu baya bapeliti Mwembo.

²⁰Ino ko baninga, kinani eyoeli enu edae a diko diejimeli enu esenɔke. Ingakani a tei eMwembo Mosenɔke.

²¹Sabaneani a ngenjɔ eNjambe, ena ko ombakani monganji moKumu osu Yesu Masiya oko a bomɔ bua bodi na bosusu.

²²Dani na wa ai bato baya badi na mokakwano.

²³Helejani batongo, bagbulani a mosa. A mojɔ mobatongo, kinani wa enu ai bo edae na bo, na gbeseani bisenja bibu bia bibeji na munu.

²⁴Iyo adi na ngulu a bobanea no bo otakwani, na a bomeja no, pɛpɛ nongo litɔnɔ, a boso boekumu ende na sepi;

²⁵ekumu na bosakoa na bokumu na kpaci ai yo yona odi Njambe omɔci pɛ, Moheleja osu a mojɔ moYesu Masiya Kumu osu, oko ehole eipeta banga, na e dɛye, oko na bosusu. *Amen.*

Boboloja

Boboloja 1

1Ibu bodi boboloja boYesu Masiya. Njambe abomopa bo anejae bakɔmeli bande ngando jia jidi bodoa bokpa; na yo ajebeja mokɔmeli onde Yoane mojɔ momina, yana amolomea yo obwɛnji onde.

2Yoane adi motati oEbaeli eNjambe na otati eYesu Masiya, a mojɔ mongando jisusu jine yo.

3Bojongoa ai moto yona olangaka bikenye bieseko ye; bojongoa ai baya ba'kaka, na baya basumaka ngando jia jisɔnɔmi ena; mojɔ bo ehole emina edi hulelu.

4Yoane ai Menga sambo maMasiya maya madi a Asia; Monganji ai no na bowi boYona odi, Yona odaka, na Yona odi na bosusu, na miembo sambo mia midi a boso bongendɛ ende,

5na Yesu Masiya, Motati oejimeli, Mwana-sɔmi a tei ebagwake, Mosuku obakumu bangondo. Iyo apalaka so, na asikoa so a jibe jisu, na makia mande,

6na akɔ bo boda bokumu bonganga ai Njambe Sangwa'nde. Ekumu na bokumu ai yo oko na bosusu. *Amen.*

7Hokeani; akɛke adoe na biyembi. Miso masusu madi bomone, na baya bamondea pongono. Na makota masusu mangondo mâyela bio a mojɔ monde. Ee, *Amen.*

8Kumu Njambe abalaka bo, Mbi nadi Alepa na Omega, yona odi, yona odaka, yona odi na bosusu, yona onci basusu.

Mojɔ Monɛ Yoane

9Mbi Yoane, mwangwa'nu yona okatani na nu a tei eminɔngɔ, na a bokumu, na a eci yena edi a tei eMasiya; mbi nadaka a mosanga mua modi na kombe Patemo, a mojɔ moEbaeli eNjambe, na a mojɔ motati eYesu.

10Nadaka a Mwembo a busa boKumu, na naka kɔpi epipo a ngɔngɔ jimbi o mondule bo,

11Sɔnɔ mojɔ monɛke wɛ a mokanda; moloma a Menga sambo maMasiya, a Epesɔ, na Semuluna, na Pelugamona, na Twatila, na Saludi, na Piladelupia, na Laodikia.

12Mbi nahekhoa a bone kɔpi yena ebalaka na mbi. Ahekhoa mbi, nanɛ paka jiwɔlɔ sambo.

13Okina o Mwana 'Moto, yona olwaka kasaka eyai adaka a ndanda epaka, na adaka na kamba ewɔlɔ a bupa.

¹⁴Molo monde, na swe jinde, jidaka bopu bop   o makambule. Miso mande mangeng  ke o mosa.

¹⁵Bibota binde bidaka o mboa jipele jia jimana a mosa na bolailai. K  pi ende edaka o doi eepela.

¹⁶Apeaka nj  t   sambo a ebo ende ebami, na ab  ne onj  ng   jibae jip  lu amanaka a mon  k   monde. Boso bonde bodaka o bohu bon  ne bomodika-busa a ngulu ende.

¹⁷Yana amone mbi, nakwa a bibota binde o mogwake. Iyo ko abakea ebo ende ebami ai mbi, na abala bo, ye bobanga. Mbi nadi yona oboso, yona osuka, na yona obom  .

¹⁸Mbi nagwa; e d  ye ko nadi mo oko na bosusu, na napeli sabe jibogwa na jiesika ebagwake.

¹⁹Oko boa, s  n   mij   min  ke we, mia midi e d  ye, na mia midi bodoa ng  ndo.

²⁰Cina enj  t   sambo bani we a ebo embi ebami, na paka jiw  l   sambo edi oko ye; nj  t   sambo badi babw  nji baMenga sambo, na paka sambo jidi Menga sambo.

Boboloja 2

MIKANDA A MENGA SAMBO Mokanda a E  s  o

¹S  nea obw  nji oDenga diE  s  o bo, Iyona opeaka nj  t   sambo a ebo ende ebami, yona odalaka a ndanda epaka jiw  l   sambo, abalaka mij   mimi.

²Mbi najebaka bik  m  li biwe, na elomu ewe, na lingbangba liwe. Najebaka bo bato babe bak  k   we maneene, bo osisoi baya basabeaka babw  nji na baditi nongo babw  nji, na onini bo badi bakosei.

³Najebaka bo odi na lingbangba a moj   mokombe embi; oh  n  k   muna momina na otangwaka.

⁴Mbi ko nadi na we moj   mu; okini epaeli ewe eboso.

⁵Toma l   esika ekwi we; hekoja molema mow  ; k   bilomu biboso. Omiti k   boa, omiti hekoja molema mow  , mbi nadi bodoa ai we, na nâ  dongeja paka ewe.

⁶Endele ko, odi na moj   mu mopele; olonaka bik  m  li biBaNikolaito, o alonaka mbi bik  m  li bibu.

⁷Isa moto adi na matoi, ye ahokee moj   mobalaka Mwembo na Menga maMasiya. Moto akagbokeja, mbi n  mopa mbuma jimole-mobomo mua modi a Paladiso eNjambe bo ayake.

Denga diSemuluna

⁸Sōnea obwēnji oDenga diSemuluna bo, Iyona oboso, yona osuka, yona ogwa na ohela koko, abalaka mijɔ mimi.

⁹Mbi najebaka monɔngɔ mowε, na bokwali bowε (nongo adi wε na likonja). Najebaka mojɔ momasingi mabato bay a baba-laka bo badi BaYuda, na baditi BaYuda; badi oko sinagoge eSatana.

¹⁰Boditigoa bokɛkɛ adoe ai wε. Ye bobanga ko. Hokeani; Satana akɛkɛ adumbe bakina banu a blɔkɔ a bomeka no, na ôdani na monɔngɔ masu domi. Da ko na lingbangba oko a bogwa, na mbi nâpa wε likongo libomɔ.

¹¹Yona odi na matoi, ye ahokee mojɔ mobalaka Mwembo na Menga maMasiya. Yona ogbokejaka atadingoa na bogwa bomabae.

Denga diPeligamona

¹²Sōnea obwēnji oDenga diPelugamona bo, Iyona odi na abεnε onjɛngɔ jibae jipɔlu abalaka mijɔ mimi.

¹³Mbi najebaka esika edi ndako ewε; edi oko a esika edi ngɛndε eSatana. Opeaka kombe embi boku. Oingana nongo ejimeli embi a masu mawa bo Antipa, motati ombi oeujimeli a tei enu, oko a esika eSatana.

¹⁴Endele ko, nadi na wε mikina mijɔ. Odi na bakwa bato oho bay a bajimaka bokoja boBalama, yona okoja Balaka bo asakejae bana baYisalaele libaku, bo bayake masiko maya mapama ai banjambe babokosea, na bo bakɔe mijɔ Mibosambolu.

¹⁵Odi koko na bakina bay a badi bacinami baBaNikolaito.

¹⁶Hekoja molema mowε. Omiti hekoja molema, nadi bodoa ai wε bokpa, a bona na bato bamina na abεnε omonɔkɔ mombi.

¹⁷Yona odi na matoi, ye ahokee mojɔ mobalaka Mwembo na Menga maMasiya. Mbi nâpa yona ogbokejaka manna mabombamake. Nâmopa koko litai lipu; kombe eyene edi bosɔnɔmɔ a litai limina, na pεpε nongo moto oje-baka kombe emina, oko yona oesɔkɔ.

Denga diTwatida

¹⁸Sōnea obwēnji oDenga diTwatila bo, Mwana 'Njambe abalaka mijɔ mimi, oko yona odi na miso mamosa mongoake, na bibota binde o mboa jipele jibolailai.

¹⁹Mbi najebaka bikɔmeli biwε, epaeli ewε, ejimeli ewε, elomu ewε na lingbangba liwε. Na bikɔmeli biwε e dεye na bikɔmeli biwε biboso, mbi najebaka bo bikɔmeli biwε e dεye binɔi bikɔmeli biwε biboso.

²⁰Endele ko, nadi na wε mojɔ mu; ojimaka bo Yesabela, mwali yona obalaka bo adi motɔndɔi, akojae na alabojae bakɔmeli bambi a bokɔ ngando jibosambolu, na a boyaka masiko maya mapama ai banjambe babokosea.

²¹Namopi ehole bo ahekojae molema monde; yo ko t'apalake bohekoja molema na bokwa ngando jinde jibosambolu.

²²Hokea; mbi nâmodumba a gbagba eyogo; na bay a bangɛkε na nde bɔɔli bamiti hekoja milema Mibu a bikɔmeli binde, mbi nâbalomea bodingoa bonεnε.

²³Nâweja bana bande oko bowa. Na Menga masusu maMasiya madi bojeba bo mbi nadi yona osisoaka bolε na molema. Nâpa moto na moto a tei enu ndese yena ewani na bikɔmeli binde.

²⁴Ino batongo ko baTwatila bay a batajimaka bokoja bomina, na bay a baidinda a ngando jibombamake jiSatana, (ebaeli ebu edi boa) nabalaka na nu bo nitabakea mokina muna motongo ai no.

²⁵Mojɔ momɔci ko; peani boku mua mope-lini no, oko a bodoa bombi.

²⁶Iyona ogbokejaka, yona osumaka ngando jimbi oko a suka mεnε, mbi nâmopa kpaci emakota.

²⁷Iyo âkuma makota na tondo eebende, na âmabε o abεkε moto teni, mojɔ bo mbi nasi kpaci ai Sangwa'mbi.

²⁸Nâmopa koko monjɔtɔ moelɔngɔ.

²⁹Moto yona odi na matoi, yε ahokee mojɔ mobalaka Mwembo na Menga maMasiya.

Boboloja 3

Denga diSaludi

¹Sonea obwεnji oDenga diSaludi bo, Iyona odi na Miembo miNjambe sambo, na njɔtɔ sambo, aba-laka mijɔ mi. Mbi najebaka bikɔmeli biwε. Odi na kombe emoto yona odi mɔ, na odi oko mogwake.

²Sisoa, na pingea ngando jia jidikai, jia jidi hulelu na bogwa; mojɔ bo mbi nanεkε bo bikɔmeli biwε bibɔngiti nongo a miso maNjambe ombi.

³Toma le mijɔ misɔ wε, na mijɔ mika wε. Banea mijɔ mimina, na hekoja molema mowε. Omiti nganjama, mbi nâdoa o mobi, na otajeba ehole êdoa mbi ai wε.

⁴Endele ko, odi na bakina bato a Saludi bay a baibeja bilwaeli bibu. Ibo badi bodala na mbi na bisenja bipu, mojɔ bo babɔngi.

⁵Iyona ogbokejaka adi bolwa bisenja bipu boa, na mbi nitahakoa kombe ende a mokanda mobom̄. Nâjima kombe ende a boso boSangwa'mbi na a boso bobabw̄enji bande baDiko.

⁶Moto yona odi na matoi, yε ahokee moj̄ mobalaka Mwembo na Menga maMasiya.

Denga diPadelupia

⁷S̄onea obw̄enji oDenga diPadelupia bo, Iyona mosen̄ke, yona osoti, yona odi na sabe eDawidi, yona odipoaka na pεpε nongo moto odi bodipa, yona odipaka na pεpε nongo moto odi bodipoa, yo abalaka mij̄ mimi.

⁸Mbi najebaka bik̄meli biwε. Hokea; mbi nakini modipe bwase a boso bowε, na pεpε nongo moto Obwani bomodipa. Najebaka bo ngulu ewε ehεhti; endele ko, osumaka ebaeli embi, na oigana nongo kombe embi.

⁹Baya badi basinagoge eSatana, baya babalaka bo badi BaYuda na baditi BaYuda, na bakoseaka, mbi nadi bobahuda ai wε bo basasunee a boso bobibota biwε, bo bajebé bo mbi napalaka wε.

¹⁰Ehole ebomeka ekek̄e adoe a ngondo esusu a bomeka bato bangondo. Mbi ko nadi bobanea wε a ehole emina, moj̄ bo obanea ebaeli embi na lingbangba.

¹¹Mbi nak̄ek̄e adoe bokpa. Pea boku mua mopeli wε, bo moto asaka katoa likongo liwε.

¹²Moto yona odi mogbokoli, mbi nâmok̄ likwe a tempelo eNjambe ombi, na ataya mana. Nâs̄on̄ kombe eNjambe ombi ai yo, na kombe engando eNjambe ombi, oko Yelusalema eyene yena ekahule oho Diko ai Njambe ombi, na kombe embi mεnε eyene pongono.

¹³Yona odi na matoi, yε ahokee moj̄ mobalaka Mwembo na Menga maMasiya.

Denga diLaodikia

¹⁴S̄onea obw̄enji oDenga diLaodikia bo, Iyona odi *Amen*, yona odi motati osoti na oejemeli, yona odi litandei lielomu eNjambe eboyoa, yo abalaka mij̄ mimi.

¹⁵Mbi najebaka bik̄meli biwε. Najebaka bo oditi nongo na pio isa na mosa. Ak̄ki wε da na pio isa na mosa, bopele.

¹⁶A moj̄ momina, mbi nâbunja wε a mon̄k̄ mombi, cina bo odi oko na bodu, pεpε pio, pεpε mosa.

¹⁷Obalaka bo, Mbi nadi konji; nakonji makonja manεnε; pεpε nongo eka etakaka na mbi. Otajebaka bo odi na es̄opi, na eduku, na bopu, na miso magwake, na bo odi mbundu.

¹⁸Mbi nalehaka wε bo osombe ai mbi wɔlɔ yena eluama na mosa, bo odae konji soti, na bisenja bipu bo odae na elwaeli, na bo sɔni embundu ewε esaka boloa, na sengo a bosuoa ta miso mawε bo onε.

¹⁹Mbi nakapala bato, nabasiaka, na nabatuaka. Oko boa, kɔ na bopipo bo ohekojae molema mowε.

²⁰Hokea; mbi nami mema a modipe, na nabomaka. Moto aka'ka monɔkɔ mombi, na akadipoa modipe, mbi nâkwea ai yo; nâyaka na nde, na yo âyaka na mbi.

²¹Mbi nâjima bo yona ogbokejaka adae na mbi a ngɛndɛ embi, o ami mbi gbokeja, na adi mbi na Sangwa'mbi a ngɛndɛ ende.

²²Yona odi na matoi, yε abokee mojɔ mobalaka Mwembo na Menga maMasiya.

Boboloja 4

Ngɛtidε eNjambe

¹Yana asia ngando jmina, mbi nanja, na nanε bo modipe modi bwase oho Diko. Na kɔpi ema mhi ka boso o ekɔmeli emondule emi ko bala oko na mbi bo, Doa jɔno diko bo nanejae wε ngando jia jikεkε adoe ngɔngɔ.

²Bokpa mεnε, nadaka a Mwembo, na nanε ngɛndɛ a tei eDiko na okina a ngɛndɛ emina.

³Yona odaka a ngɛndɛ adaka o litai liyasipi na salali; na moyama mohika ngɛndɛ o emelaudi.

⁴Mingbelengɔ licinda-na-minei mihikaka ngɛndɛ. Basuku licinda-na-banεi badaka a mingbelengɔ bayo badaka na bisenja bipu, na makongo mawɔlɔ a melo Mibu.

⁵Mikalimo, na kɔpi, na bεi jimana a ngɛndɛ. Mitanda sambo miyoaka a boso bongɛndɛ, mia midi Miembo sambo miNjambe.

⁶Boso bongɛndɛ bodaka o ekɔmeli elibale litalatala na kulusutala. Nanε koko bato babomɔ banεi a tei engɛndɛ, na bahikaka ngɛndɛ; badaka na miso botɔ, saboso na sangɔngɔ.

⁷Yona obomɔ oboso adaka o gbɔngɔ; yona obabae adaka o mwana-ngɔmbɔ; yona obasato adaka na boso bomoto; yona obanεi adaka o popo yona opimboaka.

⁸Bato babomɔ banεi badaka na mapapulapu masamano-masamano. Badaka na miso botɔ, a sokolu na a tei. Te bakwake bo'mba yembo na bulu na moi bo, Mosenɔke! Mosenɔke! Mossenɔke! Kumu Njambe yona onɔi na ngulu; Yona odaka, yona odi, na yona odabí na bosusu.

⁹Bato babom̄ bakumejaka yona odi a ngend̄e, bamosakoaka na bamosepejaka, oko yona odi na bom̄ na bosusu.

¹⁰Ak̄k̄ bo boa, basuku licinda-na-ban̄i basadumbaka a boso bonde yona odi a ngend̄e, bo bamosakoe yona odi na bom̄ oko na bosusu; badu-mbaka makongo mabu a boso bongend̄e na bambaka yembo bo,

¹¹Kumu osu na Njambe osu, Wε obwani boss̄ ekumu na lisuma na kpaci Moj̄ bo wε ok̄ leka losusu; Lodi, na lok̄m̄oko na bolulea bowε.

Boboloja 5

Mokanda na Bimbete Sambo

¹Nan̄e koko mokanda a eb̄ ebami ende yona odi a ngend̄e, mua modaka na mis̄on̄ a tei na a sokolu, na mokandama na bimbete sambo.

²Nan̄e koko obw̄enji oDiko ongulu akabekoe na bopipobo, Ob̄ongi bo adipoe mokanda na bobuka bimbete sambo nda?

³p̄ep̄e nongo okina ko oho Diko, isa a ngondo, isa a cina jingondo, obwana bodipoa mokanda, isa bonja a tei.

⁴Mbi nayeа bio moj̄ bo p̄ep̄e nongo moto oboloa yona ob̄onḡ bo adipoe mokanda isa bonja a tei.

⁵Na okina obasuku abala na mbi bo, YE boyea; anja, Gb̄onḡ ohkota liYuda, obotina boDawidi, agbokejai bo adipoe mokanda na bimbete sambo pongono.

⁶Mbi nan̄e a sibano engend̄e na bato babom̄ ban̄i, na a tei ebasuku, nan̄e Mwana-Bata yona odaka ami o yona oma gwa. Adaka na njeka sambo, na miso sambo, maya madi Miembo sambo miNja-mbe mia milomama a ngondo esus.

⁷Iyo adoa na atomba mokanda a eb̄ ende ebami yona odaka a ngend̄e.

⁸Ama yo tomba mokanda, bato babom̄ ban̄i, na basuku licinda-na-ban̄i, ba'mi sadumba oko a boso boMwana-Bata; moto na moto obu adaka na gongo a eb̄, na sani jiw̄el̄o jia jiluma na malasi; malasi mamina madi oko bingeeli bibas̄en̄oke.

⁹Ibo ba'mba yembo ye eyene, bo, Wε ob̄ongi botomba mokanda na bobuka bimbete; Moj̄ bo wε ogwa, na osikoa bato na makia mawε mēnε ai Njambe, Bato bamakota masusu, na k̄opi jisusu, na maboti masusu, na tungu jisusu;

¹⁰Ok̄ bo badae bokumu na nganga ai Njambe oSu, na bâda na bokumu a ngondo.

¹¹Anja mbi koko, naka k̄opi jimandundu mababw̄enji-baDiko p̄e njengi, baya bahikaka ngend̄e na bato babom̄ na basuku.

¹²Babala na kɔpi epipo bo, Mwana-Bata yona ogwa abɔngi boso kpaci, na makonja, na bowei na ndangasa, na lisuma, na ekumu, nabojo ngoa.

¹³Na mbi naka bato basusu baDiko, na bangondo, na cina jingondo, na a madiba, na leka losusu lua lodi ena, bakabale bo, Bojongoa, na lisuma, na ekumu, na kpaci, ai yona odi a ngendε, na ai Mwana-Bata oko na bosusu.

¹⁴Na bato babomɔ banεi babala bo, *Amen*. Na basuku basadumba a bosakoa.

Boboloja 6

Bodipoa boBimbete

¹Mbi nanjaka yana adipoa Mwana-Bata embete emɔci ebimbete sambo, na naka okina obato babomɔ banεi. Iyo abala nakɔpi ebεi bo, Doa!

²Mbi nanja, na nanε punda mopu. Yona odaka abaki a punda adaka na litimbo. Bamopa koko likongo na yo ake, mogbokoli a bogbokeja.

³Adipoa yo embete ebibae, naka moto obomɔ obabae akabale bo, Doa!

⁴Na punda otongo amana, punda mokpetu bosoɔ. Yona odaka abaki a punda asɔ kpaci a bokatoa bowi a ngondo, bo bato bawane oko bowana; na asɔ koko abεnε monεnε.

⁵Adipoa yo embete ebisato, mbi naka moto obomɔ obasato akabale bo, Doa! Mbi nanja, na nanε punda mohindo. Yona odaka abaki a punda apeaka mwεngi mokilo a ebɔ ende.

⁶Naka koko kɔpi ekamane a ndanda ebato babomɔ banεi bo, Kɔpɔ emɔci endongo pata emɔci, na kɔpɔ jisato jilɔsɔ pata emɔci; pε ko bobeja munε na vino.

⁷Adipoa yo embete ebinei, mbi naka kɔpi emoto obomɔ obansi akabale bo, Doa!

⁸Mbi nanja, na nanε punda mopu. Yona odaka abaki a punda adaka na kombe Bogwa, na esika ebagwake edaka ecini na nde ngongo. Ibo basɔ kpaci a libondo lingondo libanεi, a boweja bato na abεnε, na linjale, na mogweli moyogo, na tito babilia bangondo.

⁹Adipoa yo embete ebitano, mbi nanε miembo mibato baya bama gwa a mojɔ moEbaeli eNjambe, na a mojɔ motati ema bo tata, cina jihtumbu.

¹⁰Babekoa na kɔpi epipo bo, Ee, Kumu mosenɔke osoti, enina êda wε pε bosambeja bato bangondo, na bokunda likundu a mojɔ momakia masu?

¹¹Basɔ moto na moto kasaka eyai epu, na baka bo badi bohema koko mweka, oko a ehole êbwana etango ebina'bu baelomu na baninga babu, baya badi bogwa o ama bo gwa bo bεnε.

¹²Nanja yana adipoa yo embete ebisamano, na bojonga bongondo boda bonenę. Modika-busa mohinda oko bohinda, mohindo tuu. Songe mosusu akindoa o makia.

¹³Njeto badiko bakwa nase o asopaka likokɔ mbuma, likakumana na pwea epipo.

¹⁴Busa mene bodonga o abulaka moto ekasa emokanda. Meno misusu minenene, na sanga jisusu jidonga.

¹⁵Bakumu bangondo, na bato banenene, na bakumu babila, na konji, na bato bapipo, kanga basusu mene, na babuli na basɔmi pongono, basabomba a mabenęgę mameno na a matai mameno.

¹⁶Na babekoa a meno na matai bo, Toma kwani a diko disu; bombani so a boso bonde yona odi a ngende, na a kɛnjo eMwana-Bata.

¹⁷Mojo bo busa bonenę bolikundu libu bomei; odi bohɔnɔ husa bomina nda?

Boboloja 7

Obwənji Abakea Embete ai Bakɔmeli baNtambe

¹Ngɔngɔ jima, nanε babwənji-baDiko banεi; badaka ba'mi a makulu mangondo manεi a bopea pwea jinεi jingondo, bo pwea etahwea nongo a ngondo, isa a madiba, isa a mele.

²Nanε koko okina obwənji-oDiko otongo akamane a dɔngɔ diɛseta. Iyo apeaka embete eNjambe obomɔ, na abekoa na kɔpi epipo ai babwənji badiko banεi, baya bama sɔ kpaci a bobeja ngondo na madiba.

³Abala bo, T'obejaeni oko ngondo, isa madiba, isa mele, oko bopetakini bakea embete a maso mabakɔmeli baNjambe osu.

⁴Naka etango ebato baya basɔ embete; badaka koto mokama-na-domi-inεi na koto jinεi baya basɔ embete, bamakota masusu maYisalaele.

⁵Balikota liYuda; basɔ embete, koto domi-na-jibae. Balikota liLubena, koto domi-na-jibae. Bahkota liGada, koto domi-na-jibae.

⁶Balikota liAsela, koto domi-na-jibae. Balikota liNepatali, koto domi-na-jibae. Balikota liManase, koto domi-na-jibae.

⁷Balikota liSimeona, koto domi-na-jibae. Balikota liLewi, koto domi-na-jibae. Balikota liYissakala, koto domi-na-jibae.

⁸Balikota liSebeuluna, koto domi-na-jibae. Balikota liYosepa, koto domi-na-jibae. Balikota liBenyamina, koto domi-na-jibae.

⁹Nanja koko, na nanε emumu ebato pε njengi; pεpε nongo moto obwani bolanga etango emina; bato bamakota masusu, na tungu jesusu, nambota jesusu, na kɔpi jesusu. Badaka ba'mi a boso bongende, na a boso boMwana-Bata. Balwaka kasaka jiyai jipu, na bapeaka mango a mɔmɔ mabu.

¹⁰Babekoa na kɔpi epipo bo, Boheleja bodi ai Njambe osu yona odi a ngende, na ai Mwana-Bata.

¹¹Na babwεnji-baDiko basusu baya bahikaka ngende, na basuku, na bato babomɔ banεi, bakwa a maso mabu a boso bongende na basakoa Njambe bo,

¹²*Amen*; bojongoa, na ekumu, na bowei na bosakoa, na lisuma, na kpaci, na ngulu, ai Njambe osu oko na bosusu. *Amen*.

¹³Okina obasuku abala na mbi; yo 'ε bo, Ibo banda, baya badi na bisenja bipu? Bahuli jo?

¹⁴Mbi namosɔnibeja bo, Kumu ombi, wε ojebi. Iyo abala na mbi bo, Ibaba badi oko baya bamani a bodi-ngoа bua bonεnε; basosi bisenja bibu, na babipuejai a makia ma-Mwana-Bata.

¹⁵A mojɔ momina, badi a boso bongende eNjambe, na bamokɔmɛkε a tei etempelo ende na bulu na moi. Iyona odi a ngende âda etondo ebu bo babolame ena.

¹⁶Bataya peka na nja; bataya da na ekangola emadiba; batadingoa koko a mojɔ momodika-busa, isa a mojɔ momoi mopipo.

¹⁷Mojɔ bo, Mwana-Bata yona Odi a ndanda engende âda mobanei obu, na âbaneja njea a melo minjiba jibomɔ; na Njambe ahakoa mbisoli jesusu a miso mabu.

Boboloja 8

Embete Esambo

¹Yana adipoa Mwana-Bata embete esambo, mijɔ misusu mi yεyɔ bowi oho Diko, isa ekenge eheure emɔci.

²Na mbi nanε babwεnji-baDiko sambo baya badi a boso bo-Njambe; na bass mindule sambo.

³Okina obwεnji-oDiko otongo adoa, na ama a dɔngɔ dilitumbu. Iyo apeaka saani ewɔlɔ a ebɔ, na asɔ leka lolitindi lonεnε a boputoana na bingeeli bibasεnɔke basusu a diko dilitumbu liwɔlɔ lia lidi a boso bongende.

⁴Modidi moleka lolitindi moputuoana na bingeeli bibasεnɔke, mokina ebɔ eobwεnji, na mowea a boso boNjambe.

⁵Obwénji omina atomba saani, aelumeja na mosa molitumbu, na amosopa a ngondo. Ngongo jima, jidaka oko bëi, na daka enéne, na mikalimo, na bojonga bongondo.

⁶Babwénji sambo, bayá badaka na mindule sambo, baselingoa a bohuea.

⁷Obwénji oboso ahuea mondule, na mbua akwa a ngondo, oko mbua omatai na mosa maya maputoana na makia. Ekenge ebisato engondo engoa mosa; ekenge ebisato emele engoa, na njienjie jigwa kanga jesusu mène.

⁸Obwénji obabae ahuea mondule, na ekina eka, o mono monenéne mongoake na mosa, edumbama a madiba-mamukwa, na ekenge ebisato emadiba ebonga makia.

⁹Tito bamadiba bagwa, libondo limasato; na masua magwa, libondo limasato.

¹⁰Obwénji obasato ahuea mondule, na monjötö monené o ekomeli emotanda, adonga oho Diko na akwa nase; akwa a diko diekenge ebisato edua na njiba.

¹¹Kombe emonjötö omina edi Abisiniti. Ekenge ebisato emadiba ebonga abisiniti, na bato bagwa banené a mojø momadiba mamina, mojø bo madaka na boyo.

¹²Obwénji obanëi ahuea mondule, na ekenge ebisato emodika-busa ebeha, na ekenge ebisato esonge, na ekenge ebisato enjötö pongono. Ekenge ebisato ebohu bobu ehinda oko bohinda bo ekenge ebisato ebusa etaho, na ekenge ebisato ebulu pongono.

¹³Anja mbi koko, nanë popo akapimboe oho ta busa, na akabekoe na kopi epipo bo, Monongo, monongo, monongo, ai bato bayá badi a ngondo, a mojø momindule mitongo Mibabwénji bayá bakëke ahue.

Boboloja 9

¹Ohwénji obatano ahuea mondule, na mbi nanë monjötö yona omadonga Diko na ami kwa oko a ngondo. Iyo aso sabe emo-mböndö monase,

²na adipoa momböndö monase. Modidi momana a momböndö, o modidi momosa monené. Modika-busa mohinda, na husa bohinda a mojø momodidi momomböndö.

³Bapaala bamana a modidi na banangana a ngondo, na baso ngulu yena ebwani na ngulu ekoolo bangondo.

⁴Baso mobeko bo batabeja njienjie jingondo, isa njua, isa mele, oko bato pë bayá bapeliti embete eNjambe a maso mabu.

⁵Basɔ kpaci bo babanɔngejae songe batano, te bo babawoe. Na bakeja mwano mwano mokoolo yana akomaka yo moto.

⁶Masu mamina makadoa, bato badi boduka bogwa, pε ko boboloja bogwa. Badi boda na posa ebogwa, na bogwa bodi bobacia oko bocia.

⁷Bapaala bamina badaka o punda baya badi na moselingo mobila. Badaka na leka a melo Mibu o makongo mawɔlɔ. Maso mabu madaka o maso mabato.

⁸Swe jibu jidaka o swe jibali, na mino mabu madaka o mino magbɔngɔ.

⁹Molilo mobu a mupa modaka o nguba jiebende, na epupeli emapapulapu mabu edaka o mokilimo mopunda banεnε baya bapotaka na majangi a bila.

¹⁰Mikɔmbɔ mibu midaka o mikɔmbɔ mikoolo, na ngengε jibu pongono, na ngulu ebu a bodingoja bato songe batano edaka a mikɔmbɔ Mibu.

¹¹Obwεnji omombɔndɔ monase adi kumu obu; kombe ende a kɔpi eBaEbele edi Abadona, na edi Apolwona a kɔpi eBaEla.

¹²Monɔngɔ moboso monɔi. Minɔngɔ mitongo Mibae mikεkε adoe.

¹³Obwεnji obasamano ahuea mondule, na mhi naka kɔpi ekamane a njeka jinεi jilitumbu liwɔlɔ lia lidi a boso boNjambe.

¹⁴Kɔpi emina ebala na obwεnji obasamano yona odaka na mondule bo, Cingoa babwεnji banεi baya badi a mbɔci a dua enεnε Pelata.

¹⁵Babwεnji bamina banεi, baya bama sεlingoa a mojɔ moehole emina, na busa bomina, na songe omina, na yanga emina, baci-ngoama bo bawoe ekenge ebisato ebato bangondo.

¹⁶Etango emandundu mabasoda bapunda edaka mandundu koto licinda, tu lindundu basoda koto domi, na mbi naka etango ebu.

¹⁷Anjaka mbi oko bonja, nanε punda na baya badaka babaki a punda. Mililo Mibu mimupa midaka mikpetu o mosa, na mihindo, na midaka koko na langi esupulu. Melo mipunda midaka o melo migbɔngɔ, na mosa na modidi mimanaka a minɔkɔ Mibu.

¹⁸Ekenge ebisato ebato bangondo egwa a mojɔ momadingoa ma masato, oko a mojɔ momosa, na modidi, na supulu, mia mimanaka a minɔkɔ Mibu.

¹⁹Mojɔ bo ngulu epunda edaka a minɔkɔ mibu, na a mikɔmbɔ mibu. Mikɔmbɔ mibu midaka o njɔ na melo minjɔ, na banɔngeja bato oko na melo mimina.

²⁰Bato batongo baya bahela a madingoa mamina bai-hekoja milema mibu a bokina leka lokɔ bo na mɔmɔ; na baikina bosakoa miembo Mibe, isa bilimo

biwɔlɔ, na bilimo bipalata, na bilimo biebende, na bilimo bimatai, na bilimo bimole bia bipeliti nongo njene isa njoki, na te bidalake.

²¹Na baihekoja milema Mibu a bokwa ekɔmeli ebu ebowa bato, na elomu ebu edemba, na ngando jibu jibosambolu, na liba.

Boboloja 10

Obwɛnji Yona odoa na Mokatida

¹Nanɛ koko obwɛnji otongo akahule oho Diko, obwɛnji ongulu. Eyembɛ emohuaka, na moyama modaka a molo monde. Boso bondebodaka o modikabusa, na mako mande madaka o makwe mamosa.

²Adaka na mokanda mokɛkɛ bwase a ebɔ ende. Abakea ebota ende ebami a diko dimadiba-mamukwa, na ebota ende ebali a diko dingondo.

³Abekoa na kɔpi epipo o agbomaka gbɔngɔ. Yana abekoa yo, bɛi sambo bagama oko bogama.

⁴Yana asia bɛi sambo bogama, mbi nakɔ bo nasɔne; naka ko kɔpi ekahule oho Diko bo, Kanda na bakea embete a mijɔ Mibali bɛi sambo; Pojisɔne oko.

⁵Na obwɛnji onɛke mbi ami a madiba-mamukwa na a ngondo, angɔjɔ ebɔ ende ebami diko,

⁶na abɛlɛ bɛli na yona odi na bomɔ oko na bosusu, yona okɔ Diko na leka losusu lua lodi ena, na ngondo pongono, na leka losusu lua lodi ena, na madiba koko, na leka losusu lua lodi ena. Abɛlɛ bɛli na nde bo ehole ebo'mba esii,

⁷na bo obwɛnji osambo akahuea mondule, mojɔ mobombamake moNjambe mongame a masu mamina, o ajebeja yo batɔndɔi bakɔmeli bande.

⁸Kɔpi eka mbi ekahule Diko ebala na mbi koko bo, Kε atombe mokanda mokɛkɛ mua modi bwase a ebɔ eobwɛnji yona odi ami a diko di madiba-mamukwa na a diko dingondo.

⁹Oko boa mbi nakɛ ai obwɛnji, nabala na nde bo apɛni mokanda mokɛkɛ. Yo abala na mbi bo, Tomba mokanda, moyaka. Môda na boyo a sɔpɔ, a monɔkɔ ko bolɛbulɛbu o pɔki.

¹⁰Natomba mokanda mokɛkɛ a ebɔ eobwɛnji, na namomea oko bomea. Modaka na bolɛbulɛbu bopɔki a monɔkɔ mombi; yana ko amea mbi mokanda, modaka na boyo a sɔpɔ.

¹¹Na abala na mbi bo, Toma pa koko biseko a mojɔ mobato banɛnɛ, na makota, na kɔpi, na bakumu.

Boboloja 11

¹Mbi nasɔ mokɔmbɛ o pango; na okina abala na mbi bo, Angɔ; angɛ mwengi motempelo eNjambe, na litumbu, na baya basakoaka ena.

²Pε bongε ko libanda lia lidi a sokolu etempelo. Kina libanda, mojɔ bo lihengɛmi ai makota, na badi bodɛhe ngando esenɔke na bihota bibu songe domi-inɛi na babae.

³Mbi nadi bopa batati bambi babae kpaci a bopa biseko masu koto emɔci mikama Mibae na masu domi-inɛi na badi bolwa oko minyuku pε.

⁴Ibo badi mele mibae miolive na paka jibae, na badi mema a boso boKumu ongondo.

⁵Okina moto akapala bobanɔngeja, mosa momanaka a minɔkɔ mibu a bowa soki jibu. Moto akapala boba-nɔngeja, adi bogwa boa.

⁶Ibo badi na kpaci a bokanda busa bo mbua atakwa a masu mabiseko bibu. Na badi na kpaci a bokindoja madiba makia, na a boloma bego bisusu a ngondo yana apalaka bo.

⁷Bakasieja tati ebu, tito yona omanaka a mombɔndɔ monase adi bona na bu bila, abagbokejabí na abawabí.

⁸Njemba jibu jidikabí a licilinga lingando yena enɛnɛ; kombe engando emina edi oko monde, edi Sɔdɔmɔ na Ejipito, esika egwa Kumu a mole-mobokea.

⁹Bato banjabí njemba jibu masu masato na ekenge, bato bamakota mangondo, na maboti, na kɔpi na tungu jesusu. Na batajimabí bo moto apusee njemba jibu.

¹⁰Bato bangondo basepabí na enanga enɛnɛ, na bapanabí leka a mojɔ momina, cina bo batɔndɔi ba babae bama nɔngeja bato bangondo.

¹¹Ama nɔ masu masato na ekenge ko, mohuli mobomɔ mo'mi donga oko ai Njambe, na mokwea a tei ebu, na bama mema. Na bato baya babanɛ baluluma na bɔ.

¹²Ibo babae baka kɔpi epipo ekahule oho Diko, ekabale na bu bo, Doani jɔno diko! Na bawea a Diko na eyembi, ena ko soki jibu jibanjaka.

¹³Ngondo ejonga na bojonga bonɛnɛ a ehole emina, na ekenge edomi engondo egwa oko bogwa. Bato bagwa a mojɔ mobojonga bomina, bato koto sambo. Baya badika badaka na bɔ bonɛnɛ, na basakoa Njambe oDiko.

¹⁴Monɔngɔ moMibae mosii; mua momisato mokɛkɛ adoe.

Mondule Mosambo

¹⁵Obwənji osambo ahuea mondule, na kɔpi jibekoa a Diko bo, Bokumu bongondo bodi e dεye bokumu boKumu osu na Masiya onde. Iyo adi boda Kumu oko na bosusu.

¹⁶Na basuku domi-ibae na banεi baya badaka a mingbelεngɔ Mibu a boso boNjambe basadumba nase, oko a maso mabu,

¹⁷na basakoa Njambe bo, Bosakoaka wε Kumu Njambe obonɔ, yona odi na yona odaka, Mojɔ bo opei ngulu ewε enεnε, na okondi a bokumu bowε.

¹⁸Makota madaka na kεlε; likundu liwε ko lidoi. Ehole ebosambeja bagwake emei, A bokɔ monganji ai batɔndɔi na ai basenɔke, bakɔmeli bawε, Na bato baya basumaka kombe ewε, na banεnεnε na bakεkεlεkε, Ehole ehowa likinda haya bahejaka ngondo.

¹⁹Tempelo eNjambe oho Diko edipoama, na edejai emokongo monde edaka a bohu a tei etempelo ende. Mikalimo mimana a ehole emina, na daka enεnε, na bεi, na bojonga bongondo, na mbua monεnε omatai akwa.

Boboloja 12

Mwali na Dalakona

¹Embete enεnε emana oho Diko, oko mwali yona olwa modika-busa o bisenja. Songe adaka a cina jibibota binde, na adaka na likongo a molo monde, oko njɔtɔ domi-na-babae.

²Mwali omina adaka na demi, na abekoaka a mojɔ mobipeko na mwano mobobota.

³Ekina embete etongo emana oho Diko, oko Dalakona monεnε mokpetu. Iyo adaka na melo sambo na njeka domi, na makongo mabokumu sambo madaka a melo minde.

⁴Mokɔmbɔ monde mogbula libondo limasato linjɔtɔ badiko, na abadumba nase a ngondo. Dalakona ama a boso bomwali yona opalaka bobota, bo mwali akabota, yo amee mwana oko bomea.

⁵Mwali abota mwana-momi yona odi boda na kpaci a makota masusu, na tondo ende edi boda tondo eebende. Mwana'nde ko atombama ai Njambe na a ngendε ende.

⁶Mwali acia a lisobe, a esika ema selingoa Njambe a mojɔ monde, bo bamobɔkɔe oho masu koto emɔci mikama Mibae na masu macinda masato.

⁷Bila emana oho Diko. Mikaele na babwεnji bande bana na Dalakona. Dalakona na babwεnji bande bana,

⁸na bagboka; na baiboloja koko esika eboda oho Diko.

⁹Dalakona monené akwa, njɔ yona moyou yona odi na kombe Jabalo na Satana, mokosei ongondo esusu. Adumbama a ngondo, na babwénji bande badumbama na nde pongono.

¹⁰Naka koko kɔpi epipo ekabale oho Diko bo, Edεye, mohelo modoi, na ngulu, na Bokumu boNjambe, na kpaci eMasiya onde. Mojɔ bo yona odumbea baninga basu ebango adumbami nase, oko yona obadumbeaka a boso boNjambe osu na bulu na moi.

¹¹Bamogbokejai a mojɔ momakia maMwana-Bata na a mojɔ moebaeli etati ebu, cina bo baijuma bopa mihelo Mibu, pε bobanga bogwa.

¹²Sepani na mojɔ momina, no bay a badi oho Diko, na Diko esusu menε. Monɔngɔ ko a ngondo, na a madiba-mamukwa, mojɔ bo Satana atiti ai no na kεnjɔ enεnε, na ajebaka bo ehole ende edikai mweka pε.

¹³Yana anε Dalakona bo adumbama nase a ngondo, yo abengana mwali yona oma bota mwana-momi.

¹⁴Mwali ko asɔ mapapulapu mabae mapopo monené, a bocia a esika ende a lisobe, bo bamobokoe oho yanga emɔci, na bianga bibae, na ekenge eyanga emɔci, bo Njɔ atamonεe.

¹⁵Njɔ asopa dua emadiba a monɔkɔ monde ngɔngɔ jimwali, bo amocindojae na mopimbola.

¹⁶Ngondo ko ekɔmeja mwali; ngondo edipoa monɔkɔ na emea dua ema sopa Dalakona a monɔkɔ monde.

¹⁷Dalakona akεnjɔ na mwali bou menε, na akε a bona bila na bana bande batongo bay a basumaka mibeko mi-Njambe, na bay a batataka tati ai Yesu.

¹⁸Na ama a mbongu emadiba-mamukwa.

Boboloja 13

Tito Amana a Madiba

¹Nanε koko Tito akamane a madiba-mamukwa. Adaka na njeka domi, na melo sambo. Makongo mabokumu domi madaka a njeka jinde, na kombe jibosambolu jidaka a melo minde.

²Tito onε mbi adaka o swa. Makaka mande madaka o makaka matito kombe ours, na monɔkɔ monde modaka o monɔkɔ mogbɔngɔ. Dalakona amopa ngulu ende menε na ngende ende, na kpaci ende enεnε.

³Nanε bo mokina molo monde modi na pola ebogwa. Iyo ko ahela a pola ende ebogwa, na ngondo esusu ecingama na Tito na bokamoa.

⁴Bato basakoa Dalakona mojɔ bo yo ama pa kpaci ende a Tito. Basakoa koko Tito na ebaeli ye; Obwani na Tito nda? Odi na ngulu a bona na nde nda?

⁵Tito adaka na monɔkɔ a bobala bikenge biegbɔ, na bikenge bibosambolu; na asɔ kpaci bo akɔe o apalaka yo songe domi-inεi na babae.

⁶Adipoa monɔkɔ monde a botangola Njambe, na kombe ende, na ngando ende, na baya badi oho Diko.

⁷Adaka na kpaci a bona bila na basenɔke na bo abagbokejae. Asɔ koko kpaci a makota masusu, na tungu jesusu, na kɔpi jesusu, na maboti masusu.

⁸Bato basusu bangondo badi bomosakoa, oko bay a baditi na kombe jib a mokanda moMwana-Bata yona ogwa, kombe jia jisɔnɔmɔ ena oko a libangake lingondo.

⁹Isa moto adi na matoi, yε ahokee.

¹⁰Moto yona opeaka masungu âpeama lisungu yo mεnε. Moto akawa na abεnε, adi bogwa na abεnε yo mεnε. Cina elingbangba libasenɔke na ejimeli ebu oko yena.

Tito Yona Omara a Ngondo

¹¹Nanε koko okina Tito otongo. Iyo amana a ngondo, na adaka na njeka jibae, njeka jimwana-bata; ebaeli ende ko edaka ebaeli eDalakona.

¹²Iyo adaka na kpaci esusu eTito oboso a ngando ende, na akɔ bo bato basusu bangondo, ngondo esusu mεnε, basakoe Tito yona oboso, yona oma hela a pola ende ehogwa.

¹³Akɔ koko mindumba minεnε, na akɔ bo mosa modonge obo Diko na motite nase a boso bobato.

¹⁴Na alεngε bato bangondo cina emindumba mikɔkɔ yo a esika eTito, na abatɔndɔ bo bakɔe elimo eTito yona oma hela a pola eabεnε.

¹⁵Asɔ koko kpaci bo apε mohuli a elimo eTito, bo elimo eTito ebale, na bo awejae bato basusu bay a balona bosakoa elimo eTito.

¹⁶Na akɔ bo bato kanga basusu mεnε base embete a ebɔ ebami isa a boso, na bakεkε na banεnεnε, na bato balikonja na bato babokwali, na sɔmi na babuli pongono,

¹⁷bo, moto amiti da na embete emina, oko kombe eTito, isa etango ekombe ende, atahɔnɔ bosomba eka, isa bongejε eka.

¹⁸Mojo momina modi mojo mobowei. Isa moto adi na bocingea, ye alange etango eTito. Mojo bo etango emina edi etango emoto, na etango ende edi Mikama misamano domi-isamano na isamano.

Boboloja 14

Mwana-Bata na Basikoami Bande a Mono moSiona

¹Nanja koko, na nane Mwana-Bata ami a Mono moSiona. Bato badaka na nde koto mokama domi-inεi-na-inεi, na badaka na kombe ende, na kombe eSangwa'nde, a maso mabu.

²Naka kɔpi ekahule Diko; edaka na molunju moepeela enεnε, o ekɔmeli ebεi; kɔpi eka mbi ewana na doi libato babibumba baya babomaka bibumba bibu.

³Ba'mba yembo eyene a boso bongendε, na a boso bobasuku, na a boso bobato babomɔ banεi. Pεpε nongo okina otongo obwana bokoa yembo emina, oko bato bamina, bato koto mokama domi-inεi-na-inεi baya bama sikoama a ngondo.

⁴Ibo badi oko baya baisabeja na bali, mojo bo batajebaka mojo momwali. Bacingamaka na Mwana-Bata bisika bisusu bikekε yo. Basikoama a tei ebato bo badae mbuma jiboso ai Njambe, na ai Mwana-Bata.

⁵Bokosea boditi nongo a minɔkɔ mibu, mojo bo bapeliti nongo litɔnɔ.

Babwεnji Basato Badoa na Bwεnji

⁶Nane koko okina obwεnji otongo akapimboe a tei ebusa. Iyo adaka na Mwako Mopele mua modi na bosusu, bo atɔndε bato bangondo, makota na makota, tungu na tungu, kɔpi na kɔpi, maboti na maboti.

⁷Abala na kɔpi epipo bo, Bangani Njambe; mokumejani yo, mojo bo ehole ende ebosambeja emei. Mosakoani yo, yona oyoa Diko na nase, na madiba-mamukwa, na njiba.

⁸Okina otongo, obwεnji obabae adoa, na abala bo, Ekwi! Babilo ekwi, ngando yena enεnε! mwali yona okɔ bo makota masusu malangoe na vino eposa elisɔngi linde.

⁹Okina otongo, obwεnji obasato adoa, na abekoa bo, Moto akasakoa Tito na elimo ende, na akasɔ embete ende a licinga limbanda, isa a ebɔ,

¹⁰moto omina adi bomwaka vino elikundu li-Njambeyena esεlingoamaa kɔpɔ ekεlε ende, pεpε nongo bombejε; na adi bodingoa na mosa na supulu a boso bobabwεnji basεnɔke, na a boso boMwana-Bata.

¹¹Modidi momosa mobodingoa bobu moweaka diko oko na bosusu; baditi nongo na bowi, isa na bulu isa na moi, basakoi bamina baTito na elimo ende, na baya basɔ embete ekombe ende.

¹²A mojɔ momina, baya basumaka Mibeko mi-Njambe na ejimeli eYesu, babwani boda na lingbangba.

¹³Naka koko kɔpi ekabale oho Diko bo, Sɔnɔ mojɔ mu; Bagwake baya bagwaka a tei eKumu badi na bojongoa, e deye, oko na bosusu. Mwembo mobalaka bo, Ee badi na bojongoa, bo baheme a minɔngɔ Mibu, mojɔ bo bilomu bibu bibasusaka.

Ejueli Engondo

¹⁴Anja mbi koko, nanɛ eyembi epu. Okina adaka abaki a eyembi o moto. Adaka na likongo liwɔlɔ a molo monde, na mombimbi mopɔlu a ebɔ ende.

¹⁵Okwa obwɛnji otongo amana a tempelo, na abekoa na bopipo ai yona odaka abaki a eyembi bo, Tomba mombimbi mowɛ na kɛsɛ, mojɔ bo ehole ebojua emei. Bojua bongondo bobwani oko bobwana.

¹⁶Oko boa, yona odaka abaki a eyembi ameja mombimbi monde a diko dingondo, na ajua ngondo oko bojua.

¹⁷Okina obwɛnji otongo amana a tempelo oho Diko, na yo adaka na mombimbi mopɔlu pongono.

¹⁸Na okina obwɛnji otongo koko amana a litumbu. Iyo adaka na kpaci a mojɔ momosa, na abekoa na bopipo ai yona odaka na mombimbi mopɔlu; abekoa bo, Imeja mombimbi mowɛ mopɔlu; kɛsɛ bililo bimbuma jivine engondo, mojɔ bo mbuma jingondo jikpeti.

¹⁹Obwɛnji omina ameja mombimbi monde a diko dingondo, akɛsɛ mbuma jivine engondo, na adumba jesusu a eboka enɛnɛ ekɛnɔ eNjambe.

²⁰Eboka emina edaka a sokolu engando. Yana asieja bo bo'nda mbuma, makia mamana a eboka, na makɛlɛ bohali, oko a kilometra mikama misato na domi-isamano; na madaka na ndinda oko a kamba emolo mo-punda.

Boboloja 15

Babwɛnji Sambo; Kɔpɔ Sambo

¹Nanɛ koko ekina embete etongo oho Diko, embete enɛnɛ ebokamoa, oko babwɛnji sambo baya bapeli minɔngɔ sambo, minɔngɔ misuka, mojɔ bo kɛnɔ eNjambe edi bosia na minɔngɔ mimina.

²Nanɛ koko ekina eka yena edaka o libale litalatala lia liputoana na mosa. Baya bama gbokeja Tito, na elimo ende, na embete ekombe ende, badaka ba'mi a mbongu elibale litalatala, na badaka na bibumba biNjambe a mɔmɔ mabu.

³Ibo ba'mbaka yembo eMose mokɔmeli oNjambe, na yembo eMwana-Bata bo, Ee, Kumu Njambe obonɔ! Bilomu biwε bidi binenεnε, bidi na bokamoa. Ee, Kumu omakota! Njea jiwε jidi jitangboake, njea jisoti.

⁴Ee Kumu; odi pε bosuma, pε bokumeja kombe ewε nda? Mojɔ bo, odi mosenɔke oko wε pε. Makota masusu madi bodoa a bosakoa wε, Mojɔ bo masambeja mawε maboloi a bohu.

⁵Ngɔngɔ jimina, nanja koko, na tempelo eEtongo ebotata oho Diko edipoama.

⁶Babwεnji sambo bay a badaka na minɔngɔ sambo bamana a tempelo. Badaka na bisenja bipu bopε, na kamba jiwɔlɔ jidaka a mupa mabu.

⁷Okina obato babomɔ apa babwεnji sambo kɔpɔ jiwɔlɔ sambo jia jiluma na likundu liNjambe yona odi na bosusu.

⁸Na tempelo eluma na ekumu, na ngulu eNjambe, o ekɔmeli emodidi momosa. Pεpε nongo moto obwani bokwea a tempelo oko adi minɔngɔ sambo Mibabwεnji sambo pε bopeta sia.

Boboloja 16

¹Nakakokokɔpi epipo ekamane a tempelo, ekabale nababwεnji sambo bo, Kεni asope kɔpɔ sambo jilikundu liNjambe a ngondo.

²Obwεnji oboso akε na asopa kɔpɔ ende a ngondo. Na bato bay a badaka na embete eTito, na bay a basakoaka elimo ende badingoa na pola jibejisaya.

³Obwεnji obabae asopa kɔpɔ ende a madiba-mamukwa, na madiba makindoa makia, o makia manjemba emoto. Na leka losusu lua lodaka mɔ a madiba logwa oko bogwa.

⁴Obwεnji obasato asopa kɔpɔ ende a dua na njiba, na jikindoa makia.

⁵Na naka obwεnji omadiba akabale bo, Ee, wε Mosenɔke yona odi, na yona odaka, Wε olongi na bisambi biwε;

⁶Mojɔ bo bato basopa makia mabasenɔke na mabatɔndɔi, Na wε obanusi makia. Mokindo mobu mobwani.

⁷Naka koko litumbu likabale bo, Ee, Kumu Njambe obonɔ, Bisambi biwε bibɔngi, bidi bongbebongbe.

⁸Obwεnji obanεi asopa kɔpɔ ende a modika-busa, na modika-busa mossɔ kpaci a bonɔngeja bato na mosa.

⁹Bato bakεloa na moi mopipo, na basinga kombe eNjambe yona odaka na kpaci a minɔngɔ mimina, na baibekoja nongo milema Mibu bo bakumejae Njambe.

¹⁰Obwénji obatano asopa kɔpɔ ende a ngendé eTito. Bokumu boTito bohindá na modidi. Bato bakokala biemi bibu a mojɔ momwano,

¹¹na basinga Njambe a mojɔ momwano mobu na pola jibu, na baihekoja nongo milema Mibu a bokina bikɔmeli bibu.

¹²Obwénji obasamano asopa kɔpɔ ende a Pelata, dua yena enené. Madiba madua emina makoka oko bokoka, a boselingoa njea ebakumu baeseta.

¹³Nanɛ koko miembo Mibe misato mia midaka o magbɔsɔ, mikamane a monɔkɔ moDalakona, na a monɔkɔ moTito, na a monɔkɔ moMotɔndɔi obokosea.

¹⁴Miembo mimina midi miembo Mibajabolo; mikɔkɔ mindumba, na mikɛkɛ ai bakumu bangondo esusu bo Mibabolee a mojɔ mobila a busa bua bonené boNjambe obono.

¹⁵(Hokeani; mbi nadoaka na mbembɛ emobi. Bojongoa ai moto yona odi mosu, yona obaneaka bisenja binde bo atamana mbundu na sɔni a boso bobato.)

¹⁶Na Mibabolea a esika yena edi na kombe Alamagedo a kɔpi eBaEbele.

¹⁷Obwénji osambo asopa kɔpɔ ende a pwea. Kɔpi epipo emana a tempelo; kɔpi emina edonga a ngendé na ebala bo, Mojɔ mosii!

¹⁸Mikalimo mimana na daka enené, na bɛi, na bojonga bongondo bonené. Bojonga bomina bodaka bonené mɛnɛ; ehole edi bato a ngondo, baipaka ne bojonga bongondo bonené boa.

¹⁹Ngando yena enené ekabama, mabondo masato, na ngando jimakota jigwa. Njambe aibosa Babilo, ngando yena enené; amonusa kɔpɔ elikundu linde ligbasoake.

²⁰Sanga jesusu jicia bohali, na meno miiboloa koko.

²¹Mbuu monené omatai adonga Diko, na makwa a diko dibato. Matai mamina madaka na manji, kilo domi-itano, kilo domi-itano, na bato basinga Njambe a mojɔ momogweli momatai cina bo mogweli momina modaka mojɔ monené mɛnɛ.

Boboloja 17

Bokwa boBabilo

¹Okina obabwénji sambo bay a badaka na kɔpɔ sambo, adoa na abala na mbi bo, Doa bo nanejae wɛ esambi emwali obɔɔli yona monené, yona odi na edie ende a diko didua jinené.

²Bakumu bangondo bangɛkɛ na nde bɔɔli, na bato bangondo balangoi na vino elisɔngi linde.

³Obwənji omina atomba mbi a mwembo a lisobe, na nanε okwa mwali oho. Adaka abaki a Tito mokpetu bosɔɔ yona odaka na kombe jinεnε jibosambolu a mokuku monde, na adaka na melo sambo, na njeka domi.

⁴Mwali omina alwaka bisenja bikpetu na bikpetu bosɔɔ; mohlo monde modaka molilo mowɔlɔ, na matai mayumu, na mayaka mayumu enεnε. Adaka na kɔpɔ a ebɔ ende, kɔpɔ ewɔlɔ, yena eluma botɔ na ngando jinde jibosambolu, na lisɔngi linde, na ndukeli jinde.

⁵Ekina kombe esɔnɔmɔ a licinga limbanda, na cina ekombe emina edi mojɔ mobombamake; BABILO MONΕΝΕ, NANGE 'BATΟ BABɔɔLI NA NGANDΟ JIBOSAMBOLU JINGONDO.

⁶Mbi nanε mwali omina yona oma langoa na makia mabasεnɔke, na makia mabatati baYesu. Yana anε mbi mwali omina, nakamoaa na bokamoaa bonεnε.

⁷Obwənji ko abala na mbi bo, Okamoaka mojɔ moye? Mbi nadi boboloja ai wε mojɔ mobombamake momwali omina, na Tito yona omotombaka, yona odi na melo sambo na njeka domi.

⁸Tito onεki wε adaka, na aditi. Adi bomana ko a mombɔndo monase, na adi bonɔ oko a bodimoa. Na bato bangondo, oko bayaa badi pε bosɔnɔmɔ kombe a mokanda mobomɔ a bobanga bongondo, badi bokamoaa yana anεkε bo Tito yona odaka, yona oditi, na yona odi bodoa koko.

⁹Mojɔ mu mobwani na bocingea bomoto obowei. Melo sambo midi meno sambo, na edie emwali edi a meno mimina.

¹⁰Melo mimina midi koko bakumu sambo. Batano babu bakwi; okina adi oko; yona otongo adoakini; na yo akadoa, atayeyoa nongo ekoka.

¹¹Tito yona odaka, na aditi e dεye, adi kumu obomwambe; acingi na bakumu sambo, na akekε a bodimoa.

¹²Njeka domi jinεki wε jidi bakumu domi bayaa basɔkini bokumu; badi bosɔ kpaci ebakumu, na Tito pongono, heure emɔci.

¹³Ibo basusu badi na mokano momɔci, na bapaka ngulu ebu na kpaci ebu a Tito.

¹⁴Badi bona bila na Mwana-Bata, na Mwana-Bata adi bobagbokeja, mojɔ bo yo adi Kumu obakumu, na Koi obaroi; na bayaa bacingi na nde babeama, babɔmɔ, na badi bato baejimeli.

¹⁵Abala na mbi koko bo, Dua jinεki wε, oho adi mwali obɔɔli na mobondo, jidi oko makota, na makumu, na bato, na kɔpi.

¹⁶Njeka domi jineki we, njeka Jimina na Tito pongono,—ibo badi boda na mwali obɔɔli oko soki; bamobejabi, bamokinabi mbundu, bayakabí mimi minde na bamotumbabi na mosa.

¹⁷Mojo bo Njambe asi mojo momina a milema Mibu bo bakœ mokano monde na molema momɔci, na bo bapɛ Tito kpaci ebu ebakumu oko adi bibaeli bi-Njambe pɛ bopeta ngama.

¹⁸Na mwali onɛki we adi oko ngando enenɛ, yena edi na kpaci ai bakumu bangondo.

Boboloja 18

¹Yana asia ngando Jimina, nanɛ okina obwɛnji otongo akahule oho Diko. Iyo adaka na kpaci enenɛ, na ngondo esusu ehoa na bolailai boekumu ende.

²Abekoa na kɔpi epipo bo, Ekwi! Babilo, ngando yena enenɛ ekwi; Edi oko ekokolo ebajabolo, Esika emiembo misusu Mibe, Esika embulu basusu babosɔtɔ na bamaneene.

³Mojo bo makota masusu malangoi na vino elisɔngi linde; Bakumu bangondo ba'ngi na nde bɔɔli, Na bato babwasa bangondo bahejɛ likonja libu linenɛ a mojo mobikɔmeli binde binenɛ bibosambolu.

⁴Naka koko kɔpi etongo ekahule Diko na ekabale bo, Bato bambi, imanani, mokinani yo, osaka cingamani na nde a jibe jinde, osaka katanani na nde a madingoa mande.

⁵Mojo bo jibe jinde jidi o mono monenɛ mua momeaka a Diko, Na Njambe alei mojo mojibe jinde.

⁶Sɔmbejani ai yo oko na mwengi mopaka yo menɛ, Na nengejani mokindo monde a mojo mobikɔmeli binde; Lumejani kɔpɔ enusa yo na bato batongo bihole bibae, a mojo monde menɛ.

⁷O asakumejaka yo, na adaka yo na bikɔmeli bibosambolu, Oko boa mopani yo molɔbɔ na bio oko na mwengi momina. Mojo bo abalaka a molema monde bo, Mbi nadi a ngendɛ ekumu, Naditi nongo mwali-obogwa, nitada nongo na mokwea.

⁸A mojo momina, madingoa mande madi bodoa ai yo a busa bomɔci, mogweli, mokwea, na linjale. Na atumbama na mosa, Mojo bo Kumu Njambe yona omosambejaka adi mopipo.

⁹Bakumu bangondo baya bangɛ na nde bɔɔli na bakatana na nde a bikɔmeli binde bibosambolu, bakane modidi mobotumba bonde, badi bomoyea kɔndɔ.

¹⁰Badi bo'ma bohali a mojɔ mobɔ bobodi/ngoa bonde. Badi bobala bo, Monɔngɔ! Monɔngɔ! Wε ngando enεnεnε! Wε Babilo ngando epipo! Likundu liwε limei bundumo.

¹¹Bato babwasa bangondo bayeaka mbisoli na bamoyeaka kɔndɔ, mojɔ bo bato te bayake somba na bu leka lobwasa,

¹²leka lowɔlɔ, na palata, matai mayumu, na mayaka mayumu, bisenja bibotεtεtεlε bikpetu na bikpetu bosɔɔ, soa ekpetu, na mele misusu miyumu, leka longɔlu jimbongo, na leka losusu lua lokɔmɔ na mele na matai, na leka lua loluama na ebende na mboa,

¹³sinamona, na lihengako, na midikadika, na malasi, na male, na vino, na minε, na mitεkε mipele, na ndongo, na ngɔmbɔ, na bata, na punda, na mituka, na mikuku na milema mibato.

¹⁴Molema mowε modaka na posa embuma jikpetu, na jicia wε bohali. Leka lowε losusu loyumu, na leka lowε losusu loekumu lobungi na wε, na bato bata-loboloja koko.

¹⁵Bato baya bakɔ masa na leka lomina, baya badiba likonja linεnε a mojɔ monde, badi bo'ma bohali oko na bio na bolεbε, na bɔ pongono, a mojɔ mobodingoa bonde, na badi bobala bo,

¹⁶Monɔngɔ! monɔngɔ! ngando yena enεnεnε! yena elwaka oko bisenja bibotεtεtεlε bikpetu na bikpetu bosɔɔ, yena edaka na molilo mowɔlɔ, na matai mayumu, na mayaka mayumu,

¹⁷Makonja ma manεnε mεnε manami na *heure* emɔɔci pε. Bakapitεni bamasua, na bato bamasua masusu, na bato basusu bamadiba, na bato basusu baya bakɔkɔ elomu ebu a madiba, ba'ma oko bohali.

¹⁸Banja modidi mobotumba bonde na babekoa bo, Ngando yena ewani na ngando ye enεnεnε nda?

¹⁹Basopa dutu a melo mibu; bayea, balebε na babekoa bo, Monɔngɔ! monɔngɔ! ngandoye enεnεnε! Bato basusu baya badaka na masua a madiba-mamukwa badiha likonja linεnε a mojɔ molituna linde. Edikai o mopɔtu na heure emɔɔci pε.

²⁰Sepani oho Diko a mojɔ mongando emina; Ino basεnɔke, na babwεnji-baDiko, na batɔndɔi, sepani koko, Mojɔ bo Njambe alongejai no na amodumbi yo.

²¹Ngɔngɔ jimina, okina obwεnji mopipo atomba litai linεnεnε, alidumba a madiba-mamukwa na abala bo, Babilo, ngando yena enεnεnε, êdumbama nase na bopipo boa, na etaboloa koko.

²²Bato bata'ka koko doi egongo, na bibumba, na poolo na mindule, a tei ewε. Pépé nongo moto yona okɔkɔ ekina elomu odi boboloa koko a tei ewε. Bata'ka koko a tei ewε doi libon'nda ndongo.

²³Eyoi epaka etaya hoja modidi a tei ewε. Bata'ka koko a tei ewε kɔpi emomi na mwali obolongana, Mojɔ bo bato bawε bamasa badaka bakumu bangondo, Na wε osela makota masusu na male mawε.

²⁴Makia mabatɔndɔi na mabasɛnɔke maboloi a tei ende, Na makia mabato basusu bay a bawama a ngondo.

Boboloja 19

¹Yana asia ngando jmina, naka doi linεnε lia lidaka o kɔpi elindundu libato banεnε oho Diko haya babekoa bo, Aleluya! Boheleja, na ekumu, na ngulu, jidi ai Njambe osu;

²Mojɔ bo yo asambejaka na soti na bongbebongbe. Asambejai mwali obɔɔli yona monεnε, yona obeja ngondo na bɔɔli bonde. Njambe akundi likundu limakia mabakɔmeli bande.

³Babekoa koko bo, Aleluya! Modidi mobotumba bonde moweaka diko na bosusu.

⁴Basuku domi-ibae na banεi, na bato babomɔ banεi, basumana a bosakoa Njambe yona odi a ngendε. Babala bo, *Amen*. Aleluya!

⁵Ekina kɔpi emana a ngendε bo, Sakoani Njambe osu, ino bakɔmeli bande basusu, Ino bay a bamosumaka, banεnεna bakεkεlεkε.

⁶Naka koko doi likɔpi elindundu libato banεnε. Edaka o molunjo moepeela enεnε na ebwana na bεi mεnε. Babala bo, Aleluya! Mojɔ bo Kumu Njambe osu yona onɔi, akumaka.

⁷Kinani bosepe na enanga enεnε, na bomokumejae, Mojɔ bo ehole ebolongana boMwana-Bata emei, Na mwali onde obolongana alwai molilo monde,

⁸Mojɔ bo asi kpaci bo alwae bisenja biboteletε bipu bopεε. Bisenja bimina biboteletε bidi oko bikɔmeli bibodongo bibasɛnɔke.

⁹Obwεnji abala koko na mbi bo, Sɔnɔ mojɔ mu; Bojongoa ai bato bay a babeami a libonje libolongana boMwana-Bata. Na abala na mbi bo, Bikenge bimina bidi bikenge biNjambe na soti mεnε.

¹⁰Mbi nasadumba a bibota binde bo namosakoe. Iyo ko abala na mbi bo, yε bokɔ boa! Mbi nadi oko mokɔmeli pε, o adi wε mεnε, na baninga bawε bay a babaneaka tati eYesu. Sakoa oko Njambe. Mojɔ bo tati eYesu edi mwembo moeseko.

Tito na Motɔndɔi Obokosea Bagboka

¹¹Nanε bo Diko didi bwase, na nanε punda mopu. Okina adaka abaki a punda yona odi na kombe ji, Yona oejeimeli, Yona osoti. Iyo asambejaka, na anaka bila oko na bodongo.

¹²Miso mande madaka o mosa mεnε. Adaka na makongo manεnε mabokumu a molo monde. Adaka na kombe yena esɔnɔmɔ; pεpε nongo moto ko ojebaka kombe emina, oko yo mεnε pε.

¹³Aiwaka kasaka eyai yena edaka na matɔnɔ mamakia, na kombe ende edi Ebaeli eNjambe.

¹⁴Mandundu mabasoda baDiko mamosusaka, madaka mabaki a punda bapu, na malwaka bisenja bibobuno bipu bopεε.

¹⁵Abεnε monεnε amanaka a monɔkɔ monde a bokwεlε makota mangondo. Tondo ende ebokumu edi tondo eebende a mojɔ mobu. Iyo adi bonda eboka evino ekεlε egbasoake eNjambe obonɔ.

¹⁶Adaka koko na kombe a kasaka ende na a ebε ende bo, Koi obaroi, na Kumu obakumu.

¹⁷Nanε koko okina obwεnji yona odaka ami a modika-busa. Iyo abea mbulu basusu baya bahombaka diko na kɔpi epipo bo, Doani; titanani a mojɔ molibonje linεnε liNjambe,

¹⁸a boyaka mini Mibakmuu, na mini Mibakapitεni, na mini Mibato banεnεnε, na mini mipunda, na mini mibasoda bapunda, na mini Mibato basusu mεnε, basɔmi na babuli, banεnεnε na bakεkε.

¹⁹Nanε Tito, na bakumu bangondo, na mandundu mabasoda babu, baya bama titana a bona bila, na yona odaka abaki a punda, na lindundu libasoda bande.

²⁰Bapea Tito na motɔndɔi obokosea yona okɔkɔ mindumba, oko yona okosea bato na mindumba mimina, bato baya bama sɔ embete eTito, na baya bama sakoa elimo ende. Ibo basusu babae badumbama yana adaka bo mɔ, a libale limosa mosupulu.

²¹Yona odaka abaki a punda awa basusu batongo na abεnε onde, oko abεnε yona omanaka a monɔkɔ monde. Na mbulu basusu bagola na mini mibu.

Boboloja 20

Satana a Mbɔci

¹Nanε okwa obwεnji akahule oho Diko. Iyo apeaka sabe emombɔndɔ monase na mokina monyɔlɔ monεnε a ebɔ ende.

²Apea Dalakona, oko njɔ yona moyou, yona odi Jabalo na Satana, na amo'sa ta mbɔci bo adae ena bianga koto emɔci.

³Amodumba a mombɔndɔ monase, adipa modipe, na abakea embete a modipe bo atakosea koko makota mangondo, oko a suka ebianga koto emɔci. Ehole emina ekasia adi bocingoama mweka.

Ekumu eBato baMasiya

⁴Nanɛ koko mingbelengɔ, na bayo badaka a mingbelengɔ mimina basɔ kpaci a bosambeja. Nanɛ koko miembo Mibato bayo bama tɛndɔmɔ melo a mojɔ motati ebu ai Yesu, na a mojɔ moEbaeli eNjambe, na miembo Mibato bayo balona bosakoa Tito na elimo ende, na baisɔ embete ende a maso mabu, isa a mɔmɔ mabu. Ibo basɔ koko bomɔ, na bakuma na Yesu bianga koto emɔci.

⁵Bagwake batongo basɔ koko bomɔ, oko a suka ebianga koto emɔci; bongɔ boboso a bogwa oko bu.

⁶Yona odi a libondo libato bayo badi bongɔ a bogwa a bongɔ boboso, adi na bojongoa na boseñɔ. Bogwa bomabae boditi nongo na kpaci ai bo; badi boda nganga baNjambe na nganga baMasiya, na badi bokatana na nde a bokumu bonde bianga koto emɔci.

Satana Acingoama na Agboka na Bosusu

⁷Biang a koto emɔci bikasia, Satana adi bocingoama a blɔkɔ ende.

⁸Adi bomana a bokosea makota mangondo, oko a suka engondo mɛnɛ, oko Gogo na Magogo, bo ababolee a mojɔ mobila. Etango ebu edi o mbume jimbongu.

⁹Badonga a bisika bisusu bingondo na bahika ngando ebasenɔke na ngando eepaeli. Mosa ko modonga oho Diko ai Njambe, na mobatumba kanga basusu mɛnɛ.

¹⁰Satana, mokosei obu, adumbama a libale lomosa na lisupulu, esika edi Tito na motɔndɔi obokosea, na badi bodingoa oho mabulu na mei oko na bosusu mɛnɛ.

Esambi Esuka

¹¹Nanɛ ngendɛ enɛnɛ epu, na yona odaka a ngendɛ. Ngondo na busa bacia boso bonde, na baibo loa koko.

¹²Nanɛ koko bagwake, banɛnɛnɛ na bakɛkelɛkɛ; badaka ba'mi a boso bongendɛ. Mikanda midipoama. Na mokina mokanda motongo modipoama, oko mokanda mobomɔ. Na bagwake basamba a mojɔ mobikɔmɛli bibu bia bisɔnɔmɔ a mikanda.

¹³Madiba-mamukwa mahuleja bagwake bayo badaka ena. Bogwa na Seolo bahuleja koko bagwake bayo badaka ena, na basusu basamba a mojɔ mongando jima bo kɔ.

¹⁴Ngɔ̄ngɔ̄ jimina, Bogwa na Seolo badumbama a libale limosa; bogwa bomabae oko bu, bua bolibale limosa.

¹⁵Isa kombe emoto eiboloa, pε bosɔ̄nɔ̄mɔ̄ a mokanda mobomɔ̄, moto omina adumbama a libale limosa.

Boboloja 21

Diko Diyene na Ngondo Eyene

¹Ngɔ̄ngɔ̄ jimina, nane Diko diyene na ngondo eyene, mojɔ̄ bo Diko diboso dima dimoa, na ngondo eboso pongono, na madiba-mamukwa maditi koko.

²Na nanε ngando yena esεnɔ̄ke, Yelusalema eyene, ekadonge oho Diko ai Njambe, na moselingo momwali-obolongana yona olwa molilo monde a mojɔ̄ momuma'nde.

³Naka koko kɔ̄pi epipo ekamane a ngɛndɛ bo, Anjani; etondo eNjambe edi a tei ebato. Iyo adi boda na bu. Ibo badi boda bato bande, na Njambe yo mɛnɛ adi boda na bu.

⁴Iyo adi bohakoa mbisoli jesusu a miso mabu. Bogwa botada koko na ikina. Batayea koko kɔ̄ndɔ̄ na ikina, pεpε koko bio isa mwano, mojɔ̄ bo ngando jiboso jisia oko bosia.

⁵Iyona odaka a ngɛndɛ abala bo, Anjani; mbi nakɔ̄kɔ̄ leka losusu loyene. Abala koko bo, Sɔ̄nɔ̄ mojɔ̄ mu, cina bo bikenge bimina bidi soti, bitakputoa nongo.

⁶Na abala na mbi bo, Mojɔ̄ mosii! Mbi nadi Alepa na Omega, libangake na suka. Isa moto adi na ekangola emadiba, mbi nadi bomonusa madiba mamolo momadiba mabomɔ̄; nadi bomopa oko bopa, pεpε bongejε.

⁷Moto akagbokeja, adi bosangoa likwa. Mbi nadi boda Njambe onde, na yo adi boda mwana'mbi.

⁸A mojɔ̄ mobimeli ko, na baya bapeliti ejimeli, na bato babosambolu, na bawoi, na bato babɔ̄oli, na bato bademba, na basakoi babilimo, na bakosei basusu,— libondo libu lidi oko a libale limosa na supulu; bogwa bomina bodi bogwa bomabae.

Yelusalema Eyene

⁹Okina obabwɛnji sambo bay a badaka na kɔ̄pɔ̄ sambo jia jiluma na madingoa masuka Sambo, adoa na abala na mbi bo, Doa nanejae wε Mwali-obolongana, yona odi mwali oMwana-Bata.

¹⁰Iyo atomba mbi a mwembo a diko dimono monɛnɛ, na anejani Yelusalema, ngando esεnɔ̄ke, ekadonge oho Diko ai Njambe na ekatite nase.

¹¹Edaka na ekumu eNjambe. Langilangi engando edaka o litai liyumu, oko litai liyasepi, na bosangesange o talatala.

¹²Edaka na mongba, mongba monenene moyai, mua modaka na midipe domi-na-Mibae. Babwənji-baDiko domi-na-babae badaka a midipe, na kombe jimakota domi-na-babae mabana baYisalaele jisɔnɔmɔ a midipe.

¹³Midipe minei midaka a dɔngɔ diɛsɛta, midipe minei a dɔngɔ dinɔdɔ, midipe minei a dɔngɔ disudo, na midipe minei a dɔngɔ diwɛsɛta.

¹⁴Mongba mongando modaka na eyoeli-ecina, mboba domi-na-jibae, na kombe jibabwənji domi-na-babae ba-Mwana-Bata jidaka a mboba Jimina.

¹⁵Obwənji yona obalaka na mbi adaka na mongendu-momwəngi a bongɛ ngando, na midipe, na mongba.

¹⁶Ngando edaka mɔngɔ masusu manei oko aməci, boyai na sasa oko aməci. Ange ngando na mongendu, na ange kilometra koto jibae na mikama minei, boyai na sasa na diko oko aməci.

¹⁷Ange mwəngi momongba pongono, mako mokama momɔci na macinda mabae na mako manei na bongɛ bomoto na bongɛ boobwənji pongono.

¹⁸Mongba moyoama na yasepi. Ngando mənə eyoama na wɔlɔ esoti, na edaka na bosangesange botalatala.

¹⁹Eyoeli-ecina engando edaka na matai mayumu tungu jisu. Mboba eboso eyoama na yasepi; yena ejibae sapili;

²⁰yena ejisato kalekedona; yena ejinei emelaudi; yena ejitano saladonike; yena ejisamano saludi; yena esambo kulusoliti; yena ebomwambe beluli; yena elibwa topasi; yena edomi kulusopalo; yena edomi-na-emɔci yakinto; yena edomi-na-jibae ametusiti.

²¹Midipe domi-na-Mibae midaka mayaka mayumu domi-na-mabae, tu modipe liyaka liyumu limɔci. Licilinga lingando lidaka licilinga liwɔlɔ esoti, na lidaka na bosa-ngesange botalatala.

²²Nainε nongo tempelo a ngando, mojɔ bo tempelo engando edi oko Kumu Njambe yona onɔi, na Mwana-Bata.

²³Ngando ebwanaka, pεrε nongo modika-busa isa songe a boboja ngando, mojɔ bo ekumu eNjambe edi bobu bongando, na paka engando edi Mwana-Bata.

²⁴Bato bamakota masusu badi bodala a bohu bomina; bakumu bangondo badi bodoa na ngbemeani na ekumu ebu a ngando emina.

²⁵Midipe mingando mitadipama nongo a ehole emose na bosusu, mojɔ bo bulu botada nongo oho.

26Badi bokwea ena na ekumu na lisuma limakota mangondo.

27Pepe nongo eka epita ko edi bokwea ena, pepe nongo moto yona okoko ngando jibosambolu isa bokosea. Badi bokwea ena oko bayo basonoma kombe a mokanda mobomo moMwana-Bata.

Boboloja 22

1Anejani koko dua emadiba mabomo ekamane a ngende eNjambe na eMwana-Bata; madaka na bosangesange bota-latala, na makeleke a ndanda elicilinga lingando.

2Mole mobomo modaka a mongo masusu mabae madua, mua mobotaka mbuma, tungu domi-na-jibae, tu songe ekina tungu. Na kasa jimole jidaka a mojo mosengo emakota mangondo.

3Ndakeja etaya da. Ngende eNjambe na eMwana-Bata edabi ena, na bakomeli bande bamokomebi.

4Ibo banebi boso bonde, na kombe ende edabi a maso mabu.

5Na bulu botaya dabí; paka editi koko na elomu oho, isa modika-busa, mojo bo Kumu Njambe abapabi bohu, na bakumabi oko na bosusu.

Bileho Bisuka

6Abala na mbi bo, Bikenge bimina bidi soti, bitakputoa nongo. Na Kumu Njambe omiembo na obatondji, alomi obwenji onde bo anejae bakomeli bande ngando jia jidi bodoa ngongo mweka.

7Hokea; mbi nadoa bokpa. Bojongoa ai moto yona osumaka bikenge bieseko emokanda mu.

8Mbi Yoane naka, na nané ngando Jimina. Yana aka mbi, na yana ané mbi ngando Jimina, nasadumba nase a bibota biobwenji yona ojinejani bo namosakoe.

9Iyo ko abala na mbi bo, ye boké boa! Mbi nadi oko mokomeli pe, o adi we mené, na batondji baninga bawé, na bato basusu bayo basumaka bikenge bimokanda mu. Sakoa oko Njambe.

10Abala na mbi koko bo, T'obombe oko bikenge bieseko emo-kanda mu, mojo bo ehole eba'i mea.

11Yona odi mobe, ye akéoko bobe; yona odi na mbindo, ye adae oko na mbindo; yona odi na bodongo, ye akéoko ngando jibodongo; yona odi mosenoke, ye adae oko mosenoke.

¹²Hokea; mbi nadi bodoa bokpa. Nadi bodoa na ndese embi, bo napε moto na moto ndese yena ebwani na bikɔmɛli binde.

¹³Mbi nadi Alepa na Omega, yona oboso na yona osuka, libangake na suka.

¹⁴Bojongoa ai bato baya basosaka bisenja bibu, bo badae na njea ebodoa a mole mobomɔ, na njea ebokwea a midipe mingando.

¹⁵Sokolu ko, oko mbwa, na bato bademba, na bato babɔɔli, na bawoi, na basakoi babilimo, na basusu baya bapalaka na bakɔkɔ bokosea.

¹⁶Mbi Yesu nalomi obwɛnji ombi bo ajebejae no ngando jiji a mojɔ moMenga. Mbi nadi monjeli oDawidi na ombota ende; nadi monjɔtɔ yona odi na eyoeli enɛnɛ a elɔngɔ.

¹⁷Mwembo, na Mwali obolongana babalaka bo, Doa. Isa moto a'kaka, ye abale bo, Doa. Yona odi na ekangola, ye adoe; ye moto na moto yona opalaka, aloke madiba mabomɔ oko boloka, pεpε nongo bosomba.

¹⁸Mbi nalehaka bato basusu baya ba'kaka bikenge bieseko emokanda mu. Moto akaputana bikenge bitongo a bikenge bimina, Njambe adi bobakea ai yo madingoa maya massɔnɔmi a mokanda mu.

¹⁹Na moto akakatoa bikenge bimokanda moeseko ye, Njambe adi bokatoa libondo linde a mole mobomɔ, na a ngando esɛnɔkε, o adi misɔnɔ mimokanda mu.

²⁰Yona odi motati ongando jimina abalaka bo, Soti, mbi nadoaka bokpa. *Amen.* Kumu Yesu, doa.

²¹Ye monganji moKumu Yeslu modae na basɛnɔkε basusu. *Amen.*

Esclarecimento

Trata-se de iniciativa particular, com os seguintes objetivos: (i) colaborar para divulgação dos diversos textos bíblicos disponíveis, e, (ii) facilitar o acesso a esses textos, inclusive por meio de download.

Todo esforço em tornar a Palavra de Deus acessível a todos, em quaisquer localidades e falantes das mais diversas línguas, precisa ser um objetivo de todos os que são guiados pelo Espírito Santo. Ele inspirou o profeta Jeremias a dizer “não ensinará jamais cada um ao seu próximo, nem cada um ao seu irmão, dizendo: Conhece ao SENHOR, porque todos me conhecerão, desde o menor até ao maior deles, diz o SENHOR” (Jer. 31:34).

Jesus, também, falou assim: “e será pregado este evangelho do reino por todo o mundo, para testemunho a todas as nações” (Mat. 24:14).

Muitas organizações foram constituídas com o propósito de fazer a Bíblia disponível nas diversas línguas. Não é uma tarefa simples. Anos de trabalho, dedicação e entrega são necessários para esta tão extraordinária missão.

O texto deste trabalho está disponível na internet, em páginas eletrônicas de organizações que produzem ou divulgam bíblias, sem acréscimos de notas ou comentários. Assim, reconhecendo e respeitando os direitos que possuem sobre seus trabalhos, incumbe a todos os que amam a Palavra de Deus, o esforço em contribuir para amplificar sua divulgação.

Se possível, faça download do texto, para que sejamos, também, guardiões da Bíblia, e, com isso, preservando-a para as futuras gerações.

Divulga a Palavra de Deus, ela mostra o Caminho e permite a todos, que se conheça Sua vontade, em todos os lugares e épocas.

Marcel da Glória Pereira
2021, Vitória/ES - Brasil